

**ГИЁСИДДИН БИН ҲУМОМИДДИН ХОНДАМИР**

## **БУЮКЛИК ХИСЛАТИ**

*«Ҳабиб ус-сийар  
фи ахбори афроди башар» –  
«Башар аҳли сийратидан  
хабар берувчи дўст» китобининг  
Захириддин Мухаммад Бобур  
ҳаёти ҳақидаги боблари*

**«SHARQ» НАШРИЁТ-МАТБАА  
АКЦИЯДОРЛИК КОМПАНИЯСИ  
БОШ ТАҲРИРИЯТИ  
ТОШКЕНТ – 2011**

УДК: 821.512.133(092)

ББК 63.3(5Ў)4

X – 75

**Форс тилидан таржима, кярвнш сўзи ва изоҳлар муаллифи:**

**Исмоил БЕКЖОНОВ**

**Масъул муҳаррир:**

**Дилором Юсупова, тарих фанлари доктори, профессор**

**Тақризчилар:**

**Ғулом Каримий, ЎзФА Абу Райҳон Беруний номидаги  
Шарқшунослик институти қатга илмий ходими.**

**Нурғадди Тошев, ЎзФА Абу Райҳон Беруний номидаги  
Шарқшунослик институти қатга илмий ходими, тарих фанлари  
номзоди.**

Заҳириддин Муҳаммад Бобур подшоҳ ҳаёти ва фаолияти ҳақида ишончли маълумотлар берувчи қимматли ёзма манбалардан бири Ғиёсиддин Хондамирнинг форс тилида битилган «Ҳабиб ус-сийар фи ахбори афроди башар» номли тарихга оид йирик асари бўлиб, унинг кўлингиздаги ўзбекчага таржима қилинган бобларида Бобурнинг ота-бобоси, яқин қариндошлари ва ўша даврда рўй бериб, Бобур ҳаёти ва саркардалиқ фаолияти билан боғлиқ ҳолда кечган айрим воқеалар тилга олинади. Бу маълумотларнинг қиймати шундаки, муаллиф мазкур воқеалар иштирокчиларидан Ҳусайн Бойқаро, Шайбонийхон, Шох Исмоил сафавий ва уларнинг авлоди, вазиру саркардалари, шунингдек, Бобур Мирзо хизматида туриб, асосан ўзи қурган воқеаларни баён этган.

**ISBN 978-9943-00-752-9**

© «Sharq» нашриёт-матбаа акциядорлик  
компанияси Бош таҳририяти. 2011.

## КИРИШ

Машхур тарихнавис Ғиёсиддин Хондамирнинг ўқувчи учун «дўст» деб атаган ушбу китоби ҳақиқатдан ҳам ўтмишдаги буюк шахсларнинг, жумладан, Заҳриддин Муҳаммад Бобурнинг гўзал сийрат – яхши хулқ-атвори-ю. мактовли хислатлари, эзгулик йўлидаги ижтимоий-сиёсий фаолияти кирралари ҳақида бебаҳо маълумотлар берувчи асардир. Бу маълумотларнинг айримлари ўз тарихий қийматига эга бўлиб, уларда «Бобурнома» ёки бошқа манбалар орқали бизгача етиб келмаган, шунингдек, муаллифнинг шахсан ўзи кўриб, бевосита иштирок этган воқеалар тафсилоти акс этган.

Ғиёсиддин Муҳаммад (Хондамир) бин хожа Хумомиддин бин хожа Жалолиддин Муҳаммад бин хожа Бурҳониддин Муҳаммад Шерозий ҳаёти ва ижоди ҳақида ўзбек ва чет эл ғарбу шарқ олимлари томонидан арзирли тадқиқотлар амалга ошган<sup>1</sup>.

<sup>1</sup> Ўзбек олимларидан Бўриной Ахмедов ва Дилором Юсупова каби тадқиқотчиларнинг бу борадаги илмий изланишлари айниқса диққатга сазовор бўлиб, уларда Хондамир таржимаи ҳоли, унинг бизгача етиб келган илмий мероси ҳақида тўлақонли фикрлар айтилган. Б. Ахмедовнинг «Хондамир» (Тошкент, 1965) китоби ва «Ҳабибус-сийар» (Историко-географическая литература Средней Азии XVI-XVIII вв., ФАН, 1985, С.: 33-37.), «Хондамир ва унинг илмий мероси» (Тарихдан сабоқлар, Ўқитувчи, 1994.) номли тадқиқотларида Хондамир ва унинг асарлари ҳақида батафсил маълумотлар берилиб, жумладан, «Ҳабибус-сийар»нинг XVI аср Биринчи чорагидаги теурийлар даврини қамраган боблари таҳлили мажсус равишда амалга ошган. Д. Юсупова эса Хондамир ҳаёти ва ижодига бағишланган докторлик монографиясини яра-

Хондамир хижрий 880 (1476) йили Ҳиротда туғилган. Хондамирнинг отаси хожа Ҳумомиддин те-  
мурий Султон Маҳмуд Мирзо бин Султон Абу Саид  
хизматида вазирлик мансабида турган. Машҳур тарих-  
чи Мирхонд (1433 – 1498) эса Хондамирнинг она то-  
мондан бобоси бўлган. Хондамир Алишер Навоий ва-  
фоти (1501 йил 3 январь)гача Навоий бошқарган мада-  
ний марказ кутубхонаси мудирини бўлиб ишлайди. Сўнг  
Балхда Бадиуззамон Мирзо хизматида туради. Шайбо-  
нийхон 1507 йил май ойида Ҳиротни эгаллаганда Хон-  
дамир Ҳиротда эди ва шаҳар аҳлининг хонга ёзилган  
омонлик хатини иншо қилади. Сўнг Пашт кишлогига  
келиб яшаётган Хондамир 1515 йили Муҳаммад За-  
мон Мирзо бин Бадиуззамон Мирзо хизматига кира-  
ди. У ўша пайтлари ва 1524 йилларгача Бобур Мирзо  
билан гоҳ Балх яқинидаги юришлар даврида, гоҳида  
Ҳиротдаги сафавий ҳукмдорлар номидан Кобулга элчи  
сифатида бориб учрашади. «Бобурнома» оркали маъ-  
лумки, Хондамир 1528 йил сентябрида Ҳиндистондаги  
Бобур ҳузурига бутунлай хизмат учун бориб, Бобур ва-  
фоти (1530)дан сўнг Ҳумоюн подшоҳ хизматида турар-  
кан, вафотигача (хижрий 941 (1535) йилгача Дехлида  
яшайди. Хондамир Дехлидаги Низомиддин Авлиё  
мақбараси ичида машҳур шоир Ҳусрав Дехлавий қабри  
ёнига дафн қилинган.

Хондамирдан бизга улкан илмий мерос ёдгор  
қолган бўлиб, булар Ўрта Осиё, Шарқий Туркистон,  
Эрон, Афғонистон, Ҳиндистон ва Туркия мамлакатла-

---

тиб, унда Хондамирнинг барча тарихий асарлари қўлёзма нусхаларидан  
тортиб уларнинг ўрганилиш тарихи ва маълумотлари мазмуни, ахамияти  
қабри масалаларни кенг, изчил ёритиб берди.



ри халкларнинг ўрта асрлардаги ижтимоий-сиёсий ва маданий ҳаёти борасида ҳикоя қилувчи ўнтага яқин йирик асарлардир. Шулардан «Хулосат ул-ахбор фи аҳвол ил-аҳёр (Хайрли кишилар аҳволи хабарларининг хулосаси)» 1499 йилда Алишер Навоий топшириғи билан ёзилган бўлиб, «Дастур ал-вузаро (Вазирлар учун қулланма)» асари ҳам Навоийнинг моддий ҳомийлигида 1500 йили яратилган. Муаллифнинг «Маосир ил-мулук (Подшоҳлар замондошлари)» асари ҳам ўша йили битилган. Аммо унинг нусхалари ҳозирча топилмаган. «Макорим ул-ахлоқ (Олийжаноб сифатлар)» китоби Алишер Навоийнинг юксак фазилатлари ва олийжаноб ахлоқ-атвори, буюк мутафаккир яратган адабий асарлар, амалга оширган хайрли ишлар, халқ учун қурдирган меъморий иншоотлар ҳақида ҳикоя қилади ва бу асар улуғ шоир вафот этган 1501 йилда битилган. Мирхонднинг машҳур «Равзат ус-сафо фи сийрат ул-анбиё ва-л-мулук ва-л-хулафо» асарининг еттинчи жилди ҳам 1522 йили Хондамир томонидан ниҳоясига етказилгандир. Шунингдек, Хондамир «Номан номий (Доврукли номалар)», «Ҳумоюннома» каби асарлар муаллифи ҳам бўлиб, олимлар айтишича, унинг яна бешта асари халигача топилмаган эсада, номлари илм аҳлига маълум ҳисобланади: «Осор ул-мулук ва-л-анбиё», «Ахбор ул-аҳёр», «Мунтахаби тарихи Вассоф», «Жавоҳир ул-ахбор» ва «Ғаройиб ул-асрор».

Хондамир томонидан 1523 йилда форс тилида ёзиб тугалланган «Ҳабиб ус-сийар фи ахбори афроди башар (Башар аҳли сийратидан хабар берувчи дўст)» китоби тарихнависнинг энг йирик ва қимматли асари бўлиб,



унинг биринчи ва 1530 йиллари амалга ошган иккинчи таҳрирдан нусхалар бизгача етиб келган ва Техрон (1854, 1954, 1984), Бомбай (1858)да қайта-қайта нашр қилинган. Асарнинг турли давр ва ҳар хил савияда қучирилган қўлёзма нусхалари Ҳиндистон, Эрон, Россия, Англия, Германия, Озарбайжон, Тожикистон, Ўзбекистон илмқй марказлари ва шарқ қўлёзмалари кутубхоналарида сақланади.

Маълумки, Ҳиротда ёзиб тугалланган «Ҳабиб ус-сийар»га сафавийлар хизматидаги вазир Ҳабибуллоҳ Соважий хомийлик қилган бўлиб, муаллиф унга хурмат белгиси сифатида асар номида унинг исмига ҳам ишора қилган. Китоб ўша давр тарихнавислик анъанасига биноан Одам *алайҳиссалом* ярағилиш даври нақлидан бошланиб, Хуросон, Эрон, Туркия, Ўрта Осиёда кечган воқеалар ривожининг 1523 йилгача даврини ўз ичига олади ва у муқаддима, уч боб ва хотимадан иборат. Ҳар боб эса тўрт жузв (қисм)дан ташкил топган. Айтиб ўтиш лозимки, «Ҳабиб ус-сийар»нинг муқаддимасида ўша давр муаллифи дунёкарашидан келиб чиқиб, бутун олам яратилиши ҳақида сўз юритилган бўлса, унинг хотимасида жаҳон ажойиботлари, жуғрофий кенгликлар борасида қикоя қилинади.

Биринчи боб исломгача бўлган тарих ҳамда араб ва араб бўлмаган ўлкаларнинг ислом халифалиги давригача воқеаларни камраган бўлса, иккинчи бобда уммавия ва аббосия ҳамда хуросондаги халифалик ноийблари саналган тоҳирийлар, саффорийлар, сомонийлар сулоласи тарихи ҳақида хикоя қилади. Учинчи боб Чингизхон ва унинг авлодлари ҳамда уларга замондош қорахитойлар, хоразмшоҳлар, сарбадорлар ва темурий-



ларга бағишланган. Бу бобнинг учинчи ва тўртинчи жузв (кисм)ларидаги қимматли маълумотлар сирасига теурийлар, шайбонийлар, сафавийлар ва туркиялик усмонийлар даври тарихига онд маълумотлар кириб, жумладан, уларнинг Бобур подшоҳга бағишланган махсус бўлим ва зикр этилган бошқа ўринларда ҳам Бобур подшоҳнинг сиёсий-ижтимоий фаолияти борасида сўз юритилади. Тарихнавис Хондамирнинг бу маълумотлари шунчаки ахборот бўлмай, ўша пайтда элчи сифатида ва бошқа турли сабаблар билан тез-тез Бобур Мирзо билан учрашиб турган муаллиф бу теурийзода хислатларидаги «юрт олувчилик ва жаҳонбонлик» кирраларининг ҳам жонли тасвирини гавдалантириб, бу чизгиларга фактик материалларни илова қилиш оркали реаллик бағишлайди. Масалан, «Ҳабиб уссийар»да ёзилишича, кўчманчи ўзбеклар юриши сабабли давлати хавф остида қолган Ҳусайн Бойқаро шайбонийлар билан бир неча бор шиддатли жангларда тўкнаш келган Бобур Мирзога умид боғлаб, унга махсус мактуб жўнатади ва бу ёш теурийзодага қаттик ишонч билдириб, теурийлар салтанатини саклаб қолишда ёрдам сўрайди. Ёки Ҳусайн Бойқаро давлати инқирозидан кейин энди Амир Теуур асос солган қудратли салтанатнинг бошқа бир теурийзода кўлига ўтиб, шу туфайли бу сулола саклаб қолинишини доно ақли билан пайқаган Бобур Мирзонинг 1514 йили Табриздан, Шоҳ Исмоил олдидан қочиб келиб, қайтадан Хуросонни қўлга киритишга бел боғлаган Муҳаммад Замон бин Бадиуззамон Мирзо режаларининг аллақачон пуч халғга айлангани, эндиликда Ҳусайн Бойқаро авлодлари даври ўтиб, бу каби шарафли вазифани Бо-



бур аллақачон ўз зиммасига олгани Хондамир қалами орқали очик баён этилган. Хондамирнинг Бобур Мирзога нисбатан бундай ишорасини ҳатто ёшгина Бобурнинг Шайбонийхонга қарши илк курашлари давридаги ҳикоялари асносида ҳам укиш мумкин бўлади. Албатта Бобур ўз «Бобурнома»сида бу янглиғ фикрларини ошкор айтишни такаббурлик ўрнида билиб, шу жиҳатдан Муҳаммад Замон Мирзо кабиларга муносабатини оддий бир яхшилик сифатида талкин этган бўлса, Хондамир баёни мазкур «яхшилик»нинг ўша 1514 – 1517 йиллари келажакдаги мақсадлари улкан Бобур томонидан амалга ошганига аниқлик киритувчи шарҳ вазифасини ўтамоқда.

Хондамирнинг, келажакдаги буюк подшоҳ, аммо, китоб ёзилаётган 1522 йиллардаги фақат Кобул ва Бадахшону Балх эгаси бўлмиш Бобурнинг Шох Исмоил каби қудратли ҳукмдор билан Қандаҳорга эгалик қилиш масаласида ҳеч тап тортмай жаҳонгирларча муомалада бўлиши борасидаги ҳикоялари ҳам Бобур подшоҳ шахсиятидаги буюклик хусусиятини ифода этувчи маълумотлардир.

Тарихнавис айрим ўринларда Бобур Мирзонинг жанговарлик ва боғирлик хислатларини Амир Темур ишларига қиёслаб, Бобурни мазкур таърифлар орқали ҳам улуғлайди.

Хондамирнинг «Ҳабиб ус-сийар»да ҳавола қилган яна қатор маълумотлари ҳам бобуршунослик учун жуда қимматли ҳисобланади.

Эслатиб ўтиш жоизки, Хондамир «Ҳабиб ус-сийар»да Заҳириддин Муҳаммад Бобур ҳақида махсус сўз юритиш мақсадида аввал темурий ҳукмдор Султон



Абу Саид хонадони вакиллари, жумладан, Захириддин Муҳаммад Бобурнинг отаси Умаршайх Мирзо ҳақида алоҳида тўхталиб, кейинчалик, тахт тепасига чиққан Бобур Мирзонинг давлатчилик фаолиятига оид муфассал бўлимларни ҳавола қилади. Биламизки, бу маълумотлар жаҳон олимлари томонидан у ёки бу йўналишда тадқиқ ва таҳлил қилинган эса-да, «Ҳабиб ус-сийар» асари бошқа тиллар, жумладан, ўзбек тилига таржима қилинмаган. Шу жиҳатдан халқаро Бобур фонди бу муҳим тарихий манбани ўзбек тилига таржима қилиш ташаббуси билан чиқиб, асарнинг Ўрта Осиё халқлари тарихини ёритувчи учинчи бобининг учинчи ва тўртинчи жузв (қисм)ларини ўзбек тилида нашрга тайёрламоқда. «Ҳабиб ус-сийар»нинг мазкур бобидати Захириддин Муҳаммад Бобурга бағишланган бўлимларининг ўзбекчага таржимаси эса ушбу нашр орқали ўқувчиларни юқорида эслатилган ноёб маълумотлар билан тезроқ таништириш ва уларни махсус йўналишда илмий муомалага киритишга имкон яратиш ниятида кенг омма эътиборига ҳавола этилмоқда.

Ушбу форсчадан таржима «Ҳабиб ус-сийар»нинг 1984 йил Техрон нашри бўйича бажарилиб, изоҳларнинг барчаси таржимон томонидан амалга ошди. Ўрни-ўрни билан Техрон нашрида хато берилган киши исмлари, жой номлари Захириддин Муҳаммад Бобурнинг «Бобурнома» ва Муҳаммадёр ибн Араб Қатаған қаламига мансуб «Мусаххар ал-билод»<sup>2</sup> асарларига киёслашиб тўғриланди. Бу сайланма нашрдаги таржи-

---

<sup>2</sup> Муҳаммадёр ибн Араб Қатаған. Мусаххар ал-билод. Форс тилидан таржима, кириш сўз ва изоҳлар муаллифлари Исмоил Бекжонов ва Дилором Сангилова. -Тошкент: Янги аср авлоди, 2009.



ма матни учун ўта зарур бўлмагани сабабли Техрон нашридаги саҳифалар изчил кўрсатилмай, улар фақат боблар боши ва охиридагина ушбу шаклдаги [...] қавс ичида қайд этилди. Яна шуни ҳам таъкидлаш жоизки, келажакда китоб тўла нашр этилишини кўзда тутиб, бу нашрда зарур изоҳларга кўп ўрин ажратилмади ҳамда Хондамир ва унинг ижоди, айниқса. «Ҳабиб ус-сийар» асари борасида маълумот берувчи кириш сўзи ҳам мухтасар сатрларда баён этилди. Бу ва илмий-ижодий жараёндаги бошқа камчиликлар учун китобхонлардан узр сўраймиз.

Ушбу ишнинг юзага чиқишида ўзининг қимматли тавсия ва маслаҳатларини аямаган филология фанлари доктори, профессор Саидбек Ҳасанов, тарих фанлари доктори, профессор Дилором Юсупова, олим ва таржимон Гулом Каримий ва нашр жараёнида ёрдам кўрсатган барча хайрихоҳларга чексиз миннатдорлик билдираман.

Ишонамизки, «Ҳабиб ус-сийар»нинг мазкур боблари таржимаси ҳам Бобур подшоҳ ҳаёти ва фаолияти ҳақидаги тасаввуримизни янада бойитишга хизмат қилади.

**Исмоил БЕКЖОНОВ,**  
**филология фанлари номзоди.**

**«ХАБИБ УС-СИЙАР ФИ АХБОРИ АФРОДИ  
БАШАР»ДАН:**

**МАҚТОВ ХИСЛАТЛИ СУЛТОН АБУ САИДНИНГ  
ШОН-ШАВКАТЛИ ЎҒИЛЛАРИ АҲВОЛИНИНГ  
ҚИСҚАЧА ЗИКРИ**

[94-б.] Қазову қадар девони Султон Абу Саиднинг ҳаёт дафтарига ғаразли тугалланиш рақамини битган вақтда ул жанобнинг ўн бир нафар бахт юлдузли ўғли бор эди ва улар номлари тартиби куйидагичадир: Мирзо Султон Аҳмад, Мирзо Султон Маҳмуд, Мирзо Султон Муҳаммад Мирзо, Шохрух Мирзо, Улуғбек Мирзо, Умаршайх Мирзо, Або Бақр Мирзо, Султон Мурод Мирзо, Султон Халил Мирзо, Султон Валад Мирзо, Султон Умар. Бу ўн тўрт шохзодадан эса тўрт нафари салтанат ва фармон беришлик мартабасига етишдилар. Ва уларнинг исмлари ушбудир: Мирзо Султон Аҳмад, Мирзо Маҳмуд, Мирзо Умаршайх, Мирзо Улуғбек. Бу тўрт нафар мактов хислатли хусравлар ва Султон Саиднинг бошқа ўғиллари воқеалари тафсилоти ушбу сатрлар муаллифига унчалик маълум бўлмагани сабабли икки

---

<sup>3</sup> Султон Абу Саид Мирзо Динёрбақр ҳокими Амир Ҳасанбек бин Амир Али бин Амир Қаро Усмонга қарши амалга оширган Қорабоғ мавзесидаги урушда душманга асир тушиб, икки-уч кундан сўнг, яъни 873 йил 22 ражаби (1469 йил 6 феввали) ўша ерда ўлдирилган.



тилли қалам уларнинг мухтасар аҳволини ёзмок билан чекланиб, қай бири салтанатга эришган бўлса, фақат ўшанисининг зикрига киришади.

**Муиз ус-салтана вал-хилофа<sup>4</sup> Мирзо Султон Аҳмад Султон Абу Саиднинг азиз ўғилларидан тўнғичи бўлиб, 855 йили<sup>5</sup> доруссалтана Самарқандда Буго Тархоннинг ёркин шариятга кўра ул саодат аломатли подшоҳ Султон Абу Саид никоҳига кирган қизидан дунёга келганди. Султон Абу Саид Хуросон фатҳидан сўнг хазрат соҳибкирон дорулмулки Самарқандга қарашли вилоят ва туманларни ўшал кўзининг нурига топшириб, Жони Бек ва Султон Бек Қошғарийнинг укаси Дўлдойни мазкур шоҳзоданинг отабеклик мансабига тайинлаб, қудрати байроғини Самарқанд ва Бухоро узра кўтарди. Ул соҳибни далил хусрав Султон Абу Саиднинг бутун умри давомида Мовароуннаҳрда сарафрозлик тахтида макон тутди. Райят ва кўшин аҳли билан тўла адолат ва эзгуликда муносабат қиларди. Қорабоғ воқеасидан кейин эса Хуросон вилоятларини эгаллаш учун Омўя дарёсидан ўтиб, Андхуд чегарасига етишгач, мансур хокон Султон Ҳусайн Мирзонинг истилоси хабарини эшитди ва шунга кўра қайтиш тизгинини Самарқанд сари бурди. Шундан кейин «ал-ауд аҳмад (қайтиш мактовлидир)» сўзи мактов хислатли бу подшоҳ холи васфи учун инди. Мирзо Аҳмад ўзининг подшоҳлиги айёмида тўрт навбат мухалиф аҳли билан уруш қилди. Биринчиси, Неъмат исмли Шайх Жамол арғуннинг укаси билан Зомин**

<sup>4</sup> Муиз ус-салтана вал-хилофа – салтанат ва давлатга шараф бағишловчи.

<sup>5</sup> 855 йил – 1451 йил.

навоҳисида тўкнашиб, ул жангда Султон Аҳмад Мирзо ғалаба қилди. Неъмат эса ўзининг неъматга куфрлиги балосига йўликиб, кочиш водийси сари ошиқди. Иккинчи марта ўзининг укаси Умаршайх Мирзо билан Шохрухия ва Ўратепа оралиғидаги Хавос қишлоғида уруш қилди. Ўша куниси ҳам фатҳ ва ғалаба нури ул ҳазрат байроғи туғи сари инди. Учинчиси шуқим, бир гал мўғуллар орасида танилган Султон Маҳмудхон бин Юнусхон Самарқандни олишни мақсад қилиб, Тошканд навоҳисини ўз лашкаргоҳига айлантирди ва мўғул қўшинлари Туркистон атрофи ва Мовароуннаҳр теғрасида қўлни ғорат ва талон-тарож учун чўздилар. Султон Аҳмад Мирзо эса Самарқанд шаҳридан уруш оловини алангалатмоққа жазм қилиб, ғалаба белгили байроқ ва туғларни баланд кўтарган кўйи душман сари юзланди. Айрим чопқунчи мўғулларнинг пўрталларини олиб, Султон Маҳмудхон черики қўнган Чир дарёси кирғоғига етиб келгач, иккала қўшин карама-қаршилиқ курулларини ишга солмасдан ҳар тоифа ўз мамлақати сари қочиб қолишди. Тўртинчиси шуқим, Ҳайдар Кўкалтош қадамини қаршилиқ водийси аро ташлаб, Ботирлик отини ғанимлик майдонида йўрттирди. Султон Аҳмад Мирзо эса довюрак кишилар тўдаси билан бирга уни йўқ қилмоқ ниятини кўнглига тугди ва оти жilовини исёнчининг аскаргоҳи сари буриб, Ёрййлок<sup>7</sup> навоҳисида тарафлар тўкнаши юз берди. Урушда Ҳайдар енгилиб, Мирзо Султон Аҳмад музаффар бўлди ва ғалабага ёр ҳолда ўз мамлақати пойтахти

<sup>6</sup> Пўртал – юк; мол ва буюм.

<sup>7</sup> Бу топоним нашр матнида гоҳ “Ёзййлок”, гоҳида “Ёрййлок” шаклида келган.

сари қайтди. 899 йил<sup>8</sup>да эса Мирзо Умаршайх Кўрагон муносабатларидан ўта безор бўлган Султон Аҳмад Мирзо ва Султон Маҳмудхон бир-бири билан иттифок бўлиб, ул салтанат доираси марказининг иқбол ниҳоли томирини кўпориб ташламоққа қарор қилдилар ва Султон Маҳмудхон Хўжанд дарёсининг шимол томонидан, Султон Аҳмад Мирзо эса ул дарёнинг жануб тарафидан Андижон томонга юзландилар. Шу аснода ҳеч қутилмаган бир воқеа рўй берди ва ажал лочини Умаршайх Мирзонинг руҳ кушини овламоқ ҳавосида парвозга киришиб, ул ҳазрат 899 йил муборак рамазон ойининг туртинчиси да душанба куни Аҳси кабутархонаси тоmidан учиб, ардоқли жонининг лочини юксак жаннат покликларида уя қурди. Султон Аҳмад Мирзо бу хабарни эшитиб, Фарғона мамлакатини эгаллаш бобида яна ҳам қатъийлик ва тиришқоқлик кўрсатиб, Ўратепа, Хўжанд, Марғинонни қўлга киритди ва сўнг Андижоннинг тўрт фарсахлик ерида қўш ташлади. Аммо мазкур вилоят фатҳи унга муяссар бўлмади. Булар Худо хоҳласа ушбу варақларда ёзув ипига тизилажак. Хуллас, Султон Аҳмад Мирзо, отаси вафотидан кейин сарварлик тахтига ўтирган ҳазрат подшоҳ Заҳририддин Муҳаммад Бобур билан сулҳ тузиб, орқага қайтди. Икки-уч манзилни босиб ўтгач эса, шариф саломатлиги ўз меъёрий ҳолати йўлидан қучсизлик ва беҳоллик сари майл кўрсатиб, қаттиқ ёндирувчи иситма ул адолатпарвар подшоҳнинг ҳаракат марказини заифлантирди ва мазкур йилнинг ўрталарида Ўратепа навоҳисида Оқсулот дарёси буйида ҳаётининг шуъла-

<sup>8</sup> 899 йил – бу ерда 1494 йил ёзи қўзда тutilмоқда.

<sup>9</sup> 899 йил 4 рамазон – 1494 йил 8 июнь.

си тақдир ажалининг суви билан ўчирилди. Ул ҳазрат қирк тўрт йил давомида бу уқубатли уйда умр кечирганди. Ва Султон Аҳмад Мирзо эътиқоди поклиги ва тариқат сулукида етуқлиги билан васф этилган бўлиб, яширин намозлар адосида тиришқоклик шартларини бажо келтирганча ҳеч қачон ибодатни тарк этмасди. Ҳамиша «ақд-битимларга вафо қилинг»<sup>10</sup> ояти мазмунини ўзининг олий асарли мақсади қилиб олганди ва ҳеч қачон аҳду паймон масаласига қарама-қарши иш фикрини олий кўнгли сари йўлатмасди. Ва гарчи урушларда ўзи шахсан жанг қуроқларини ишлатмаса-да, аммо ул жаҳонбонлик асослари қурувчисининг ҳаракатлари-ю, ўтириб-туришида ши-жоат ва баҳодирлик ҳамда паҳлавонлик белгиси юзага чиқарди. Ўқ отиш ва ковок чопиш<sup>11</sup> соҳасида замоннинг кўпчилик ўқчиларидан устун эди. Узоққа отган ўқи кўпинча мақсад нишонига етиб, ҳеч хато кетмасди. Ва ул ҳазратнинг таъби қуввати шу даража эдики, агар истаса, бир кеча-кундуз давом этувчи шароб мажлисида гул юзли соқийлар қўлидан тотли бода қадаҳларини бемалол сипқориб ўтираверарди ва базм йиғинида ғоятда инсонийлик кўрсатар, яъни ҳеч қачон ул оқил ҳусрав томонидан ёқимсиз ишлар юзага чиқмасди. Сўзлашув чоғи гапни чўзиш ва сергапникни жоиз кўрмасди. Султон Аҳмад Мирзо ўз умри мобай-

<sup>10</sup> Куръони қарим, Моида (5) сураси 1-оятдан: Эй мўъминлар, ақдлар (ўзаро келишилган битимлар)га вафо қилингиз!

<sup>11</sup> Ковок чопмоқ – (матнда “кабак тохтан”) тепалик ерда ўрнатилган хода учига ковок қўйиб, от чоптирганча келиб, камон ўқи билан шу ковокни уриб тушириш машини ва мусобақаси. Ғолибга соврин сифатида бериладиган тилло танга ёки олтин қўймасини шу ковок ичига ҳам қўйиб ўтказадиган бундай мусобакани “олтин ковок отиш” дейилган.

нида олти нафар аёлни ўз никоҳига киритди. Ва унга Худои субхона ва таоло етти нафар киз ато қилди. Ул тахту тожни безовчининг хотинлари номи куйидаги тарзда ёзиб кўрсатилмоқда: Биринчиси Меҳр Нигорхоним бента Юнусхон; иккинчиси эса насаби Тархон амирларига уланувчи Тархонбегим; учинчиси Тархонбегимнинг кўкалтоши Кабакбегим эди. Тўртинчиси насаби Термиз хонзодаларига боғланувчи Хонзодабегим. Бешинчиси Латифбегим бинта Амир Аҳмад Ҳожи. Олтинчиси Султон Арғуннинг оғо-инисининг кизи бўлмиш Ҳабиба Султонбегим. Айтмоқ лозимки, Султон Аҳмад Мирзонинг ўғил фарзандлари икки нафар бўлиб, аммо уларнинг ҳар иккаласи ҳам кичикликда оламдан ўтишган. Ул олий шаъвли подшоҳнинг кизлари жумласидан тўрт нафари Кабакбегимдан вужуд оламига келган эдилар. Бир нафари эса Ҳабиба Султонбегимдан эди. Кабакбегим кизларидан энг тўнғичи Робиа Султонбегим бўлиб, уни Қарокўзбегим ҳам дер эдилар. Қарокўзбегим Султон Аҳмад Мирзо ҳаётлигида Султон Маҳмудхоннинг никоҳига кирди. Султон Маҳмудхон шахидлик топгач, ул аъфифага шайбоний Жонибек Султон уйланди. Иккинчиси Солиҳа Султонбегим бўлиб, уни Окбегим ҳам дейишар эди. Окбегим отаси вафот этгач, ўз амакасининг ўғли Султон Масъуд Мирзонинг никоҳига кирди. Учунчиси Ойиша Султонбегим бўлиб, бир неча вақт Жамшид мартабали подшоҳ Захириддин Мухаммад Бобур ҳарамида турди. Тўртинчиси Султонбегим бўлиб, Султон Али Мирзо Самарқанд салтанатида чоғи уни ўз никоҳига киритди. Бешинчиси Ҳабиба Султонбегимдан туғилган кизи бўлиб, исми Маъсума



Султонбегим эди. У халифатпанох хазрат Захириддин Мухаммад Бобур подшоҳнинг ҳарами сари йўл топиб, бир неча вақтдан сўнг битта киз туғди. Ушанда онаси вафот этиб, кизга онасининг исми қўйилди.

Султон Маҳмуд Мирзонинг дунёга келиши ҳижрий 857 йили<sup>12</sup> рўй берган. Ул ҳазрат Султон Абу Саиднинг азиз ўғилларидан каттаси ва Султон Аҳмад Мирзонинг ота бир, она бошқа укаси эди. Шижоат ва мардоналик сифати билан васф этилган, донолик ва саховату тан-тилик бобида танилган, яхши хулқ ва чиройли одоб эгаси, адолат ва инсоф пойдеворини мустаҳкамлаш, зулм ва ноҳақлик қондаларини вайрон этишда султонлар устунига бошчилик қиларди. Ўткир қиличи уруш пайти дину<sup>1</sup> давлат душманларининг икбол дарахтини чопар, қон оқизувчи найзаси жанг майдонида мулку миллат аъло байроғининг энг баланди эди. Шунингдек, оламни безовчи ақли хуршид каби машриқдан нур сочувчи-ю, ёғдулик қони, тўғри тадбири қоронғи кечадаги ўн гўрт қонлик ой мисоли ёруғлик манбаси, пок кўнгли маоний ҳақиқатларини англовчи ва ўткир зехни нуктадошлик ҳикматлари тўплами, саҳий кўли фозиллар турмушининг кафолати ва инъомининг кўзи олимлар ҳаётининг шарофати эди.

### Назм:

Гашт мулк аз адолаташ маъмур,  
Зулм шуд аз сиёсаташ мастур.  
Зоти у буд зейби тахту сарир,  
Нури рояш чу меҳр оламгир.

<sup>12</sup> 857 йил – 1453 йил.

Кафи жудаш чу абри гуҳарбор,  
Жавҳари таъби у неку осор.

*Мазмуни:*

Бўлди юрт адолатидан маъмур,  
Зулм сиёсатидан кўркиб яширинди.  
Зоти тахтни безовчи эди,  
Акли нури куёшдек оламини олғувчи.  
Саховатли кўли гавҳар сочувчи булутдек,  
Таъби жавҳари яхши аломатли.

Ва ул олий зотли шохзода отаси Улим домига гирифтор бўлган пайтда ҳазрат парвардигор ҳимояси кафолати остида Хуросон томонга йўналди ва 873 йил муборак рамазон ойининг иккинчиси<sup>13</sup> да пайшанба куни соғ-омон доруслалтана Ҳиротга етиб келиб, кўшин ва халқ ахволига қараш ишлари билан машғул бўлди. Мазкур ойнинг учинчисида жума куни<sup>14</sup> ул фоҳира шаҳарнинг жоме масжидида ҳазрат соҳибқирон Амир Темур Кўрагон ва Мирзо Султон Абу Саид ва Мирзо Султон Аҳмад ва Мирзо Султон Махмуд номига хутба ўқидилар ва шу тарика Султон Абу Саиднинг жонни кўйдирувчи воқеаси хабари маълум бўлиб, хос ва авом кишилари тоифасининг бари йиғи ва нола товушларини зангори фалакка етказдилар.

**Байт:**

Бигардид олам зи ойини хеш,  
Ки омад ажаб мушкили саъб пеш.

<sup>13</sup> 873 йил 2 рамазон – 1469 йил 16 март.

<sup>14</sup> 873 йил 3 рамазон – 1469 йил 17 март кўзда тутилмоқда.

*Мазмуни:*

Олам ўз қондасидан чиқди,

Чун ажаб оғир бир иш рўй берди.

Ойнинг тўртинчисида шанба куни<sup>15</sup> тонги эса Ихтиёриддин қалъасининг қутвол<sup>16</sup>и исён кўтарди ва халқ гуруҳ-гуруҳ Султон Ҳусайн Мирзо<sup>17</sup>га тарафдорлик шисорини илгари суриб, иш тадбир доирасидан ташқари чиқди. Шунга кўра куёш тепада вақти Султон Маҳмуд Мирзо амир Ёр мўғул ва амир Қанбар Али ҳамда бирдамлик йўлининг солиқларидан бир тўдаси билан биргаликда Хеш дарвозасидан ташқари чиқиб, йўналишюзини Самарқанд сари қаратдилар ва ул жаннатга мезгир шаҳарга етишгач, Мирзо Султон Аҳмад лутфу марҳамат эшиқларини укаси юзи томон очди ва бир неча вақт ака-укалар ўртасида келишув йўллари сакланиб, ниҳоят Мирзо Султон Маҳмуд бир куни шикор баҳоласи билан шаҳардан ташқари чиқди ва Аҳмад Муштоқ Саййид Бадр ва Хусравшоҳ ва саройга яқин яна айрим кишилар иғвоси бўйича Ҳисори Шодмон тарафга кетди ва мақсад-манзилга етишгач, ўша пайтда ул шаҳарда ҳоким бўлиб ўтирган Амир Қанбар Али Мирзо Султон Маҳмудни салтанат узра кўтарди ва ул ҳазрат Термиз, Чағониён, Ҳисор, Хатлон, Кундуз, Баклон, Бадахшон вилоятларида то Ҳиндукуш доvonигача салтанат байроғини кўтарди. Ва Мирзо Султон Маҳмуд фар-

<sup>15</sup> 873 йил 4 рамазон – 1469 йил 18 март кўзда тутилмоқда.

<sup>16</sup> *Қутвол* – қалъабегин; қалъа комендантин.

<sup>17</sup> *Султон Ҳусайн Мирзо* – Хондамир ушбу китобда кейинчалик «*хоқони мансур*» деб тилга олувчи Султон Ҳусайн Бойқаро (1470 – 1506) кўзда тутилмоқда.

монфармо<sup>18</sup> лиги замонида бир неча навбат Катвар ва Сиёхпушон тоғи томонга кўшин тортди ва ул диёрнинг кофирларига қарши газовот ва жиход ишларини амалга оширди. Шу сабабли «ғозий» лақабига эришди ва ўз фармонлари тугросини «Султон Маҳмуд Ғозий» деб ёзадиган бўлди. Ул ҳазрат ўз салтанати замонида Султон Ҳусайн Мирзо билан қайта-қайта уруш ва яраш қилиб юрди. Келажак воқеалари баёни асносида икки тилли қалам ул ҳолатлар борасида ҳам тил очажак. Ва саккиз юз тўксон тўққизинчи йил шавволи<sup>19</sup>да Мирзо Султон Аҳмад Самарқандда вафот этгач, Султон Маҳмуд Мирзо амирларнинг улуглари талабига мувофиқ Ҳисордан Самарқанд сари ошиқди ва икболи кавкаби камол даражасига етишиб, ҳазрат соҳибқирон Амир Темурнинг дорулмулкида мақсади ҳосиллик тахтига кадам қўйди. Амирлар ва давлат устунларини ўз тарафига оғдиришга киришиб, айшу ишрат эшикларини очди. Ўзининг куёви ва Султон Абу Саид Мирзонинг акаси Манучехр Мирзонинг ўғли бўлмиш ва мустақил ҳукм юргизиш пайида юрган Мирзо Малик Муҳаммаднинг бошқа бир неча темурий шохзодалар билан бирга туғиб, қатлга етказди. Халқни хамиша ҳокимлар зулмидан ўз ҳимояси сояси остида омон сақлашда кафил бўлиб келаётган валийлик паноҳи ҳазрат Хожа Носириддин Убайдуллоҳнинг қариндош ва яқин кишиларига нисбатан ҳам қўпол муомалада бўла бошлади. Ҳатто унинг зулми аломати касофати назкур ҳазрат хожанинг иззатли ўғилларига ҳам тегмай қолмади.

<sup>18</sup> *Фармо фармо* – ҳам ҳоким, ҳам ҳарбий қўмондон; генерал-губернатор.

<sup>19</sup> 899 йил шаввол ойи - 1494 йил 16 июль – 14 август.

Султон Махмуд Мирзо махрамлар билан ўтиришда жуда ботирлиги ва силлиқ юзли ўғлонлар ҳамда куёш чехрали ёшлар суҳбатида жасорат кўргузгани учун давлатининг устунлари ҳам турли-туман фиску фасод ишлари билан булғанар эдилар. Султон Аҳмад Мирзонинг адолати соясида йигирма беш йилга яқин даврни эркинлик билан ўтказган самарқандликлар бу янглиг қилмишларни кўриб, изтироб чеккан кўйи ўзини эмин-эркин сезувчи бу подшоҳнинг икбол офтоби сўнишини кудратда тенгсиз ҳазрати эгамдан тилай бошладилар ва қарангки, дуо ўқи ижобат нишонига тегиб, 900 йилнинг рабиулохир ойи<sup>20</sup> Махмуд Мирзо охират олами сари кетди. Ул ғалаба туғли подшоҳ қирк уч йил фойлик уйида умр кечирди. Ул ҳазратнинг садрлиги ишини олийжаноб, саховатпеша, улуғлар сарвари мавлоно Асомиддин Довуд Хофий бажариб келди. Мирзо Султон Махмуд давлатининг вазирлиги унинг салтанати айёмида кўп вақт ушбу варақлар қораловчиси<sup>21</sup>нинг отаси хожа Хумомиддин Муҳаммад бин хожа Жалолиддин Муҳаммад бин хожа Бурҳониддин Муҳаммад Шерозийнинг тўғри йўлдан юрувчи ақлига топширилган эди.

Мирзо Султон Махмуднинг беш ўғли ва ўн бир кизи бор эди. Ул мақсади ҳосил подшоҳнинг тўнғич ўғли Султон Масъуд Мирзо эди. Унинг онаси Бузург Термизийнинг кизи Хонзодабегим эди. Иккинчиси Бойсункур Мирзо бўлиб, у Пўштбегимдан туғилганди. Учинчиси

<sup>20</sup> 900 йил рабиулохир ойи – 1494 йил 9 январь – 7 февраль.

<sup>21</sup> Яъни ушбу «Ҳабиб ус-сийар» китоби муаллифи Ғиёсиддин Хондамир кўзда тутилмоқда.

<sup>22</sup> Мўғуллар боскинидан кейин Жужихон бин Чингизхоннинг невараси Ўзбекхон (XIV аср) бошқарган худуднинг катта қисми «ўзбек улуси» деб аталиб, ўша даврда ҳозирги Шаркий Туркистон (Хитой Халқ Республикаси) ўлкасидан то Мовароуннаҳр ва Хоразм худудигача ерлар эса Чигатой улуси дейилгани учун ўзаги битта туркий халқларнинг бу худудлари аҳолиси «ўзбек» ва «чигатой» номи остида танилган. 1498 йилдан дашти кипчоқлик ўзбек улуси хонлари вакили Муҳаммад Шайбонийхон ҳозирги Қозоғистон, Ўрта Осиё ва Хуросон ерларида ўз ҳукмронлигини ўрнатган ва ўзбек улуси халқидан аяча қисми Дашти Кипчоқдан келиб ўроқлашиб, Ўрта Осиёнинг айрим ўлкалари (Бухоро, Хива)да шайбоний, аштархоний, манкит, кўнғирот ва минг каби бир нечта ўзбек хонлари давлати 1920 йил кузигача ҳуқи сургани сабабли бу давлатларга барҳам берган шўролар ҳукумати 1924 йилда ҳозирги Ўзбекистон Республикасини маъкур «ўзбек улуси» халқлари номи билан аташ қарорини қабул қилди. Шундан сўнг мўғуллар боскинидан кейин «чигатой» улуси таркибига кирган худуднинг илгари кўп минг йиллик давлатчилик ва маданият тарихига эга халқлари вакиллари ягона «ўзбек миллати» номини олди. Шу ўринда таъкидлаш лозимки, Шаркий Туркистондаги чингизий насабли турк хонлари авлоди, масалан, Бобурнинг Тошкент, Туркистон шаҳарларини ҳам эгаллаган она томондан бобоси Юнусхон Кошгарий қабилар, «мўғуллар» номи остида тилга олинган. Ҳозирги кунда Афғонистон шимолида ҳам асли дашти кипчоқлик ўзбеклар ва ўзларини ҳалигача (норасмий равишда) мўғул, чигатой, теурий деб атовчи аҳоли ҳаёт кечиради. Ўрта аср тарихчилари асарларида шу сабабли юқоридаги худудлар аҳолиси чигатой, ўзбек, мўғул ҳамда кам сонли уруғ-аймоқлар номи остида эсланган. Демак, «Бобурнома», «Ҳабиб ус-сийар»да «ўзбеклар» дейилганда, бугунги тушунчамиздаги ўзбек халқи эмас, балки ўша даврларда Дашти Кипчоқда яшаётган ёки Ўрта Осиё, Хуросонга кириб келган кам сонли ўзбек улуси вакиллари кўзда тутилган. Яна эслатиш жоизки, чигатой (жумладан теурийлар, бобурийлар) ва мўғул деб аталган улуснинг ҳозирги кунгача Ҳиндистон, Афғонистонда яшаб келаётган вакиллари ўзларини чигатой, мўғул деб аташади ва бу тарихий қонуният тақозосидир. Буяндай ҳол 1924 йилгача Ўрта Осиёда ҳам давом этиб, Мулис, Оғахий, Аваз Аттор Хўқандий ва ўрта осиелик бошқа муаррихлар ҳамда рус ва ғарбий европалик Ҳ. Вамбери сингари олимлар хотираларида ёзилишича, айрим сиёсий арбоблар доимо ўзларининг «чигатой»лигини таъкидлаб туришган. Ёки жадиллар

суб Зухрабеги Оғодир. Тўртинчи Султон Хусайн Мирзо бўлиб, онаси мазкур Амир Бузургнинг набираси Хонзодабегим эди ва бу Султон Хусайн Мирзо отаси хаёт пайти улуг Аллоҳ мағфирати қабтолига етишди. Бешинчиси «Хон Мирзо» номи билан танилган Султон Увайс Мирзо бўлиб, Хон Мирзонинг онаси Султон Нигорхонимдир.

**Умаршайх Мирзо.** Бу саодатманд шоҳзоданинг дунёга келиши доруссалтана Самарқандда 856 йил<sup>23</sup>и рўй берди. Султоннинг калби салтанатнинг бу нурийдасини вужуд оламида кўришдан қувончу шодликларга тўлиб, тўй ва зиёфат эшикларини очди. Ул оқибат мақтовли фарзанд халифалик ва мақсади ҳосиллик бешиги, ғамхўрлик ва меҳрибонлик хужрасида парвариш топиб, балоғат ва етуклик сарҳадига қадам босгач, ўзига Қобул ва Ғазнин шаҳарлари атрофидаги туманлар топирилиши билан ифтихор бошини юқори кўтариб, сарбаландлик топди ва бузруквор отаси билан хайрлашиб, йўл сари юзланди. Дарагаз манзили ғалаба оятли байроғининг марказига айлангач, аъло тахт поясидан олий ўрдуга бир чопар етишиб, ҳамма бажариши шарт бўлган фармон келтирди. Унинг мазмуни қуйидагича эди: «Ушбу фурсатларда олий шаънли фарзандларнинг хагна суннатлари учун тўй ва байрам маросимлари адо

---

ишлатган «чигатой гурунги», «чигатой адабиёти» атамаларини эсланг. Бу каби атамалардан ажабсиниш (айниқса, шўро даврида мазкур холга жиний иш сифатида қаралганки, бунинг сиёсий замини ҳаммага яхши аён) хато бўлиб чет эллардаги умрида бирон марта ўзини «ўзбек» атамаси билан сифатламаган миллатдош жигарларимиз, жумладан, асрлар оша ўзларини қонуний равишда гоҳ чигатой, гоҳ мўтул деб атаб келаётган бо бурий авлодга «туркий» атамасини нисбат бериш тўғри ҳисобланади.

<sup>23</sup> 856 йил – 1452 йил 23 январь – 1453 йил 11 январь.

этилажак. Нурли қалб шунга йўналганким, салтанатнинг ул кўз қорачуғи шодлик ва хурсандчилик айёмида жаннат мартабали суҳбатда бўлса». Ана шу фармонга биноан Умаршайх Мирзо улугвор олий бўсагага қайтди. Хурсандчилик ва кўнгил очишлик кунлари тугагач, исмлар ўхшашлиги муносабатидан келиб чиқиб, Султон Абу Саиднинг аъло ва шариф кўнглидан кечдиким «Ҳазрат соҳибкирон амир Темур Кўрагон Андижон ва унга тобе ерлардан ташкил топган Фарғона мамлакати ҳукумати ўзининг иккинчи ўғли Умаршайхга иноят қилган эдилар. Муносиби шуким, биз ҳам ул вилоят туманларини унинг отдоши Умаршайх Мирзога берсак». Шу сабабли жаҳон бўйсунувчи фармон чиқарилиб, ул кишвар олувчилик кутисининг дури отабеклиги Амир Худойберди Темуртошга тааллуқ топди ва соҳиб давлат шоҳзода тизгинида давлат ва иқбол ҳамроҳ бўлиб, етгита обод ва фаровон қасабадан ташкил топган Фарғона мамлакати сари ошиқиб, илгари замонда номи афтидан «Аҳси сакат» бўлиб, замонлар ўтиши билан эса товушлар сони қисқариб ва талаффузи бузилиши натижасида ҳозирда «Аҳси» шаклига келган Аҳсини ўз мулкининг пойтахти қилди. Мақсади ҳосил мақтовли ҳислати шеvasидан билиниб турганидек адолат ва раиятпарварлик байроғини қилпиратди. Ҳар қасабага бир инсофли доруға тайинлади. Иши тушиб келганларнинг илтимосларини ижобат этишда иноят ва илтифот лавозимларини бажо келтирди.

**Байт:**

Ба раҳмат чораи бечорагон шуд,  
Муроди хотири оворагон шуд.





## *Мазмуни:*

Раҳмати ила бечораларга чора бўлди,  
Оворалар кўнглининг муроди бўлди.

Ва Мирзо Умаршайх Кўрагон жаннатмакон ота-сининг тириклик айёми ниҳоясига етгач, ҳиммати юксажлиги орқасида Андижон вилояти тушумига қаноат қилмасдан, доимо юрт олишлик ўй-фикрида Султон Аҳмад Мирзонинг мамлакатига қўл чўзиб, низо эшикларини очиб юрди. Худди шу каби баъзида Мўғулистон томонга ҳам кўшин тортар ва ул диёр аҳолисининг тинч турмушига халақит бериб, зиён-заҳмат етказарди. Шу жиҳатдан ул ҳазрат билан Юнусхон ўртасида нифоқ чанги кўтариларди ва қаршилик, душманлик алангаси мўғулларнинг ички ўчоғига ўт ташларди. Аммо шунга карамай, бир неча бор Юнусхон ота-белалик сабаби ҳуқуқи мулоҳазасига кўра Мирзо Умаршайх Кўрагонни ўз олдига чақирди ва инсонийлик расмини тутиб, бир нечта жойни ул ҳазратнинг ме-росий ўлкасига кўшиб берди. Аммо Умаршайх Мирзонинг муддаоси бундан ҳам орғикрок бўлгани учун бу янглиғ инъом ва бахшиш туфайли уруш ва қон тўкишлик олови сўниш сифатини топмади. Ул ҳазрат уч наъбат яқинлари ва бегоналар билан тўкнаш келди. Биринчиси мухтарам ҳарамининг олий отаси Юнусхон билан Андижон қасабасининг шимол томонида Сайхун дарёсининг кирғоғида. Ул жангда Умаршайх Мирзодан ғоятда жасурлик ва баҳодирлик юзага чиққан бўлса-да, аммо Аллоҳнинг тақдири билан фатху зафар на-сими Юнусхоннинг байроғи сари эсди. Айрим лашкар бошликлари ул эҳсон осмонининг қуёшини олиб бо-

риб, хон олдига элтдилар. Ул хазратнинг оталик нисбати шафқати қони жўшиб, меҳрибонлик ва мурувват йўлини тутди ва Мирзо Умаршайх Кўрагонни ўз илтифот ва иноятга сазовор қилиб, ўз вилоятга қайтариб юборди. Яна бири шуқим, бир гал дашти қипчоқлик ўзбекнинг қиёмат нишонли лашқаридан бир тўдаси Самарқанд атрофидаги ерларни босқин-чопқин қилиб, сон-саноксиз молни қўлга қиритганча ўз манзиллари сари қайтиб кетдилар. Бу хабар ул шижоат сийратли хусрав кулогига етишиб, адоват ойинли шижоатдилар ва темир совутли баҳодирларнинг бир гуруҳи билан ўзбекларни қувлаш сари юзланди ва Амраш дарёсидан муз устидан ўтиб, муҳолифларга яқинлашди. Ул жамоат эса олий маркаб чангини кўрганларидан сўнг жиловни жанг майдони сари бурдилар ва дарё бўйида икки гомон ўртасида уруш-саваш олови аланга олиб, шамол асарли ҳамла елидан диловар кишилардан кўпларининг қомати дарахти ҳалокат тупроғи узра қулади. Жон олувчи найзалар учи-ю, ўқ пайқони ҳамда ўлим юришли санчқилар паҳлавонларнинг кўзу дилидан қон олови булоғини очди. Ниҳоят, зафар ва ғалабанинг анбар тароватли насими ул сарварлик осмонининг куёши байроғи сари эсишга тушди ва ўзбаклар тор-мор бўлиб, нусрат нишонли мавкаб<sup>24</sup> мулозимлари самарқандликларнинг босқинчилар тортиб олган барча молларини қайтариб олдилар ва ҳеч зиён-заҳмат етказмасдан бенуқсон ҳолатда эгаларига келтириб бердилар. Учинчиси шуқим, бир гал Мирзо Султон Аҳмад ёмғир томчилари сонли қўшин билан Самарқанддан Фарғона

<sup>24</sup> Мавкаб – ҳукмдорлар минган от. Ҳукмдорнинг хос мансабдорлари қуршовада юришига ишора.

гарафга юзланди. Мирзо Умаршайх ҳам лашкар билан урушга азму жазм қилиб, укаси олдига чиқиб, Шохрухия ва Ҷратепа оралиғида жойлашган Хавос қишлоғида томонлар бир-бири билан тўқнаш келдилар. Жанг ва уруш-саваш чангини тўзғитганларидан сўнг Мирзо Султон Аҳмаднинг туғи ойчаси зафарнинг саодат аломатли юлдузига яқинлашди, Умаршайх Мирзо Кўрагон эса қайтиш тизгинини ўз мамлақати пойтахти сари бурди.

**Байт:**

Ченин аст ойини гардун сипехр,  
Гаҳе кина варзад ба кас, гоҳ меҳр.

*Мазмуни:*

Шундайдир осмони фалак қондаси,  
Гоҳ адоват кўрсатар одамга, гоҳ меҳр.

Ва илгари айтиб ўтганимиз кўринишда Умаршайх Мирзонинг баракатли руҳи қуши Аҳсидаги қабутархона тоmidан йиқилиб тушиши натижасида 899 йил 4 рамазон<sup>25</sup>да душанба куни жаннат боғлари сари парвоз қилди. Азиз умри муддати ўттиз тўққиз йил бўлди. Ул ҳазратдан уч нафар олий зотли ўғил ва беш нафар яхши юлдузли киз ёдгор қолди. Энг катта ўғли суву қуруқлик подшоҳи Заҳриддин Муҳаммад Бобур гозий бўлиб, у Юнусхоннинг кизи Қуллуғ Нигорхонимдан туғилган. Иккинчиси бу мустақил ҳукмли подшоҳдан икки яшар кичикрок бўлмиш Муизиддин Жаҳонгир Мирзо эди ва унинг онаси Мўғулистон туманидаги амирлардан би-

<sup>25</sup> 899 йил 4 рамазон – 1494 йил 8 июнь.

рининг қизлари сирасидан бўлиб, исми Фотима Султондир. Учинчи ўғил Султон Носир Мирзо бўлиб, онаси Андижондан, исми Умид эди. Мирзо Умаршайхнинг энг катта кизи Хонзодабегим бўлиб, мамлакат олувчи ҳазрат Мухаммад Бобур подшоҳнинг бир онадан туғилган опасидир. Иккинчи кизи Меҳрбону бегим бўлиб, у Султон Носир Мирзонинг онасидан туғилган эди. Учинчиси Шаҳрбону бегим бўлиб, у ҳам Султон Носир Мирзо билан бир онадан туғилган сингил эди. Тўртинчи Ёдгор Султон бегим бўлиб, онаси Оғо Султон исмли кўнжи эди. Бешинчи Рукия Султон бегимдир. Бу кейинги икки киз фарзанд Умаршайх Мирзо вафотидан сўнг туғилганлар.

Ва Мирзо Умаршайхнинг бу айтилганлардан бошқа никоҳида яна бошқа аёл ва канизак хотинлари ҳам бор эди. Бу завжалари жумласидан бири Улус Оғо бинта Хожабек эди. Яна бири Кароқўзбегим бўлиб, у ўзини Мирзо Манучеҳрнинг кизи дерди. Яна бири мўғуллар наслидан саналган Кумонун Султон эди.

**Мирзо Улуғбек Кўрагон** донгдор отаси тириклигида Кобул, Ғазнин ва унинг ён-атроф ҳудудларига эгалик қилиш фаҳри-ю, сарафрозлигини топган эди. Давлати айёми анча чўзилиб, кўп вақт ўта адолат ва раиятпарварлик билан ул вилоятларда ҳукуматга машғул бўлди. Ҳижрий сана 900 йил<sup>26</sup>дан ўтгач, ул инсоф-диёнат қондали хусрав жаннат боғлари сари юзланди ва ўғли Мирзо Абдураззоқ отаси ўрнига ўтирди. Аммо кичик ёшдалиги ва амирлару давлат устунларининг қарама-қаршиликлари сабабли ул вилоятларни бошқаришнинг

---

<sup>26</sup> 900 йил – 1494 йил 12 октябрь – 1495 йил 20 сентябрь.

удласидан чиқа олмади. Натижада Шужоиддин амир Зуинун Арғуннинг ўгли Мирзо Муқим Қандаҳордан Қобул устига лашкар тортди ва шоҳзодани қочириб, бир неча кун ул шаҳарни ўз жавлонгоҳига айлангирди. Ниҳоят, кейинчалик, ҳазрат салтанатпаноҳий дин ва халифалик химоячиси Муҳаммад Бобур Мирзо бин Мирзо Умаршайх Баҳодирхон бин Султон Абу Саид Мирзо иқбол ва осмоний саодатга тизгиндош бўлиб, Қобул томонга ошиқди ва ул ҳудудни сулҳ билан Мирзо Муқимдан олиб, адолати нурлари зиёсини Султон Маҳмуд Ғазнавийнинг вилоятлари ён-тевараги узра таратди.

### **Байт:**

Мулки Маҳмуд Ғазнавий набавий,  
Шуд зи адлаш чу Ясриби набавий.

### *Мазмуни:*

Маҳмуд Ғазнавий ғозийнинг юрти,  
Адолатидан бўлди набининг Ясриби мисол.

Ва ҳижрий 929 йил муборак рамазон ойи охири<sup>27</sup>га етишган ҳозирги давргача ул адолат коидали хусрав Заҳириддин Муҳаммад Бобур подшоҳ шу мамлакатнинг давлат ва эркин ҳукмронлик ўриндиғида ўтирибди. Бу подшоҳнинг султонлар паноҳи бўлмиш шоҳлик даргоҳи ходимларига нисбатан яхши ўй ва эзгу ниятлилиги ҳаддан зиёдлиги туфайли султонлар ҳам ихлос ва давлатхоҳлик кўрсатадилар. Чунончи, Мирзо Муизиддин Жаҳонгир ва Султон Носир Мирзо бу ака-сига доимо итоатда эрурлар.

<sup>27</sup> 929 йил рамазон ойи охири – 1523 йил 14 август.



**Мирзо Султонмухаммад ва Мирзо Шоҳрух** ҳазрат султонликнинг мағлубияти куни Амир Ҳасанбек<sup>28</sup>нинг мулозимлари қўлига тушдилар ва анча вақт Озарбайжондаги қалъаларда тутқунликда сақланиб, ниҳоят халослик топдилар. Аммо ёмон ҳолат ва паришонликда умр кечирдилар ва 899 йил<sup>29</sup>и Мирзо Шоҳрух доруссалтана Ҳирот сари йўлга тушиб, Сори вилоятига етиб келган чоғда Аллоҳи таолонинг мағфирати қабтолига кўчиб ўтди. Султон Ҳусайн Мирзо Бойқаро унинг наъшини Ҳиротга келтириш учун Сорий шахрига одам жўнатди. Жасад олиб келинган эса, султонлар қондаси бўйича Маҳд Улё Гавҳаршод Оғо мадрасасига элтдилар ва анъана тариқасига кўра дафн қилдилар. Мирзо Султонмухаммад укаси вафотидан сўнг ҳам то оламдан ўтгунига қадар ўша мамлакатда бўлди.

**Мирзо Або Бакр** Султон Абу Саид ўғилларининг энг шижоатлиси эди ва отаси ҳаёт пайти Бадахшон мамлакатада фармон берувчилик ишига мансуб турди. Ул ҳазрат шахид бўлган, дастлаб Мирзо Султон Ҳусайнга нисбатан ихлосмандлик йўлини тутиб юрди, кейинчалик эса қаршилик байроғини қилпиратиб, бир неча вақт ҳужум ва қочиш ишларини амалга ошириб турди. 884 йилнинг ражаб ойи охири<sup>30</sup>да Астро-бод ҳудудида қўлга тушиб, сиёсат қўли унинг ҳаёти кўч-кўронини йиғиштирди. Бу ҳикоят тафсили Султон Ҳусайн Мирзо давлати айёми воқеалари асносида чечанлик қалами билан рақам қилинажак.

---

<sup>28</sup> Амир Абунаср Музаффариддин бин Амир Алибек бин Амир Қаро Усмон кўзда тутилмоқда.

<sup>29</sup> 899 йил – 1493 йил 12 октябрь - 1494 йил 1 октябрь.

<sup>30</sup> 884 йил ражаб ойи охири – 1479 йил 17 октябрь.

**Мирзо Султон Мурод** отаси хукмронлиги даврида Гармсер ва Кандажор вилоятида ҳукумат тахтига оёк кўйди ва ул мамлакатнинг ихтиёр эгаси бўлмиш Амир Низомиддин Аҳмад Барлос шоҳзода хизматига камар боғлаб, итоат ва ихлос эшикларини ланг очди. Султон Абу Саид Мирзо Ҳиротдан чикиб, Озарбайжон вилоятига кириб борган вақтда қутлуғ буйрук чиқарилиб, унга кўра Мирзо Султон Муроднинг Кермон томонга кетиши айтилди ва шоҳзода ўша томонга йўналиб, аммо йўл асносида отасининг қайғули воқеаси хабарини эшитди ва совуқ бир оҳ чекиб, оти жиловини Гармсер томонга бурди. Ҳирманд дарёси бўйида эса, Юсуф Тархон исён қилиб, Мирзо Султон Муроднинг ёнидаги қимматбаҳо буюм ва ашёларини талон-тарож елига со-вурди. Ноилож шоҳзода Ҳирот сари кетиб, бир неча кун салтанат ва халифалик шарафли Султон Ҳусайн Мирзо хизматида турди. Шундан сўнг олий шонли султон уни Мовароуннахрга ака-укалари олдига жўнатди. Мирзо Султон Мурод оға-иниларидан шафқатсизлик рўй беришини англаб, яна қайтиб Хуросон томон юз тутди. Мирзо Султон Ҳусайн Бойқаро эса шоҳзодани 880 йил<sup>31</sup>и Тирату қалъасига юборди. **Мисра:** Дигар хабаре аз у ба мардум нарасид – Шундан сўнг халққа у ҳақда ҳеч бир хабар келмади.

**Мирзо Султон Халил Султон Абу Саид Озарбайжонга** юриш қилган вақтда Ҳирот шаҳрида отаси ўрнига қолган эди. Бу шаҳар юрт олувчи подшоҳ Мирзо Султон Ҳусайн Бойқаро томонидан эгаллангач, султон уни Самарқандга юборганди. Шоҳзода ўша шаҳарда исёнчи сифатида бош кўтариб чиқди ва нати-

<sup>31</sup> 880 йил – 1475 йил 7 май – 1476 йил 25 апрель.

жада Султон Аҳмад Мирзо амирларидан бири кўлида қатлга етди.

**Мирзо Султон Валад** отаси фармонига биноан *ар-лот* амирлари орасида яшаб юрди. Султон Абу Саид воқеасидан кейин кўп ўтмай ҳалокатнинг ёқимсиз аччиқ шарбатини татиди.

**Мирзо Султон Умар** отаси шахид бўлган пайти Самарқанд шаҳрида эди. Ўша воқеадан бир оз вақт ўтгач эса Мирзо Султон Аҳмад укасининг ҳаракат ва юриб-туришидан муҳолифат аломатларини сезиб, уни шаҳардан ҳайдаб чиқаришларига буйруқ берди. Шохзода Мирзо Або Бакрга кўшилиб, Мирзо Або Бакр Марв навоҳисида олий мартабали подшоҳ кўшини ҳужумидан шикаст топган маҳалда эса, Мирзо Султон Умар Нисо ва Обивард тарафларга бориб қолди ва ўша вилоятда амирлардан бири уни ушлаб, Ҳиротга юборди. Султон Ҳусайн Мирзо бўлса, шохзодани дастлаб Ихтиёрдин қалъасида ҳибсада сақлаб, 883 йилнинг ражаб ойи<sup>32</sup>да Тирату қалъасига жўнатди. Шундан сўнг ундан ҳеч хабар бўлмади [102-б.].

## МАҒФИРАТЛИ СУЛТОН АБУ САИДГА ЗАМОНДОШ БЎЛГАН УЛУҒ САЙИД, МАШОЙИХ ВА УЛАМОДАН АЙРИМЛАРИНИНГ ЗИКРИ

[109-б.] **Хожа Носирдин Убайдуллоҳ** Туркистон машойихи ва Мовароуннаҳр улуғларининг барчасидан мартабаю шавкати юксаклиги ва тобеларию мол-мулкининг кўплиги билан устун ва тенгсиз эди. Замон султонлари ва фармони нуфузли ҳоқонлар Туркистон

<sup>32</sup> 883 йил ражаб ойи – 1478 йил 28 сентябрь – 27 октябрь.





шаҳарлари бошидан то Ирок ва Озарбайжон шаҳару ўлкалари охиригача ул жанобга нисбатан тўла иродаг ва ихлосли эдилар. Ва алардан қай бир сўз эшитсатар, ноёб дур каби хуш кулоқларига безак қилиб, тўғрилиқни кўрсатувчи раъйига хилоф ишни ўзларига раво кўрмасдилар. Айниқса, Султон Абу Саид мулку миллат ишларини тартибга солишда хамиша ҳазрат хожа билан машварат қиларди ва ўта эътиқоди орқасида гоҳо пойи пиёда хожа минган от билан тенг юриб, иродаг етуклиги маросимини бажарарди. Ул ҳазрат султоннинг мажид ўғиллари ҳам ўз бузруквор оталари анъанасига эргашиб, ҳазрат хожага итоат қилиш йўлидан ташқари чиқишни жоиз билмас эдилар ва доимо олия ҳимматларини алар шаъни улуғлиги ва макони юксаклиги сари қаратар эдилар. Бир ҳикоят халқ орасида машҳур ва ишончли кишилар тилида мазкурким, бир навбат Умаршаъх Мирзо ва Султон Маҳмуд Мирзо бир-бирлари билан иттифок бўлиб, Самарканд устига қўшин тортадилар. Султон Аҳмад Мирзо ҳам шаҳардан ташқари чиқиб, ога-инилари билан тўқнашиш ва уруш қилиш учун белига ҳиммат камарини боғлайди. Ҳар икки қўшин бир-бири рўпарасида уруш сафини тузган куниси тўсатдан «хожа Носириддин Убайдуллоҳ жанг майдони сари келмоқдалар» деган хабар етишади. Учала подшоҳ ул ҳазрат ҳурмати учун жиловни орқага тортиб, хожанинг келишига нима сабаб бўлганини билмоқ мақсадида қўлларини уруш асбобларини ишлатмоқ сари чўзмай турадилар. Ўша лаҳзада хожа Убайдуллоҳ ул ерга етишиб, панду насихат суви билан уруш ва саваш оловини ўчиради. Ҳар учала подшоҳни ярашу тинчликка кўндириб, майдонда бир қодир тикишлари-

ни буюради. Мирзо Султон Аҳмад ва Мирзо Султон Маҳмуд ва Мирзо Умаршайх ўз лашкари сафларидан айрилиб чиқиб, ул чодир сари кетадилар. Чодирга киргач, ҳар учови бир гиламда ўтириб, хожа ҳузурида «бундан сўнг бир-бирови билан келишув мақомида бўлиб, нифок яқинига йўламаслик» борасидаги аҳду паймон сўзларини ўртага соладилар. Шундан сўнг ҳар қайси ўз кўшинига кўшилиб, ўз вилоятларига кетишади ва то умрлари охиригача келишув йўлида собитлик билан қадам ташлайдилар.

Ҳазрат Хожа Убайдуллоҳ 896 йил<sup>33</sup>и Самарқандда вафот этди. Бу хожанинг ўлиmidан сўнг кўп ўтмай, Моъароуннаҳр халқининг бирлиги тарқоклик ва аҳволи паришонликка дучор бўлиб, неча турлук машаққат ва нотинчликни бошидан кечирдилар.

Ҳазрат Султоннинг яқин кишиси Амир Низомиддин Алишер Навоий мазкур Хожа Убайдуллоҳнинг вафоти тарихида эса демишлар:

### Қитъа:

Хожаи хожাগон Убайдуллоҳ,  
Муршиди соликони роҳи яқин.  
Шуд ба хулд барин ки дар фавташ.  
Соли таърих гашт «хулд барин».

### Мазмуни:

Хожалар хожаси Убайдуллоҳ,  
Эътиқод йўли издошлари муршиди.  
Юксак жаннатга кетди, вафоти учун,  
Тарих санаси «хулд барин»<sup>34</sup> бўлди.

<sup>33</sup> 896 йил – 1490 йил 14 ноябрь – 1491 йил 3 ноябрь.

<sup>34</sup> Хулд барин – энг юксак жаннат.

Ҳазрат хожа Убайдуллоҳдан икки нафар хидоят сийрагли ўғил ёдгор қолди: Хожако лақабни билан машҳур Хожа Муҳаммад Убайдуллоҳ ва Хожа Қутбиддин Яҳё.

Имкони келиб, сўзларни рақам этгувчи қалам муваффақ бўлса, Мовароуннаҳр султонлари аҳборида ул икки мактов сифатли улуғлар аҳволидан бир бўлагини ҳам турмуш воқеалари саҳифалари узра битажакдир. **Тушунтириш.** Мактов рақамли қалам сиёҳ томчилари ёрдамида Мирзо Султон Абу Саид ва ул шаҳид хусравнинг етук ўғиллари аҳволини айрим машҳур саййидлар ва машойих ва уламо ва фозиллар зикри билан бирга безаган экан, энди мақсади ҳосил хокони мансур ва қудрат далилли, Жамшид хашаматли, Фаридун лашкарли, Искандар ҳимматли, Кисро марҳаматли султон, салтанат ва халифалик шарафи Аби-ал-ғози Султон Ҳусайн Мирзонинг аҳбори гулзори тароватидан фазлу камол боғлари мустаншиқлари димоғини муаттар айлағай ва ул адолат либосли подшоҳнинг бадое атвор белгилари насимларидан бу лагофат сифот саҳифаларнинг роҳат ортирувчи фазосини тароват ва сафода аъло осмоннинг фирдавс рангли сахнига етказгай.

**Байт:**

Кунад ганже аз кони идрок пур,  
Чу феруза феруз ва дурре чу дур [110-б.].

*Мазмуни:*

Ганжни тўлдирар идрок конидан,  
Ферузадек ферузни, дурни дурдек.

**САОДАТЛИ ЗАҲИРИДДИН МУҲАММАД БОБУР  
ПОДШОҲ ХАЁТИДА АЛАРНИНГ ТУҒИЛИШ  
ВАҚТИДАН ТО САМАРҚАНД ШАҲРИ ТОМОНГА  
ЮРИШ ҚИЛИШИ ЗАМОНИГАЧА СОДИР БЎЛГАН  
ВОҚЕАЛАР БАЁНИ**

[225-б.] Фарғона мамлакатининг ён-атрофи доно подшоҳ Умаршайх Кўрагоннинг адолати шарофатидан жаннат боғлари рашкини оширувчи бўлиб турган 888 йил муҳаррам ойининг олтинчиси<sup>35</sup>да салтанат ва донгдорлик тизимига нур сочувчи бир дур тизилди ва куёш ёғдули бир гавҳар халифалик ва мақсади ҳосиллик уфкидан порлаб чиқди. Балким, соҳибкиронлик осмонидан бир офтоб бани башар аҳли ҳаёти юзи сари чарақлаб боқдиким, мамлакат олувчилик чўққилари сари кўтарилувчилар умид кўзини ёруғлангирди ва бир мақсади ҳосил инсон йўқлик қаъридан вужуд бўстонсаройига кадам кўйдиким. лутфу карам соясини бани одам тойифаси боши узра ташлади.

**Назм:**

Ба файзи кирдигори лоязолий,  
Дурре афзуд дар ақди лоолий.  
Падид омад ажаб фархунда фоле,  
Жамолаш офтоби безаволий.  
Вужудаш нурбахши чашми умид,  
Зухураш бар ҳасби иқболи жовид.

*Мазмуни:*

Заволсиз ярагувчи файзидан.  
Гавҳар тизимига бир дур кўшилди.

<sup>35</sup> 888 йил 6 муҳаррам — 1483 йил 14 февраль.

Юзага чикди ажиб бир бахтли фол,  
Жамоли заволсизлик офтоби.  
Вужуди умид кўзининг нур бағишловчиси,  
Пайдо бўлишти мангу икбол ҳукми билан раво.

Яъни Мирзо Умаршайх бин Мирзо Абу Саид бин Мирзо Султон Муҳаммад бин Мирзо Мироншоҳ бин жаҳон олувчи соҳибқирони Амир Темур Кўрагонга атолар бахш этувчи ҳазрат хотини Нигорхоним бинта Юнусхондан бир ўғил каромат килдиким, ҳам болалик айёми бошидан давлат ва икбол нурлари ҳоли жамолидан ялтирар, ҳам ўсиб-улғайиш замони аввалидан шавкат ва истиқлол аломати бахт келажакли манглайдан билиниб турарди. Куёш нурли чехраси зиёси субҳи содиқ нури сингари хабар берардики, тез орада давлат ва мамлакат олувчилик офтоби соҳибқиронлик хонадонининг бу самараси умид машриқидан инсонлар боши ҳаёти сафҳаларига балкижакдир ва куёш асарли юзи сафоси сахарий юлдуздек порлаганча шу маънода даракчилик килардиким, у тез орада олам мазлумларининг қоронгу туни халифалик ва жаҳонбонликнинг бу аён покизаси ёғдусидан шодлик ва қувонч кунига айланажак.

**Назм:**

Бале, бесухан субҳи гитифуруз,  
Бувад мухбир аз рўшаной рўз.  
Шавад зоҳир аз нури икболи меҳр,  
Ки созад мунтавар тамоми сипеҳр.

*Мазмуни:*

Ҳа, оламни ёритувчи тонг сўзсиз,  
Хабар берар бўлажак ёғдули кундан.



Зоҳир бўлур куёш иқболи нуридан,  
Килгали бутун осмонни мунаввар.

Ва илоҳий иноят жаннати насимига кўра подшоҳлик боғи гунчаси Мирзо Умаршайх Кўрагоннинг умид гулшанида очилгач ва иқбол башоратчиси ул олий зотли ўғилнинг кувонч аломатли туғилиш хабарини жон кулоғига айтгач, чексиз шодлик ва севинч билан тўй ва хурсандчилик асбобларини тайёрлашга буйруқ берди ва бир неча кун нишот патосини ёйиб, тоғли шароб кадаҳларини лола юзлик соқийлар кўлидан сипқорди ва ул дилбанд фарзанднинг ном ва лақаби Заҳириддин Муҳаммад Бобурга қарор топди. Бир неча Зухра<sup>16</sup> пешонали энагалар ул саодатга ёр чақалокни эмизиш ва қаровчилик ишига тайинланди. Шоҳзода балоғат ёшига етган ва оқ-қорани ажрата биладиган давр бошигача иззат ва ғамхўрлик бешиги, меҳрибонлик ва қомронлик тарбияси остида парвариш топган айёмда Андижон ўлкаси ноҳияларини бошқариш ишига тайинланиб, ўша сарзаминда истикомат қила бошлади. Бир неча йил давомида ул олий шарафли шоҳзоданинг саодат аломатли умри Андижонда шоду хуррамлик оғушида орзу-умидларига етишган кўйи тинч-осойишталикда кечди. Умри ҳаёт бекатларидан ўн иккинчи манзилни босиб ўтган чоғда эса, Мирзо Умаршайхнинг даҳшатли ҳодиса ва мусибатли воқеаси хабарини эшгитди. Ўшанда амирлар ва давлат устунлари, вилоятнинг қаттақон ва аъёнлари ул ҳазратни отаси ўрнига подшоҳликка кўтардилар ва итоат бошини бажарили-

<sup>16</sup> Зухра - ялтирок Зухра (Венера) юлдузи кўзда тутилган.

ши шарт бўлган фармони хати сари эгиб, хизматкорлик байроғини хилпиратдилар. Юкорида ёзиб ўтганимиз сабабга кўра ўша айёмда Султон Маҳмудхон ва Султон Аҳмад Мирзо икки томондан Фарғона мамлакатини эгаллаш сари йўналган эдилар ва қаршилиқ ва низо туғларини балан д кўтариб, ул ўлканинг калъаларини фатх этишда кўлларидан келганча саъй-ҳаракат қилардилар. Амир Ширам Тағой кишваристонлик авжининг ул гавҳар-дурини отга мингаштириб, «мабодо вилоятлар ҳокимлари вафосизлик йўлини тутиб, Мирзо Султон Аҳмадга тарафдорлик шиорини кўрсатсалар ва Мирзо Умаршайх Кўрагоннинг тарбиятлари ҳаққи устига унутиш чизиғини тортиб, муҳолифат байроғини кўтарсалар, Бобур Мирзо ҳазрат Илоҳнинг ҳимоят лашкари паноҳида пасткашлиқ солиқлари зиён-заҳматидан омон қолгай» деган ўйда ул ҳазратни Ўзганд тоғи этагига олиб боришни ният қилди. Насаби ота томондан шайх Бурҳониддин Қиличга уланувчи, она тарафдан эса Султон Илик Мозийга боғланувчи ва илгари замонлардан бери хонадони улуғлари Андижонда шайхулислом бўлиб келаётган ҳамда шаҳарнинг шариф кишилари ва каттаконлари қозилиқ ишларини ҳал этишда аларга мурожаат қилиб, одамлар бошига тушган мушкулларини ечишда ёрдам олувчи сулола вақили хожа Мавлоно қози амир Ширамнинг бу режасидан хабар топиб, Умаршайх Мирзо инояти остида Мирзо учун кийим-кечак тикиш бўйича тарбият топган хожа Муҳаммад тикувчини ҳазрат подшоҳ ва амир Ширам Тағой олдига юборди ва бундай жўнаб кетишни манъ қилди. Хожа Мавлоно Қозининг сўзи розилиқ қулоғи билан тингланиб, олий мавкаб Ийдгоҳ мавзесиданок

оркага қайтди ва Андижон кўргони ул олий шаъли подшоҳнинг қадами шарофатидан жаннат боғларининг рашк этадиган жойига айланиб, амирлар ва аъёнлар қалъа буржу борасини тузатиш ва қалъа усти йўлак ва дарвозаларни мустаҳкамлашга киришдилар. Шу ҳол асносида илғор йўсини билан Марғинон тарафга кетган Ҳасан Ёқуб, амир Қосим қавчин ва бошқа амирлардан айримлари Андижонга қайтиб келиб, ҳазрат подшоҳ давлати тарафдорлиги юзасидан тўла ихлос изҳорини билдирдилар.

Султон Аҳмад Мирзо Ўратепа, Хўжанд ва Марғинонни эгаллагандан сўнг Андижонга тўрт фарсах<sup>1</sup>лик ергача етиб келиб, истиқомат чодирини тиклади ва камал мақомида маҳкам қадам босиб, низо ва тўкнашув байроқларини хилпиратди. Ўша аснода саодат насабли подшоҳ Андижон вилояти арбобларидан бўлмиш Дарвиш Гов лақабли биттасини муҳолифат қоришиқ сўзларни айтиб юргани сабабидан қатлга буюрди. Бундай сиёсат эса бошқа андижонликларнинг кўркинчига сабаб бўлиб, айримларнинг попути пасайди ва ул шаҳарнинг барча хос ва авоми ўз кўнгилларини фақат шаҳар ва қалъани сақлаш ишларига қаратдилар. Шунда олий мартабали подшоҳ хожа Мавлоно қози ва Узун Ҳасанхожани элчилик расми билан Мирзо Султон Аҳмад ёнига жунатиб, адаб тариқасига риоя қилган кўйи «Ул ҳазрат Самарқандни кўйиб, Андижондек ерда истиқомат тутишга мойил бўлмаёжаклари жуда аниқ гап. Давлатчилик ишига лойиқ кўрилмоқдаким. бу вилоят ҳукуматини мента

---

<sup>1</sup> 1 фарсах (фарсанг) – 6 – 7 км. масофа.



топширсалар ва нифоку карама-каршилиқ эшикларини бекитиб, дўстлик ва тинч-тотувлик эшикларини очсалар, то Сиз мақсади ҳосил наввоб жанобларининг фарзанди ўрнида бўлмиш бу мухлисингиз бутун умри давомида навкарлик ва итоатнинг тўғри йўлида бўлиб, хилоф ва низо яқинига йўламаса» деган мазмундаги номани йўлади. Ҳийласиз зоти мурувват ва инсонийлик сифати билан яратилган Султон Аҳмад Мирзо юборилган бу пайғом-хабарни эшитгач, каттик таъсирланиб, сулҳ ишини кўнглига тугса-да, бироқ яраш битими тузишни раво кўрмай, элчиларнинг мазмундор сўзлари жавобида пойинтар-сойинтар гапларни тилга олган кўйи кўчиб шаҳар яқинига бориб, ўша ерда манзил тутди. Шу аснода пок ва улуғ Аллоҳ иродасига биноан бир неча воқеа рўй бердики, уларнинг юзага чиқиши подшоҳ давлати қувватига боис, Мирзо Султон Аҳмаднинг эса толеси заифлашувига сабаб бўлди. Биринчиси шуким, Самарқанд қўшини Андижонга яқин ерда жойлашган Сияҳоб дарёсидан ўтиш чоғи ҳос ва авомнинг издиҳоми натижасида кўплаб от ва туя Сияҳобга чўкиб, йўқлик ўтлоқзори сари юзланди. Иккинчиси шуким, айни ўша айёмда самарқандликлар лашкаргоҳида от вабоси рўй бериб, лашкар аҳлининг уюр-уюр юк ташувчи ҳайвонлари ҳалок бўлди. Яна бири эса шуким, кундан-кунга Андижон халқидан каттаю кичигининг ҳазрат подшоҳга нисбатан ихлос ва бирдамлиги олдингидан кўпроқ бўлиб, улардан қай бирининг дилида озгина журъати бўлса оёғини уруш майдони ва самарқандликларга қарши мудофаа кураши сари ташлаб, жонларидан кеча бошладилар. Шунга кўра Султон Аҳмад Мирзо ярашувга талабгор бўлди

ва холи юзидаги хол бўлмиш Дарвиш Муҳаммад Тархонни Андижоннинг бир фарсахлик еридан ул юмушни бажариш учун жўнатди. Амир Дарвиш Муҳаммад Ийдгоҳ сари ошиқди ва ҳазрат подшоҳ Ҳасан Яъқубни унинг мулокоти учун буюрди ва ул икки амир мазкур мавзеда бир-бирини кўришди. Улуғвор амаки ва олий мартабали жияннинг келишуви борасидаги бир неча сўз ўртага солиниб, ҳар бири ўз жойларига қайтдилар. Шундан сўнг Султон Аҳмад Мирзо Самарқанд тарафга қайтиш учун йўналди. Аммо юкорида ёзганимиздек, йўл давомида табиий ажал егишгани сабабли оламдан ўтди.

Фарғонани кўлга киритиш учун бошқа томондан йўналган Султон Маҳмудхон эса Аҳси сари юриш уюштириб, камал хаёлини кўнглига тугди. Ўша вақтда Жаҳонгир Мирзо Аҳси қалъасида турарди ва амирлардан Али Дарвиш ва Мирзоқули кўкалтош ва Муҳаммад Бокир, Шайх Абдуллоҳ эшикоғо, Вайс Лоғарий, Мир Ғиёс *тағой* ул фармонфармолик буржининг дури хизматида эдилар. Султон Маҳмудхон яқинлашиб қолгач, амирлар ва нўёнларнинг чидам пойдеворини ваҳима ва кўрқув сели тагидан кўпориб, Аҳсидан Вайс Лоғарийнинг ўлкаси бўлмиш Косонга кетдилар. Ўша вақтда Султон Носир Мирзо мазкур Вайснинг унга атка бўлгани муносабаги билан мазкур қалъада яшарди. Султон Маҳмудхон бу ишдан хабар топгач, ул томонга ошиқди ва мазкур жамоат итоат издор этиб, Косонни мақсади ҳосил ҳокон даргоҳининг эгаси ихтиёрига топширдилар ва Мир Ғиёс *тағой* ул даргоҳ хизмати исирғасини қулоғига осиб, Вайс Лоғарий эса Султон Носир Мирзо ёнида Султон Аҳмад Мир-

зо ўрдусига кетди ва ул ҳазрат Муҳаммад Мазид Тархонни шоҳзодани саклаш ишига буюрди. Султон Маҳмудхон Косонни эгаллагач, Аҳси атрофига келиб, бир неча навбат уруш оловини аланга олдириш билан машғул бўлди. Аммо иши ҳеч олдинга силжимади ва танасига ёпишган бир хасталик сабабли ўз вилояти томон йўл олди.

Шу воқеалар асносида сарварлик иддаосини қилиб, ҳеч бир тахту тож эгаси олдида бош индирмай юрган ва Кошгару Хўтанда ҳукумат юргизиб ўтирган Абобакр Кошгарий Ўзганд худудига лашкар тортди ва бир қалъа қуриш тарҳини қилиб, мусулмонларга озор етказиш, шаҳарларни бузишга машғул бўлди. Хожа Қози ва кўпчилик амирлар уни йўқотиш ишига буюрилгач, Абобакр уларга қарши марди майдон бўлиб тура олмаслигини англади ва хожа Қозини восита қилиб, турлитуман алдов сўзлари билан қўшин бошлиқларини ярашувга қўндирди ва қайтиш байроғини Кошгар томонга кўтарди. Подшоҳнинг ойдин кўнгли бундай ишлардан тинчигач, Фарғона ишларини тартибга солиш учун юзланиб, Андижон ҳукумати ва мамлақату молиявий ишлар бошқаруви мансабинини Ҳасан Яъқубга берди, Ўш вилояти бошқарув ихтиёрини Амир Қосим *қавчининг* қудратли қўлига топширди. Аҳси ва Марғинон амирлигига Узун Ҳасан ва Али Дўст Тағой тайинланди. Шунингдек, бошқа амирлар ва ичкилар ҳам муносиб мансаблар билан ифтихор ва мағрурланиш бошини баланд кўтардилар.

Бу воқеалар юз бериб турган вақтда акаси вафотидан кейин пойтахт Самарқандга келган ва Султон Аҳмад Миръонинг кизи Окбегимни Султон Масъуд

Мирзонинг никохи тизимига киритган Султон Махмуд Мирзо Абдулқуддус Маржий ва Отога кўшиб, олий зотли подшоҳ хузурига сочки юборди ва меҳрибонлик, дўстона сўзларга тўла нома жўнатди. У билан Ҳасан бин Яъқуб ўртасида кариндошлик бўлгани сабабли Абдулқуддус яширинча Ҳасан бин Яъқубни Султон Махмуд Мирзонинг лутфу иноятидан умидвор қилди ва ҳазрат подшоҳ давлатига тарафдорлик йўлидан воз кечирди. Қайтиб келгандан сўнг Абдулқуддус беш-олти ойча таҳсинга сазовор яхши хулқини ўзгартириб, куфрони неъмат шиори изҳорига тиришди ва Мирзо Жаҳонгирни салтанатга ўтказиб, наввоби комёб подшоҳ Бобурни Андижондан қайси тарафга кетишни истаса, ўша ёкка чиқариб юборишни ният қилди. Шунга кўра Хожа Қози, Амир Қосим *қавчин*, Али Дўст *тағой*, Узун Ҳасан ва замон подшоҳининг мухлисларидан яна бир нечтаси ул ҳазратнинг бувиси Эсан Давлатбегимнинг маъқулловига кўра Ҳасан Яъқубни ихтиёрсиз қилиб, қандай йўсинда мумкин бўлса, ўша тарзда унинг касофатли ўйини йўқка чиқаришга қарор қилдилар. Шу ўй билан олий мартабали подшоҳ ҳамроҳлигида Ҳасаннинг маскани бўлмиш Арк сари йўналдилар. Ҳасан бу пайтда далага чиқиб кетиб, ов қушлари учир-иш билан машғул эди. У ҳодиса қайфиятидан хабар топиб, Самарқанд томонга равона бўлди. Қандибодомга етгач, бузуки хаёл ва фасод ўйи билан йўналиш тизгинини Аҳси тарафга бурди. Ҳазрат подшоҳ унинг қайтганидан огоҳлик топиб, амирлардан бир нечтаси музаффар туғли аскардан бир гуруҳи ҳамроҳлигида уни йўқ қилиш сари юзландилар. Бу кичик қўшиндан бир туғли манқалой расми билан олдинроқ юриб кетган



бўлиб, Ҳасан сафёра аскарларнинг муқаддима қисми келаётганидан воқиф бўлди ва ярим кечаси улар устига ҳужум қиларкан, навкарлари ўқ отишга тушиб, улардан бирининг ўқи Ҳасаннинг жон чиқар жойига тегди ва у ўзининг қора қилмишига яраша жазо топиб, ўша яраланиш оғибатида ўлим топди.

Мазкур воқеалар рўй бериб турган вақтда *минглик* қавмидан бўлмиш ва Умаршайх Мирзодан тарбиятлар топиб, аммо бир гуноҳ содир этгани натижасида саройдан қувилган Иброҳим сору Ашира қалъасига кириб, Бойсунқур Мирзо номига хутба ўқитди. Ҳазрат подшоҳ бу ишдан хабар топиб, мазкур йилнинг шабон ойи<sup>38</sup>да ғалабага ёр мавкаб Ашира томон ошиқди. Иброҳим сору эса қалъанинг буржу борасини мустаҳкамлашга киришаркан, етиб келган зафар аломатли аскарлар қамал ва уруш-саваш ишига ҳозир бўлдилар ва қўлларини уруш аслаҳалари сари чўзиб, қонли жанг ва ҳалокатли тўқнашув эшикларини қалъадагиларнинг ҳол юзи сари очдилар. Қамал муддати қирк кун давомида шу янглиғ кечди. Иброҳим Сорунинг аҳвол юзида ожизлик ва тушқунлик ҳолаги намоён бўлди. Ноилож, Хожа Қозини ўз гуноҳларига шафе қилиб, омонлик сўради, подшоҳ эса унинг гуноҳидан кечди. Иброҳим бўйнига қилич осиб ва қўлида кафанлик тутган кўйи қалъадан ташқари чикди. Шундан сўнг зафарпаноҳ байроқлар Хўжанд томонга йўналди ва ул қалъада сокин турган Амир Мўгул бин Абдулвахҳоб шиғовул подшоҳлик мавкаби яқинлашгач ва етиб келгач, истиқбол лавозимини

<sup>38</sup> 899 йил шабон ойи – 1494 йил 7 май – 7 июнь кўзда тутилган.

бажаришга шошилиб, ихлос маросимини бажо келтирди ва итоат занжирини елкасига ташлаб, шаҳар ва кўрғон калитларини мақсади ҳосил наввоб подшоҳга топширди. Ўша пайтда исломпаноҳ подшоҳ Султон Маҳмудхон Шохрухияни ўзининг кутлуғ тушиш иззатига мушарраф қилганини эшитди ва ойдин кўнглини илгариги кина-кудуратларни йўқотмок учун улутвор тоғаси мулоқотига мойил бўлиб, Шохрухияга қараб кетди. Хон ул олий шонли хоконларнинг кўзлари нури яқинлашгани ва етиб келаётганидан шоду хурам бўлди. Подшоҳ кўрунушхонага киргач, таъзим ва қутлов лавозимига риоя қилиб, ўрнидан турди ва ул ҳазрат ҳам адаб маросимига амал қилиб, тиззаси билан чўккалади. Сўнг олий мансабли хон исломпаноҳ подшоҳни меҳрибонлик ва ғамхўрлик оғушига тортиб, шафкат онлари ва кўнгил сўраш лаҳзаларидан бир сонияни ҳам холи қолдирмади. Мақтов хислагли подшоҳ икки-уч кун тоғаси суҳбатида қувонч ва хурсандлик билан вақт ўтказди. Шундан сўнг эса давлатининг қароргоҳи томон йўналиш байроғини қилпиратди.

Шунингдек, ўша йилда халифалик ва истиклол дуржининг гавҳари ботир кишиларидан бир гуруҳи ҳамроҳлигида Ўратепани эгаллашга йўналди. Ўтган ҳикояларимиз мазмунидан англашиниб гурганидек, Ўратепа неча йиллар давомида Мирзо Умаршайх Кўрагон девони доирасида бўлиб, тилга олаётганимиз вақтларда Бойсунқур Мирзонинг гумашталари тасарруфига кирган бўлиб, у ерда Султон Али Мирзо ҳукумат юргизарди. Султон Али Мирзо юрт олувчи подшоҳ кўшини келаётганидан хабар топгач, Шайх Зуннунни қалъа муҳофизатига тайинлаб, ўзи эса Фалғар ва Масчо

кухистони томонга ошиқди. Саодатманд подшоҳ қанча манзилларни бо сиб ўтгач, Хўжанддан ўтди ва Султон Али Мирзонинг қочганидан воқиф бўлиб, ҳазрат султоннинг яқин қишиси Амир Низомиддин Али Халифа ва Мир Усмонни элчилик расми билан Шайх Зуннун олдига юборди. Шайх эса бахти қайтганлик ва толе пастилик тақозосига кўра Амир Халифани ушлаб, ул жанобнинг ҳаёти пойдеворини бузмокчи бўлди. Ул яхши хислатли амир эса ҳазрат малики мутаол инояти билан қочиш иложини топиб, икки-уч кундан сўнг пиёда юрганча зафар насабли мавқабга етиб келди. Ўратепа ташқарисида қаъба мартабали боргоҳ ўрнатилгач ва ул худудда ғалла топилмаслиги ва дон-дун ноёб экани маълум бўлгач, амирлар ва давлат устунлари юртга қайтиб кетишни маъкул кўриб ва ҳазрат подшоҳ давлатхоҳлик тариқининг солиқлари маслаҳатига амал қилиб, оти жилловини Андижон томонга бурди.

Шунингдек, ўша вақтда Султон Маҳмудхон Ўратепага чексиз сонли лапқар юбориб, Шайх Зуннун эса қочиб кетди ва Ўратепа хоннинг мулозимлари тасарруфига кириб, ул ноҳия ҳукумати Муҳаммад Ҳусайн Кўрагонга тааллуқ топди. Ўша санадан то 908 йил<sup>39</sup>гача унинг Ўратепада сардорлик айёми давом этди.

Султон Ҳусайн Мирзо Ҳисор вилоятига етишган пайтда Султон Масъуд Мирзодан ажраб чиққан Ҳамза султон ва ўғли Мамоқ султон ва Маҳди султон ва Муҳаммад Дуғлот 901 йилнинг муборак рамазон ойи<sup>40</sup>да Андижон қасабасида жаҳон аҳли подшоҳи Бобур Мирзонинг иқбол ошиёнли даргоҳига

<sup>39</sup> 908 йил – 1502 йил 7 июль – 1503 йил 25 июнь.

<sup>40</sup> 901 йил рамазон ойи – 1496 йил 14 май – 13 июнь.

келдилар. Ул хазрат султонлар иззат-хурматини тутиб, кўрпачадан пастга тушди ва зиёфат лавозими ва меҳмондорчилик вазифасини адо этди. Ўша йилнинг шавволида Султон Махмуд Мирзо ўғилларининг мухолифати ва Султон Масъуд Мирзо ва Султон Али Мирзонинг доруссалтана Самарқандни камал қилгани хабари Андижонга етишди. Олий мартабали подшоҳ ҳам ул ўлкани эгаллаш истаги билан ғалабага элгувчи байрокни хилширатди. Ота-бобосининг салтанат пойтахти Самарқанд шахри яқинига етишгач, шижоат вужудли кўшинни камал ва уруш ишига буюрди. Уч-тўрт ой давомида шахарнинг уч томонидан шараф дуржининг уч дури самарқандликларни каттик сикувга олиш учун тиришдилар. Шахарликлар ҳам шахарни сақлашда кўлларидан келгунча саъй-ҳаракат кўргузиб, даъвогарларга қарши мудофаа курашида мардоналикнинг юксак намунасини намоеън этдилар. Шу аснода олийжаноб ҳидоят насабли хожа Яҳё Султон Али Мирзо олдидан зафар байрокли подшоҳ Бобур ҳузурига ошикиб, бирдамликка келишши сўзларини арзга етказди ва ул мушфикона гаплар қабул қулоғига йўл топиб, подшоҳнинг олий мавкаби жаноб иршодпаноҳнинг илтимосига кўра Самарқанд ташқарисидан Суғд томонга икки-уч фарсах қуйроқка кетиб тушди. Ул тарафдан Мирзо Султон Али ҳам ўша ноҳияга келди ва кўшинни Қухак дарёси бўйидаги қулай мавзегга тушириб, хос кишиларидан тўрт-беш нафари билан подшоҳ мулокотига етиш учун юрди. Ул хазрат хос ёронларидан тўрт-беш киши ҳамроҳлигида Қухак дарёсидан ўтиб, от устида турганча томонлар ўртасидаги мулокот рўй берди ва мулкни эгаллаш чора-тадбири борасида-



ги сўзлар орага солиниб, ўша киш ул олий шавкатли шохзодалардан ҳар бири ўз давлат қароргоҳига қайтиб келиш ва райҳонгу гул-чечакларнинг униб чиқиш мавсуми бўлмиш баҳор фасли бошида эса яна қайтадан Самарқандга юриш қилишга қарор қилинди. Шундан сўнг исломпаноҳ подшоҳ Андижон сари юзланди. Султон Али Мирзо Бухорога кетиб, ўша ерда кишламиш қилди. Амир Шайх Абдуллоҳ барлоснинг кизи мулоқотига ошифта бўлган Мирзо Султон Масъуд эса бу суюқлисини ўз никоҳига киритиб, Ҳисор томонга қайтиб кетди.

Мамлакат олувчи подшоҳнинг байроғи маҳчаси Қосон манзилига етишганда, Маҳди султон нусрат аломатли ўрдудан кочиб, Самарқандга кетди. Ҳамза султон руҳсат сўраб, у ҳам ўша шаҳар сари йўл олди. Бирок бир неча ойдан кейин Самарқандда Мирзо Бойсунқурнинг меҳрибонлиги ва эъзозига эришган бу иккала султон ул ҳазратдан ҳам юз ўгириб, ўзларини Мухаммадхон Шайбонийнинг байроғи сояси остига олдилар [230-б.].

**МАМЛАКАТ ОЛУВЧИЛИК ОСМОНИ  
ДОРО<sup>41</sup>СИНИНГ САМАРҚАНД ТОМОНГА  
ИККИНЧИ МАРТА ЮЗЛАНГАНИ ВА УЛ  
ШАҲАРНИНГ СУЛАЙМОН МАКОНЛИ ҲАЗРАТ  
ПОДШОҲ [БОБУР] ҚЎЛИГА КИРГАНИ**

[231-б.] Осмоний мамлакатлар подшоси<sup>42</sup> қишқи бурждаги тўхтов чўзилишидан юраги сиқилган ҳамда ўз шараф уйи сари йўналиб, феруз рангли калъа ичидагиларни сикувга олишга тиришган кўйи жаҳон олувчилик шартларини бажо келтирган баҳор фасли бошида Султон Али Мирзо шаҳарлар фахри Бухоро шаҳридан ғалаба насабли байроқни Самарқанд сари кўтарди ва неча бир манзил-бекатларни босиб ўтиб, Хожа Кордзан мавзесини лашкаргоҳ қилди. Мирзо Бойсункур ҳам жанговар кишилардан иборат кўшинни шаҳардан ташқарига чиқарди ва Саригулни лашкаргоҳга айлантириб, иниси тўғрисида ўз чодирни куббасини баланд кўтарди. Исломпаноҳ ҳазрат подшоҳ ҳам муборак рамазон ойи<sup>43</sup>да Андижон шаҳридан ул тарафга равона бўлди ва довурак сипоҳ билан манзил-бекатларни босиб ўтиб, Ёзайлоқда осмон аломатли даргоҳ чодирни куббасини кайвон айвонидан ўткарди. Шу мавзеда Бойсункур Мирзонинг Самарқанддан ташқари чиққани ва иниси рўпарасига келиб жойлашгани Бобур подшоҳнинг арз қулоғига етишди ва Тўлунхожа

---

<sup>41</sup> Доро – катта қудудга ҳукмдорлик қилган Эрон подшоси номига ишора: Доролик қилиш «эгаллик қилиш» маъносини ҳам беради. Бу ерда Бобур Мирзо кўзда тутилмоқда.

<sup>42</sup> Қуёшга ишора қилинган.

<sup>43</sup> 902 йил рамазон ойи боши /1497 йил 3 май/ кўзда тутилмоқда.

мўғулни ботир казоқ халқидан уч юзга яқин киши билан бирга олдинроқ юборди. Подшоҳлик мавкабининг яқин етишгани хабари Бойсункур Мирзонинг маҳкам туриш ва барқарорлик пойдеворига ларза солгач, бузилган кўйи Самарқанд томонга ошиқди. Тўлунхожа эса ўзига тобе кишилар билан тунда тўсатдан Бойсункур Мирзо лашкаргоҳига етиб олиб, самарқандликлардан кўгини ўлим яқунли камон ўқи ярасидан майибмажруҳ ва бежону беруҳ қилдилар ҳамда мўл-кўл ўлжа олиб, соғ-сало-мат қайтиш байроғини хилпиратдилар. Ҳазрат подшоҳ давлат тарафдорлиги тариқатининг ул солиқларини соврин ва инъомлар билан сийлаб, қалбларига фахру сарафрозлик бағишлагач, юзни мақсад сари қаратди. Мақсади ҳосиллик ва боши баландлик билан Шерозга етиб келиб, ул қасаба кўрғонини камал қилишга қарор берди. Ўша вақтда Шероз Қосим Дўлдойга қарашли ўлка бўлиб, ул диёр қалъасини Қосим Дўлдойнинг навкарларидан бири кўриқлаб ўтирарди. Мазкур ойнинг сўнгги куни<sup>44</sup> фалакка тегувчи байроқнинг ойчаси Шероз атрофи узра етишув нурини сочди. Қосим Дўлдой кўйган одамнинг эса қалъани сақлашга кучи етмай, пок қалбли подшоҳга нисбатан бўйсунуш ва куллуқ этиш шиорини юзага чиқарди ва қалъа қалитларини осмон иктидорли даргоҳ эгаси наввоб Бобур подшоҳга топшириб, омонлик тилагач, унинг ҳаққида подшоҳона лутф амалга ошди. Шероз қалъаси кутволлиги Иброҳим соруға топширилди. Илоҳий бахт эгаси бўлмиш Бобур подшоҳ эса эртасига ҳайит намозини ўқигач ва ул саид айёмнинг бошқа во-

<sup>44</sup> 902 йил 30 рамазон – 1497 йил 2 июнь.

жибоғу анъаналарини бажаргач, Самарқанд агрофига йўл олди ва Обёр кўруғига бориб тушди. Ўша куниси Қосим Дўлдой, Вайс Логарий, Ҳасан набира, Султон Муҳаммад Сайфал, Султон Муҳаммад Вайс тўрт юзга яқин киши билан Самарқанд гарафдан келиб, подшоҳ мавжабига кўшилдилар. Уларнинг сўзи шу бўлди: Бойсункур Мирзо Сарипулдан кўчиб, шаҳар сари юзланган вақтда биз ҳазрат подшоҳ давлатхоҳлиги учун унинг ўрдусидан ажралиб, бу томонга келганмиз.

Бир-икки кундан сўнг аниқ ва ойдин бўлишича, ул жамоат аслида Шерозни мудофаа қилиш мақсадида Бойсункур Мирзодан руҳсат сўраб, бу томонга шошилган эканлар. Аммо ул қалъанинг кишвар олувчи Бобур подшоҳ тасарруфи доирасига кирганини эшитгач, ноилжлик қадамини мулозимат йўли бўйлаб босишга мажбур бўлишган.

Алқисса, олам подшоҳи Обёр манзилдан Каробулок сари кўзгалди ва бир-икки кундан сўнг у ердан кўчди ва дарёдан ўтиб, Ём тўғрисидаги мавзе галабага ёр қўшиш чодирлари устунни тикилган жойга айланди. Ўша куниси жасурлардан бир гуруҳи Хиёбон йўли бошида Мирзо Бойсункур аскарларидан бир тўпига дуч келиб, кахрамонлик отини кураш майдони сари чоптирдилар ва ҳамла ели билан жанг оловини алангалатиб, бир-бирининг қони билан уруш майдони тупроғини лойга айлантирдилар. Ўша аснода жон олувчи бир ўк Хожа Калонбекнинг акаси Хожагий Мавлоно Садрнинг бўйнига тегиб, ўша лаҳзадаёқ оёқдан қолиб, жаннат боғи сари юзланди. Хожагий Мавлоно Садр бир неча муддат илм ўрганиб, луғат ва ҳисоб-китоб фанидан соҳибни воқиф бўлган эди. Мактубларни ҳам яхши

иншо килур эди ва бир неча муддат Умаршайх Мирзонинг мухрдорлик вазифасини бажарганди.

Бойсункур Мирзога нисбатан душман сифатида келиб, Хожжа Кордзан мавзесида манзил тутган Султон Али Мирзо эса бир-икки навбат мухориба майдонининг довиюракларидан бир тўдаси билан бирга Самарканд якинига юриш қилди. У билан шаҳардан чиқиб келган баҳодирлар ўртасида тўкнашув ва уруш-саваш оловни аланга олиб, бироқ кўзлангани шаклида бирор иши илгари силжимади. Султон Али Мирзо ул жаннат аломатли шаҳар ташқарисида натижасиз узоқ ушланиб қолганидан умидсизланиб, Бухорога қайтиб кетди. Ҳазрат подшоҳ эса Ёмда бир неча кун турган пайтида Самарканд қамалига киришиб, сўнг ул манзилдан кўчган кўйи шаҳаргача тахмин бўйича бир фарсах масофа бўлмиш Хон юрти мавзесини улуғворлик чодирларига макон айлади ва ўша ерда элик кунгача тўхтаб турди. Ўша кунларда бир неча навбат бобурий лашкарнинг довиюраклари билан бойсункурий кўшиннинг жасурлари ўртасида тўкнаш юз берди. Бу урушларнинг айримларида Амир Иброҳим Бекчик, Абулқосим Кухбўр, Амир Шоҳ кавчин ўта шижоат ва чежис баҳодирлик намунасини кўрсатдилар. Самарканд ахлидан бир тўдасини мажруҳ ва берух килиб, устунлик байроғини кўтардилар. Хиёбон бошида мардлик майдони аро жавлон уришган кун Амир Иброҳим Бекчик юзидан яраланди ва шу жиҳатдан кейинчалик «Иброҳим чопук» лакабини олди.

Ўша манзилдан яширин ғалабалар далили бўлмиш подшоҳ айрим самаркандликлар олдига битта чопар юборди ва уларни итоат ва бўйсуннишга чакириб,

иноят коришик сўзларни етказди. Ул жамоат эса ул сўзлар қабулида тилни баёнга чоғлаб «Бобур подшоҳ мавкаби гунда Ғори Ошикон томондан шаҳар сари йўналиши лозим, ўшанда хизмат камарини жон белига боғланса, мақсуддаги нарса қўлга киради» дедилар. Шунга кўра бир окшоми комрон подшоҳ кутлуғ оёғини узангига кўйиб, Пули Мағокка ошиқди. Бир нечта жасурлик аломатли пиёда ва отликни олдинроқ жўнатди. Шаҳар халки бу ишдан хабар топиб, бирданига ботир аскарлардан бир тўпи қаршилиқ оёғига қалқди. Бир неча муддатдан бери соҳибни далил подшоҳ Бобур Мирзо хизматида умр ўтказаётган Ҳожи пиёда ва Махмуд пиёдани ушлаб, ўткир қиличга гирифтор қилдилар. Мақтов хислатли подшоҳ чор-ночор зафар асарли лашкаргоҳга қайтди. Хон юрти мавзеси галаба аломатли байроқлар ойчаси ёғдуси туфайли жаннат ўтлоқларидан ҳам ёруғроқ бўлган вақтда ул ҳудуддаги қалъа ва кишлоқлар халқининг бариси салтанат ошиён даргоҳга чопарлар юбориб, итоат ва фармон бажарувчилик изҳорини қилдилар ҳамда тортиқ йўсини билан кимматбахо совғалар жўнатиб, шу орқали ўз ҳаётлари сари тинчлик ва осойишталик эшикларини очдилар. Шунингдек, Самарқанднинг хунарманду қосиб ва савдогар аҳлидан жуда кўп кишилар галаба шиорли ўрдуга келдилар ва ўрду бозор худди шаҳар каби фаровон ва ободончилик касб этди. Ўша аснода аъло ашраф қулоғига Шовдор тоғининг этагида Ургут деб аталувчи бир қалъа бўлиб, бир тўда кишилар ул қалъани беркитиб, бўйинларини подшоҳга итоат занжири сари эгмай ўтирибдилар, деган хабар етишди. Осмон хашаматли даргоҳ эгаси ул жамоатнинг таъзирини бериб кўйиш

учун ўша томонга йўналди. Ул қалъанинг атрофида зафар шиорли байроқ мохчаси ёришиб чиккач, кўргон аҳолиси тавба-газарру ва ожизлик эшиги орқали чикиб, Хожа Қозини восита қилиб, гуноҳларидан ўтишни сўраб, ялиниб-ёлворишга тушдилар. Ул тойифа ҳақида подшоҳона кечирим амалга ошди. Шундан сўнг зафар аломатли байроқ Самарқанд сари йўналди ва Боғи Майдон навоҳи сидаги Қулба ўлангига бориб тушилди. Ўша орада Самарқанд аҳолиси ва сипоҳидан кўплаб киши шаҳардан ташқари чикиб, подшоҳ лашкаргоҳига яқин ердаги Пули Мухаммад чап кўпригигача жиловни кўлдан чиқармай, ҳамла йўсини билан кела етишдилар. Ваҳолонки, подшоҳлик мавқабининг мулозимлари бул фурсатда ғофил ўлтирган бўлиб, уруш асбобларини ишлатишга тайёр эмас эдилар. Ноилож озгина шикаст рўй бериб, самарқандликлар Султонкули ва Бобоқулини асир олиб, қалъага элтдилар. Эртаси куни мактов хулкли подшоҳ ул манзилдан кўзғалиб, Куҳак дарёси яқинидаги Қулба сайхонлигининг боши зафар насабли кўшян чодирларининг тикланиш жойи бўлди. Самарқандликлар эса «жасоратга тўла Бобур подшоҳ кайтиб кетиш учун ул манзилни ихтиёр этган» деган тасаввурда бўлиб, шу сабабли кўплаб кишилар Шайхзода дарвозасидан чикиб, нусрат нишонли ўрду сари юрдилар ва Мухаммад чап кўпригигача етиб келиб, жанг сафларини туздилар. Подшоҳ кўшини ҳам жасурлик отининг уруш-саваш маҳмизини қаттиқ никтаб, душман устига от қўйдилар ва фитна кўзғовчи найзалару қон оқизувчи қамон ўқлари захми билан қиёмат куни аломатини юзага чиқардилар. Жанг майдонининг қангли тез айланувчи фалак авжига етди ва қуёш

чехрасини қора парда билан тўсди. Қиличу шамширлар шуъласи темир совут йиртувчи баходирлар кўзини хира қилиб «чакмоғининг ёруғлиги кўзларни кетказгудек бўлур»<sup>45</sup> ояти маъносини юзага чиқарди. Ниҳоят фатҳу нусратнинг иси подшоҳлик мавкабининг йиғит-яланлари димоғини муаттар қилиб, Самарқанд кўшини отлари жиловини шаҳар сари бурди. Улардан катта бир тўдаси бахтикарлик арқонига илиниб, қолганлари не бир ҳийла-найранг ва эпчиллик орқасида кутулиб қочдилар. Қўлга тушганлар жумласидан бири Ҳофиз Дўлдой ўгли Муҳаммад мискин ва яна бири Муҳаммад Қосим набиранинг укаси Ҳасан набира эди. Шунингдек, тағин Самарқанднинг ятим ва лавандлари сарбадорларидан бўлмиш Девона жомабоф ва Кал қошук ҳам ўша куни тақдир сарпанжасига асир тушиб, Ҳожи пиёда ва Махмуд пиёда қасоси учун ўлдирилдилар. Бу энгилишдан сўнг қайтиб Самарқанд лашқари шаҳар қалъаси деворидан ташқари чиқа олмадилар. Подшоҳ аскарлари эса дадилланиб, хандакқача борадиган ва шаҳарликларнинг ташқарида ишлаб юрган кулларию канизакларини ўлжа олиб қайтадиган бўлдилар. Ўша аснода оламни безовчи офтоб Мезон буржидан чикди ва куз душмани совуқлик дамани уриб, қўлини боғу бўстон талон-тарожи сари чўзди. Подшоҳ амирлар ва кўшин бошлиқларига қишлоқ юрти борасида маслаҳат солиб, барчасининг кўнгли ушбу қиш Хожа Дийдор кўрғонида яшаб турмоққа, баҳор фасли бошида яна бир бор Самарқандга келиб, қалъа олувчилик шартларини амалга оширмоққа қарор топди. Шундан сўнг

---

<sup>45</sup> Қуръони карим, Нур (24) сураси, 43-оятдан.



кўчиб, мазкур кўрғонга уланган сайхонлик кутлуг кўш ташлаш шарофатидан гардун кўкламзорининг рашк этадиган жойига айланди ва кўрғон ичида уй ва қапа куриш борасида барча бажариши шарт фармон берилди. Фармон ижрочилари буйруқ бўйича амал қилиб, ишлар битказилгач, подшоҳ ва амирлару кўшин аҳли Хожа Дийдор қалъасига кирдилар.

Оламини ёритувчи байроқ ойчаси мазкур манзилдан Хожа Дийдор қалъаси буржига кўчиб ўтган куниси Муҳаммадхон Шайбоний Бойсункур Мирзо сўровига биноан Туркистондан илғор қилиб чиққан паҳлавонлик сулукиннинг солиқларидан бир гуруҳи ҳамроҳлигида ўша сайхонликка етишди. Ҳазрат сулаймонмакон Бобур подшоҳнинг субҳоний тавфикликда ўша куниси қалъага кирганини билгач, ҳайрон қолган кўйи афсус-надоматлар чекди. Ўша вақтда жаҳон аҳли подшоҳи ўз хизматида озгина одами бўлишига карамай, тўкнаш ва уруш асбобини тайёрлашга киришиб, қалъадан ташқари чиқишга қарор қилди. Аммо бахтли тақдир Шайбонийхоннинг уруш майдонига тушмоғига йўл бермай, хон у ердан кўчиб, Самарқанд томонга йўналди. Бойсункур Мирзонинг хондан қутган муддаоси ҳосил бўлмагач, унчалик ҳол-ахволини сўрамади, Шайбонийхон умидсизлик ва ҳайронлик билан йўналиш байроғини Туркистон сари ҳилпиратди.

Шундан сўнг етти ой давомида қалъа атрофидаги сикувда қолиб, қаттиқ қийинчилик билан кун кечирган ва юзи сари шайбоний хонидан мақсади ҳосиллик эшиклари очилмаган Бойсункур Мирзо ўз кўшинидан икки юз-уч юз киши билан бирга Хусравшоҳ мулоқоти томон йўналди. Термиз кечувига бориб тушгач, Султон

Масъуд Мирзога якин қариндошлик нисбати бўлмиш ва ул шаҳарда бошқарув байроғини хилпиратиб ўтирган Саййид Хусайн Акбар босқин-чопқин учун Бойсункур Мирзонинг ўрдуси томон юзланди. Бироқ Бойсункур Мирзо дарёдан кечиб ўтиб, ортда қолган озгина одам устига бостириб келди ва Мирзо Бойсункурнинг чухраси Муҳаммад Тохирни қўлга туширишга муваффақ бўлди. Аскарлари эса озгина пўртални олиб, орқага кайтиб кетишди. Бойсункур Мирзонинг олий мавкаби Кундуз атрофига қўш ташлагач, Хусравшоҳ кутиб олиш маросими ва ниёзу нисор лавозимини бажо келтириб, томонлар ўртасида чиройли бир тарздаги учрашув рўй берди.

Бойсункур Мирзо давлат марказини бўш қолдирган ўша маҳалда саодатга ёр Бобур подшоҳ бу воқеадан хабар топиб, зафар экинли байроқни Самарқанд томон хилпиратди. Каттаконлар ва аҳоли олий мавкаб келаётганидан вокиф бўлишгач, тўп-тўп бир-бири кетидан ва орқама-орқа истикболга ошиқдилар ҳамда олий палосни ўпиш шарафига эришгач, кимматбаҳо тухфа ва муносиб тансуқотларни тортиқ қилиб, подшоҳликнинг турли-туман сийлов ва илтифоти билан сарафроз бўлдилар. Ва ул ҳазрат 903 йил рабиулаввал ойи охири<sup>46</sup>да ота-бобосининг дорулмулкини қутлуғ талъат бахти билан гардун гулшани рашк этадиган жойга айлангириб, Самарқанд қалъасининг Бўстонсаройига қўш ташлади ва мағфират паноҳ соҳибкирон Амир Темур тахтгоҳига саодатли қадами шарофати билан Эрам бўстонидек ям-яшиллик ва тоза-

---

<sup>46</sup> 903 йил рабиулаввал охири – 1497 йил 27 ноябрь – 26 декабрь.

лик бағишлади. Барча ашроф ва каттаконларни Аллоҳ улуғворлиги сояси остида ходисалар офтоби куйдиришидан омон бўлажақларига ишонтирди. Азоб-укубат тагида эзилган, турлук меҳнату захмат қурбони бўлган бечора фукарога адолат ёйиш ва дод сўраш билан умид бағишлаб, золимлар ва зўравонларнинг зулм сарпанжасини уларнинг арз этагига етмас қилди. Бобурий амирларга ҳам имкон борича ғамхўрлик кўрсатди. Шу зайл қудрат байроғи уруш майдони узра омонлик билан кўтарилган кўйи юз кун давомида Самарқанд шаҳри саодагманд подшоҳнинг адолату эҳсони нуридан фирдавсмонанд бўлди. Шундан сўнг, хали куйида баён этмокчи бўлганимиз ишлар сабабли, самарқандликлар бундай бахт давлатидан маҳрум бўлиб, нусрат нишонли мавқаб Андижон томонга юзланди. Чунончи, тез орада ул ҳикоят ҳолати ўқувчи арзига етажак ва ширин сўзли калам бу қисқача баён тафсили борасида саъй-ҳаракат етажакдир [234-б.].

## **МИРЗО БОЙСУНҚУР ВА АМИР ХУСРАВШОҲНИНГ ҲИСОРИ ШОДМОН ТОМОНГА ҚЎШИН ТОРТГАНИ ВА СУЛТОН МАСЪУД МИРЗОНИНГ ОЖИЗЛИК БИЛАН ЎТА ҚАЙГУДА ХУРОСОН САРИ ҚОЧГАНИ ЗИКРИ**

[235-б.] Мирзо Бойсунқур бир неча кун Қундузда истикомат қилгач, Амир Хусравшоҳ ёмғир томчилари миқдордаги қўшин ва кўп сонли сипоҳ билан ул ҳазрат хизматида Ҳисорни эгаллаш учун юзланди. Омуя дарёсидан кечиб ўтиб, Чағониёнга етгандан кейин Султон Масъуд Мирзо олдида гапга чечан

қосидлар юбориб, ҳар хил баҳона ва алдов тили билан «давлат ишида шуниси муносиб кўринмоқдаки, Сиз ҳазрат қалъадан ташқари чиқиб, бу тарафга ташриф буюрсангиз ва укангиз билан бирга Самарканд фатҳини юксак ҳимматингиз ниятига айлантурсангиз. Шуниси аниқким, ул дилга ёқар ўлка эгаллангач, оға-инидан бири мазкур шарафли шаҳарда ўрнашса, яна бирови эса Ҳисорда бошқарув туғини хилпиратса» деган мазмундаги хабарни етказди. Султон Масъуд Мирзо бу сўзларни эшитиб, бундай таклифни рад этиш ё қабул қилиш қарори ўртасида тараддулланиб, душманнинг макру алдовидан ғофил қолган кўйи бу воқеа оқибати борасида уйга толди. Ўша аснода не қилишини билмай қолган бу шоҳзоданинг амир Шайх Абдуллоҳ Барлосни ўз давлатида тўла ихтиёр эгаси этиб, обрў-эътиборини оширганидан кўнгли қолиб юрган амирлар ва ичкилар бир-бир, икки-икки Мирзо Бойсунқур ўрдуси сари кета бошладилар. Бойсунқур Мирзо эса буни бўлажак фатҳу зафар аломати англаб, Амир Хусравшоҳ жиловида Чағониёндан Ҳисор томонга илғор солди ва сахар ноқораси чалинадиган вақтда ул қалъанинг атрофини ўраб олиб, камалга киришди. Ўша тунда Султон Масъуд Мирзо отаси қурдирган Давлатсарой деб аталувчи бинода ётар экан, воқеа нелигидан хабар топгач, қайнотаси Амир Шайх Абдуллоҳ билан бирга қочинга қарор қилиб, Амударёнинг ўмуж кечувидан ўтди. Илгар и зикр этганимиз Султон Хусайн Мирзо Бойқаро билан Бадиуззамон Мирзо уруши содир бўлиб турган пайтда Нишин сайхонлигига етиб, шафқат кўзи диққатига сазовор бўлди.

Хусравшоҳ эса Мирзо Бойсунқурни Ҳисорда



салтанат ўриндигига ўтказиб, Хатлонни ўз укаси Амир Валита берди. Бир неча кундан сўнг Балхни кўлга киритиш ўйида оёғини узангига кўйиб, Назар Баҳодирни манғлой йўсини билан олдинроқ жўнатди. Бу жикоянинг тафсилоти эса ўз ўрнида зикр этилажак, иншооллоҳи таоло [235-б.].

**САМАРҚАНДНИНГ ЗАҲИРИДДИН МУҲАММАД  
БОБУР ПОДШОҲ ДЕВONI ТАСАРРУФИДАН  
ЧИҚҚАНИ ЗИКРИ ВА МИРЗО ЖАҲОНГИРНИНГ  
САРОЙДАГИ АЙРИМ АМИРЛАР ИҒВОСИГА УЧИБ,  
ШУ ҚУТҚУ ОРҚАСИДА ҚАРШИЛИК КЎРСАТГАНИ  
БАЁНИ**

[259-б.] Назм:

Салотине ки кишвар мекушоянд,  
Зи ихвон гуйи давлат мерубоянд.  
Набошад аз хилофи зулмқийшон,  
Ба як минвол доим ҳоли ийшон.  
Ба як наҳзат гаҳе мулк ситонанд,  
Гаҳе дар кори худ ҳайрон бимонанд.  
Самар нушанд гаҳе дар Самарқанд,  
Замоне не самар ёбанд, не қанд.  
Ченин бошад дар аввал ҳоли ийшон,  
Бувад дар ўфту хез иқболи ийшон.  
Вале ёбанд охир сарафрозий,  
Чу султони жаҳон хокони ғозий.  
Заҳириддин Муҳаммад подшоҳе,  
Ки монандаш набуда динпаноҳе.  
Ҳадиве комрони пур таҳаввур,  
Малози мулку миллат Шох Бобур.



*Мазмуни:*

Мамлакат олувчи султонлар,  
Оғо-инидан давлат тўпин олиб кочарлар.  
Бўлмас зулм мазҳабдилар қаршилигидан,  
Ҳоллари ҳеч қачон бир хил.  
Бир юриш билан гоҳо юрт олишар,  
Гоҳида ўз ишларида хайрон қолишар.  
Гоҳи самар-мева ерлар Самарқандда,  
Бошқа вақт на самар топишар, на қанд.  
Бошида бўлар ҳоллари уларнинг шундай,  
Иқболлари доимо юрар уриниб-суриниб.  
Лекин топишар охирида сарафрозлик,  
Мисоли жаҳон султони ғозий ҳокондек.  
Заҳириддин Муҳаммад подшоҳдир у,  
Унингдек бўлмаган ҳеч бир динпаноҳ.  
Мақсади ҳосил жасоратга тўла дили,  
Юрту халқ бошпанаси Шох Бобур.

Ва хўжаста сифатли ул саодатманд подшоҳнинг ахволи кайфияти Самарқандни олгандан сўнг ушбу сингари бўлди: Қамал кунлари чўзилавергач, уруш ва тўқнашувлар ҳаддан ошавергач, самарқандликлар ўта даражада кашшоқлашиб ва камбағаллашиб қолган эдилар. Улардан кўпчилигининг ўзи уруғ экадиган бўнакка зор ваҳар нарса учун қарз кўтаришга тайёр эдилар. Шу сабабли ул жаннат аломатли ўлканинг бу барча аҳолиси ва деҳқонларидан фармони вожиб подшоҳнинг амирлари ва кўшин аҳли кўлига бирон нарса тегиши амри маҳол бўлиб қолганди. Ён-атрофдан ўлка қилиб келинган арзимас моллар эса озгина вақт ичида сарфланиб, бутун бошлиқ кўшинга етадиган бирон нарса қолмаганди.

Барча бажариши лозим бўлган фармонга биноан Ахсида ҳоким бўлиб қолган ва хамиша ёвуз феъллиги зиёдалиги сабабидан фитна кўзғаш режасини қалби саҳифасига ёзиб юрган Узун Ҳасан зафар насабли мавкаб мулозимлари аҳволи ёмонлашганидан хабар топиб, яширинча равишда Самарқандга чопарлар юбориб, амирлар ва сипоҳиларни Жаҳонгир Мирзо салтанати сари ундаган кўйи макру тузоқ эшикларини очди. Ул тоифнинг кўч ва яқинлари Фарғонада бўлгани ҳамда бу каби қашшоқлик сабабли Самарқандда туриш табиатларига мос тушмаганидан ихлос ипини вафосизлик қайчиси билан қирққанча бир-бир, икки-икки Андижон томон юзланиб, Самарқандни ташлаб қочдилар. Хонқули, Баёнқули, Иброҳим Бекчиқ, Султон Аҳмад Танбал қабилар ана шулар жумласидан эдилар. Умуман, барча мўғуллар бу жамоат билан келишиб, қочмоқ қарорини ихтиёр этишди. Мақтов хислатли подшоҳ аҳволни бу янглиғ кўргач, рўй берган бузғунчиликни бостиришга биргалашиб ҳаракат қилишлари ва қочганларни Самарқандга қайтариб, айрим ўжарларининг эса адабини бериб қўйишлари мақсадида Узун Ҳасан эътикод қилувчи Хожа Қозини Ахси томонга юборди. Хожа Қози мақсад-манзилга етгач ва келгани сабабини Узун Ҳасан қулоғига етказгач, Узун Ҳасан ул халқ жамоасига йиғилиш борасида буйруқ берди ва кўпчилиги йиғилгандан сўнг Султон Аҳмад Танбал билан келишган ҳолда подшоҳга нисбатан қаршилик шиорини намоён қилиб ва Мирзо Жаҳонгирни салтанатга тайинлаб, бир чопарни олий тахт пойига жўнатиб, у орқали жасорат тили билан «Доруссалтана Самарқанд саодатманд подшоҳнинг

эгаллаш доирасига кирган ушбу айёмда Андижон шахрининг Жаҳонгир Мирзо девонига тааллуқ топиши муносиброҳ кўринади» деган мазмунда хат юбордилар. Қилни кирк ёрувчи ақли ва доно подшоҳ бу илтимосни икки жиҳатдан қабул қилмади: Биринчиси шуким, ўша пайтда Султон Маҳмудхон ҳам Андижонга кўз тикиб юрар, аммо унинг сўрови Бобур Мирзо томонидан рад этилганди. Шу сабабдан ҳам бу гап сира-сира мақбул тушмасди. Иккинчидан, Султон Аҳмад Танбал ва осмонга етувчи даргоҳнинг кўпчилиқ мулозимлари Самарқанддан Андижонга қочиб кетган маҳалда бу душманларнинг илтимоси қабуллик даражасини топса, узоқ-яқиндаги халқу эл ва турку тожик буни салтанат саройи ва истиқлол эгасининг аҳволи ожизлигига йўйишлари турган гап эди.

Фарғона амирларининг чопари изига қайтиб кетгач, эшитган жавобини бориб уларга етказар экан мухолиф гуруҳларнинг барчаси Жаҳонгир Мирзонинг иззат қароргоҳи бўлмиш Аҳсида тўпланиб, ёғийлик ва исён усулида тугён ясаб, подшоҳга қарши бош кўтарган кўйи Андижон кўшинини юриш сари бошлаб, подшоҳнинг фармони бўйича Андижон томон келаётган Тўлунхожа мўғул устига бир илғор гуруҳини юбордилар. Ул исёнчи тоифа Дуоб ўртасида тўсатдан Тўлунхожа устига етиб келиб, уни ушлаб олганча Узун Ҳасан олдига олиб бордилар ва Тўлунхожа шу онда қатлга етди. Алқисса, Андижон чети Жаҳонгир Мирзонинг ходимлари ва тобе кишиларнинг қодирлари устунлари қокилган жойга айлангач, кишвар очувчи ҳазрат Бобур подшоҳнинг фармонига биноан ул ўлканинг ҳокими бўлиб ўтирган Али Дўст Тағой қалъа





атрофини беркитиб, халк кўнглига тасалли бериш мақсадида қалъа сакловчилик ишлари ва уруш асбобларини тартибга солиш ҳаракатига тушди. Хожа Мавлоно ўша кезде қарамоғидаги хос чорва молларидан ўн саккиз минг бошга яқин қўйни уларнинг лашқари ва тобе кишилари орасида тақсимлаб берди. Камал кунлари узокқа чўзилгач ва Узун Ҳасан, Султон Аҳмад Танбал бузғунчилигининг олови надомат ва пушаймонлик суви билан пасаявермагач, Хожа Мавлоно Қози ва ҳазрат Бобур подшоҳнинг онаси ва бувиси кетма-кет ва тўхтовсиз равишда Самарқандга чопару хат-хабар юбордилар ва ҳаддан ташқари равишда жуда ўтинч ила ғалабага ёр лашқарни бу ёққа жўнатишини илтимос қилиб, ўзларининг ночор ва аянчли аҳволда қолганликларини етказдилар. Шу аснода бузғунчи моддалар замон подшоси баданини қуршовга олиб, тожу тахт эгасининг табиати ўз меъёридан ошиб, оғир бир касаллик фасод эшикларини очди, табиат султони эса мудофаа мақомида собитқадамлик қилиб, беш-олти кундан сўнг ул касаллик пасайиш сари юзланди. Аммо соғайиш айёмида парҳезсизлик рўй бериб, хасталик яна қайталана бошлади ва бу қайталаниш чоғи аҳвол шу даражага бориб етдики, халкнинг ул нури дийдасида гапиришга ҳам мажол қолмади ва касалга қараб ўтирганларнинг ул ҳазратнинг соғайиши умидида лабларига сув томизишдан бошқа имконлари бўлмади. Абдийликка уланган давлат устунлари эса подшоҳ бошидан ўтириб, Самарқанд фуқароларига садақа ва сийловлар улашдилар. Масиҳо нафасли табиблар парҳез ичимлик ва овқат, дору дармон аралашма тайёрлаш билан машғул бўлдилар ва Хизр қадамли солиҳлар тазар-

рую эҳтиёж билан олий мутлак ҳақимдан подшоҳнинг хўжаста сифот зоти сихат-соғлигини тиладилар. Худого шуқр ўша бир неча кундан сўнг казо дорушшифосидан шифо етиб, ер юзи подшоҳининг меъёр коидали мазожи соғайиш сари юзланди, каттик дард эса ул лутфу карам конининг латиф жисмидан узоқлик истаб, мамлакат олувчи ҳазрат даргоҳининг якин кишиларининг шодлик шовқлини кайвон айвонидан ўтиб кетди. Ва ўша айёмда яна қайта Али Дўст Тағой ва Хожа Қозининг муҳолифлар жамоаси ҳақида битилган ва зафар аломатли кўшинни сўраб ёзилган хатлари етишди. Шунга кўра мақсади ҳосил подшоҳ юз кун давомида Самарқанд ўлкасини оламни безовчи талъати шарофатидан Наврўз фаслидан ҳам хуррамрок бир равишда яшнатиб тургандан сўнг йўналиш юзини Андижон томонга қаратди ва мазкур йилнинг ражаб ойи<sup>47</sup>га дахлдор бир шанба куниси ғалаба аломатли байроқларни хилпиратди ва сешанба кунини Хўжанд касабаси саодатманд подшоҳнинг ҳузурини бахтидан жаннати аъло равнақини топди. Ўша онда эса Андижондан бир чопар ҳам келиб қолиб, арз шарафига «бундан етти кун олдин Али Дўст Тағой муҳолифлар билан келишувга эришиб, Андижон дарвозасини уларга очиб берди» деган хабарни етказди. Бу воқеанинг рўй бериш ҳолати шундай эдиким, жаҳон аҳли подшоҳининг касали ўта кучайган пайтида Узун Ҳасан навкарларидан биттаси элчилик йўсини билан олампаноҳ даргоҳга келган бўлиб, амирлар ва давлат устунлари ул ҳазрат соғаймасдан бурун мазкур элчига қайтиш учун

<sup>47</sup> 903 йил ражаб ойи – 1498 йил 23 февраль – 25 март оралиғи.



рухсат берган эдилар. Ул шахс эса замон подшоҳи касалининг ўта авж олгани хабарини Узун Ҳасанга етказди, Узун Ҳасан эса уни Али Дўст Тағой олдига юборди. Ҳалиги одам бориб, воқеани бориचा айтиб берди. Шунга кўра, Дўст Али Тағойнинг чидам ва қарор устунлари ларзага келиб, ярашишга мойил бўлди ва муҳолифлардан бир нечасини Андижон дарвозаси ёнига чорлаб, ўртага қасам билан аҳду паймон сўзини солгач, қалъа ва шаҳар калитларини топширди. Мирзо Жаҳонгир ва ул ҳазратнинг тобеларига Андижонни эгаллаш муяссар бўлгач ва подшоҳликнинг зафар гавдали соябони Хўжандга етишгани хабари тарқалгач, Абдуллоҳ исмли ва илгариги дастур буйича ҳазрат подшоҳ давлати тарафдорлигига тиришиб турган хожа Мавлоно Қозини Арк дарвозаси олдида шаҳид қилиб, ул жанобга қарашли барча яқинлари ва навкарларини туттириб, мол-мулкларини талон-тарож қилиб, золимлик туғини кўтардилар. Ваҳоланки, Хожа Мавлоно Қози валийлик паноҳи ҳазрат Хожа Носириддин Убайдуллоҳнинг тарбия қилган муридлари жумласидан бўлиб, жаноб жалол Ҳақ июнятига бўлган ишончга кўра хавф-хатарга қон кураш майдонларида ҳам ўта журъат ва довиюраклик кўрсатарди. Алқисса, бу қайғули ахбор олий рутбали подшоҳ арзига етишгач, ғаддор замонанинг носоз ишларидан ва жаноб шарият шиорнинг шаҳид этилганидан кўп қайғуриб, неча бир афсус-надомат чеккан кўйи Султон Маҳмудхондан ёрдам сўраш, балки бу султонни чексиз лашкар билан Андижон тарафга юришга ундаш илинжида Амир Қосим қавчинни Тошкандга жўнатди. Амир Қосим қавчин Султон Маҳмудхон мулозиматига мушарраф бўлгач ва ул

ҳазратнинг илтимосини арзга етказгач, хон бу илтимосни ижобат шарафига яқин тутиб, исёнчи муҳолифларни йўқотиш сари юзланди. Кишвар олувчи ҳазрат подшоҳ эса хоннинг олий мавкаби юришга отланганидан хабар топиб, кутиб олиш маросимини адо этиш мақсадида Хўжанддан чикиб, истиқбол учун Оҳангарон сайхонлигида манзил тутмоқ сари ошиқди ва ўша ерда икки бахт юлдузининг бирга порлаб чиқиши рўй бериб, ҳар икки тарафдан бирдамлик ва муҳаббат шартлари амалга ошди. Муҳолифлар бу воқеадан вокиф бўлишгач, Аҳсида йиғилиб, хонлик тахти пойига элчи ва хат юбордилар ва шойиста хизматлар адо этмоқ мажбуриятини бўйинларига олиб, яраш ва сулҳ талабгори бўлдилар. Хон эса Оҳангарон текислигидан Аҳси тарафга равона бўлиб, улуғлар йўлбошчиси Хожа Абулмакорим ва Султон Аҳмад Танбалнинг акаси Иброҳимни элчилик расми билан Узун Ҳасаннинг ёнига юбориб, исёнчиларни келишиш йўли сулуки сари чақирди. Улар эса хон даъватига кўра ихлос изҳорини килиб, ёлғон қоришикли сўзларни тилга олдилар ва хонлик кўшинининг орқага қайтишини илтимос қилдилар. Султон Маҳмудхон ғоятда содда кўнгил киши бўлгани сабабли душманларнинг ясама сўзларига лаққа учиб ва агар яна бир манзил Аҳси сари олдинга кадам босганида ғалаба муяссар бўлиб турган бир маҳалда ёлғон сўзларни қабул қулоғи билан тинглаган кўйи Тошкент томон юзланди. Шунда, подшоҳликнинг олий мавкабидаги кўч ва яқинлари Андижонда қолган мулозимлар ул шаҳар эгалланиши орзусидан умид узиб, тушқин кайфиятда олти юз нафарга яқин киши ул ҳазратдан ажралдилар. Али Дарвишбек, Али Мазид

кавчин, Муҳаммад Боқир, Шайх Абдуллоҳ эшиқоғоси, Мирам Лоғарий ана шулар жумласидан эдилар. Аммо амир Қосим кавчин, Вайс Лоғарий, Иброҳим Сору, Ширам Тағой, саййид Қаро, Амир Шоҳ кавчин, саййид Қосим эшиқоғо, Қосим Ажаб, Али Дўст Тағой ўғли Муҳаммад Дўст, Муҳаммад Али мубашшир, Худойберди тўқчи мўғул, Ёрак Тағой, султон Али Бобо, Пир Дарвиш, Шайх Вайс, Ёр Али Биллол, Қосим Мир охур, Ҳайдар рикобдор Эса икки юздан кўпроқ киши билан улуғлик ва саховат денгизи бўлмиш Бобур подшоҳ хизматида собитқадамлик қилдилар. Ул ҳазрат кўл остидаги мазкур кишилар билан ҳамжихатликда Хўжанд томонга қайтиб келди ва шу зайл бир неча кун вақти жуда ҳам паришонликда кечди. 904 йил<sup>48</sup>и ҳазрат подшоҳ Ўратепа ҳокими бўлмиш Муҳаммад Ҳусайн Кўрагон олдига бир чопар юбориб «Хўжанд жуда тор жой бўлгани учун олий мавқаб ҳодимлари чексиз даражада сиқилиб қолишлари турган гап. Истагимиз шуким, бу киш Соғарж кишлоғида кишлов қилинса» деган хабарни етказдилар. Муҳаммад Ҳусайн бу ишни жоиз кўриб, зафар гавдали байроқ етишув нурини Соғарж узра сочди. Бир неча кундан кейин Иброҳим Сору, Вайс Лоғарий, Ширам Тағой кўшиндан бир гуруҳи билан фармонга биноан ҳар калай ул диёрни эгаллаш хаёлида Ёзййлок сари юзландилар. Уша вақтда Саййид Юсуф Ўғлокчининг акасининг ўғли Аҳмад Юсуф ўз амакисидан бурунроқ ул тарафларнинг волийси бўлган эди.

Алқисса. олий мартабали подшоҳнинг амирлари ва кўшини ўша кишда Ёзййлок диёрида ниҳоятда сайй-

<sup>48</sup>904 йил – 1498 йил 19 август – 1499 йил 7 август.



харакатлар қилиб, баъзи бир қалъаларни қилич зарби, айримларини эса ақту тадбир ишлатиш билан тасарруф доирасига киритдилар. Бу хабар Самарқандга етишгач, хазрат подшоҳнинг Хўжанд сари йўналганидан сўнг ул фирдавсмонанд шаҳарни истило қилишга эришган Мирзо Султон Али Саййид Юсуфни яширинча равишда қудрат фармонли подшоҳ тарафдорлари қаторида тартиб топган бўлса керак деган гумон тасаввурида Хуросон томонга жўнатди. Совуқ мавсуми ва киш фасли охирига етишгач ва «бас сиз Аллоҳнинг раҳмати – ёмғирнинг изларига қаранг: – У қандай қилиб ерни ўлгандан кейин тирилтиради-я!»<sup>49</sup> оятининг ҳақиқати кўриниш бергач, Султон Али Мирзо ҳидоят насабли жаноб хожа Қутбиддин Яҳёдан Соғаржга боришларини ва яхши сийратли подшоҳдан яраш сулҳномасини тузишни сўрашни илтимос қилди. Хожа ул илтимосни қабул қилиб ва олий ҳимматни ярашиш қоидаларини тузиш сари йўналтириб, Соғаржга ташриф буюрди. Пок эътиқодли подшоҳ эса етуклик ва муршидлар асҳоби бошлиғининг шариф қадамини ғанимат санаб, таъзим ва эъзоз пайдан бўлди. Хожа сулҳ ва сафо бобида хожа нимани аъло қулоққа етказган бўлса, қабул иззатига сазовор қилди. Хожа Яҳё муваффақиятга эришиб, Самарқандга қайтиб кетди. Олий мақомли подшоҳ эса Ўратепанинг жануб томонида жойлашган бир яйлоқзорда манзил тутди ва мулкни эгаллаш тадбири борасида боши қотиб, мақсадларни бериши мумкин булган бирон тарафга бориш хаёли иқбол аломатли кўнгли сари йўл топмас ва бул ноҳияда ўтиришдан ҳам

---

<sup>49</sup> Қуръони карим, Рум (30) сураси, 50-оятдан.



муваффақиятга етишув эшиклари хурматли ходимлар рўзгори юзи сари очилмас эди. Мисра: Не ройи сафар кардан ва не руйи иқомат – На сафар қилмоқ қарори бор, на ўтиришга тоқат; Шу аснода подшоҳ давлати тарафдорлари каторида турган улуғлар ифтихори хожа Абулмақорим нусрат аломатли лашкароғҳга келди ва асл зотли подшоҳ мулоқоти шарафини топиб, жоҳу жалол мавкаби мулозимлари бузилиб кетгани сабабидан кайфияти юзига малол чанги ўтириб ва соф кўнгилли подшоҳнинг фатҳу нусрати ниятини килиб, баракатли фотиҳа сўзларини тилида айлантиргач, кетишга рухсат сўради. Ўша куннинг охирида Али Дўст Тағой олдидан мамлакат олувчи Бобур подшоҳ хузурига бир қосид келиб, мақсади ҳосил наввобга: – Али Дўст душман тўдаси билан тил бириктириб, Рустам шижоатли Бобур подшоҳга эса қарши чиққанидан ниҳоятда пушаймондир. Шу сабабли «осмон асосли даргоҳ эгаси ўзининг чексиз лутфи орқасида гуноҳларим ёзуви устига кечирим чизигини тортиб, Марғинон тарафга ташриф буюрсалар, мен эсам хизматкорлик қадамлари билан шаҳрпёрлик мавкабини кутиб олиб, бундан сўнг куллик ва итоат йўлидан ташқари қадам босмай, дея илтимос қилмоқда, – деди. Бу сўзлар сўз мағзини англовчи подшоҳ қулоғига етишгач, кун ботиши пайтида тез суръат ва шитоб билан Марғинон сари йўналди. Йигирма беш фарсахлик масофани икки кеча ва бир кундузда босиб ўтиб, оламни безовчи куёшнинг оқ нузли байроғи машриқ уфқидан кўриниб, умидсизлик бурчагида илҳак ўтирганларнинг меҳнат тунини қувонч ва хурсандчилик кунига айлантирган тонг чоғи подшоҳлик равнақи зафар байрогининг ойчаси

етишув партавини Марғинон дарвозаси узра таратди ва кўрғон дарвозасининг ички томонида унинг қутлуғ кадамини интизорлик билан кутаётган Али Дўст аҳду паймон қондалари амалга ошгач, дарвозани давлат ва иқбол эшиклари каби жоҳу жалол мавкабининг мулозимлари юзи сари ланг очиб, халифа насабли узангини ўпиш шарафини топиб, подшоҳлик иноятига эришди. Подшоҳу амирлар ва кўшин йўл ҳордикларидан тинчигач, барча бажариши лозим бўлган фармонга биноан амир Қосим қавчин зафар ойинли лашкардан бир гуруҳи билан бирга Андижоннинг жанубидаги тоғлик халқини қаршилиқ саҳросидан дўстликнинг катта йўлига солиш учун ўша томонга йўналди. Иброҳим сору ва Вайс Лоғарий ва Сайди қаро лашкарнинг яна бир гуруҳи билан бирга Аҳси сари кетдилар. Уларнинг иақсади Хўжанд дарёсидан ўтиб, ул тарафнинг тоғ халқини итбатга киритиб, бош кўтаришта йўл қўймаслик эди. Амирлар кетганидан сўнг бир неча кун ўтиб, Узун Ҳасан ва Султон Аҳмад Танбал фурсатни ғанимат билиб ва Андижон, Аҳси лашкарини йиғиб, Жаҳонгир Мирзонинг узангисида отлари жиловини Марғинон тарафга бурдилар. Ул қасабанинг бир фарсахлик ерига етишгач, Марғиноннинг шарқий қисмида жойлашган Себиён кишлоғида манзил тутдилар ва қалъа олишлиқ асбобларини тартибга солгач, бир-икки кундан сўнг қалъа сари юзландилар.

Шежоат паноҳли подшоҳ довюраклардан бир бўлаглини муҳолифларга қарши курашиш учун тайинлади ва ул жамоат шаҳардан ташқари отилиб чиқиб, ўк отмоқ ва қилич солмоқ сари билак шимарганча душманларнинг қалъага яқинлашишига йўл қўймадилар.





Андижон жанубидаги тоглик ерларга кетган амир Қосим қавчин ва жангчилар гуруҳи у ерларнинг аймақ-қавмларини тўлалигича эл ва итоатга киритдилар. Аҳси томонга кетган Иброҳим Сору ва унинг дўстлари Поп қалъаси ва яна бир-икки қалъани олиб, ғалаба байроғини ҳилпиратдилар.

Фарғона шаҳри халкининг Узун Ҳасан ва Султон Аҳмад Танбал каби иккита кофир мазҳабли золим ҳукуматидан безор бўлган хоҳ таниш, хоҳ нотаниш кишилари уларга нисбатан юракларига ҳаддан зиёд нафрат ҳиссини туғиб, осмон ғулумли подшоҳнинг аъзам амирлари Аҳси ҳудудида ғалаба аломатли байроқларни баланд кўтариб, қалъа ва кўрғонларни эгаллаш сари киришганларида, Аҳсининг каттақонларидан бири Ҳасан ва Такча номли авбош ва ятимлардан бир тўдасини йиғиб, Аҳсининг тоғдек тош қалъасини беркитиб, Иброҳим Сору ва Вайс Лоғарий, Сайдий Қаро бошлиқ подшоҳ кўшинини ўша ерга киритди. Шу вақт яхши бир тасодиф рўй бериб, ўша вақтда Ҳайдар Али кўкалтошнинг ўғли Банда Али ва Ҳожи ғози *мангит* Султон Маҳмудхоннинг жаҳон аҳли подшоҳи учун ёрдамга юборган лашкари билан бирга Аҳси яқинига етишдилар ва бу хабар Мирзо Жаҳонгир ўрдусида миш-миш бўлиб, Узун Ҳасан маъюс тортиб, қайғуга ботган кўйи шижоат касбли ишончли кишилари ва уруш истовчи довураклардан бир тўдасини Аҳси қалъаси ёрдамига жўнатди. Ул жамоат тоғ пайти, аслида эса ўзларининг бахтсизлик туни чоғи, дарё қирғоғига етишиб, подшоҳ амирлари ва кўшини ҳамда олий мартабали хоннинг нўён ва лашкари қандайлигидан огоҳлик топиб, саросимага туш-

ганча бир бўлаги дарёдан кечиб ўтиш хаёлида яшинга ўхшаш отларга миндилар, яна бир бўлаги эса кема ичига кирдилар. Аммо жанг денгизининг наҳанглари, яъни музаффар тугли подшоҳнинг давлатхоҳлари уларга кемани дарё қирғоғи сари юкорига тортиб, сувдан чиқиб олишлари учун фурсат бермай, балки ул зафар киришимли кўшин яланғоч отларга миниб, тўп-тўп ҳолда худди гўлқиндек дарё суви юзида душман томон сузиб кетдилар. Кема ичида ўтирган душман жамоасининг бундай вазиятда жанг оловини алангалата олишга ҳеч иложлари йўқ эди. Қўлидан келган бир ишлари шу бўлдиким, Каро Бўғоч бахши хийла йўли билан мўғул амирлари автодидан бирини кўлга тушириб ўлдирди. Бу ҳаракат сабабли мўғуллар ул гуруҳни йўқ қилиш бобида олдинидан ҳам кўпроқ равишда ҳаракат қилиб, Узун Ҳасаннинг кўплаб навкарларини қатл балосига дучор қилдилар. Шунинг учун етмиш нафарга яқин довюрак жангчидан фақат беш-олти кишигина қутулиб қола олди, ҳолос. Бу хабар Узун Ҳасанга етишиб, шу заҳоти Марғишон ташқарисидан кўчиб, Андижон сари юзланди. Жаҳонгир Мирзо фармонига биноан ул ўлка волийси бўлиб ўтирган Носирбек воқеа ҳолатини бу янглиғ эшитгач, ул жамоат биносининг ўргимчак уяси-дан ҳам заифроқ. Сулаймон ҳашаматли подшоҳ давлатининг пойдевори эса Искандар тўғонидан ҳам мустаҳкамроқ эканини англаб етди. Ноилож ул ҳазратга куллик шиорини кўрсатиб, Андижон қалъасини беркитди ва бу ҳолни билдириш учун олампаҳоқ даргоҳга бир қосид жўнатди. Бу хабар муҳолифлар қулоғига етишиб, Узун Ҳасан Аҳси сари юриш бошлади. Султон Аҳмад Танбал эса ўзига тааллуқли бўлган Ўш томонга

кўчиб кетди. Мирзо Жаҳонгир ҳам ўша томонга раво-на бўлди. Носирбекнинг элчиси осмонга баробар тахт поясига етишгандан сўнг олий мартабали подшоҳ эр-таси тонг маҳали — ок байрокли жамшид, яъни юлдуз хашамли куёш шарк уфқидан ғарб диёрига юзланган чоғда Марғинондан оти жиловини Андижон томон бу-риб, пешин намози пайти мақсаддаги манзилга етиш-ди. Носирбек ва унинг улуғ ўғиллари Дўстбек ва Ми-рамбек кутиб олиш ишларини бажариш учун ошикиб, эҳтиёж ва сочки сочиш маросимини бекаму кўст адо этдилар. Ўзлари ҳам турли-туман подшоҳона лутф ва эъзозлар топиб, ифтихор ва ғурур бошини самовот ав-жигача кўтардилар. Анча муддатдан бери доно подшоҳ тасарруфидан чиққан дорулмулк Фарғона шаҳри қайтадан ул ҳазратнинг девони доирасига кирди. Бу ойдин фатх эса пайгамбарлар охиргиси хижратининг 904 йили зулкаъда ойи<sup>50</sup>да муяссарлик сифатини топди.

Жаҳонгир Мирзо жиловида Ўш томонга кетган Султон Аҳмад Танбал ул худудга етишгач, қизилоёқ халки хужум қилиб, уларни қалъага киритмадилар. Чорасиз қолиб, кўркув ва умидсизлик билан қайтиб, Ўзганд кўргонига кирдилар. Узун Ҳасан эса Аҳси қалъасига бориб, шу кўргонни беркитди. Музаффар туғли подшоҳ ул томонга кўшин тортди. Узун Ҳасан душманни янчувчи хусравга қарши курашдан ожиз ке-либ, Рустам сифатли амирлар воситасида омонлик ти-лади. Унинг илтимоси ижобат шарафини топиб, қалъа қалитларини кўтарган кўйи мулозиматга ошиқди. Олий мартабали подшоҳ бир неча кун Аҳсида тўхтади ва ул

---

<sup>50</sup> 904 йил зулкаъда ойи — 1499 йил 10 июнь — 8 июль

қасаба ҳамда Қосон қасабаси ишларини бутқариб, тартибу назм бергач, мўғул амирларини инъом ва эҳсонлар билан сийлаб, кетишларига рухсат берди. Сўнг Қосим Ажибни Аҳси доруғалигига тайинлади. **Мисра:** Зафар хаминон, нусрат аз пай равон – Зафар жиловдош, ғалаба эса ортда эргашувчи; бўлиб, йўналиш Байрогини Андижон сари кўтарди. Узун Ҳасан рухсат олишга муваффақ бўлган кўйи кўчи ва яқинлари билан бирга Ҳисори Шодмон тарафга кетди. Навқарларидан кўпчилиги эса ушбу байт мазмунига, **байт:** Зи бедавлат гурезон бош чун тир, Ватан дар кўйи соҳиб давлатон гир – Бедавлатлардан ўқдек узоқлаш, Давлату бахт эгалари кўчасида ватан тут; мазмунига амал қилиб, Узун Ҳасандан айрилдилар ва подшоҳликнинг олий мавқабига кўшилдилар. Шунда амирлар ва ичкилардан бир тўпи жаҳон аҳли подшоси арзига қуйидагича сўзларни етказдилар: - Бу фатаротда Хожа Мавлоно Қозини зулм ва раҳмсизлик қиличидан ўтказган ва подшоҳнинг хос яқинлари молу ашёларини галон-тарожга учратганлар ушбу туз кўр қилгур жамоат бўлади. Улар кимга хизмат учун қўшилган бўлишса, бирор баҳона билан вафо ва аҳду паймон ипини албатта узган ва қулай фурсат топган заҳоти мурувватсизлик оёғини мақр йўлига қўйган кўйи қочиб қолганлар. Булардан ихлос ва садоқат қутмоқ донолар одағига хилоф ва булар дили даласига яқин тутиш уруғини сочиш одоб аҳли табиатига номуносибдир.

### **Байт:**

Зи бадахд чашми беҳий доштан,  
Бувад хок дар дида анболган.



*Мазмуни:*

Вафосиздан яхшилик кутмоқ,  
Гўё ўз кўзига тупроқ сочмоқ.

Агар бугун подшоҳ илгариги аҳду паймонга риоя қилиш фикрида бу тоифанинг қатлу ғоратига рухсат бермасалар, у ҳолда тўғрироғи шуқим, олий фармон чиқиб, ҳақиқий хослардан қай бири улар тасарруфига кирган ўз молида н қанчасини топса, қайтариб олсин!

Шунга кўра ҳукм бўлгач, бу масаладан огоҳлик топган мўғуллар эса яна бир бор адашганлик йўлига кириб, Работак манзилидан Ўзганд тарафга кетдилар ва Танбал олдига бир чопар юбориб, унга ўзларининг подшоҳга қарши ёғийлик ва исёни борасида хабар бердилар. Саодагга ёр подшоҳ ул тутруки йўқ жамоанинг қаршилиқ йўлига кирганини кўргач, улуғ амирлар маслаҳатига биноан Амир Қосим қавчинни сафга безак берувчи кўшиндан бир бўлаги билан бирга ул ёғийлар ёмонлигини орадан аритиш учун тайинлади. Аммо Амир Қосим мўғуллар устига етиб бормасдан олдин Султон Аҳмад Танбал мўғулларга кўшилди. Эртаси кун икки кўшин Кандиобда бир-бирига тўқнаш келиб, уруш ва саваш олови аланга олди ва улуғ тангри тақдири билан Султон Аҳмад Танбал кучлилик қилиб, Амир Қосим қавчин, Али Дўст Тағой, Иброҳим Сору, Вайс Лоғарий, Сайди қаро ва яна ичкилар ва амирлардан тўрт-беш киши жанг майдонидан худо лутфи билан қутулиб чиқдилар. Бошқа амирлар эса тақдир сарпанжасига асир бўлдилар. Али Дарвишбек, Мирам Лоғарий, Амир Тавка ва Тағойбек, Муҳаммад Дўст ва Али Дўст, Амир Шоҳ қавчин, Мирам девона ўша қўлга тушганлар сирасидан эдилар.

Султон Аҳмад Танбал бу иш рўй берганидан яна ҳам дадил бўлиб ва юраги ғурурга тўлиб, Жаҳонгир Мирзо хузурига Андижон атрофига кетди ва Пуштаи Айш мавзесига уланган ва шаҳаргача бир фарсах масофадан узоқ бўлмаган сайхонликка кўш ташлади. Сўнг бир-икки марта уруш сафини ясаб, айш этагида енгилтаклик бошлаган кўйи жанг хаёлида жавлон урди. Андижон ботирлари ҳам душманларнинг жон торларини қирқиш мақсадида шаҳар ташқарисидаги кўча боғлардан ва маҳаллалардан дашту далазорларга чиқдилар ва ёт кўшин аскарларининг Фарғона ўлкаси пойтахти Андижон қалъаси сари яқин келишга йўл кўймадилар. Танбал бир ойга яқин ўша атроф ноҳияда туриб, асир тушган бояги амирлардан Тавқа ва Мирам Логарийни хаёт ўлкасидан маҳрум қилган кўйи жўналиш байроғини Ўш томонга кўтарди. Бу пайтда Ўшда Иброҳим Сору навкарларидан бири волий бўлиб, ул шахс мухолифлар келаётгани хабарини эшитиб, қалъани мустаҳкамлаш ва беркитишга саъй-ҳаракат қилди. Олий мартабали подшоҳ эса шавкат дастгоҳли кўшинни бир ерга йиғгандан сўнг 905 йил муҳаррам ойининг ўн саккизинчиси<sup>51</sup>да Андижондан юриш билан чиқиб, Ҳофизбек чаҳорбоғи муқаррам қадам шарофатидан Эрам гулистонининг рашик ва ғайирлигини оширадиган жойга айланди. Бир-икки кун ўша ерда тўхтаб туриш иши амалга ошиб, ғалаба шиорли кўшиннинг кўл, буронғор, жувонгори уруш ўрмони шерлари билан мустаҳкамлангач, зафар аломатли байроқлар Ўш сари кўзгалди. Бир манзил йўл

<sup>51</sup> 905 йил 18 муҳаррам – 1499 йил 18 август.

юрилгач, саодат эшитишлик кулокка «касоскор мух-  
лифлар Ўш гашқарисидан кўзгалиб, Сарҳанг работи  
сари юрдилар» деган хабар етишди. Аклу хушга кон  
подшоҳ жавшган кийган баҳодирлар билан бирга Ўш  
худудида жойлашган Лот кишлогиданок оти жиловини  
душманларни кувлаш сари бурди. Шу кувлаш мобай-  
нида ул исёнчи ғанимларнинг Андижон томонга қараб  
кетганлари маълум бўлди. Ғалаба аломатли туғ Ўзганд  
атрофига оши киб, мансур черик аскарлари ул ҳудудда  
нимани кўрсалар, барчасини таладилар. Шундан сўнг  
доврук истакли подшоҳ юзини Моду қалъаси томон  
қаратди. Бу қалъа ғоятда метиндек мустаҳкам ва усти-  
вору маҳкамликда машхур, пишик ва баландлигидан  
тилларда достон бўлиб, куш девори тепасигача учиш-  
дан толиқар, қамон ўқи чўккисигача етишдан ожизлик  
қилар, ўткир чангалли хаёл арқони васфи кунгурасига  
ташланишга қалталиқ этар, осмонидаги кушлар Тойир  
юлдузига сирдош ва чуқур хандақи балиқлари ерни  
кўтариб турган хўкиз билан ҳамнафас эди.

### Назм:

Ҳисоре дар бўландий рашки афлок,  
Ба бемислий мисли дар хиттаи хок.  
Забони кунгураш ҳамрози анжум,  
В-зи у қосир каманди ваҳми мардум.

### Мазмуни:

Баландликда фалаклар рашкини келтирувчи  
бир кўрғон,  
Тенгсизликда тупроқ ўлкасида гўё дурри ятим  
МИСОЛ.

Девори чўккиларининг тили юлдузлар билан

сирдош,

Инсон зоти хаёлининг арқони калталиқ килар

унга етишдан.

Ва ўша айёмда Султон Ахмад Танбалнинг Халил исмли кичик укаси икки юз элик нафарга якин тенгсиз курашчан мардлар билан бирга ул қалъада маскан тутган ва қалъа сакловчилик асбобидан канчаси зарур бўлса, шунча микдорда тайёр қилиб қўйганди. Алжисса, Моду қалъасининг ташқариси жанг истовчи кўшин чодирларнинг маконига айлангач, кўрғондагилар қалъа минораси ва девори шинақларидан ўку тош оғишга киришдилар. Зафар асарли кўшин довюралари қалқонларни бошлари узра тутиб, хандак ва ҳокрез томон йўналдилар. Бу томондан ўқларнинг чийиллаган товуши мустажоб дуо каби юкори олам томон ўрлади. Ул тарафдан ҳам ўлим юришли тошлар феруз савашли подшоҳ муҳолифлари иши сингари қия пастлиги сари юзланиб, «каттик коккувчи, у каттик коккувчи недур»<sup>52</sup> маъносини баён қилди. Али Билол ва Ботир кишилардан яна бир гуруҳи ажал ўртоғи тоши остида янчилган эса, қалъа халқидан бир тудаси ҳам сина сандиғини тақдир ўкига нишон қилиб, жондан кечдилар. Куёш феруза ишли осмон қалъасини эгалламок учун йўналган тонг маҳалидан то томошабин юлдузлар зангори ранг пардаси ортидан ул уруш воқеасига кўзлари тушгунга қадар чокқача

<sup>52</sup> Қуръони карим. Ал-қориа (101) сураси, 1 ва 2-оятлардан: (Ўз дахшатлари билан кишилар қалбини) каттик коккувчи (Қиёмат)! У каттик коккувчи недур?!



уруш-саваш ва қамал жанги олови гуруллаб ёнди. Эртаси кунни Халил ва унга тобе кишилар кўрар кўз билан ўз ишларида ожизлик ва тушкунлик аломатларини мушоҳада қилтиб, омонлик сўрадилар. Тўғри аҳду паймонли подшоҳ уларнинг ночорлик ҳолларига раҳм қилганча қамалдагилар конини тўкишдан кечди. Аммо Халилни саксон нафар шижоат аломатли кишиси билан бирга зафар гавдали мавкабнинг душманлар асир олган бир бўлак ходимларга алмаштириш мақсадида кўл-оёқларини боғлаб, бир гуруҳ ишончли кишиларга кўшган кўйи эҳтиёт билан саклаш учун Андижонга юборди. Шундан сўнг Ўш кишлоқларидан бири саналган Обжутава кишлоғи шовкин-суронли аскарлар чодри тикилган ерга айланди.

Андижон томонга кетган Аҳмад Танбал кечаси ўғрилар тариқи бўйича иш тутуб, шаҳар қалъаси тепасига нарвон ташлаб, хийла аркони билан шаҳарга кирмокни мақсад қилди. Андижонликлар эса хонларнинг бу каби ўй-фикридан воқиф бўлиб, қаршилик оёғига қалқдилар. Танбал маънос ва умидсизлик билан Андижондан қайтиб, Сарҳанг работига қарашли кишлоқ ерларидан саналган Оби хон манзилини ўзига лашқаргоҳ қилди. Оби хон эса олий мартабали подшоҳ лашқаргоҳидан бир фарсахлик жой эди. Қирқ кун давомида икки кўшин бир-бири қаршисида ўтира туриб, ҳеч қайсиниси бирор томондан жавлон уриб чиқишга истақ билдиришмади. Албатта гоҳида икки тараф аскарларининг ғалла ва сомон учун у ёқ-бу ёққа ўтиб-қайтиш чоғи бир-бирига тўқнаш келиб, уруш асбобларини ишлатиш сари кўл чўзганларини ҳисобга олмаганда. Бир кун Сайдибек Тағой ана

шундай тўқнаш пайти Танбалнинг одамлари кўлига тушди. Бирок подшоҳнинг шу бекдан бўлак бошка кишисига бирор зиён-заҳмат етмади. Мазкур манзилда Қўчбекнинг отаси бўлмиш ва Мирзо Бойсункур воқеасидан кейин укаларию ўзига карашли кўч билан Қаротегиядан зафарга ёр ўрду сари йўлга тушган Амир Сулгон Аҳмад Қаровул етиб келиб, подшоҳ палосини ўпиш бахтига муяссар бўлди.

Шу гаплар бўлиб турган пайтда касаллик арзи учун Ўшга кетган Амир Қанбар Али ҳам қайтиб келди ва бу икки нафар шижоат паноҳли амир етишгани орқасида шоху сипоҳнинг ёрдамга умид елкаси бақувват бўлиб, шарқ қуёши юлдузлар кўшинига зарба бериш учун нилуфар осмон фазоси узра юриш қилган тонг маҳали ул сарварлик осмони офтобининг зафар табиатли туғи йўналиш юзини муҳолифлар лашкаргоҳи сари қаратди.

Жаҳонгир Мирзо ва Танбал эса жангу жадалга киришдан тийиниб, ниҳоятда шошилишч тезликда қўчиб кетдилар. Шу сабабли уларга карашли чодир ва пўрталлардан бир нечтаси нусрат аломатли кўшин тасарруфига кирди ва ул паришон ҳолли жамоа ташлаб кетган лашкаргоҳ олий маконли подшоҳ келиши шарофатидан жаннат боғлари равнакини топди. Ўша кечаси Мирзо Жаҳонгирнинг Танбал билан подшоҳ турган мавзедан уч фарсах Андижон томон наридаги Хунон қишлоғида манзил тутгани хабари етиб келди. Эртаси куни шарқ қуёши зафар гавдали байроқни машрик уфқидан кўтариб чиққан ва зарҳал қилич зарби билан юлдузлар лашкарини тор-мор қилиб, фатҳу ферузлик садосини олам аро янграган чоғда, яъни:



## Назм:

Субҳ зада хусрави анжум ҳашам,  
Бар уфқи торами хазар алам.  
Кард барун теги зафар аз ниём,  
Гашт равон жониби хайли зуллом.

## Мазмуни:

Тонгда юлдуз ҳашаматли подшоҳ,  
Зангори осмон уфкига байроқ тикди.  
Зафар қиличини кинидан сугурди,  
Зулмкор тўда сари бўлди юриб равон.

Олампаҳоқ подшоҳ зафар дастгоҳли сипоҳни уруш-га тайёрлаш учун юзланиб, бурунғорга Али Дўст Тағой ва мамлакат олишлик ўрмонининг шерлари бўлмиш тобеларини тайин қилди. Жувонғорда Иброҳим Сору, Вайс Лоғарий, Сайди Қаро Муҳаммад Алишер ва Хожа Калоннинг укаси Кичикбеклар шижоат байроғини кўтаришди. Баҳром асарли лашкарнинг ҳировули Мир Қанбар Али бўлиб, у бирдамлик денгизи наҳангларида бир тўпи билан бу хатарли вазифани ихтиёр қилганди. Кишвар очувчи подшоҳ байроғининг ойчаси эса қўшиннинг кўл томон уфкида порлади. Амир Қосим кавчин дарғазаб ва қасоскор баҳодирлардан бир тўпи ҳамроҳлигида ул иқбол қоидали туғ остида душманни несту нобуд қилиш учун юзланиб, равнақ хуршидининг санжоғи шу тартиб ва қоида билан ғанимлар устига равона бўлди. Душман ҳам уруш сафини тузди ва зафарга ёр сипоҳ олдидан чиқиш учун йўлга отланиб, жаннат хаёлини кўрқоклик ҳашақи билан безадилар. Ул икки лашкар Хунон кишлоғининг шарқ ва жану-



би Оралиғидаги Сако деган мавзеда бир-бирига тўқнаш келдилар ва жасурлик самандини ниқтадилар. Қилич ва Ўк зарби, найзаву шамшир захмидан қон хумлари чил-чил синиб, сахро юзини лолазор қилди. Кичикбек жувонғордан душман бурунғори томон чопқин уюштирди ва Хунон кишлоғи атрофини ул дашт гўзаллари қонидан кизил рангга бўяди. Муҳаммад Али Мубашшир ҳам Кичикбек кетича ҳамла қилди ва найза учи билан бир тўда кишининг вужуди нақшини борлик саҳифасидан учирди.

Мирзо Жаҳонгир ва Танбал сипоҳи баҳодирлари ҳам қўлдан келгунча ўлдирдиш ва қон оқизиш ишида тиришиб, уруш чангини тез айланувчи фалак авжиге етказган кўйи куёш ойнасини қора қилдилар. Аммо икбўл хушхабарчиси бобурий мавкаб дилбарларини «ҳақиқатдан ёрдам беражакмиз» хитоби билан сийлаб ва умид бошқарувчиси ул сарварлик осмони куёшини зафар ва устунлик авжиге етказган кўйи душман устидан ғолиб қилди. Мирзо Жаҳонгир ва ёвуз ниятли Танбал ўта ўкинч билан қочмок қарорини ихтиёр қилдилар ва уларнинг қўшинидан жуда кўпи асир тушиб, қочиш уйи сари юзландилар. Ўша куни Хунон кишлоғи дил угирлашда мақсади ҳосил подшоҳ нузули шарофатидан гўзаллар юзидан ҳам неча чандон файз топиб, юрт олувчи ҳазрат у ердан Андижон сари ошиқиб, бир неча кун йўл азобидан етган чарчоғини ёзди. Шундан сўнг ул исломпаноҳ подшоҳ олий мансабли амирлар маслаҳатига кўра, Ўзгандга кетган муҳолифлар озлигини зафар аломатли назарда тутиб, Дармиён ва Нўшон атрофида жойлашган Работ мавзесига қараб юрди. Ўша ерда кишламиш режасини тузиб, мансур черикни душ-

манлар мавзеларини босқин-чопқин қилиш ишига тайинлади. Душман эса музаффар туғли қўшинга қарши чиқишга ожиз келиб, ўша маҳалда лашқар яроқи юзасидан бошқа амирлардан юқори рутбага эга бўлмиш Амир Қанбар Али хаддан ташқари равишда кетишга рухсат тилади ва ўлкаси саналган Хўжанд томонга юзланди. Амирлар ва лашқардан яна икки киши Қанбар Алига тақлид қилиб, ўз уйларига кетишга майл билдирдилар. Макс ади ҳосил наввоб подшоҳ ҳам Андижонга қайтиб келиб, бир неча кунни роҳату фароғатда ўтказди.

Шу воқеалар асносида Султон Аҳмад Танбал бир неча бор Султон Маҳмудхон саройига элчилар юбориб, мадад сўради. Танбалнинг хон даргоҳи олий бўсағасида ҳожиблик мансабида турган акаси Бектелба ҳамда уларга қариндош ва хоннинг ўғли Султон Муҳаммад Хониканинг акаси бўлмиш Аҳмадбек иғво қилиб, Султон Маҳмудхонни шу даражага етказдиларки, Султон Муҳаммадга қўшиб Аҳмадбекни беш-олти минг ханжар санчувчи мўғул билан бирга Танбалга ёрдам бериш учун тайинланади ва улар Арчакент йўлидан Косон атрофига ошиқиб, қамал ва уруш байроғини кўтардилар. Бу хабар Андижонга етиб, жаҳон аҳли подшоҳи совуқ шиддатидан еру осмон орасида ёмғир томчилари уммон дурру гавҳарлари сингари қотиб қоладиган ва ўрдақ қўлидан келса ўзини қабоблик қуш каби бир сизга тортиб, жон матоҳидан кечадиган киши ўртасида Косон сари кўзгалди ва туни билан совуқ ва машаққат ичида йўл юриб, эртаси тонгда Аҳсига қўш ташлади. Ул маъзилда озгина дам олиб, Косон томонга қараб кетди. Нусрат аломатли Байроқ ойчаси ёғдуси

етишиш нурларини ул шахарнинг бир фарсахлик еридан сочган вақт «мўғул қўшини подшоҳлик мавкаби келаётганидан воқиф бўлиб, қайтиш тизгинини ўз вилояти сари бурдилар» деган хабар етишди.

Танбал Косон камалига киришилган ва мақсади ҳо сил подшоҳнинг йўналиш байроғи Андижон томондан қилпирашга тушган куни ўша вақтда қароргоҳи бўлган Янгисавордан Косон томонга илғор солди ва куннинг икки намоз оралиғи пайти подшоҳ ўрдусига яқин келиб, нима воқеа бўй бергани ва ул жанг майдонининг сардорлари ким эканини билиб, хайрон бўлиб қолди. Чунки, совуқ шиддати ва йўл қийинчилигига қарамай шундай қиш пайтида олий мартабали подшоҳнинг қатта қўшин билан бирга орадаги узок масофани босиб, бу каби тезликда етиб кела олишини тасаввур ҳам қилмаганди. Подшоҳнинг муборақ кўзи Танбалнинг мавкабига тушгач, давлат амирларини чақириб, илҳом тили билан «ганимни қарим яратгувчи бу ерга етказди, дарҳол устига бостириб боришимиз лозим ва ишини исталган йўсинда бир ёқлик қилсак» деди. Вайс Лоғарий ва амирлардан айримлари «кун кеч бўлди, худо хоҳласа, эрта тонгда икбол байроғини кўтарамиз ва душманнинг икбол дарахтини тағ-томири билан кўпориш учун етук саъй-ҳаракатлар қиламиз» дея арзга етказдилар. Подшоҳ ул яхши тилакли гуруҳ сўзини қабул қулоғи билан эшитди. Аммо ўша тунда Танбал Архӣён қалъаси томонга қочиб қолди. Эртаси куни шижоат сийратли подшоҳ уни қувлаб бориб, Архӣённинг бир фарсахлик еридаги Ғазнани Намангон манзилини лашқаргоҳ қилди ва қирқ кунга яқин ул манзил подшоҳ чодирининг тикланиш жойи бўлиб

турди. Танбал Аржиёнда оёғини маҳкам тираб, хаёлига келишув ва итоат сўзини сира келтирмади. Шу аснода эса *мажам* халқининг боши ва хайлу хашами ва динору дирами кўплиги воситасида ул кавмнинг калонтари мансабидан оёғини сарварлик тахтига қўйиб, амирлик ва ҳукумат муддаосида юрган Саййид Юсуф дегани Танбал ёнига чопар юборди ва у билан келишув тариқида қадам босмоқчи экани-ю ҳозир Аржиён томон йўлга тушгани борасидаги хушxabарни етказди. Диёнатли ва адолатли подшоҳ бу ёзишмадан хабар топиб, Саййид Юсуфнинг Танбалга ёрдам беришига йўл қўймаслик учун Саййид Юсуф ўтирган манзил сари қўзғалди ва Аржиённинг бир фарсахлик еридан ўртада бир кеча ўтказиб, Пуштихоронга бориб, нурли кўнгил ул қалъани эгалламоққа юзланди. Аммо бу иш амалга ошмасдан бурунроқ Султон Аҳмад Танбал Мирзо Жаҳонгир билан бирга келиб, ушбу кўрғонга кирганди. Подшоҳ қалъа олиш асбобларини тайёрлаш ва тартибга келтириш борасида фармон берди. Ўша аснода Али Дўст ва Қанбар Али Саллоҳ музаффар байроқли подшоҳ кўнглида йўқ фикрга қарши ўлароқ қалъага чопарлар юбориб, яраш сўзини орага солдилар. Мирзо Жаҳонгир ва Танбал бу икки амирдан чиққан ташаббусни эшитиб, жуда хурсанд бўлган кўйи сулҳ иши тайёргарлигига киришдилар. Ғалаба далолатли подшоҳнинг ақл нури тешда ул икки амир иши узра сочилса-да, лекин ичдан улар таклиф этаётган қуйидагилардан иборат тадбирга бутунлай қарши эди. Аммо юзаки бўлса-да, уларнинг илтимосини ижобат билан шараф топтирди. Чунки Али Дўст ва Қанбар Али шу даража эътибор ва қувват топган эдиларки, шу

жиҳатдан айни тобда подшоҳнинг бу икки амир таклиф этаётган гапини қабул қилиши вақт талаби саналарди. Бу сулҳ битими шартлари тубандаги йўсинда тузилганди: Хўжанд дарёсидан то Аҳсига қадар ерлар Жаҳонгир мирзога тегади. Андижон шаҳри билан бирга унга қарашли еру музофотлар мактов сифатли Бобур подшоҳ девонига тааллуқ топади. Танбал ва унга тобелар ўз кўчларини Ўзганддан олиб чиққанларидан сўнг ул шаҳарни ҳам мақсади ҳосил наввоб подшоҳ тасарруфига қолдирадилар. Фарғонадаги ерларнинг олиш-топшириш ва яқину бегонани ўзлари томон огдириш ишлари битгач эса, ака-укалар биргалик ва бирдамликда Самарқанд сари қўшин торгадилар. Ул фирдавсмонанд шаҳарни эгаллашса, юрт олувчи подшоҳ ўша ерда халифалик тахтига ўтириб, Фарғона вилояти бутунлигича Мирзо Жаҳонгирга берилади.

Шундан сўнг Мирзо Жаҳонгир ва Танбал қалъадан ташқарига ошиқиб, юксак маконли подшоҳ мулозиматини топдилар ва подшоҳнинг турлича лутфу ҳар хил меҳрибонлиги билан ифтихор бошини баланд кўтариб, йўналиш жиловини Аҳси томон бурдилар. Подшоҳ худди юрак қутисига киргувчи жон жавҳари каби Андижон сари юриб кетди. Кела солиб, Танбалнинг укаси Халил ва бошқа маҳбусларни банддан қутқарди ва қимматли тўнлар кийгизиб, Жаҳонгир мирзо олдиға юборди. Жаҳонгир мирзо ҳам маҳбусликда ушлаб турган Тағойбек, Муҳаммад Дўст, Али Дўст ва подшоҳлик мавқабининг қолган ходимларига тўнлар иноят қилиб, озодлик руҳсатини берди.

Андижонга келгандан сўнг Али Дўст хайлу ҳашами-ю, навқару ходимлари кўплигича мағрур бўлиб,



манмалик ва жабр туғини баланд кўтариб, такаббурилиги ва ҳаволаиши ҳаддан ошиб, давлат ишларини наввоб подшоҳга айтиб ўтирмасдан ҳал қиладиган одат чиқарди. Ҳатто ул ҳазратнинг яқин кишиларини мақтов сифатли подшоҳ ризосига қарши равишда қайси тарафга кетсангиз тўрт томонингиз қибла деб, руҳсат бериб юборди. Иброҳим Сору, Вайс Лоғарийни ҳеч бир сабабсиз талаб ва мусодара қилиб, уларнинг ҳам халифа аломатлик даргоҳда турмасликларига буйруқ берди. Бу гаплар жаҳонбонлик пойдевори курувчисининг ёғдули қалбига ғоятда оғир келди. Аммо замон талабига кўра бу чоғларда Али Дўстнинг таъзирини бериб қўйишга имкон йўклиги сабабли бир неча кун сабрли ва чидамли бўлишига тўғри келди.

#### **Назм:**

Бесабр гушод кори кам жўй,  
Ҳар кор ба сабр мегушояд.  
Мақсуд ки рух нахуфт аз халқ,  
Ружсор ба сабр мегушояд.

#### *Мазмуни:*

Сабрсиз очган ишда фойда кам,  
Иш фойдаси сабрдан унар ҳар дам.  
Инсондан юз ини бекитган мақсуд,  
Чеҳрасини сабрли кишига очар [270-б.]

## МУҲАММАД МАЗИД ТАРХОННИНГ СУЛТОН АЛИ МИРЗО БИЛАН ЁВЛАШГАНИ ВА СУЛТОН ВАЙСНИНГ САМАРҚАНДУ БУХОРО ТОМОНЛАРГА ҚАЙТГАНИ ЗИКРИ

[270-б.] Олий шаънли Бобур подшоҳ Узун Ҳасан ва Султон Аҳмад Танбал ёвлашгани сабабли худо хижоясидаги Самарқанд шаҳрини саклашдан қўл тортиб, жаҳон олувчи байроқни Андижон томон кўтарган пайтда Бухорода аини шундай кунни орзиқиб кутаётган Султон Али Мирзо Муҳаммад Боқи Тархонга ул ўлка бошқарувини топшириб, ўзи Самарқандга юзланди ва ота-бобоси давлатининг пойтахтига етишгач, салтанат ишлари бошқарувини Муҳаммад Мазид Тархоннинг ихтиёр кафтига қўйди. Шундан Тархон амирлари мўъжаз низомли «дарҳақиқат (кофир) инсон ўзини бой-беҳожат кўргач, албатта тугёнга тушар – ҳаддидан ошар»<sup>53</sup> субҳоний каломдагидек, жуда эркинлик ва дабаба билан бошқарув ўриндигидан жой олишди. Муҳаммад Боқи Тархон Бухоро шаҳри ва музофот молмулки хирожидан бир динор ва бир ман юк ҳам Султон Али Мирзо девонига бермасди. Муҳаммад Мазид Тархон эса Самарқандда давлатнинг барча мулкий ва моллиявий, каттаю кичик барча ишларини ўз қўлига олиб, бошқа амирлар ва ичкилар қўлини султонлик ишларига етишдан қисқа қилди. Балки шаҳардан ундириладиган маблагдан Мирзо Султон Али тирикчилиги учун эҳтиёжига яраша маош тайинлаб, Самарқандга қаршли кўпчилик вилоят ва туманлари молини ўз

<sup>53</sup> Қуръони карим, Алақ (96) сураси, 6 – 7-оятлар.



фарзандлари ва кариндошларига таксимлаб берарди. Ниҳоят, Султон Али Мирзо ичкилардан бир нечтаси билан иттифок бўлиб, Муҳаммад Мазид Тархоннинг қасди пайига тушди. Амирлик паноҳи жаноб Муҳаммад Мазид Тархон бундан хабар топиб, Султон Ҳусайн *арғун*, Хожа Ҳусайн Пир Аҳмад *арғун* ва Узун Ҳасаннинг укаси Қаро Барлос ва яна бошқа тобелари билан биргаликда шаҳардан ташқари чиқиб кетди.

Ўша пайтда Султон Маҳмудхон Муҳаммад Ҳусайн Дуғлот ва Аҳмадбекни жуда кўп мўғуллар билан бирга Хон Мирзо номи билан танилган Мирзо Султон Вайс<sup>54</sup>га ёрдам учун кўшиб, Самарқанд устига юборган эди. Муҳаммад Мазид Тархон эса Хон Мирзонинг келаётганидан хабар топиб, бу воқеанинг рўй беришини ўз давлатининг бахти англаб, ихлосмандлик ва давлатхоҳлик изҳорини билдириш мақсадида бир чопар юбориб, у орқали қуйидаги арзни етказди: Шуниси муносиб кўринмоқдаки, зафар гавдали байроқ жуда тезликда иноят соясини бу диёр худудига солса, токим мақсади ҳосил наввобнинг истаги амалга ошса.

Хон Мирзо масофаларни босиб ўтишда яна ҳам илдамроқ юриб, Шовдор атрофига етишганда, Муҳаммад Мазид Тархон истикбол шартларини бажариб, саховат узангисини ўпиш ва мўл-кўл туҳфаву эҳсонлар билан сийланиш шарафидан боши осмон қадар юксалди. Аммо мўғул амирлари Тархонни унчалик хушламай, эътибор доирасидан четроқ тутдилар. Ҳатто уни талаш ва мусодара этиш вазифасини зим-

<sup>54</sup> Бадахшонлик темирӣ Мирзо Султон Увайс ибн Мирзо Султон Маҳмуд ибн Мирзо Султон Абу Саид кўзда тутилмоқда.



маларига олишни билдирдилар. Айғокчилардан бири эса бу гапни Амир Муҳаммад Мазиднинг хушёрлик кулоғига етказиб, ул жаноб Самарканднинг бошқа амирлари ва уз яқинлари билан бирга Хон Мирзодан айрилиб чикди. Шунга кўра мўғуллар Самаркандни эгаллаш ниятидан воз кечиб. Ёзьялокка кетдилар ва истикомат чодирини тикладилар. Аммо кутилмаганда, Булар касдида илғор солиб Самарканддан чиккан Султон Али Мирзо кўшинининг қораси кўринди. Хон Мирзо ва мўғуллар хаёллари кўчасидан ҳам ўтказмаган бу ҳолатни кўриб, саросимага тушиб, ҳар тоифа бир томонга қараб қочди.

**МУҲАММАД МАЗИД ТАРХОННИНГ ҲАЗРАТ  
ПОДШОҲ [ЗАҲИРИДДИН МУҲАММАД БОБУР  
МИРЗО]НИНГ ҲУЗУРИГА КЕТГАНИ ЗИКРИ ВА УЛ  
ИЛОҲИЙ ЛУТФЛАР НАМОЙИШГОҲИ ҲАЁТИДА  
РЎЙ БЕРГАН БОШҚА ВОҚЕАЛАР БАЁНИ**

Муҳаммад Мазид Тархон Султон Али Мирзодан кўркувдалиги, Хон Мирзо билан эса учрашиб, бироқ мурод эшиклари юзи сари очилмаганидан сўнг илгари вақтларда олий зотли подшоҳнинг Сидра<sup>55</sup> мақомли бўсагаси ходимлари қаторида турган Мўғул Абдулвахҳобни салтанат сайрли тахт поясига юбориб, у орқали «агар фалакка тегувчи соябон етишув соясини бу ҳудуд узра ташласа, камина давлату иқбол каби хизмат камарини жон белига боғлаб, Самарканд фатҳида саъй-ҳаракатлар қилгум ва Сулаймон ма-

---

<sup>55</sup> Сидра (тул мунтаҳо) – жаннатдаги энг баланд дарахт номи.

қонли хазратга куллик исирғасини хуш кулоғимга тақиб, умримни зафарга ёр байроқ остида осойишта ўтказажакмен» дея арзга етказди. Мўғул Абдулвахоб неча бир манзилларни босиб ўтгач, мақсади ҳосил наввоб подшоҳнинг қабул шарафи ва эҳсонлари билан сарафроз бўлиб, Амир Муҳаммад Мазид Тархоннинг ихлос ва давлатхоҳлик гапларини арзга етказди. Шунга кўра олийжаноб подшоҳ Самарқанд томон юришга жазм қилиб, Мўғул Абдулвахобни бу юриш қароридан хабардор қилиб, розилик бериш йўлига солишга ундов учун Жаҳонгир Мирзо олдиға Аҳсиға жўнатди. Ва подшоҳнинг юлдуз мартабали мавқаби илоҳийликнинг чексиз инояти нурлари сақловида 905 йил зулкаъда ойи<sup>56</sup>да мақсад-манзил сари йўналди. Маргинон атрофи нусрат аломатли аскарлар чодирлари устунига айлангач, Қўчибек укалари билан қайҳонга етувчи ўрдуга етишиб, палосни ўпиш иззати билан сарафроз бўлди ва фалакка сургалувчи байроқ Маргинондан Испараға бориб, Маҳая қишлоғи саф ёрувчи қўшиннинг қўш ташлаш жойига айланди ва ул манзилда Қосимбек қавчин, Али Дўст, Саййид Қосим яна улуғлардан бошқа бир гуруҳи билан олампадох даргоҳга келдилар. Ва олий мартабали подшоҳ у ердан дашти Хасбон йўли билан масофаларни босиб ўтиб ва Чўпон кўприги устидан кечиб, Ўратепада осмонга тегар даргоҳ куббасини кўтарди. Ўша манзилда «Муҳаммадхон Шайбоний қуддусий иноят туфайли Муҳаммад Бокий Тархонни Дабусия қалъаси атрофида босиб, ғолиблик билан Бухоро томон юзланибди» деган гап тарқалди.

<sup>56</sup> 905 йил зулкаъда ойи – 1500 йил 29 май – 27 июнь оралиғи.

Олиймиқдор подшоҳ Ўратепадан Сангзорга борди. Ул мавзе доруғаси эса қалъани топширди. Амир Қанбар Али буйрукка биноан ўша кўрғонда қолди. Подшоҳлик мавкаби Юрти хонда манзил тутди. Ўша ерда Амир Муҳаммад Мазид ўзига қарашли самарқандлик тобе кишилари билан бирга келиб қолди ва мўл-кўл лутфу иноятлар билан сарафроз бўлди. Дўстни сийловчи подшоҳ Самарқанд фатҳи борасида ул жамоат билан маслаҳатлашди. Улар эса ушбу сўзларни арзга етказдилар: Ул Худо химоясидаги шаҳарнинг ихтиёр жилови валийлик шиорли жаноб Хожа Қутбиддин Яхёнинг қудрат кўлидадир, ул жаноб эса ўзини мақсади ҳосил наввоб подшоҳ дўстлари жумласидан санайдилар. Агар бу ишни амалга ошириш мақсадида ул ҳидоят оппёнли даргоҳ ҳузурига бир чопар юборилса, истак юзи мақсад ойнасида чехра очиши ҳеч гап эмас.

Шунга биноан мақсади ҳосил подшоҳ ул хатарли иш юзасидан бир неча марта Хожа Яхё олдига сўзга чечан қосидларни юборди. Ҳар гал ул ҳазрат хавф ва умид ўртасида жавоб берди. Сўнг ғалаба аломатли байроқ Юрти хондан кўзғалиб, Дарғам мавзесида шод юрак билан кўш ташлади. Ул манзилдан фалак иктидо даргоҳнинг яқин кишиси Хожа Муҳаммад Али китобдор ўша иш бўйича жаноб ҳидоят шиорли Хожа Яхё олдига бориб, ундан «яхшиси, нусрат аломатли байроқ ойчаси шаҳар четига етишув нурини сочса, шунда бу муҳибингиз дарвозаларни очишга уриниб, подшоҳ кунглидаги истакни амалга ошира олса» деган мазмундаги хабарни келтирди. Фалак ҳашаматли подшоҳ шом вақтига яқин соатда Дарғамдан Самарқанд сари юзланди. Шу ораликда Султон Маҳмуд Дўлдой қутлуғ

мавкабдан кочиb кетди ва шаҳарга бориb, яширин келишув воқеасини наввоб Мирзо Султон Алига айтиб берди. Начора, шу зайл қалб ойнасида акс этиши мумкин бўлган суврат юз очмади.

Бу воқеалар асносида Иброҳим Сору қайтиб келиб, шуниингдек, Али Дўстнинг игвеси касофатидан ҳар тарафга кетиб қолган таниқли амирлардан айримлари ҳам бир-бир, икки-икки бўлиб келиб, Бобур Мирзонинг саодат ва иқбол қабри зафарга ёр мавқабига қўшилдилар ва иноят назарига илинган кўйи Али Дўстга қарши адоват камарини жон белига боғладилар. Али Дўст душманларнинг бир ерға йиғилганидан чўчиб, халифа ошиёнлик даргоҳ наввоби Бобур Мирзодан рухсат сўради ва истаги қабул иззатини топиб, ўз ўғли Муҳаммад Дўст билан Султон Аҳмад Танбал хузурига кетди. Султон Аҳмад Танбал билан булар ўртасида дўстлик қоидалари йўлга қўйилиб, ул ота-боладан кўп ёвузлик ишлари юзага чиқди. Бирок бир-икки йилдан сўнгра Али Дўст ўзининг қора қилмишларига яраша жазога йўлиқиб, казо қўли унинг ҳаёти палосини йиғиштирди. Муҳаммад Дўст эса ўзбек султонларидан баъзиларига топиниб бориб, шу илтижоси орқасида озгина риоят топди. Кейинчалик ул тоифадан ҳам қочиb, Андижоннинг қўхпоя<sup>57</sup>сига келиб, фитна ва бузукчилик оловини ёндира бошлади. Шу сабабли ўзбеклардан бир тўдаси ушлаб олиб, кўзини қўр қилишди.

Алқисса, музаффар туғли подшоҳ ҳар иккаласи ҳам чин душман бўлган Али Дўст ва Муҳаммад Дўстга рухсат бергач, Ғури барлос ўзи билан бирга қўшиндан

---

<sup>57</sup> Қўхпоя – тоғ эстагидаги ерлар, тоғлик.



бир неча кишини олиб, кўрқув нелигини билмасдан, буйрукка кўра, Бухоро томонларда нима гаплигини билиб келиш учун ул диёрга кетувди. У тезда оркага қайтиб, Муҳаммадхон Шайбоний Бухорони эгаллаш ишидан кўнглини тинчитиб, Самарқанд сари йуналган, деган хабарни келтирди. Шунга кўра, ул маконда ушла-ниб туриш маъқул кўрилмай, куёш янглиғ туғ ойча-си Кеш шаҳри сари ҳаракатланди. Чунки соф вужуд-ли подшоҳга куллик килиш занжирини яқиндагина бўйнига ташлаган самарқандлик амирлардан айрим-ларининг кўч ва яқинлари ўша ерда яшаб турганди-лар. Ана шу чоғда кутилмаганда, Султон Али Мирзо Худо химоясидаги Самарқанд шаҳрини Муҳаммадхон Шайбонийга топшириб, хон даргоҳига борибди ва бу ҳаракатини давлати дастгоҳининг кучайиши англабди, деган хабар келиб қолди.

Энди сўз тартиби тақозоси шуқим, дастлаб Му-хаммадхон Шайбоний аҳволдан бир бўлагини баён доирасига киритиб, ана шундан сўнг эса ҳикмат бит-гувчи калам мақсади ҳосил Заҳириддин Муҳаммад Бо-бур подшоҳ аҳборининг давомига тил очса. Ёрдам ва тавфик Аллохдандир.



**АБУЛФАТҲ МУҲАММАДХОН ШАЙБОНИЙ  
ҲАЁТИ БОШИДАН ТО БУХОРО ВА САМАРҚАНД  
ШАҲАРЛАРИНИНГ УЛ ЖАҲОНБОНЛИК  
ПОЙДЕВОРИ ҚУРУВЧИСИНИНГ ЭГАЛЛАШ  
ДОИРАСИГА КИРГАНИ ЗАМОНИГАЧА КЕЧГАН  
ВОҚЕАЛАР БАЁНИ ЗИКРИДАГИ ГАПЛАР**

Маънавий фазилатлар эгалари ва сўзамоллик назмига тартиб берувчилар узлуксиз ахбор ва асарлар мўллигидан шундай таҳқиқ қилганларки, Муҳаммадхон Шайбоний Шох Будоғ Султон бин Абулхайрхон ўғли Жўжихон улуси хоконларидан мартаба ва ҳашамат, шавкат ва улуғлик жихатидан устун бўлиб, ҳаёти мобайнида ҳамиша давлат ва икбол етуқлиги билан салтанат ва истиклол байрогини қилпираган. Илгари ёзиб ўтганимиздек, Султон Саид Мирзо бин Султон Абу Саид ул олий шонли хон ёрдами шарофатидан Самарқандни фатҳ этган. Ва мансур хокон Абулғози Султон Хусайн Мирзо ундан мадад сўраган пайги вафоти рўй берганди. Муҳаммадхон Шайбонийнинг онаси Оқ Кўзибегим бўлиб, хон 855 йил<sup>58</sup>и туғилган. Қобилиятли бу ўғли болалигидаёқ отаси Шох Будоғ Султон вафот этиб, тупроқаро маскан тутгач, бобоси Абулхайрхон невараси тарбиясини ҳиммат бўйнига олиб, унга отабеклик қилиш мансабини илгари Будоғ Султоннинг ҳам атқаси бўлган Уйғурбой Шайхга топширди. Абулхайрхонни ваъдасига вафодор ажал охират оламига олиб кетган вақтда ўзбек амирларининг катталари қаторидан жой олган Карочинбек

<sup>58</sup> 855 йил – 1451 йил 3 февраль – 1452 йил 22 январь.

Муҳаммадхон Шайбоний ва унинг укаси Махмуд Султон аҳволига қаровчиликни ўз зиммасига олиб, ул шоҳзодани Ойбокхоннинг Шайх Ҳайдархон устидан эришган галабасидан кейин шавкати устунликда Дашти Кипчоқдаги султонлар қатгалари жумласидан саналган Қосим Султон олдига олиб борди. Қосим Султон уларни ўз амир ул-умароси бўлмиш Темурбекка топширди. Ўша пайтда Ойбокхон ва Аҳмадхон қатта кўшин билан Қосим Султоннинг вилоятларини босиб олиш учун йўналдилар. Қосим Султоннинг эса ул сон-саноксиз кўшинга қарши урушга қучи етмаганидан Ҳожи Тархон қалъаси<sup>59</sup>га беркинди. Ойбокхон ва Аҳмадхон ул мустаҳкам қалъани узук қошидек ўртага олишди. Муҳаммадхон Шайбоний ва укаси Махмуд Султон Қарочинбек ва қадимий мулозимлардан қирк нафар киши билан биргаликда бир кечаси ўзини душманлар кўшинига урдилар ва сахар чоғигача қилгичу найза ва ханжарларни ишга солиб, бир томондан ёриб чиқиб кетдилар. Муҳаммадхон Шайбонийнинг жаҳон олиш ва юрт эгаллаш муддаоси бўлгани сабабли мазкур воқеадан кейин ўзбек амирлари ва аскарларидан бир тоифасини ўзига эргаштириб, ҳар неча кунда бир марта соҳиби шавкат султонлардан бирининг вилоятига ҳужум уюштириб юрди. Унинг бу иши то Саброн ҳудудида ўша ер ҳокими Эронжихон бин Бекхондан қаттиқ мағлубиятга учраб, Бухорога қочиб кетгунга қадар давом этди. Ўша кезларда Бухоро шаҳрининг ҳокими булиб турган Абдулали Тархон Шайбонийхонга иззат-икром кўрсатиб, лойиқ тухфалар

---

<sup>59</sup> Ҳожи Тархон. Аштархон – ҳозирги Астрахань.



ва қимматли совғалар тортиқ қилди. Сўнг Самарқандга Султон Аҳмадхон хузурига бир хаг жўнатди ва Султон Аҳмадхон ул жанобнинг келгани воқеасини эшитгач, ул нома жавобида фармон битиб, хонни кўришга ўта иштиёқманд эканини билдирди. Хон Самарқандга чакирилгач, Султон Аҳмадхон уни жуда яхши кутиб олди, зиёфат берди ва меҳмонни сийлаш расмини адо этди. Шайбонийхон бир неча кунни ул фирдавсмонанд шаҳарда осойишта ўтказиб, тагин Бухорога қайтиш истагини изҳор қилди ва Абдулали Тархонга қўшилиб, ул ўлкага қайтиб кетди. Унинг Бухорода тўхтаб туриши эса икки йилга чўзилиб, сўнг ўзи туғилиб-ўсган ота ватани сари юзланди. Хонликнинг туғи манжуқи етишув нурини Арқуқ қалъаси худудига сочгач, ул кўрғоннинг бошқа сўзи қатъий кишиларига караганда юқоринок мартабага эга бўлган Қози Бекчик итоат занжирини бўйнига ташлаб, қалъа калити ва ул ўлка аҳолисидан бир тўдаси билан бирга хон хузурига ошиқди ва муносиб тортиқ ва совғалар ўтқариб, хон ёнидаги кишилар қаторидан ўрин олди. Шайбонийхон Арқуқдан Сигноққа бориб, ул қалъани ҳам олди. Бир неча кундан сўнг Дашти Кипчок амирларининг энг каттаси саналган Мирзо Ака олдидан чопар келиб, унинг «агар хоннинг кишвар очувчи байроғи етишув соясини бу диёр узра ташласа, камина хизматкорлик мақомида туриб, ул ҳазратни хонлик тахтига чиқарардим ва менинг ушбу мустаҳкам аҳдимга муносиб равишдаги етук ихлос ва қуллик расмини адо этардим» деган сўзларини арзга етказди. Шайбонийхон бу сўздан сўнг ноилож ўша ёққа кетишга қарор қилиб, мақсад сари равона бўлди. Даштга етишгач, Мусо Мирзо истиқбол расми ижроси



учун ошикиб, эъзоз ва таъзим шартларидан ҳеч бирини унутмай, ҳар бирини мукаммал равишда адо этди.

Ана шундай бир пайтда Дашти Кипчокнинг мутлак ҳокими Бурундукхон сон-саноксиз лашкар билан Шайбонийхонни йўқотиш сари юзланди. Қўшин етишгач, икки ўртада уруш бошланиб, фатху ғалаба ёғдуси Муҳаммадхон Шайбонийнинг байроғи ойчаси юзига ёғилди, Бурундукхон эса ўз манзили сари қочиб кетди. Шундан кейин Шайбонийхон Мусо Мирзодан вадасига вафо қилишини сўради, Мусо Мирзо бунга ўз амирлари ризолиги йўқлиги важдан, хоннинг бу ғалабини бажаришдан бош тортди. Шу сабабли ул жаноб Сяғноққа қайтди ва бир-икки навбат Шайбонийхон билан Саврон ҳокими Султон Маҳмудхон бин Жонибек хон ўртасида тўқнаш ва уруш-саваш рўй берди. Охирги мартасида Шайбонийхон енгилиб, оти жоловини Манқишлоқ томонга бурди. Манқишлоқдан эса Хоразм йўли билан Бухоро сари юзланиб, Хоразм атрофига етишгач, ҳокони мансур Султон Ҳусайн Бойқаро томонидан ул шаҳар волийси бўлиб ўтирган Амир Носириддин Абдулхолик Ферузшоҳ совға ва тортиқлар тайёрлаб, хизматкорлик йўлининг солиқи бўлди. Шайбонийхон Хоразмдан Қаробиг кўл, Қаробиг кўлидан Бухорога ошиқди. Амир Абдулвали Тархон олдинги ғалдагидек дастур билан ихлос шартлари ва ихтисос маросимини бажо келтирди ва ул жанобни ўзига қўшиб. Самарқандга олиб борди. Султон Аҳмад Мирзо хоннинг қаддини ўзининг жаҳонбонлик қудрати ортисига боис билиб, инъом ва эҳсон эшиқларини хон ҳаёти юзи сари очди. Сўнг Мўғулистонни эгаллаш учун йўлга тушиб, олам олувчи ул хонни

хам ўзига ҳамроҳ қилган кўйи Тошкент устига юрди. Шохрухия атрофига етишгач, Самарқанд кўпинининг хировул қисми бўлган Шайбонийхон Мирзо Султон Аҳмаддан хавфсираб, Тошкент томонга қочиб кетди ва Султон Маҳмудхон билан учрашиб, унинг давлати этагидан осилди. Султон Аҳмад Мирзо ноилож бузилиб, оти тизгинини Самарқанд томон бурди. Шайбонийхон эса озгина вақт Тошкентда туриб, сўнг у ердан Арқук қалъасига йўл олди. Ул худуднинг қалъаларини мустаҳкамлаб, Сигноқка кетди. Шундан сўнг бир-икки навбат Бурундукхон Сигноқ сардорларидан бир гуруҳи ва Туркистон шаҳар ва қалъаларининг баъзи бир қишилари билан бирга лашқар тортиб, Шайбонийхоннинг иқбол ниҳолини кўпориб ташлашга қасд қилди. Аммо тақдир келажакда Шайбонийхоннинг бир неча вақт Мовароуннаҳр ва Хуросон юрту шаҳарларига мутлақ ҳоким бўлишини тақозо қилган эканки, Бурундукхоннинг истагани юзага чиқмади.

Шайбонийхон қулай фурсат топиб, Хоразм фатҳи сари юзланди. Зеро бу пайтда Хоразм ҳокими Амир Абдулҳолик Ферузшоҳ олий мартабали ҳокон Султон Ҳусайн даргоҳига Хиротга кетган бўлиб, ўз мулозимларидан бирини Хоразмда ўринбосар қилиб қолдирганди. Шайбонийхон ул шаҳарга етишгач, бир неча кун камал ишларини амалга ошириб турди. Бироқ ҳокони мансур топшириги бўйича хоразмликларга ёрдам учун юборилган Амир Абдулҳолик, Амир Муҳаммад Валибек ва Амир Бехбуднинг яқинлашиб қолгани хабарини эшитгач, у ердан кўзғалиб, Булдумсоз кўргони атрофига кетди ва ул қалъа аҳолиси билан сулҳга эришиб, озгина тортиқлар олгач, Вазир шаҳри сари йўналди.

Бу калъа атрофида Хуросондан келган кўшин билан бир-икки кун уруш-саваш ясаб, собиткадамлик килди. Аммо иши юришмагач, у ердан Адоқ калъасига кетди, Адоқдан эса Астробод сари йўл олди. Ул шаҳарнинг теварак-атроф худудига боскин-чопкин уюштириб, сўнг йўналиш байроғини мулозимлари кўли остида бўлган Тирсак калъаси томон ҳилпиратди. Шундан кейин Муҳаммадхон Шайбоний илтимоси билан Султон Маҳмудхон Ўтрорни Шайбонийхон тасарруфида қолдириб, ўзи оти жиловини Тошкент сари бурди.

Ўша маҳалда Саброн аҳолиси Шайбонийхон давлатига тарафдор чикиб, ўз доруғаси бўлмиш Қулмуҳаммад Тархон бин Муҳаммад Мазид Тархонни калъадан чиқариб юбордилар ва шаҳар калъаси калитини Маҳмуд Султон олдига жўнатдилар. Ул жаноб Саброн кўрғонига кирди. Шунингдек, Туркистон шаҳарларининг барча халки кўнгилларини ул икки ака-укага тобе бўлиш сари қаратдилар. Аммо ўша вақтда Бурундукхон Амир Муҳаммад Мазид Тархоннинг куткуси билан Саброн устига кўшин тортди, Саброн аҳолиси эса сабрсизларча чидам ва токат тизгинини қўлдан чиқариб, қалонтарлардан бир тўдаси қутилмаганда ёпирилиб келиб, Маҳмуд Султонни ушлаб олдилар ва қалъани Бурундукхонга бериб, Маҳмуд Султонни ўша давр султонлари ичида энг эътиборлиси бўлган Қосим Султонга топширдилар. Қосим Султон уни кишанга солиб, ишончли одамлардан бир гуруҳига кўшган кўйи Сузоқ калъаси томонга жўнатди. Маҳмуд Султон эса бир кечаси кулай фурсатини топиб, қочиб кетди ва Ўкуз тоғига етиб олди. У ердан бу воқеани билдириш учун акаси олдига чопар юборди, Шайбо-

нийхон эса мазкур тоққа бориб, укаси билан учрашди. Ака-ука жиловдош бўлган кўйи Ўтрор сари ошиқдилар. Айни ўша вақтда Бурундуқхон ва Муҳаммад Мазид Тархон ҳам Ўтрор томон юриб, Шайбонийхон улардан ўзганча келиб, Ўтрор қалъасига кириб беркинди ва бир неча кеча-кундуз давомида қамалдагилар билан Дашти Қипчок лашкари ўртасида тўкнаш ва уруш-саваш эшиклари очилиб, урхо-ур, улдирхо-ўлдир садолари осмоннинг феруза рангли кўрғони айвонидан ошди. Ниҳоят, Султон Маҳмудхон томонидан юборилган ёрдам кучлари Ўтрорга етиб келиб, натижада Бурундуқхон сулх битимига кўнишга мажбур бўлди ва Ўтрор атрофидан кўчиб, юзини ўз диёри сари қаратди. **Миерз:** Ба шахри худ раваму шахриёри худ бошам – ўз шахримга борай-да, ўз юртим шахриёри бўлай.

Ўтрор шахри гулзори Бурундуқхон кўшини хас-хашақи ва тикани озоридан тозалангач, Шайбонийхон Муҳаммад Мазид Тархоннинг қудрат қароргоҳи бўлган Ясси шахри томон лашкар тортди. Амир Муҳаммад Мазид эса хонлик мавкаби олдига урушгани чиқиб, Маҳмуд Султон шайбонийнинг қўлига асир тушди. Султон уни Ўтрорга элтиб, хибсда тутди. Султон Маҳмудхон бу воқеадан вокиф бўлиб, Ўтрор сари ошиқди ва Амир Муҳаммад Мазидни Шайбонийхондан сўраб олиб, Мирзо Султон Аҳмаднинг қизини ўзи учун сўрашда воситачи килиб Самарқандга совчиликка жўнатди.

## МУҲАММАДХОН ШАЙБОНИЙНИНГ САМАРҚАНД ВА БУХОРО ТОМОН ЮРИШ ҚИЛГАНИ ҲАМДА УЛ ИККИ ШАҲАРНИНГ СУБҲОНА ВА ТАОЛО ХУДО ТАҚДИРИ БИЛАН ХОН ҚЎЛИГА КИРГАНИ ЗИКРИ

Султон Маҳмуд Мирзо ўғиллари ўртасидаги карама-каршилиқ ҳамда Самарқанд ва Бухородаги ахволнинг парижонлиги хабари Муҳаммадхон Шайбоний қулоғига етишган 905 йил<sup>60</sup> да бу ўзбек хони Мовароуннаҳр шаҳарларини босиб олиш тамасига тушиб, замон ботирларидан бир гуруҳи ва бошдан-оёқ ғазаб ва қасос ҳиссига тўла қўшин билан оти жиловини ул томонга бурди. Султон Али Мирзо дала-даштда урушга кучи етмагани учун шаҳарда камалиб, кальанинг буржу борасини мустаҳкамлашга киришди. Шайбоний хони эса Самарқанд ташқарисида чодир ва ўтов куббасини баланд ясаб, ўн кунга яқин шу ерда туриб, кейин ботирлардан иборат катта бир гуруҳ билан Шайхзода дарвозаси сари бориб, пистирмада яширишиб ётган кўйи жасурлардан бир бўлагини олдинроқ юборди. Самарқанддан ҳам қўшин ва оддий халқдан мард кишилар ташқари чиқиб, ўзбеклар устига ёпирилдилар. Улар эса уруш майдонидан ёлғондакамига қоча бошлаб, орқага чекинган кўйи самарқандликларни қалъа ёнидаги кўчабоғлардан кенг дала-дашт сари эргаштириб чиқдилар. Шундан сўнг Шайбонийхон мавкаби баҳодирлари пистирмадан отилиб чиқиб, душман устига ташландилар ва улардан кўпининг ишини бир ёқляк қилдилар. Шайбонийхон ул жамоатдан

<sup>60</sup> 905 йил – 1499 йил 8 август – 1500 йил 27 июль.



қолганларини қувлаб бораркан, то Шайхзода дарво-  
засигача ғаним қишиларини ўлдириш ва чопиш би-  
лан машғул бўлди. Сўнг Чаҳорроҳа дарвозаси томон  
от солди ва ул ерда ҳам жангу саваш шартларини адо  
этиб, Самарқанд аҳолиси устидан ғалаба қозонди ва  
музаффару мансур оти жиловини ўз қароргоҳи томон  
бурди. Шу воқеа асносида Амир Нур Саид билкут  
ўғли Амир Муҳаммад Солиҳ хонлик даргоҳига ке-  
либ, палосни ўпиш саодатини топгач, Бухоро ҳокими  
Муҳаммад Боқи Тархон ўн мингта яқин пиеда ва суво-  
рийни йиғиб, Султон Али Мирзога ёрдам йўсини билан  
йўналиш байроғини бу томон сари кўтарганини айт-  
ди. Шунга кўра, Муҳаммадхон Шайбоний Самарқанд  
атрофидан кўчиб, юзини Амир Муҳаммад Боқи Тар-  
хон лашқаргоҳи томон қаратди ва Дабусия қалъаси  
ташқарисида икки тараф ўртасидаги қаттиқ уруш рўй  
бериб, қуддусий ҳазрати таоло инояти билан шайбоний  
хонига фатҳу зафар насиб этди. Амир Муҳаммад Боқи  
Тархон эса обнусий рангли чарх гардишидан жанг май-  
донида ўз душманидан енгилиб, Дабусия қалъасига  
кириб беркинди. Ўзбеклар эса бу урушда ҳаддан зиёд  
кўп жанг ўлжасини қўлга киритдилар. Шундан сўнг  
Муҳаммадхон Шайбоний Бухоро томонга йўналди  
ва шаҳар четига етгач, камал иши ва урушни бошлаб  
юборди. Бухороликлар уч кунгача шаҳарни саклашга  
эришиб, тўртинчи куни эса Мавлоно Муҳаммад Али  
Хоразмийни тортиқ ва совғалар билан ташқарига юбо-  
риб, итоат ва бўйсунуш изҳорини тилга олган кўйи  
омонлик тиладилар. Жаноб мавлавийнинг шафоати во-  
ситасида уларнинг бу сўрови қабуллик иззатини топиб,  
Шайбонийхон бухороликлардан қасос олиш ниятидан

воз кечди. Шундан кейин саййидлар, козилар, мавлонолар, уламо ва аслзода шариф кишилар ҳамда аҳоли шаҳардан ташқари чиқиб, хон қўлини ўпиш шарафига эришдилар ва шу тариқа хонга Бухоро фатҳи мурасар булди. Муҳаммадхон Шайбоний ул шаҳарнинг ҳукумат юргизиш мансабини Амир Муҳаммад Солиҳга топшириб, йўналиш юзини Самарқанд сари ўтирди. Тотканд қишлоғига етилган чоғда Бухородан Амир Муҳаммад Солиҳнинг чопари хат келтириб қолди. Хатнинг мазмуни шундай эди: «Амир Муҳаммад Боқи Тархон Дабусия калъасидан Қарши шаҳри томонга кетгач, Бухоро улуғлари Қаршига хат ва элчилар жўнатиб, унга Бухоро шаҳри ва калъасини топшириш умидини бағишлабдилар. Шунга кўра, бу томонга юзлансангиз, қолган гаплар эса олий ақлингизга ҳаволадир». Шайбонийхон бу хабарни эшитгач, қайтиш жиловини Бухоро томонга тўғрилади. Ул атрофга яқинлашиб қолган Амир Муҳаммад Боқи эса Қаршига қайтиб кетди. Шайбонийхон шаҳар атрофини зафар аломатли байроқлар маркази килиб, аскарлар ул шаҳар аҳолисининг барча мол ва буюмларини бир қолдирмай, талон-тарожга учратсинлар, деган буйруқ берди. Ўзбеклар зулм ва раҳмсизлик ўтини гуруллатиб, хонадонлар бошидан тутун чиқардилар. Душманлар тутун осмон чўққисига етиб, кўпчилик бухороликларни таладилар. Шундан кейин Шайбонийхон Бухоро шаҳрбанди учун қўйилган ғов ва тўсиқларни бузишга фармон берди ва ул ҳукумат жиловини ўз укаси Маҳмуд Султоннинг қудрат қўлига топширди. Сўнг баланд химмати арқонини Самарқандни эгаллаш кунгураси устига отди ва шижоат қондали сулгонлару амирлар гуруҳи ва довюрак

Ўзбек ва мўғул кўшинидан бир бўлаги билан ул фохира шаҳар четига бориб, қалъасини марказдек ўраб ўртага олган кўйи чодир ва ўтов ва саропарда ва боргоҳни қайвон айвонига етказди. Хон Самарқандни жанг билан эгаллаш муяссар бўлмаслигини билгани учун ишни макру ҳийла ва алдов йўсинига ҳавола қилди. Айни шу воқеалар асносида Султон Али Мирзонинг онаси Зухрабеги Оғо<sup>61</sup> акли камлиги ва қайта эр қилиш орзусига майлу ишгиёки кўплиги сабаб яширинча равишда Шайбонийхон олдига чопар юборди ва муҳаббат тили билан ушбу хабарни етказди: Агар хон ҳазратлари бу заифани ўз ниҳоҳига киритиш гапини қабул қилса, мен хизмат камарини жон белига боғлаб, Самарқанд дарвозасини очаман ва ўғлим Мирзо Султон Алини ул ҳазрат ҳузурига юбораман. Аммо шарти шуким, қачон хон бошка шаҳарларни ҳам тасарруф доирасига киритсалар, Самарқандни Султон Али Мирзога бергайлар.

Шайбонийхон бу сўзларни эшитгач, яқин орада фатҳу зафар келини оғушида ётажаги ва маъшукаси бўлмиш Самарқанд шаҳри висоли осонликча муяссар бўлажagini англади. Шу заҳоти шавк кўзғатувчи ва ишк қоришиқ мактублар битиб, Зухрабеги Оғо олдига юборди ва уни дилни алдовчи ваъдалар билан сарафроз қилди. Шунга кўра Зухрабеги Оғо куткусини бошлаб, Мирзо Султон Алини Шайбонийхонга душманлик мақомидан воз кечиришга киришди. Айни шу пайтда Мирзо Султон Али олий мартаба ва валийлик вужудли хожа Кутбиддин Яҳё кўнглига ҳазрат Бобур подшоҳни Самарқандга киритиб, сарварлик тахти-

<sup>61</sup> *Зухрабеги Оғо* – яна бир бор эслатайлик: Зухрабеги Оғо асли Дашти кипчоклик ўзбеклар хонадонидан чиққан.

га ўтказиш ва ул хазратнинг адолати соясида мамлакат халқини ходисалар офтоби ҳароратидан қутқариш фикру қарори йўл топган деган гумонда эди. Онасидан эшитган афсона ва афсундан кейин Шайбонийхон билан учрашишга боришга қарор қилди. Бу гап-сўзлар ва Мирзо Султон Алининг йўлбошчи хислатли хожа ходимларидан кўркиши воқеаси Шайбонийхоннинг арзига етишгач, саййид Жалолиддин Хованд Бухорийни насиҳат қоришикли маслаҳат гаплари ва иноят ваъдали хатлар билан «қандай бўлмасин, хожа Қутбиддин Яҳёни тобеликка мойил этиш ҳамда унинг Мирзо Султон Алини хон томонидан кадрланишига умидвор қилиб, осмон қудратли даргоҳга юборишига эришиш» учун шаҳарга жўнатди. Жаноб сиёдатмаоб дастлаб олий мартабали ҳидоят атоматли Хожа Яҳё билан учрашиб, ул хазратнинг Шайбонийхон томонга майл билдириши борасида қанчалик тиришмасин, бирор натижа чиқара олмади. Сўнг қимсасиз хилват ва пана бир жойда Султон Али Мирзо ҳузурига бориб, шундай сўзларни арзга етказди: Ҳазрат хон «Самарқанд атрофи ғалаба яқунли кўшиннинг қодирлари тикланган жойга айлангач, Хожа Яҳёнинг бу ўлканинг давлат ва молиявий ишлари устидан назорат ўрнатгани воқеаси, Сизнинг эса шахриёрлик ишларида ихтиёригиз йўқлиги ойдинлашиб қолган ушбу айёмда олий бир ҳиммат Сизнинг эркинлик ва фаровон яшашингиз учун юзланди. Бундай пайтда қаршилик эшиқларини ёпиб, қелишувнинг катта йўлидан олампаҳоқ даргоҳга келсангиз ва хоннинг туккан ўғиллари қаторидан жой олиб, саховатли марҳамат ва меҳрибонлик сояси остида осойишталикка эришсангиз» демокдатар.

Содда полшоҳзода бу ичи ковак сўзларга лакка ишониб, бошини мағрур тутганча саййидлик паноҳи Хоразмий жанобларининг таклифини қабул қилиб «имкон борича ихлос қадами билан Самарқанддан ташқари чиқиб, Шайбонийхонга бўйсуниб занжини эгнига ташлаш ва жаҳонбонлик пойдевори қурувчисини кўришга бориб, ифтихор бошини баланд кўтаражагини» айтди. Шундан сўнг сиёдатпаноҳ Хоразмий жаноблари олий мартабали, ҳидоят дастгоҳли Хожа Яҳёдан руҳсат олиб, Шайбонийхоннинг ҳузурига қайди ва айтган-эшитганларини битта қолдирмай сўзлаб берди.

Султон Али Мирзо сиёдатпаноҳ кетганидан икки-уч кун ўтгач, Хожа Қутбиддин Яҳё ва Самарқанд улуғлари Жоме масжидида намоз адосига машғул бўлиб турган жумъа куниси ўзининг хос кишилари билан Чаҳорроҳа дарвозасини очиб, оти жиловини Шайбонийхоннинг Боғи Майдонда жойлашган лашкаргоҳи томон тўғрилади. **Мисра:** Мурғро чун ажал ояд, ба суйи сайёд равад – Қушнинг ажали етса, овчи олдига ўзи борар. Осмонга тегувчи даргоҳга киргач, Чингизхон тўра<sup>62</sup>сига биноан тиз чўккалаб, шайбоний хонининг кўрунишига эришди. Хон эса унга меҳрибонлик ва гамкўрлик кўрсатиб, шоҳзодани бағрига босди. Шундан сўнг шоҳзоданинг Муҳаммад Темур Султон ёнида манзил тутиб, юриш ва туришда унга тобе бўлган кўйи келишув йўлидан ташқари қадам босмаслиги борасида буйруқ берилди.

Хожа Қутбиддин Яҳё Султон Али Мирзонинг қочиб

<sup>62</sup> Тўра (ва яса) – қонун, қоида.

кетганидан хабар топгач, муборак оёғини узангига тикиб, шаҳар ўртасига ошиқди ва халқни қалъа минора ва деворларини химоя қилиш, қалъа тепаси йўлаги ва дарвозаларни мустаҳкамлашга ундади. Аммо Иброҳим Жоний, Ҳайбат қавчин, Султон Ҳусайн Арғун, Абдулваҳҳоб шиғовул сингари амирлар ва бошқалар Шайбонийхон мулозиматига мойиллик кўрсатиб, ҳеч бир зот Хожа Яҳёнинг сўзларини қабул қилоғи билан эшитмасди. Чор-ночор мактов сийратли хожа давр талабига бўйсуниб, қариндошу ётлар билан бирга хонлик даргоҳи сари юзланди ва салтанат вужудли бўсагага етишгач, на ўлик, на тирик бир аллозда олий мажлисга кирди. Хон ул ҳидоят шиордан етган озорни дилида сақлаб юргани сабабли таъзими учун ўрнидан турмади, тилидан дағдағали сўзларни жорий қилди. Аммо Хожа бу йиғиндан чиқиб кетмоқчи бўлган вақтда Шайбонийхон ўрнидан туриб, ул жанобнинг олдинроқ келишини сўради ва кучоклаб кўришаркан, шундай деди: Ўтган нарса ўтди. Биз гина-кудуратингиз зангини иродат сайқали билан кўнглимиз лавҳидан ўчириб ташладик. Сиз ҳам бундан сўнг ота-боболарингиз равишидан ташқари чиқишни жоиз кўрмасангиз.

Хожа қабул бошини қимирлатиб, боргоҳдан ташқари чиқди. Сўнг Шайбонийхон *найман* уруғидан бўлмиш Жонвафо<sup>63</sup>ни Самарқанд шаҳри доруғалиги мансабига тайинлаб «қалъа дарвозаларига соқчи қўйиб, яхшилаб беркитинлар ва ҳеч бир зотни эътиборли хужжатсиз шаҳар ичкарасига киритманглар» дея буйруқ берди. Ҳақиқатдан ҳам бу фармон чиқмаганда

<sup>63</sup> Бошқа кўпгина манбаларда Жонвафобийнинг *дурмон* уруғидан экани кайд этилган.

эди, Самарқанддаги авому хос халкнинг барча мулк ва ашёлари даштлик ўзбек аскарларининг талон-тарожига йўлиқарди. Шундан сўнг Шайбонийхон Боғи майдондан кўзгалиб, Кониғил ўтлоқзорида манзил тутди. Икки-уч кундан сўнг эса Қуҳак дарёси бўйидаги Фаррошон қишлоғига кўчилиб, салтанат ошиёنли даргоҳ фаррошлари улуғлик ва шуқуҳ чодирларини ўша ерда тикладилар.

Шайбонийхон Самарқанд атрофига келиб тушган пайтларда Хожаработга бориб, ўз мулозимларини йиғиб ва қуролланиб, шаҳарга кирмоқчи бўлган Хожа Алибой ўгли Амир Жон Али бу ҳодиса воқеасидан хабар топиб, қимматли пешкашлар тузатган кўйи мазкур манзилда хон хузурига ошиқди. Шунингдек, шариф ва аъзам кишилар ифтихори Хожа Абулмақорим ва Самарқанду Бухоронинг бошқа улуғ ва қатталари салтанат бўсағаси сари ошиқдилар ва хонликнинг чексиз иноятига етишиб, умид ҳиссини туйдилар.

## **СУЛТОН АЛИ МИРЗО ВА ХОЖА ҚУТБИДДИН ЯҲЁНИНГ ШАҲИД БЎЛГАНЛАРИ ЗИКРИ ВА ХУДО ҲИМОЯСИДАГИ САМАРҚАНД ШАҲРИДА АҚЛИ ПАСТ ЎЗБЕКЛАР АМАЛГА ОШИРГАН ЗУЛМ ВА АЗОБ-УҚУБАТДАН БИР БЎЛАГИНИНГ БАЁНИ**

Муҳаммадхон Шайбоний Самарқанд мулкида жаҳон саклашлик тахтига ўтиргач ва Мовароуннахрнинг кўпчилиқ қаттақон ва улуғлари хонлик тахти остида йиғилиб, у ер ишларини кўнгилдагидек ниҳоясига етказгач, хон барча ҳимматини қай бировдан қаршилиқ кўрсатиш аломатлари юзага чиқиши мумкин бўлса, ўша



исёнчи ҳаётини нобуд қилиш ёки Амударёдан Хуросон томонга ўтиш ишига қаратди. Биринчи бўлиб Мирзо Султон Али билан бирга Жон Али оёғини ҳаракатдан қолдиришга ният қилиб, бир кечаси аҳдсизлик қиличи билан ул икки яхши қиликли ёшнинг вужуд нақшини борлиқ сажифасидан ўчирди. Сўнг ишончли кишилардан бир гуруҳини Хожа Қутбиддин Яҳё ва Хожа Хўрд қозини қўриқлашга қўйди. Давлат ишларига аралашган катталардан бир тоифасининг мол ва ашёларини талаш борасида бажарилиши лозим бўлган ҳукмлар чиқарди. Садрлик мансабига тайинланиб, хонга жуда яқинлиги жиҳатидан давлат ва молия ишларининг катта-кичигидаги тортиб барчасига аралашадиган мавлоно Абдурахим Туркистоний жаноб ҳидоят сифот Хожа Қутбиддин Яҳё ва унинг мажид ўғиллари мол-мулкани мусодара қилишга киришиб, мавлоно Шамсиддин Муҳаммад судур зиммасига Хожа Хўрд қозининг мол-мулкани қатга олиш иши юкланди. Бек Оқо эса амир Абдулбоситнинг молларини ўз тасарруфига киритди. Шунга қўйс хон ўзининг ҳар бир аёнини каттақонлардан бирининг молини ўзлаштиришга буюрди. Аммо Муҳаммадхон Шайбонийнинг ҳуш қулоғига фақиҳ Абуллайсининг иззатли ўғиллари ҳамиша ўзларини ҳокимлар ишлари ва юмушларига аралаштиришдан четга олиб юрганлари хабари етишгач, ул тоифани эътибор назари билан манзур тутиб, Самарқанднинг шайхулисломлик мансабини Хожа Ховандга топширди. Хожа Абдуллатифга эса шариф қозилик ишини бахшида қилди. Олий мартабали, маоний паноҳли аъзамлар бошлиғи Хожа Абулмақоримдан хавфсирагани учун ул жанобнинг ўтириб-туришда доимо ўрду мулози-



ми бўлишига фармон берди. Олийжаноб хидоятпаноҳ Хожа Қутбиддин Яҳёга эса Маккаи муборака тарафга боришга ижозат берди ва ул жаноб сафар асбобини тайёрлашга машғул бўлди. Хон ўзининг хос отхонасидан қувватда филдек ва суръатда кушдек тавсифи билан мақталган отларидан биттасини алар ҳазратлари олдига юборди ва «бу от бир кеча-кундузда уч фарсах масофани босиб ўтади» дея айттирди. Абдурахим Туркистоний мустақим динга қувват берувчи ул хожа арзига «ҳазрат хоннинг бу сўзи шу маънига ишоратким, Сиз фарзандларингиз ва яқин кишиларингизни олиб кетиш ишига қўпам боғланиб қолмаслигингиз лозим, дарҳол ўта тезлик билан Амударёдан кечиб ўтишингиз керак. Чунки, тасаввур қилинмоқдаки, ўзбеклардан айримлари тўла ҳаракат билан эҳтиромли Сиз ҳазратларининг орқангизга тушишлари мумкин ва ҳеч ким олдини олишга улгурмай диган ишни бажаришга қўл урғайлар» дея етказди. Хожаси эса шундай жавоб берди: Бола-чақа ва хотин-халажни бундай тоифа орасида қолдирмоқ ва ўз жони саломатлигини ихтиёр қилиб, қочмоқ нақшини кўнгил лавҳига қизмоқ мардоналик тариқатидан узок, ақл қондасидан йироқдир. Қазову қадар нимани такозо қилса, ўша юзага чиқажак – «чунки Аллоҳ бирон ишни қилмоқни истаса, ўша иш бўлур»<sup>64</sup>.

Сўнг хидоятпаноҳ хожа юзини йўл сари қаратди. Йўл юриб, Хожа Кордзан манзили четига тушган чоғда эса, ўзбек қўшинидан бир тўдаси орқадан етиб келиб, ул ҳазратни яхши юлдузли икки ўғли Хожа Муҳаммад Закарийё ва Хожа Муҳаммад Боқи билан бирга шаҳидлик сасодатига етказдилар ҳамда ёнларидаги

<sup>64</sup> Қуръони қарим, Марям (19) сураси, 35-оятга ишора.



майда-чуйдаларини горат ва тарож елига совурдилар. Лоязолий иноят уфқидан порлаб чикиб, Мовароуннаҳр шаҳарлари, балки бошқа ҳар бир диёр ва шаҳар устига зиё сифатини таратиб турган ҳидоят осмонининг куёши айёмнинг жафо киличидан юзини фано мағриби томон қўйди ва фазлу камол боғида кўкариб, лутф ва саховат соясини каромат тарикининг сокинлари боши узра солган валийлик гулшани чинори зулм шамолдан ер тубан кулади.<sup>65</sup>

### Назм:

Дар ин дайри фоний ки ором дид,  
Ки онки жовид аз у ком дид.  
Касе рахт аз ин хона берун набарад,  
Ки тири балое зи гардун нахӯрад.  
Чи гуям зи гардуни нопокбоз,  
Ки бо покбозон кунад турктоз.  
Фигон аз силехри шарорат асар,  
К-зи у оламе гашт зеру забар.

---

<sup>65</sup> Ушбу воқеага нисбатан ўз фикрини билдирган Бобур «Бобурнома»да мазкур суикасдининг Шайбонийхон томонидан уюштирилганини таъкидлаш мақсадида бу борада хоннинг ўзини оқлашга уривишини форсча «узраш аз гунохаш баттар» иборасини ишлатади. Бу сўзларнинг ўзбекчага «узри гунохидан баттар» шаклдаги таржимаси асл маънони бермайди, чунки бу ердаги «узр» сўзи ҳозирги ўзбек уқувчиси фикрини чалкаштиради. Арабча «узр» сўзининг бир нечта луғавий маъноси бўлиб, улардан бири «баҳона»дир. Демак мақол таржимаси «баҳонаси гунохидан баттар» шаклида бўлиши лозим. Шундагина аниқ маъно англашинади. Аммо айтиш лозимки, гарчи «Тарихи Қипчокхоний» кабя айрим асарларда ҳам мазкур хожанинг хон томонидан ўлдирилганига ишора бўлса-да, «Мусаххир ил-билод» сингари манбаларда бундай айблов йўқ. Шу сабабли бу воқеа тарихда мавҳумлигича қолаверади.

*Мазмуни:*

Бу ўткинчи оламда ким ором кўрибди,  
Ким у бу жаҳонда мақсади мангу ҳосил кўрибди?  
Ҳеч ким бу уйдан кўрпа-тўшагини кўтариб кета  
омайди,  
То фалакдан бало ўқини емагунча.  
Нопок ўйинли гардундан яна не дейин,  
Ки покбозлар устига босқин-чопқин килур.  
Дод ёмонлик аломатли осмон дастидан,  
Ки, бутун олам бўлди остин-устун.

Сухан ахлининг жимжимадор сўзи ва миш-миш гапларни бир четга суриб, ростини айтадиган бўлсак, даштлик ўзбек кавми золимларининг бу ёвуз ходисасидан сўнг Мовароуннаҳрнинг жуда кўп шаҳар ва диёрларида, айниқса, маҳфуза Самарқанд балдасида зулм ва азоб-уқубатлар бошланиб, шайбоний хонининг одамлари тасарруф қўлини фуқаро ва бечоралар молини олиш сари чўздилар. Қай бир жонзотда бир динор ё бир ман ғалла борлигига гумон қилишса, дарров ўша одамни бирор баҳона билан ушлаб, унга нисбатан азоб ва уқубат усулини қўлладилар. Кўпгина қишлоқ ва шаҳарларга «сўнг (ерни) теп-текис қилиб кўярки, унда на чуқурни ва на дўнгликни кўрарсиз»<sup>66</sup> ояти васф илҳол бўлди ва талай иморатлар асосини гам мавжлари талотўми ва ғусса фавжлари йиғини изтироб гирдобига фарқ қилди.

<sup>66</sup> Куръони карим, Тоҳа (20) сураси, 106 – 107-оятлар.

## Назм:

Сари фитна аз хоб бедор гашт,  
Бисоти фароғат қазо дар навишт.  
Мамолик шуд аз жаври гораггарон,  
Паришонтар аз зулфи махлайкарон.  
Зи сели бало шуд аён растахез,  
На руйи икомат. на роҳи гурез.  
На дар хона буди касеро қарор,  
На дар кўча диди тариқи фарор.  
Кас аз хона гар пой монди ба дар,  
На дастор бар жой монди, на сар.

## Мазмуни:

Фитна боши уйқудан уйғонди,  
Фароғат палосини тақдир йиғиштирди.  
Мамлакатлар бўлди гораггарлар жабридан,  
Мохпайкарлар сочидан ҳам қорарок.  
Бало селидан киёмат куни кўринди,  
На турарга жой, на қочишга йўл бор.  
Уйда ҳам ҳеч кимга бўлмади қарор,  
На кўчада кўринди қочиш учун йўл.  
Ким уйдан ташқари қўйса гар кадам,  
Салласи қолмай бошда, кетди боши ҳам.

Ноилож саодат савмаасининг эътикоф ўтирувчилари ва ибодат йиғингоҳининг садр нишинлари ниёз юзини ерга суриб ва дуо кўлини осмон сари кўтариб, яхши-ёмонга қозилик қилувчи хазрат борий буюк Аллоҳ даргоҳидан инсон тойифасини зулм зулмати ва душман дастидан қутқаришни тиладилар, хавфсизлик ва омонлик офтоби чиқишини подшоҳлар подшоҳи – Худои та-

Олонинг инояти машриқидан ўтиниб илтижо қилдилар. Ўша аснода мазлумлар дуосининг ўқи ижобат нишонига етишиб, жаҳонни безовчи Бобур подшоҳнинг юрт олувчи байроғи ойчаси Самарқанд уфқи тепасидан ёғду сочиб, самарқандликларнинг ғамга ботирувчи кечасини роҳат бағишловчи кунга айлантирди. Замона каттаю кичикка озор бериш ишидан бир неча вақт воз кечди. Яқин орада бунинг воқеаси ёзув сифатини топажак ва ҳаракат шуъласи бу ҳикоя тафсили сари тушажак, иншоэлоҳи таоло.

## **БАЪЗИ ЁМОН ИШЛАР ЮЗАГА ЧИҚҚАНИ САБАБ ҲАЗРАТ ЗАҲИРИДДИН МУҲАММАД БОБУР ПОДШОҲНИНГ КЕШ ШАҲРИДАН КЎЗГАЛГАНИ ЗИКРИ**

Бу воқеалар ғалаба далолатли подшоҳ Бобур Мирзо қароргоҳида миш-миш бўлгач, дағдаға ва андиша ўти айрим фикратпеша амирлар ичи ўчоғига учкун ташлади. Муҳаммад Мазид Тархон ва унга тобе самарқандликлардан бир гуруҳи Бобур подшоҳ мавқабидан ажралиб чиқиб, Амир Хусравшоҳ ҳузурига кетдилар. Жасоратга қон подшоҳ хайрат денгизига чўмиб, иқбол аломатли кўнглига Қаротегин ва Олой йўли орқали тоғаси Олачахон Олдига бориш фикри келди. Шу ўйда Кеш шаҳридан кўзгалиб, таваккал юзини йўл сари қаратди ва Хусравшоҳ мамлакатининг бир неча худудларидан ўтди. Аммо Қаротегин йўли билан юриш муяссар бўлмади, натижада Камруд тепасидан юриб, Саритоғ томонга қараб йўл солди. Навандак атрофи подшоҳ чодири устунлари тикланиши-

дан шараф топчаг, олампадох подшоҳ боргоҳига Амир Хусравшоҳнинг чопари келди ва бир тўккиз от ва бир тўккиз қуммош<sup>67</sup> пешкаш келтирди. Сўнг ул ўврок аҳли сарвари Навандакдан ҳаракатланиб, Камруд довонига етишган кун Шерали чухра қочиб кетди ва Амир Вали ёнига бориб, навкар бўлди. Эртаси куни Қўчбек ҳам Ҳисор тарафга кочди. Подшоҳ мавкаби шу зайл Камруд дарасига кирди ва таваккал оёғи билан юриб, бошни эса юкори тугтан кўйи масофаларни босиб ўтишга киришди. Тангу тор йўлларда ва тошлоқ тоғларда кўпгина от ва туялар юришдан қолиб, нобуд бўлди. Уч кун мобайнида тонгдан шомгача жуда кийинчиликда шу тахлит йўл юрилиб, тўртинчи куни Саритокка едилар ва этаги Алванд тоғи чўккиси билан тенглашадиган бир кўтал-довонни кўрдилар. Тепаси эса осмон куббасидан баландроқ, йўли ниҳоятда тор ва оёқ кесар тошларга кон ҳамда оёқ унга чиқиш андишасидан ланг. Хуллас. ул осмон виқорли тоғ кўп ғам-андухлар билан босиб ўтилиб, Фон атрофи нусрат аломатли лашкарнинг қўш ташлаш жойи бўлди. Фон малики қонида бор бераҳмлиги кўзиб, халифа ошиёнлик даргоҳга келмади ва бир вақтлар саховати кўплиги билан танилган бу одам шу чоқда ҳяммати пастлиги тутиб, пешкаш учун бор-йўғи биттагина от юборди. Жаҳон аҳли подшоҳи Фонни ўнг қўл тарафда қолдириб, Кешту қалъаси томонга йўналди ва Кештудан сўнг Қуҳакларёси бўйига бориб қўш ташлади. Кейин Қуҳак дарёсидан Ёри кечуви билан ўтиб, Ёзйўлок зафар шиорли қўшин қодир-

---

<sup>67</sup> Мўғул-турк одағи бўйича тухфа ёки ёпиладиган нон қабилар сони тўккизтадан тайёрланган. Қуммош – қимматбаҳо мато, газлама. Бу ерда тўккиз тўп мато кўзда тутилган.

лари устунлари кокилган жойга айланди. Ўша вақтда амир Қанбар Али Сангзордан келиб, олий даргоҳ палосини ўпиш иззатини топди. Абулқосим Кухбўр, Иброҳим Тархон ўз одамларини юбордилар, уларнинг ҳам чексиз сийловлардан диллари хуш ва вақтлари чоғ бўлди. Сўнг зафарға ёр байроқ Ёзйилоқдан кўзғалиб, Сафидак қалъасига шошилди ва у ердан баланд ҳимматли тавсан жилови маҳфуза Самарқанд балдаси фатҳи томон тўғриланди.

### **МАҚСАДИ ҲОСИЛ БОБУР ПОДШОҲ КЎРГАН ТУШ ВА ШУ САБАБЛИ УМИД КЎЗГУСИДА ФАТҲ ЖАМОЛИНИ КЎРИШ РЎЙ БЕРГАНИ ЗИКРИ**

Огоҳ хушмандлар басират кўзи билан кўрган ва ҳамиша уйғоқ қалбли асҳоблар хуш кулоғи билан эшитган ғайбий ишоратлар ва лорайбий башоратлар жумласидан бири рўёи солиҳа, яъни солиҳа туш эрурким, нубувватнинг қирқ олти жузидан бир жуздир. Араб халқидан чиққан пайғамбар – *унга саловотларнинг энг яхшиси бўлсин* – буюрадиким «солиҳа туш набийликнинг қирқ олти бўлагидан бир бўлагидир». Бу кўп маъноли қутлуғ сўз шунга ишораким, пайғамбарлик келиши бошида олти ой давомида набийга инган ваҳий рўёи солиҳа, яъни туш орқали келиб турган. Чунончи ҳазрат рисолагганоҳ ўша вақтларда кўрган ҳар бир туш унинг таъбири аломати худди субҳи содиқдек умид матлаъсидан ёришиб тураркан.

Ҳижозлик пайғамбарнинг Худони ёлғиз билувчи дини ҳомийси олийжаноб подшоҳ Заҳириддин Муҳаммад Бобур ғозий кўрган туш ҳам ана шун-



дай рўёйи солиҳа тушлар сирасидан бўлиб, уни бир башорат сифагида англагач, бор саъй-ҳаракати билан Самарқанд фатҳи сари юзланди. Бу воқеа ҳолати шуким, осмон ғуломли подшоҳ Ёзъялоқ ва Сафидақ қалъаси агрофида Самарқандни эгаллаш гадбири режасини файз топар кўнгли саҳифасига нақшлаб турган пайтда, бир кечаси рўё оламида ҳазрат валийлик паноҳи Хожа Носириддин Убайдуллоҳнинг осмон-ўпар даргоҳга келаётганини кўради ва ул салтанат ва истиклол уфқининг офтоби кутиб олиш шартларини бажо келтиради. Хожа ўтиради, аммо алар олди-га номуносиб бир дастурхон тушалади. Шу жиҳатдан онҳазратнинг муборак кўнглида ўзгариш пайдо бўлади ва мавлоно ҳидоят ривожли мазоҳ ўзгаришини англаб ва подшоҳга қараб, бу маънига ишора ва имо қилади. Аълоҳазрат эса «бу ишнинг рўй беришида менинг айбим йўқ, бунда дастурхон ёзган кишидан айб ўтган» дея жавоб беради. Бу савол-жавоб ҳақиқати ҳазрат хожанинг ҳақиқатни кўрсатувчи қалбида кашф бўлиб, узрни эшитадилар ва мажлистан кўпиб, йўлга равона бўладилар. Подшоҳ эса кузатиб қолиш маросимини адо этиб йўналганда, хожа ўша уйнинг даҳлизида подшоҳнинг икки билагидан биттасини ушлаб, шундай кўтарадиларки, ул ҳазратнинг бир оёғи ердан узилади. Сўнг ҳидоят назмининг нозими ушбу сўзларни тилга олади: Шайх маслаҳат берди.

Исломпаноҳ подшоҳ рўё оламидан уйғоклик ҳолатига кайтгач, якин ораларда мулк бағишловчи маликнинг ивояти насими шабадаси мурод чаманида хавфсизлик ғунчасини очилтиражаги ва тез орада Мангу зотнинг меҳрибонлиги соясида уйғок бахт кўзи





иктидор тўшагида осойишта ухляяжаги, фатху ферузлик тонги умид уфқидан отажаги, зафар ва бехрузлик офтоби мангу давлат машриқидан порлаяжагини англади.

### Назм:

Ба алтофи илоҳий субҳи умид,  
Дамад аз матлаи иқболи жовид.  
Бар омад меҳр аз буржи иноят,  
Нихон гардад шаби ғамро ниҳоят.

### Мазмуни:

Илоҳий лутфдан умид тонги,  
Оқарар мангу иқбол балқишидан.  
Куёш чикди иноят буржидан бешак,  
Ғам туни поёни энди яширинажак.

Ғаройиб тасодифлардан бири шуқим, ўша вақтда бир куниси фархунда сифот подшоҳ осмонга тенг сарой ичкиларидан бир нечтаси билан бирга ҳар тўғрида сўзлашиб ўтирар эди. Шу аснода ҳазрат «неча кундан кейин бизга Самарқанд фатҳи муяссар бўларкан?» дея буюрди. Ўтирганлардан ҳар бири ўша борада бир сўз айта бошлади. Нўён Кўкалтош тилидан эса «иншооллоҳи таоло ўн тўрт кундан сўнг Самарқанд фатҳи юз кўрсатажак ва бу кийин иш одилсифат подшоҳ давлати қуввати орқасида осонлик топажак» деган сўзлар жорий бўлди. Худди шундай бўлиб, нўён айтганидек, ул мурод натижаси ўн тўрт кун ўтгандан сўнг рўй берди.

## ХУДО ҲИМОЯСИДАГИ САМАРҚАНД ШАҲРИНИНГ ЧЕКСИЗ СУБҲОНИЙ ИНОЯТ ТУФАЙЛИ ФАТҲ БЎЛГАНИ ВА МУҲАММАДХОН ШАЙБОНИЙНИНГ ҲАЙРАТ ВА ПАРИШОНЛИК ВОДИЙСИГА ТУШГАНИ ЗИКРИ

Умнат ишлари интизоми жиловини қўлида тутган ва бани Одам тоифаси ишлари ихтиёрини продаси кафтида ушлаган мулкнинг мутлак молики ва жону жаҳоннинг яратгувчиси нурга кон «истаган кишингга мулк ато қилурсан»<sup>68</sup> фармони содир бўлиш шарафини топадиган ва сурур тўла «Аллоҳ одамлар учун не бир раҳмат-марҳаматни очиб қўйса, бас уни ушлаб-тўсиб қолувчи бўлмас»<sup>69</sup> фармони кўриниш сифатини оладиган кибриё даргоҳда ва «Аллоҳ истаган нарса бўлур» тахтгоҳида юрт олувчининг Фарқад юлдузи<sup>70</sup>га етадиган бошини «биз сени ерда ўринбосар қилдик»<sup>71</sup> каримаси билан зийнатланган тож билан баланд кўтарса ва оламнинг қобилият коматини «Аллоҳ мулки аломати»нинг қувончли либоси билан безатса ҳар калай илоҳият девонининг ишчилари мушкул ишлар очилиши асбобини унга ато қиладилар ва илоҳийлик айвони юмушчилари аҳвол мушкулликларини хал қилувчи эшикларини ҳаёти юзи сари очадилар. Нағижада у кишига аъло мақсадлар даражаларига

---

<sup>68</sup> Қуръони карим, Оли Имрон (3) сура, 26-оятдан: Айтнинг «Эй мулку давлат эгаси бўлган Аллоҳим, сен истаган кишингга мулку ато қилурсан ва истаган кишингдан бу мулкни тортиб олурсан, истаган кишингни азиз қилурсан ва истаган кишингни хор қилурсан».

<sup>69</sup> Қуръони карим, Фотир (35) сураси, 2-оятдан.

<sup>70</sup> Фарқад юлдузи – Кичик Айик юлдузлари туркумига кирувчи икки ёруғ юлдуздан бири.

<sup>71</sup> Қуръони карим, “Сод” (38) сураси, 26-оятдан.



кўтарилиш яхши бир тарзда муяссар ва пок истаклар макомотига етмоқ мукаррар бўлгай ва «ваъда қилинган мағфират ва жаннат Аллоҳнинг фазлу марҳамати бўлиб, уни Ўзи хоҳлаган кишиларга ато этур. Аллоҳ улуг фазлу марҳамат соҳибидир»<sup>72</sup>.

### **Назм:**

Сарир орои мулки подшоҳий,  
Мадад ёбад чу аз фазли илоҳий.  
Муродота ш шавад дар даҳр ҳосил,  
Бар у осон шавад ҳар кори мушкул.  
Агар жайғи адув бошад чу анжум,  
Набошад ҳамчу хур уро таваҳҳум.  
Бале, ҳаргаҳ бар ояд меҳри анвар,  
Бувад ахтар бараш аз зарра камтар.  
Чу гардад рояти хур олам афруз,  
Шавад бар куббаи афлок феруз.

### *Мазмуни:*

Подшоҳлик мулкининг тахт безовчиси,  
Мадад тоғса илоҳий фазлдан.  
Муродлари бўлар жаҳон аро ҳосил,  
Ҳар бир мушкул иш осон бўлар унга.  
Душман лашкари бўлса ҳам юлдуз сонли,  
Қуёшдек бўлмас унда ҳеч бир кўркув.  
Ҳа, нурлар сочувчи қуёш чиққан маҳал,  
Бўлур юлдуз ёнида заррадан камрок.  
Қуёш бай роғи оламини ёритувчи бўлса,  
Осмон куббаси устидан қозонар ғалаба.

<sup>72</sup> Қуръони карим, Ҳадид (57) сураси, 21-оятдан.

Бу ташбеҳ ва ушбу ўхшатишидан мақсад мактов хислатли подшоҳнинг иқболга яқинлик воқеаси бўлиб, у Шайбонийхон етти-саккиз минг нафар жасур чавандоз ва пиёда аскар билан [Хожа] Дийдор қалъаси ён-теварагида иқтидор улуғлиги чодирини айланувчи фалак авжига кўтарган ва Жонвафо Мирзо ҳар бири Рустаму Исфандиёрни ўзларининг занжир тортувчи кули каби билувчи олти юзга яқин ўзбек билан Самарқанд шаҳри ичида истикомат қилиб турган ҳамда Ҳамза Султон, Меҳди Султон ўзларининг жуда кўп тобелари билан бирга шаҳарга яқин Будана кўруғида тургун пайтида душман кўплиги ва устунлиги борасида ўйлаб Утирмади ва муъжаз низомли «ким Аллоҳга суянса – таваккал қилса бас, Ўзи унга етарлидир»<sup>73</sup> каломини олий аломатли назарининг кўзлаган мақсади қилди ва ботир кишиларидан икки юз қирқ нафари билан Самарқандни фатҳ этишга азми қарор этиб, бир кечаси ул маҳфуза шаҳарга кириб олган кўйи оламаро киёмат куни шовкинини солди. Мишкин саллали қалам бу хабар тароватидан жаҳон аҳлининг жон димоғини шу янглиғ муаттар қиладиқим, буюк химматли подшоҳ Сафидак қалъаси атрофини зафарга ёр аскарларига лашкаргоҳ қилган вақтда иқбол аломатли кўнглига тун зулмати қора асосли либосни «биз кечаси либос кийгиздик»<sup>74</sup> фармони бўйича одамлар эгни-боши узра ташлаган ва қора рангли парда кўз қувватини нарсаларни кўриш хиссидан айирган пайтда яширин ва бекитикча ҳолатда Самарқанд хандақига кириб олиб, сўнг кўргон устига нарвон кўйган кўйи тепага чиқиб,

<sup>73</sup> Қуръони карим, Галок (65) сураси, 3-оятдан.

<sup>74</sup> Қуръони карим 78-сура, 10 – 11-оятлар.

ул ўлка фазосини саховатга кон вужуди кудрати билан безаш қарори йўл топади. Ва шу ўй-фикрда бир кун пешин намози фарзларини адо этгандан сўнг узангида фатҳу давлат, ғалаба ва қудрат йўлдош, Ёзйлоқдан Самарқанд диёри сари юзланди ва ярим кечада Хон юрт манзили феруз нишон байроқ ойчаси ёғдусидан жаннат бўстони гўзаллигини топди. Ўша пайтда маълум бўлишича, Самарқанддаги ўзбекларга «саодатманд подшоҳнинг баланд ҳимматлик арконини Самарқанд қалъасини эгаллаш учун отани келмоқда» деган хабар етиб, урушга тайёргарлик кўришга тушибдилар. Подшоҳ ноилож қайтиш жиловини Ёзйлоқ тарафга бурди. **Мисра**: Ин бор бар ниёмад, бори дигар бар ояд – Бу гал чиқмаса, кейинги гал чиқар. Икки-уч кун шундай борди-келди билан ўтгач, олий карамли подшоҳ яна бир бор ул хатарли иш сари йўл олди ва Ёзйлоқдан Самарқанд қалъаси томон от чоптириб, олишонли «азми қарор қилдингми, унда Аллоҳга таваккал қил»<sup>75</sup> фармони тақозосича мулклар бахш этувчи маликнинг чексиз иноятига таваккал қилган кўйи пешин намози паёти баракатли оёғини бақувват бир саманд узангисига тикиб, Самарқанд сари равона бўлди. Ўша кечаси фатҳу зафардек Шайбонийхон сипоҳидан айрилиб чиқиб, Сулаймон маконли подшоҳга келиб кўшилган улуғлар бошлиги Хожа Абулмакорим нусрат аломатли мавқабда подшоҳ билан бирга масофаларни босиб ўтганча йўлбошчи бўлиб, давлатхоҳликнинг етук намунасини намойиш қилмоқда эди. Шарафли байроқ тун ярмидан ошганда Мағокнинг Сарипулига етишиб,

<sup>75</sup> Куръони карим, Оли Имрон (3) сураси, 154-оятдан.

сохиби далил подшоҳ Рустам аломатли ёш-ялангдан саксонга яқин кишини олдинроқ юборган кўйи уларга «Ғори ошиқон текислигида ошиқпеша айёр<sup>76</sup>лар сингари иш тутиб, ҳеч ўйлаб-нетиб ўтирмай, қалъа устига нарвон ташлаб, қалъа ичига кириб олинглар ва Феруза дарвозасини саодат эшиклари каби ферузий нишонли мавкабнинг бошқа камарбасталари юзи сари очинглар» деган фармон берди. Ўзи эса шижоат аломатли ботирлардан бир тўдаси билан бирга секин-аста айтганимиз дарвоза томонга юрди.

Олдинроқ жўнатилган мазкур шерюрак ёшлар одил подшоҳ буюрган мавзедан деворга чиқиб, ўзларини тап-тап шаҳар ичига ташладилар ва қиличларини яланғочлаб, Феруза дарвозасига бориб кўрсалар, аслида Туркистон савдогарлари жумласидан саналиб, аммо Шайбонийхоннинг нишони бўйича тархон<sup>77</sup> бўлган Фозил исмли киши ул дарвозани кўриқлаш учун тайинланиб, мулозимлардан бир тўдаси билан истироҳат тўшагида пишиллаганча мириқиб ухлаб ётган экан. Шу заҳоти ул жамоани йўқлик шаҳристониغا равона қилиб, дарвозани очдилар. Мақсади ҳосил подшоҳ дарҳол, мисра: Зафар хаминон, нусрат аз пай равон – Зафар жиловдош, ғалаба орқада равон; ўша ерга етиб келиб, баданга кирувчи мангу ҳаёт ёки зулмоний оламни ёғдуга бурковчи куёш нури каби қадамини ул маҳфуза шаҳар ичига кўйди. Замона ҳол тили билан ушбу сўзни такрорларди: Юрт султони танадаги рух кабидир; Бахт кўзли халқдан қай бири ўша пайтда

<sup>76</sup> Айёр – эпчиллик билан иш кўриш қобилиятига эга кишилар.

<sup>77</sup> Тархон – турк-мўғул давлатчилиқ дастурига кўра барча солиқлардан озод қилинган кишига бериладиган унвон.

уйғок бўлиб, кўзи билан ул ҳазратнинг офтоб талъатли чехрасини кўрса, беихтиёр дуо ва сано сасини зангори осмонга етказиб, Ҳак субҳона ва таоло ҳамдига киришган кўйи шоду хуррам бўлди. Олий мартабали подшоҳ маърифат паноҳли хонакоҳга қўш ташлаб, шу лаҳзадаёқ Самарқанд шаҳрининг бутун аҳолиси подшоҳнинг саодат келтирувчи қадамидан хабар топди ва юраклари қувончу сурурга тўлганидан ўзларини йўқотган кўйи уйларида отилиб, ташқари чиқдилар ва подшоҳ хузур сари талпиндилар. «Аллоҳ фаровон ато берса, яшириб беради» калимаси ҳақиқати барча наздида аён бўлди ва тарафдорлар тили молики маннон шукри учун айлажиб, табрик ва кутлов сўзлари етти устунли айвондан ошди.

#### Назм:

Дар шаби ғам кавкаби масъуд ногаҳ ру намуд,  
Халқро дар шоми навмидий ажаб субҳе дамид.  
Ҳоли ин жамъи паришон ру ба жамнат ниҳод,  
Боз растанд аҳли миллат аз укуботи шадид.  
Зулмати зулм аз фазон мамлакат нобуд шуд.

#### Мазмуни:

Ғам тунда бахт юлдузи туйқусдан юз кўрсатди,  
Халқ учун умидсизлик шомда ажаб бир тонг отди.  
Бу паришон кишилар бир тизим сари юз тутишди,  
Миллат аҳли қутулдилар қаттиқ укубатлардан.  
Зулм зулмати мамлакат осмонидан ариди.

Шоҳлик байроқларининг ойчаси бул манзилга етишгач, ўзбекларнинг бари саросимада қолиб, тел-

Ба гадолар сингари уйма-уй чопишга тушдилар, жанг майдони ботирлари ҳамда ятиму бебош кишилар эса ул бахти қайтганларни таъкиб қилиб, таёк ва тош зарби билан ўлдирар эдилар. Хожа Қутбиддин Яхё уйида истикомат қилиб турган Жонвафо Мирзо, Мавлоно Абдурахим Туркистоний ва Муҳаммадхон Шайбоний даргоҳининг бошқа яқин кишиларидан бир нечтаси бирор ҳийла билан қочиш имконини топдилар. Аммо беш юз нафарга яқин бошқа ўзбек ва хизмагчилари ўлдирилиб, жаҳаннамга равона бўлдилар. Ўша кечаси муаззинлар тонг нидосини осмоннинг гумбази айланаси сари ўрлатгунга қадар ғала-ғовур шаъни овози зангори гунбаз оғзигача етиб турди ва самарқандликлардан қай бир кишининг кучи етса, ўзбекларни ўлдиришга тиришиб, молларини таларди.

Олий мартабати подшоҳ хонақоҳ гумбази устида манзил тутди. Хунармандлар ва калонтарлар бир-бири кетидан мулозамаг шарафини топиб, ҳар ким кучи етганча ўзига яраша совғалар тортик қиларди. Собит тургувчи ва сайр қилгувчи осмон жисмлари хусрави<sup>78</sup> айланувчи фалакнинг яшил отига мингач ва уфқ дарвозасига қарор оёғини маҳкам тираб турган юлдузлар лашкарини қатгаю кичикнинг қўзидан яширгач, олий зотли подшоҳга «ўзбек лашкаридан бир тоифаси Оҳания дарвозасида икки дарвозанинг орасини беркитиб, уруш солмоқдалар» деган хабар етди. Ваҳоланки, бу пайтда ул ҳазратнинг хизматида саккиз кишидан ўзга одами йўқ эди. Чунки бошқа мулозимлар ўлжа моллини қайтариб олиш ва аҳоли аҳволини ўрганиш учун ҳар тарафга ёйилиб кетган эди. Шунга кўра, ул жасур

---

<sup>78</sup> Қуёшга ишора.



хусрав муборак оёғини зафар насабли узангига тикиб, Оҳанин дарвозаси сари юзланди. Подшоҳлик мавқабининг Оҳанин дарвозасига етгани ҳам шу бўлди, муҳолифлар йиғини занжири узилиб кетгани ҳам шу бўлди. Ўша аснода бу ходисадан хабар топган Шайбонийхон бир юз эллик нафар темир совут кийган, ханжар урувчи отлик кишиси билан Оҳанин дарвозасига яқин келди. Бу пайтда юксак ҳимматли подшоҳ ёнида бор-йўғи йигирма кишиси бўлгани сабабли душманга қарши урушга чиқиш маъқул кўринмади. Шайбонийхон бир оз вақт келган жойида тўхтаб туриб, иши олдин сийжимаслигини сезди ва ноилоҳ юзини ўз ўрдуси томон қаратди. Зафарга ёр Бобур подшоҳ эса Оҳанин дарвозасидан Арк Бўстонсаройига бориб, ул манзил саҳнини саодат келтирувчи қадами ташрифидан гўзалларнинг гулдек чехраси рашкига айлантирди ва бахту мақсади ҳосиллик тахтига ўтириб, Самарқанднинг қутлаш учун келган улуғ ва шариф кишиларини кўрунишига қорлади. Ул дуоғўй ва сано айтувчи жамоат салтанат тахти поясига етишдилар ва чексиз сийловларга эришиб, ушбу мақол мазмунини айтувчи бўлдилар.

### Назм:

Ки шоҳо, ба коми ту бодо жаҳон,  
Марфа ба даврат қаҳону маҳон.  
Зи адлат Самарқанд маъмур бод,  
Аз ин мулк зулми адув дур бод.  
На танҳо Самарқанд шуд зи они ту,  
Тамоми жаҳон шуд ба фармони ту.  
Аз инсофи ту олам обод бод,  
Зи алтофи ту ҳалқ дилшод бод.

*Мазмуни:*

Эй шох, қўлингга кирсин жаҳон,  
Шод бўлсин даврингда катгаю кичик.  
Адолатингдан Самарқанд обод бўлсин,  
Бу юртдан душман зулми узок бўлсин.  
Фақат Самарқанд бўлиб қолмай мулкинг,  
Бутун олам фармонинг остига кирди.  
Диёнатингдан жаҳон обод бўлсин,  
Лутфингдан халқ дили шод бўлсин.

Илм истагувчи тарихчиларнинг ёғдули кўнглидан яширин қолмасинким, Самарқанд шахрининг саодатманд Бобур подшоҳга муяссар бўлгани каби бу янглиғ эгалланиши воқеаси, худди ҳазрат соҳибқирон Амир Темур Кўрагоннинг икки юз киши билан кечаси Қаршига боргани ва ул шаҳарни жуда бир кўнгиладан очар тарзда олгани хикоясига ўхшайди. Ул воқеадан бир бўлаги китобимизнинг соҳибқирон вақоеси бобида ёзилиб, ул ҳодисанинг таройиб ҳолати фасоҳат қалами билан баён этилган эди. Агар ёқимтой васфли ҳушманд киши бу икки хикоятни мутолаа қилса, ўша кеча олий мартабали подшоҳ Заҳириддин Муҳаммад Бобурдан юзага чиққан бу журъат ва жасоратнинг мамлакат олувчи соҳибқироннинг Қаршини эгаллаганидан бир неча ортикча сифатга эгаллигини билиб олади. Биринчидан, олий ҳасабли соҳибқирон Қарши сари йўналган ўша тунда ул ерда ҳоким йўқ эди, амирлардан Амир Хусайн бин Амир Мулло ва Амир Мусо ва Малик Баҳодир эса ташқарида бўлиб, шаҳар ичкарасида фақат Амир Мусонинг кичик ёшдаги ўғли Муҳаммадбек қолган эди. Олий мартаба-

ли подшоҳ Самарқандга кирган тунда эса жаҳоннинг барча ўлка ва шаҳарларини ўзининг меросий мулки деб билган ва ҳамиша ўй-фикр қалами билан рубъи масқуннинг тамоми мамлакатларини эгаллаш нақшини кўнгли саҳифасига битган Шайбонийхон шижоат қоидали султонларнинг кўпчилик қисми билан бирга Самарқанднинг яқин теваарагида чодир ва ўтови куббасини осмону фалак авжигача кўтарган эди. Эҳтиёткорлик йўсини ва шаҳару қалъани сақлаш қоидаларини жуда яхши билган ҳамда ботирлик ва паҳлавонлик майдонида ютуқ тўпини Мухаммад Шайбонийнинг бошқа нўёнлари қўлидан олиб қочиб юрган Жонвафо Мирзо олти юзга яқин дев сийратли ўзбек билан Самарқанд шаҳри ичида эди. Яна шуқим, Мовароуннаҳр шаҳарларининг доруссалтанаси бўлган Самарқанд қалъаси жуда катталиги қатори метиндек мустаҳкам ва ниҳоятда баландлиги билан машҳур ва тилларда дostonдир. Ҳеч қачон ҳеч бир шавкатли подшоҳнинг кўнглидан ул қалъани уруш билан эгаллай олиш фикри ўтган эмас. Шу сабабли бу ер халқнинг ҳосу авоми орасида «маҳфуза шаҳар» номи билан танилган. Қарши эса кичик бир мавзе бўлиб, у ерни доруғаларгина бошқарган. Мустаҳкамликда ҳам ҳеч қачон Самарқанд билан тенглашиш даъвосини қилмаган. **Мисра:** Бубин тафовути раҳ аз кужост то ба кужо – Йўл фарқини кўр, қайдан қайгачадир?

Алқисса, Самарқанднинг подшоҳ томонидан фатҳ этилгани борасидаги қувончли хабар Мовароуннаҳр диёрининг теваарак-атрофига ёйилгач, Шовдор ва Сўғд ҳамда ул шаҳарнинг бошқа туманлари, қалъа ва кишлоклари аҳолиси ҳазрат подшоҳга давлатхоҳлик

шиорини намоён этдилар. Ўзбек доруғалари эса қочиб қолиш қарорини ихтиёр этиб, Шайбонийхон ўрдусига бориб кўшилдилар. Хон эзилиб-сикилиб, хайрон бўлган кўйи юзини Бухоро сари қаратди.

Шу воқеалар асносида Муҳаммад Боқи Тархон Қаршига келиб кириб, ул қалъа ва Хузур кўрғонини беркитди. Адолат паноҳли подшоҳ бу хабарларни эшитиб, шоду хуррам бўлиб, қалби қувончларга тўлди.

Подшоҳ халққа ғамхўрлик ва эҳсон палосини ёйиш ҳамда адолат ва саховат асосини ўрнатиш учун тиришди. Айниқса ислом олимларига тарбиятлар кўрсатиш ва ширин сўзли шоирларга яхшиликлар қилиш бобида кўп сабъ-ҳаракатлар этди. Фозиллар қаймоғи бўлмиш фасоҳат пойдевори қурувчиси ва сўзни безаш майдонида назму наср човғони билан ютук қоптоғини замон шоирлари қўлидан олиб қочиб юрган мавлоно Биноий Шайбонийхоннинг Самарқанд ўлкасини истило қилган чоғи шу хон ёнида бўларди. Фозилларни сийловчи подшоҳга бу фатҳ муяссар бўлгач эса, бошдан-оёқ ясаган кўйи осмонўлар даргоҳга келди. Аммо Амир Қосим қавчин эҳтиёткорлик йўлини тутиб, ул жанобни Шаҳрисабзга чиқариб юборди. Аммо бир неча вақт ўтиб, фозилларга бошпана бўлмиш подшоҳ қайтадан Самарқандга чақириб олди ва иноят назарига манзур этиб, инъом ва эҳсон эшиқларини бу шоир хаёти юзи сари очди. Ва мавлоно Биноий ўша айёмда олий мақомли подшоҳнинг мактов яқунли номига атаб мусиқада бир амал басталади. Мазкур куйида ушбу рубоийни битганди.

## **Рубоий:**

Не ғалла маро, к-зи он тавонам нўшид,  
Не муҳмал<sup>79</sup>и ғалла то тавонам пўшид.  
Овро ки на хўрдан аст, не пўшидан,  
Дар илму хунар кужо тавонад кўшид.

## *Мазмуни:*

Ея олишимга на ғалла бор,  
Кийишимга на асраган кийимим.  
Емоғию киймаги учун нарсаси йўқнинг,  
Илму хунар учун тиришмоғи амри маҳол.

Ва фазилат дастгоҳли Бобур подшоҳ мазкур рубоий баробарда сўзга чечанлик намунаси бўлган ушбу калом жавҳарларини баён тизимига терганлар.

## **Рубоий:**

Ишлар бори кўнгулдагидек бўлғусидур,  
Иньому вазифа<sup>80</sup> бори буйрулғусидур.  
Ул ғаллаву муҳмалки деб эрдинг,  
Муҳмалға бўю, ғалладин уй тўлғусидур.

Мавлоно Биноий бу рубоийнинг биринчи мисраси кофияси радифга айлангирди ва баён тизимига бир дубайтлик тизди ва унинг бир байти ушбу бўлиб, нукта билувчи подшоҳ назарига етказди.

<sup>79</sup> Муҳмал – бу ерда: мато, кийим.

<sup>80</sup> Вазифа – нафақа.

**Байт:**

Мирзоки ки шоҳи баҳру барр<sup>81</sup> бўлғусидур,  
Бир муҳмал<sup>82</sup> учун мунча иноят бўлғусидур<sup>83</sup>.

Ва ўша аснода Фирокий таҳаллусли Хожа Абулбарака подшоҳнинг жаннат рутбали суҳбатига етишди ва мазкур рубоийларни эшитиб, дур сочувчи подшоҳнинг гавҳарга юн назми татаббусида бир рубоий айтди. Ёдимда шундан фақат бир фарди қолган.

**Байт:**

Бу жаврки, қилди давр, сўрулғусидир.  
Султони қарам бу узрни қўлғусидур.

Алкисса, ўша қишда жаҳон олувчи Бобур подшоҳ фирдавсмонанд Самарқандда сарафрозлик тахтида ўтириб, доимо фуқаропарварлик шартларини бажо ва дўстларни сийлаш ишларини адо этиб, душманни қуйдириш нақшини қўнгли лавҳига чизиш билан

---

<sup>81</sup> Баҳру барр – денгизу қуруқлик. Яъни сув ва қуруқликдан иборат ер қурраси.

<sup>82</sup> Муҳмал – бу ерда: бекорчи гап; Биноий бир сўзнинг иккита маъносидан сўз ўйини қилган.

<sup>83</sup> Хондамир гарчи «Ҳабиб ус-сийар»нинг ушбу бобини 1524 йил ёзиб, ақмо, кейинчалик. яъни 1530 йилларда Ҳиндистонда «Бобурнома»ни қўриш имконига эга бўлган эса-да, унинг Биноий, Фирокий шеърларини узук-юлук тарзда бериши, бизга бошқа бир асосни беради – Хондамир ўша пайтлари бир неча бор Бобур билан (Балх ва шу шаҳар атрофи ҳамда Кобулда) учрашар экан, ёзаётган китобига Бобурнинг оғзаки берган маълумотларинигина киритган бўлиб, «Бобурнома»нинг ҳақиқатдан ҳам қўлимиздаги таҳрири асосан 1528 йил баҳори– 1529 йил январь ойи оралиғида амалга ошириб, қолган воқеалар баъзи сўнграқ қушилгани, шу туфайли Бобур бу асарини 1529 йил мартида Самарқандга бериб юбора олгани маълум бўлади.

машгул бўларкан, Шайбонийхон Бухородан Иброҳим Тархоннинг укаси Аҳмад Тархон волийлик қилиб ўтирган Дабусия қалъаси устига лашкар тортиб, катта куч ва зўрлик ишлатган кўйи ул кўрғонни босиб олиб, аҳолисини катли ом қондаси бўйича ёппасига кириб ташлади.

**ДҮСТНИ СИЙЛОВЧИ ПОДШОҲНИНГ  
ДУШМАН БИЛАН ХОЖА КОРДЗАН МАНЗИЛИ  
ТАШҚАРИСИДА УРУШГАНИ ЗИКРИ ВА УЛ  
ҲАЗРАТНИНГ МАҲҲУЗА САМАРҚАНД ШАҲРИДА  
БЕРКИНГАНИ ВА ХУДОВАНД ТАҚДИРИГА КЎРА  
ОЗИҚ-ОВҚАТ ТАНҚИСЛИГИ ВА ОЧЛИК РЎЙ  
БЕРГАНИ БАЁНИ**

Рустамдек саф ёрувчи ва динпаноҳ подшоҳ Самарқанд фатҳидан сўнг ҳамиша ўй-фикр қалами воқитасида Мухаммадхон Шайбоний билан тўқнашиш ва уруш солиш нақшини ёғдули кўнгли саҳифасига битиб ўтираркан, ҳазрат қуддусийнинг ўзгартиб бўлмағ тақдирига биноан Шайбонийхоннинг Дабусия қалъасини қўлга киритгани ва ул кўрғоннинг барча аҳолисини қирғинга дучор этганини эшитгач, хаёлдаги мазкур юриш азму қарор сифатини топди. Аммо ўша пайтда халифа ошиёнлик даргоҳда қўшин аҳлидан икки юз қирқ нафардан ортиқ бирон киши йўқ эди. Шайбонийхон мавкабида эса беш-олти минг пиёда ва отлик бўлиб, уларнинг ҳар бири жангу жадал майдонида ўзини Рустаму Исфандиёрдан сўнг учинчи қаҳрамон деб биларди. Бир неча кун урушга чиқиш кечиктирилди. Шу ораликда Султон Маҳмудхон Аюб

Бекчиқ ва Қашқа Маҳмудни беш юз нафар довиюрак кишилар билан олий зотли подшоҳга ёрдам учун жўнади. Шунингдек, Жаҳонгир Мирзо олдида Султон Аҳмад Танбалнинг укаси Халил шижоат аломатли икки юз нафар отлик билан подшоҳ ўрдусига келди. Шундан сўнг олийшонли подшоҳ 906 йил шаввол ойи<sup>84</sup>да Муҳаммадхон Шайбоний билан урушиш мақсадида пахлавонлик маслаки солиқларини жангга тайёрлаб, Самарқанддан чиқди ва Боғи Нав саодат нурли байроғи ойчасидан гуллаб-яшнаб, беш-олти кун ўша ерда тўхтаб турилди. Қўшин йўл асбобларини саранжомлаш ишларидан қутулгач, нусратпаноҳ мавкаб кўчма-кўч юриб, душман тарафига йўналди ва Сарипулдан ўтиб, тўқнаш ва уруш-саваш учун қулай бир жойни лашкаргоҳ қилди. У томондан эса Шайбонийхон мақтов хислатли подшоҳнинг қаршиси сари келиб, ҳазрат подшоҳ лашкаргоҳигача бир фарсахлик масофа наридаги Хожа Кордзан четига хонлик туғларини хилпиради. Аммо икки қўшин беш-олти кун бири-бири қаршисида ўтиришса-да, султонлик жангига киришмадилар. Фақат баъзида бир нечта довиюраклар пахлавонлик самандини мардлар майдонида жавлон урдириб, жанг чангини тез айланувчи осмон авжига чиқариб қолардилар ва уруш асбобларини ишга солиб, етук журъат ва жасурлик намунасини кўрсатардилар. Ана шундай вақтлардан бир кечаси Шайбонийхон шабихун<sup>85</sup> расми билан рубъи маскун подшоҳи чодирини ёнига келди. Аммо яхши аломатли лашкаргоҳ атрофи

<sup>84</sup> 906 йил шаввол ойи – 1501 йил 20 апрель – 18 май.

<sup>85</sup> Шабихун – тунги юриш.



Эшик ва чапаркат<sup>86</sup> тахталари ва ёғоч билан қаттиқ бе-  
китилгани сабабли бирон иш чиқара олмай, «орқага  
қайтиш мактовли ишдир» сўзини тилидан жорий  
қилган кўйи юзини ўз лашкаргоҳи сари қаратди. Шун-  
дан сўнг кишвар олувчи подшоҳнинг ойдин кўнглига  
«тезроқ ғаним билан урушга чиқилса ва янгидан ер  
юзини душман қонидан қизил қилиб, Шайбонийхон-  
га мамлакат олишнинг қандай бўлишини кўрсатиб  
кўйилса» деган фикр йўл топди. Амир Қанбар Али ҳам  
ҳазрат подшоҳни шунга ундаб «пасткаш душманларга  
бундан ортиқ муҳлат бермаслик керак, аксинча тезроқ  
памшир ва ханжар захми билан вужудлари қасри де-  
воридан дарча очиш лозим» дерди. Аммо шу пайтда  
«Муҳаммад Боқи Тархон яхши куролланган икки минг  
нафар отлик билан Кеш шаҳрига келибди ва тез орада  
олий ўрдуга келиб кўшиларкан» деган хабар етишгач ва  
шунингдек «Мирзо Аҳмад Дўғлот Султон Маҳмудхон  
буйруғига кўра бир минг беш юз нафар диловар киши  
билан мана шу икки-уч кун ичида осмон мартабали  
мавқабга кўшилади» мазмунидаги сўзлар етиб келгач,  
бошқа амирлар уруш учун шошилишни маъқул кўрмай,  
«ул икки кўшин етиб келмагунга қадар ғаним билан  
беллашмайлик» дедилар. Ҳазрат подшоҳ илоҳий қазову  
қадарга биноян амир Қанбар Алининг фикрини тўғри  
деб ўйлаб, куёш жамшиди ёғдули байроғини зангори  
осмон узра кўтарган ва кавқаблар мавқабларига олтин  
рангли совут кийдирган тонг чоғи зулмат кўринишли  
кўшинни тор-мор келтиришни ўз олдига мақсад қилиб  
кўйди. Шу сабабли Искандар мартабали подшоҳ куёш

<sup>86</sup> *Чапар* — одам бўйича келадиган тахта қалқон-тўсиқ; *Чапаркат* —  
бир одам сиғувчи содда ясалган қат.

нурли кўнглини шавкат дастгоҳли кўпинни тайёрлаш учун қаратиб, амир Қанбар Али, Банда Али, Хожа Али, Амиршоҳ қавчин, Сайди Қосим эшикоғо, Банда Алининг укаси амир Қосим қавчиннинг ўгли Қўч Ҳайдар яна бир нечта қасоскор баҳодирлар билан бирга Ҳировулда таваккал туғини кўтардилар. Иброҳим Сору, Иброҳим Жоний, Абулқосим Кухбўр ва жасорат ахлидан тағин бир бўлаги бурунғор қисмда туриб душман билан урушадиган бўлишди. Иброҳим Тархон, Султон Ҳусайн аргун, Қаро Барлос, Пир Аҳмад, Хожа Ҳусайн эса жангчилардан яна бир бошқа бўлаги билан жувонғордан уруш майдонига йўналишга буйруқ олдилар. Амир Қосим қавчин ичкилардан бир тупи билан подшоҳнинг баланд пояли туғи соясида кўл қисмда туриб, ҳимматини душманга кириш ва ғанимни фано оламига жўнатишга қаратадиган бўлди.

У томондан Муҳаммадхон Шайбоний ҳам кўшин сафини ясаб, ўзи кўл қисмда турди. Маҳмуд Султонни Бурунғор қисмда сақлаб, жувонғорни бошқаришни Ҳамза Султон ва Маҳди Султонга топширди.

Шундай қилиб, бу иккала урушқоқ жанговар подшоҳ ва хон мазкур тартиб ва қонда билан бир-бири қаршисида турган кўйи ғазаб ва адоват оташини ёндириб, довлорак баҳодирлар қон торини узувчи пайқон учи билан қон оқизувчи оловни киндор жисм сари пуракдилар ва Рустам қудратли ботирлар ўткир шамшир зарби билан гўзаллар жонидан тешик очган кўйи уларнинг бако хирмагини фано елига совурдилар.

### **Назм:**

Ғумоми камонҳо зи борони тир,  
Расонид тўфон ба чархи асир.



Ҳусоми далерон чу хунбор гашт,  
Зи хун руди Жайхун падидор гашт.

*Мазмуни:*

Камонлар булгути ўқлар ёмғиридан,  
Баланд чархга тўфон ўрлатди.  
Ботирлар қилгичи қон окизгач,  
Қондан Жайхун дарёси ясалди.

Шу аснода душман қўшини буронғори ҳамлага ўтиб, олий мавқабнинг орқаси томон чопдилар. Сулаймон маконли подшоҳ эса оти жиловини муҳолифлар томонга бурди. Бу пайтда шижоату жасоратда тенгсиз тажрибали йигитлар хировулда тургани сабабли жангга мохир хусрав олдида улардан ҳеч бири кўринмади. Шунга қарамай, Бобур Мирзо бостириб келаётган ўзбеклар олдида чиққанча найза захми ва пайкон зарби билан ғанимни орқасига қайтарди. Ул мияси айниган душманлар эса қилич ва ханжар зарбидан талвасага тушиб, ура қочганича Шайбонийхон олдида етгунга қадар ҳеч ерда тўхташ имконини топмадилар. Чексиз кўркув туйғуси Шайбонийхон яқинларидан баъзиларининг чидам ва барқарорлик пойдеворини ларзага солиб, улар хонга қарата, қўшинимизнинг буронғор қисми остинустун бўлди ва иш уруш оловини гуриллатиш фурсатидан ўтди, яхшиси «ўз вақтида қочиш ҳам галабадир»<sup>87</sup> мазмунига амал қилайлик ҳамда «қочиш пайғамбарлар суннатидир» мазмуни тақозосидан ташқари қадам босмайлик, дедилар. Шайбонийхон бу сўзларни қабул

<sup>87</sup> Араб мақоли.

кулоғи билан эшитмади ва ўз кўшинини чакириб, уруш майдони чангини тўзгитишни буюрди. Қалби жўшқин даштлик ўзбеклар яна қайтадан ҳамла уюштириб, нусрат аломатли подшоҳ сипоҳининг жувонғор ва буронғорини олддан олиб ташлашга эришиб, қўл қисмининг орқасидан кирдилар. Олий зотли подшоҳ эса яна бир бор оти жиловини душман сари тўғирлаб, қилич сармаш ва ханжар санчишга тушди. Аммо саодат аломатли узанги ёнида ҳеч ким қолмагани, ўзбек кўшинининг ён-атрофдан кириб келиб, шибба<sup>88</sup> лагани учун уларни қайтара олишга муваффақ бўлинмади. Улуғ амирлардан Иброҳим тархон, Иброҳим Сору, Иброҳим Жоний жасорат ва пахлавонлик намунасини етук бир алпозда намоён қила-қила сўнг жаноби жалолли субҳонийнинг ўзгартиб бўлмас тақдири бўйича мангулик оламига ошиқдилар. Шунингдек, ўша жон куйдирувчи кун Абулқосим Кухбўр, Қосимбек қавчиннинг тўнғич ўғли Ҳайдар Қосим, Худойберди туғчи, Султон Аҳмад Танбалнинг укаси Халил буюк тангри қазосича шаҳидлик мартабасига етишдилар. Ўша аснода, не ажабким, Султон Маҳмудхон томонидан подшоҳга ёрдам учун келган мўғуллар худди ғаним ўзбекларга ўхшаб, улар ҳам галабага ёр лашкар ашёларини талашга киришиб кетдилар. Шижоат паноҳли подшоҳ имкони борича ул даҳшатли майдонда туриб, ул нопок қавмни йўқ қилишга уринар ва ғанимнинг чакқон ботирлари қонидан тупроқ юзини қизилга бўярди. Бироқ олий мавқабда ўн-ўн икки кишидан ўзга киши қолмагани зулм аҳлининг ўқлари галаба аломатли байроқларга

---

<sup>88</sup> Шибба – бир түп бўлиб ўкка туттиш.

тега бошлагани учун ул бало ғарқобидан йўналиш жиловини Куҳак дарёси тарафига бурди. Отини кежим ва жибаси билан бирга дарёга солиб, кўп кийинчиликда ул соҳилга чижиб олди ва сўнг от устидаги кежимни кесиб ташлаб, шимол тарафга шамолдек елиб кетди ва Кулба ўланги жудудида яна бир бор мазкур дарёдан кечиб ўтиб, икки намоз оралиғи Шайхзода дарвозасидан шаҳарга кириб борди ва фақат шу ерда отдан тушди.

Бу жанг майдонидан омон чиққан амир ва ичкиларнинг бир гуруҳи эса ваҳима ва кўркинч кучлиликдидан ҳар бўлаги бир тарафга бош олиб кетдилар. Шулар жумласидан Қанбар Али саллоҳ Кундуз сари равона бўлди, Каримдод ва Худодод туркман, Жоника кўкалтош, мавлоно Бобо Пашоғарий Ўратепа тарафга кетдилар. Ул маъшум ҳодисадан икки кун ўтгач, Хожа Абулмакорим, Қосимбек қавчин ва олий мартабали подшоҳ хизматида қолган бир нечта тайинли кишилар аълоҳазрат хузуридаги мажлисга йиғилиб, машварат шартларини адо этдилар ва маслаҳатни қалъани беркитмоққа қарор бердилар. Сузангарон дарвозасини ҳимоя қилиш Қаро барлос бошлиқ бир нечта довюрак йигитлар зиммасига юкланди. Қозиристон дарвозаси эса Ширам тағой ва Қутлук хожа кўкалтошнинг жасурлиғи шарофати билан мустаҳкамланиш сифатини топди. Жамшид қоидали подшоҳ ва амир Қосим қавчин ҳамда осмонга туташ даргоҳнинг яқин кишиларидан бир тўпи ул гуруҳларга ёрдамчи ўрнида тайинланиб, қалъанинг барча дарвоза ва буржларига бир хил тенг масофада турган кўйи қайси тараф ёрдамга муҳтож бўлса, ўша ерга тез етиб боришлари учун шаҳар ўртасида жойлашган Мирзо Улуғбек мадраса-

сида ўрнашдилар. Подшоҳ ул мадраса томида чодир  
куббасини ой ва куёшли осмон авжигача кўтарди. Му-  
лозимлар эса шу мадрасанинг хоналарида манзил тут-  
дилар. Эртаси куни Шайбонийхон маҳфуза Самарқанд  
қалъаси ён-атрофига келиб, сал нарироққа тушди. Буни  
кўрган шаҳарнинг чапани ва бебош кишилари жанг ва  
саваш мақсадида Самарқанд маҳаллаларидан тўп-тўп  
бўлиб келган кўйи дастлаб Улуғбек Мирзо мадрасаси  
эшиги сари ошиқар, сўнг подшоҳлик давлати дуоси-  
ни адо этгач, урушга рухсат олиб, дарвозадан ташқари  
чиқар ҳамда жасорат ва журъат ели билан жанг  
учқунини алангалатиб, муҳориба оловини гуриллатар  
эдилар. Ўзбеклар эса «қочиб урушиш» усулини қўллаб,  
сира шаҳарга яқин келмасдилар. Бундан дадилланган  
шаҳарликлар Шайбонийхон ўрдуси ёнигача боришар  
ва кўзларига нима кўринса, жасурлик қўли билан тала-  
шар эди. Ўшандай кунларнинг бирида Шайбонийхон  
Оҳанин дарвозаси тарафдан ҳамла қилиб, қўшинидан  
бир нечтасини эса пистирмада кўйди. Эски қонда  
бўйича олдга чиққан пиёдалар душман отлиқлари  
орқаларидан келиб ҳамла қилган пайтдагина ўзбеклар  
ишлатган хийладан вокиф бўлдилар ва икки ўртада  
азим бир жанг рўй бериб, Нўён кўкалтош, Қулназар  
тағой, Мазид ва соҳиби далил хусрав қўшинидан яна  
бир нечта довюрақлар пиёдаларни ҳимоя қилиш ния-  
тида отлари жиловини ўзбеклар билан урушиш сари  
бурдилар. Қулназар муҳолифлардан бири томон қилич  
сармаб урди. Аммо ўзбек сипоҳи кўп бўлгани сабабли  
пиёдалар устидан ғолиб чиқиб, уларни пўлат қиличлар  
зарби билан Оҳанин дарвозасигача қувиб бордилар.  
Ҳагто ўзбек отлиқлари улар кетидан хожан Хизр мас-

жидига ёвук бостириб келдилар. Ўша мақомда Кўчбек яхши жанглар килди. Олампаҳоқ подшоҳ ва халифа дастгоҳли даргоҳ яқинлари ул дарвоза устидан ўлим йўналишли ўқ отардилар. Ноилож душман ўша ердан қайтиб кетди. Эргаси куни Шайбонийхон темир кийган момақалдирок гулдирашли кўшин билан Оҳанин ва Шайхзода дарвозалари оралиғига келиб, тўкнаш ва уруш-савашга тайёр турди. Олий мартабали подшоҳ саодатли ёшлар билан Шайхзода дарвозаси орқасига ошикиб, келишилган дастурга кўра тангрига топиниш кўлини ўқу ёй сари чўзди ва подшоҳнинг бош бармоғидан ўлим аломатли ўқ учиб чиқиб, битта ўзбек жангчиси минган бўз отга бориб тегди. От шу заҳоти тил тортмай ўлди. Ўша куниси душман кўшини ҳаддан ташқари мардоналик кўрсатди, ҳатто бир бўлаги Шутургардан буржи ёнида девор тагигача келдилар. Бошқа бир тўғи эса «олий мавқабнинг доворак йигитларидан қатга қисми Оҳанин ва Шайхзода дарвозаларида йигилиб, Қозиристон ва Сузангарон дарвозаси буржида бўлса игна мисол пайкон учи билан ботирлар ҳаёти торини уза оладиган бирор киши қолмаган» деган гумонда, ўша икки дарвоза томон от кўйишди ва ёнларида тузатиб олиб келган олтимиш беш нарвонни деворга кўйиб, тепага чикмоқчи бўлишди. Кўчбек, Муҳаммадқули қавчин, Шоҳ Сўфи ва Рустам сийратли баҳодирлардан тағин бир нечтаси қаршилиқ қалқонини юзларига тутиб, ҳамла оёғи билан ул жамоат устига отилдилар ва мазкур ғанимлардан айримлари деворга чиқиб олиб, баъзилари эса ҳали нарвонда турган вақтда ул ғолиб ботирлар улар сари чанғалини чўзиб, кўзларига қиёмат куни аломатини кўрсатдилар.

Пастда турганлари эса оёғини нарвонга қўяр-қўймай ура кочдилар. Қўчбек бошқа ўртоқларидан кўпроқ килич ва ханжар ишлатиб, қанча ўзбекнинг вужуд нақшини борлиқ саҳифасидан ўчирди. Қаро барлос, Қутлук хожа кукалтош, Қулназар ҳам ўша куниси ўткир килич ва қон оқизар новак-ўк билан ўз мурчалини душман босқинидан асрадилар. Эртаси куни эса амир Қосим қавчин бошлиғ жасур отликлар гуруҳи шаҳардан ташқари чиқиб, жанг учун олдинроқ келган ўзбеклар билан уруш-саваш майдонида беллашиб, уларни Хожа Кафшгаргача ҳайдаб борган қўйи ҳатто бир нечта машхурроғини ҳаёт отидан кулатиб, ному-борак бошларини қутлуг аломатли подшоҳнинг нурли назарига етказдилар. Ана шу зайл тўрт ойга яқин икки кўшин ўртасида жанг ва ҳарб олови ёниб, уруш-саваш чангу тўзони кўтарилиб турди. Ҳазрат подшоҳ жаннат нишонли Самарканд шаҳрини қўлда сақлаш учун имкон борича ҳаракат қиларди. Шайбонийхон эса камалдагиларни кийин аҳволда қолдиришга уриниб, муҳосира ишини пайсалга солишга ҳеч унамасди. Ўша аснода халқ ва шаҳараро озиқ-овқат танқислиги ва очлик балоси оралаб, Самарканд аҳолиси ичи ўчоғига очлик оташи тушди. Бир неча вақт шаҳарликлар кўзига ҳар тонг фалак тандиридан чикувчи куёш доирасидан ўзга айлана нарса кўринмади. Бирор уй ва қашонада деворга урилган сомон лойи ичида бўлмаса, ҳатто ўша лой ичида ҳам бир сиким сомон ёки бир дона бугдойми, арпами ёки сули топилмасди. Гўшту ёғ эса Аҳмар гугурти-ю, анқонинг уруғи каби ноёб эди. Камбағал ва муҳтож халқдан айримлари ит ва мушук гўштидан қайла пишириб, иш мулоҳаза ва уят даража-



сидан ўтиб кетганди. Амирлар ва катталар от-уловга ем-хашак топмай, ўрнига дов-дарахтлар япроғини едирардилар. Бир бўлак кишилар эса қуриган ёғочларни майдалаб ва тахта тарашаларини бир оз вақт сувда ивитиб, отлари учун ем тайёрлардилар. Ана шу қамал даврида Искандар рутбали подшоҳ бир неча бор Хуросон ва Ҳисори Шодмон, Кундуз, Баклон, Мўғулистон ҳокимлари олдига элчилар юбориб, ёрдам сўради, мазкур вилоятлар волийлари эса мадад борасида бепарволик ва ишни орқага суришга мойил бўлиб, ҳеч ким додга етмади. Ноилож самарқандликлар маънос тортиб ва тушқувликка тушган кўйи битта-битта, иккита-иккита бўлиб, ўзини қалъа буржу борасидан пастга ташлаб, Шайбонийхонга бориб кўшилавердилар. Шаҳар халқининг қийин аҳволда қолганини билган хон Ғори Ошиқон яқинига келиб қўш ташлади. Подшоҳ ҳам унинг ўтрусига келиб, Кўйи Поён манзилида даргоҳ куббасини баланд кўтарди.

### **СУЛАЙМОН МАҚОҢЛИ ҲАЗРАТ ПОДШОҲНИНГ САМАРҚАНДИ ЯНА БИР МАРТА АБУЛФАТҲ МУҲАММАДХОН ШАЙБОНИЙГА ТАШЛАБ ЧИҚҚАНИ ЗИКРИ**

Исломпаноҳ подшоҳ яна бир неча кун қамал қийинчилигига чидам ва бардош бериб, сабру тоқат қилгач, кўнглидан «ғалла қаҳатчилиги-ю, очлик зуғумидан одамлар ҳар хил ҳаром ишга қўл ураётгани ҳамда озиқ-овқат йўқлиги сабабли самарқандликларга қўп зулм ўтказилиб, одамлар зарурат юзасидан душманга итоат нақшини кўнгил саҳифасига чизмоқдалар,

яхшиси шижим, яна бир неча кун зулмкор турмуш такдирига тан бериб, шаҳарни ташлаб, йўналиш туғини Тошканд томонга кўтарсак» қабилдаги ўй-фикрлар ўтди. Шунга кўра, 907 йилнинг боши<sup>89</sup> да ўта қоронғулигидан товуш кулоқ пардаси саройи йўлида адашадиган ва фалак юлдузлари кўзидан бўлак ҳеч бир посбоннинг кўзи очик эмас бир кечаси оқибати хайрли Бобур подшоҳ Абулмакорим ва бошқа бир нечта улуғлар ва юзга яқин саодатли навкар билан бирга Самарканд дарвозасидан чиқиб, йўналиш юзини Андижон томон қаратди. Йўл давомида азалий саодатни Султон Аҳмад Танбалдан ажралишда ва осмон мартабали Бобур подшоҳга дўстликда билган Жаҳонгир Мирзо Андижон томондан келиб, улуғвор оғосининг қабули шарафини топди ва гуноҳлари рақамлари осмон ҳашаматли подшоҳнинг кечирим сувлари билан айём саҳифасидан ўчириб ташланиб, шафқат ва меҳрибонлик нурлари аҳволи юзи узра зиё сочди. Подшоҳ барча мулкларнинг мутлақ молики саклови остида Андижонга яқин етганда, Султон Аҳмад Танбалнинг исён ва туғёни ҳаддан ошгани сабабли Андижонга кириш ҳақида ўйлаб ўтиришнинг ҳожати йўқлиги аён бўлди. Шунга кўра, подшоҳ оти жиловини Тошканд тарафга бурди. Ул давлат ва иқбол осмонининг қуёшини тоғалари бўлмиш Султон Маҳмудхон ва Олачахон шариф қадамларини эъзоз-икром билан қаршилаб, зиёфат ва шодлик шартларини адо этишга киришдилар.

Шайбонийхонга эса тагин бир бор Самарканд

<sup>89</sup> 907 йил боши – 1501 йил 17 июль ойи.

шаҳрининг фатҳи муяссар бўлиб, Мовароуннаҳрнинг кўпгина шаҳарларида эркин ҳукумат ва истибод байроғини хилпиратди. Сўнг эса амир Хусравшоҳ икболи низолини кулатмоқ ва Ҳисори Шодмон, Хатлон, Бадахшон, Қундуз, Баклонни эгалламоқ ҳаёлини кўнгли лавҳига чизиб, кетма-кет узлуксиз равишда бебок ўзбек сипоҳини ул ҳудудларни талаш учун юбориб турди ва ул ботирлар бўлса ҳамла ели билан қатл ва асир олиш оловини алангалатиб, ўз куч-қудрати аломатларини кўрсатдилар.

### **ЎЗГАРУВЧАН ФАЛАК ҲОДИСАЛАРИДАН АЙРИМЛАРИ БАЁНИ ВА КОБУЛНИНГ АМИР МУҲАММАД МУҚИМ АРҒУН ТАСАРРУФИГА КИРГАНИ ЗИКРИ**

«Аллоҳдан ташқари барча нарса ҳалок бўлгувчидир»<sup>90</sup> ояти сўзлари тақозосича ва тенгсиз қодирнинг зоти хоссаси давоми «бўл ва бўлади»<sup>91</sup> экани ва бу тубан дунёдан ўтиб кетиш рубъи маскуннинг барча меҳнада эзилган халқи вужудига хос бўлгани сабабли 907 йил<sup>92</sup>да Мирзо Улуғбек бин Мирзо Султон Абу Саид Кобул шаҳрида илоҳий ва моддий оламини яратган Худованднинг мағфиратли қабтолига қўшилгач ва ўғли Мирзо Абдулраззоқ ул диёр ҳокими бўлиб, отаси ўрнига фармон беришлик ўриндигига ўтиргач

<sup>90</sup> Қуръони карим, Қасас (28) сураси, 88-оятдан.

<sup>91</sup> Матъада «қунфаяқун». Қуръони карим, Марям (19) сураси, 35-оятдан: У (Аллоҳ) бирон ишни қилмоқни истаса, фақат унга «Бўл», дер. Бас (ўша иш) бўлур.

<sup>92</sup> 907 йил – 1501 йил 17 июль – 1502 йил 6 июль.

ва бу шохзоданинг кичик ёшдалиги учун амирлар ва давлат устунлари орасига қарама-қаршилиқ тушгач, Ширам Ака барча катта ва кичик ишларни бажаришни ўз зиммасига олди. Амир Юсуф Муҳаммад ва амирлардан айримлари шаҳардан чиқиб кетиб, фурсат пойлаб турдилар ва Қурбон ҳайитининг тонг маҳали Ширам Ака султонлик девонхонасида ўтириб, ош тортаётган пайтда уч юз нафар мукамал қуролланган киши билан билдирмасдан Кобулга кириб, устига ташландилар ва қиличларни қасос кинидан суғуриб дарҳол ҳаёти иморатини яқсон қилдилар. Шу жиҳатдан кобулликлар орасига қаттиқ паришоялик йўл топиб, бу хабар Гармсирда Амир Зуннуннинг кичик ўғли Муҳаммад Муқим аргуннинг қулоғига етди. 908 йилнинг охири<sup>93</sup>да ҳазора ва накудар лашкарини йиғиб келиб, Кобулни босиб олишни ният қилди ва ўша томонга қараб кўзгалди. Мирзо Абдулраззоқ қочиш қарорини ихтиёр этди. Муҳаммад Муқим ўл мамлакатнинг давлат ва иқболида муқим ўтириб, Мирзо Улуғбекнинг кизини ўз никоҳига киритди. Бу хабарлар Мирзо Бадиуззамон ва амир Зуннун Амўя дарёси қирғоғида турган пайтлари улар қулоғига етишиб, барчасининг кўнглини хурсандлик ва қувонч туйғулари чулғаб олди.

---

<sup>93</sup> 908 йил охири (зулҳижжа) – 1503 йил 28 май.

**СУЛТОН БАДИУЗЗАМОН МИРЗОНИНГ ОЛИЙ  
МАРТАБАЛИ ШАЙБОНИЙХОНГА ҚАРШИ  
УРУШ УЧУН КЎШИН ТОРТГАНИ, АММО  
АМИР ШУЖОИДДИН ХУСРАВШОҲ БИЛАН  
БИРДАМЛИККА ЭРИШМАГАНИ САБАБЛИ АМУЯ  
ДАРЁСИ ҚИРГОҒИДАН ЯНА ОРҚАГА ҚАЙТГАНИ  
ЗИКРИ**

Абулфатҳ Мухаммадхон Шайбонийнинг жаҳон олувчилиги овозаси оламари кенг ёйилгач ва ўзбек кўшини савлати Самарканд қатгалари ва шариф кишилари йигинини таркоклик сари юз туттиргач, хокони мансур Султон Хусайн Мирзо Балх томонга Мирзо Бадиуззамон олдиға чопарлар жўнатиб, уни ўзбек хонига қарши тўкнашиш ва урушишға ундади.<sup>94</sup> Амир Хусравшоҳ ҳам шоҳзода Бадиуззамонға элчилар юбориб, улар орқали ёмон вужудли ўзбеклар зулмидан шикоят қилган кўйи «қачон шоҳзоданинг олий мавқаби Амуй дарёси қиргоғига етишса, камина Ҳисори Шодмон, Хутлон, Бадахшон, Қундуз, Бақлон кўшинлари билан осмонни босиб ўтувчи ўрдуга қўшилажакман ва бу юришда икбол янглиғ зафар асарли узанги мулозими бўлажакман» дея айттирди. Шунга кўра Мирзо Бадиуззамон Қандаҳор ва Заминдовар томонларға элчи ва хат-

<sup>94</sup> «Бобурнома»да ёзилишича, Султон Хусайн Бойқаро бундай мазмундаги хатни Коҳмард ва Ажарда турган (1504 йил июль) Бобур Мирзоға ҳам жўнатган. Бобур Мирзо Хусайн Бойқаронинг ўшанда Бадиуззамон Мирзо, амир Хусравшоҳ, амир Зуннун ва ўзига бир хилда ёзиб юборган хатини 1529 йилгача (архив ҳужжати сифатида) сақлаган бўлиб, унинг Бадиуззамон Мирзо ва ўзига доир қисмларини «Бобурнома»да аниқ хавола этган. Қаранг: Захриддин Мухаммад Бобур. Бобурнома. – Тошкент: Юлдузча, 1989. — 111-б.

лар жўнатиб, амир Зуннун ва ўғиллари-ю, ака-укалари номига ҳамма бажариши шарт бўлган куйидагича фармон битди: Жуда тезлик билан ул ҳудуднинг қушинини тўплаб. кутлуғ мавкаб мулозиматида ўзбек лашкарини тор-мор этиш ва Мовароуннаҳрни қўлга киритиш учун куббатил ислом Балхга келинглар!

Амир Зуннун фармонга итоат шартларини бажариб, икки-уч минг жасур отлик билан Балх томонга равона бўлди ва Бадиуззамон Мирзо ул шижоат паноҳ амирни хусравона меҳрибонлик ва подшоҳона тортиқлар билан сийлаб, ҳаёти юзи сари турли марҳамат ва мушфикликлар эшикларини очди. Амир Хусравшоҳ ҳам амир Зуннун назарига арзирли тухфа ва муносиб совғалар юбориб, шошилич равишда Амуя дарёси бўйига келишга ундади.

Киш охирлаб, яшил майса ва гул-чечақлар қўшини арик бўйлари ва дала-дашту тоғ ёнбағирларида саф тортган вақтда Бадиуззамон Мирзо Самарканд юришига жазм қилди ва 908 йил охирлари<sup>95</sup> да икки минг пиёда ва отлик темир совут кийган найза санчувчи билан куббатил ислом Балхдан Темир кечуви томонга равона бўлди. Амир Умарбекни эса доруссалтана Ҳиротга юбориб, бузруквор отасидан ёрдам тилади. Дарё бўйига келгач, мадинат ур-рижол<sup>96</sup> Термиз шаҳри рўпарасига қўш ташлади ва ҳарбий ноқора садоларини кумуш рангли фалак авжига етказди. Термизнинг Мир Боки номи билан танилган ҳокими Муҳаммад Боки дарҳол дарёнинг қўшин тушган бу ёқ томонига келиб,

<sup>95</sup> 908 йил охирлари – 1503 йил 28 май.

<sup>96</sup> *Мадинат ур-рижол* – эрлар шаҳри. Термиз шаҳрига берилган сифат.

салтанат вужудли шоҳзода палосини ўпди ва пешкашлар тортиб ўзи ҳам иноят ва илтифотга эришди. Сўнг Бадиуззамон Мирзо амир Султон Ҳусайн арғун ва амир Зуннун, Абдуллоҳ қорақулоқни амир Хусравшоҳ олди-га Ҳисори Шодмонга жўнатди ва уни олий мавкабнинг дарё бўйига келгани ва Муҳаммадхон Шайбонийга қарши урушга қарор қилганидан хабардор қилиб «тез орада мулку давлат душманининг тор-мор қилиниши учун» зудлик билан зафар асарли лашкароҳга келиб қўшилишини буюрди. Амир Султон Ҳусайн, амир Зуннун ва Абдуллоҳ қорақулоқ амир Хусравшоҳ ва унинг укалари Амир Вали, Пир Вали билан учрашиб, уларга Бадиуззамон Мирзонинг фармонлари ва амир Зуннуннинг хатларини етказдилар ва уларни олий ўрдуга боришга ундадилар. Амир Хусравшоҳ бўлса, пешонасига муваффақият ёрлиги битилмаганидан, фармонга итоат этишдан бўйин товлади ва кўнглига «Бадиуззамон Мирзонинг кўли Муҳаммадхон Шайбоний ишидан бўшаган заҳоти албатта мендан Султон Маҳмуд Мирзо мамлакатини қайтариб олиш тамасида мени ўлдирди» деган гумонни келтирди. Натижада ёлғондакам баҳоналар билан элчиларни курук қайтарди. Элчилар Бадиуззамон ўрдусига қайтиб келиб, амир Хусравшоҳнинг ваъдага хилоф иш тутганини арзга етказгач, шоҳзода Амуя дарёсидан кечиб ўтиши борасида иккиланиб қолди. Шу воқеа пайти амир Носириддин Умарбек аъло тахт пойидан қайтиб келди ва унинг сўзларидан ҳокони мансур кутилганига қарши ўлароқ иш тутиб, ёрдам учун қўшин юбормагани аён бўлди. Нонлож, Бадиуззамон Мирзо амир Зуннун билан маслаҳатлашиб, қайтиш ноқорасини чалдир-

ди ва қуббатулислом Балх шаҳри четига яқинлашиб, Иброҳим Султон Мирзо чаҳорбоғида манзил тутди. Амир Шужоиддин Зуннунга кетиш учун рухсат берди.

Ул жаноб йўналиш тугини ўзининг кудрат қароргоҳи сари кўтаргач, Бадиуззамон Мирзонинг давлати ва шон-шавкатига қатта зиён-заҳмат нуқсони йўл толиб, турли-туман бузғунчиликлар рўй берди ва Муҳаммад Шайбонийхон Хуросон шаҳарлари фатҳига умид боғлаб, Амуя дарёсидан кечиб ўтди.

### **БАДИУЗЗАМОН МИРЗОНИНГ ХОС КИШИЛАРИ ТОМОНИДАН ЮЗАГА ЧИҚҚАН ФИТНА ВА ШУ САБАБЛИ МУҲАММАДХОН ШАЙБОНИЙНИНГ АМУЯДАН КЕЧИБ ЎТИБ, БАЛХГА ЙЎНАЛГАНИ**

Мазкур воқеалар бўлиб ўтаётган бир вақтда Дашти кипчок саййидлари каторида турувчи ва ўзбек хонларига нисбатан ғоятда муҳаббат ва ихлос билан хизмат қилиб келаётган Саййид Жаъфархожа исмли хожазода Мовароуннахр диёридан қуббат ул-ислом Балхга келиб, Султон Бадиуззамон Мирзонинг кўлини ўпиш шарафни топди ва шундай сўзларни изҳор этди: – Муҳаммадхон Шайбонийнинг зулми ва зўравонлиги сабабли ундан юз ўтириб, подшоҳлигингиз инояти соясидан паноҳ излаб келдим ва ҳаётим борича давлатингиз тарғфдори бўлиб яшамоқчиман.

Султон Бадиуззамон Мирзо ул айёр саййидга ишониб, уни ўзининг чексиз инъом ва эҳсонлари сазовор этди. Бу саййид жаноблари эса аста-секинлик билан шохзоданинг амирлари ва яқинлари билан ўтириб-туриш муносабатларини йўлга қўйиб, гоҳ-гоҳида хил-



ват ўтиришларида Муҳаммадхон Шайбоний мадҳидаги мақтов сўзларини айтишни бошлаб юборди. Кези келиб, кулай фурсат топилган чоғда уларни хон мулозимати сари оғдириш ишини ҳам пайсалга солмади. Бу борада турли-туман ваъдалар билан алдов усулини ҳам қўлаб турди. Бадиуззамон Мирзонинг амирлари ва хос кишиларидан бўлмиш Иброҳим Султон барлос, Жаҳонгир барлос, Шохмуҳаммад барлос ва Офтоб тархон, Қаро Пирмуҳаммад, Тийнак Келди ўзбек биргалашиб, саййид Жаъфархожага вақти-соати етганда қўзғалишлари ва Султон Бадиуззамон Мирзога қарши мухолифат водийсига қадам қўйган кўйи Шайбонийхон сари эса хизмат эшикларини очажаклари борасида келишув қўлини бердилар.

Ўша аснода илгари Маҳмуд Султон Бухорони истило қилгани сабабли ул ўлкадан қочиб келиб, Бадиуззамон Мирзодан паноҳ топган ва шохзоданинг иноят назарига манзур бўлиб, Андхудда ҳукумати юргизиб ўтирган Муҳаммад Бокир тархондан қаршилик аломати курилиш бериб, аниқроғи, тесқаричилик иши амалга ошиб, бу амир Муҳаммад тархон деганимиз Муҳаммад Шайбонийхон олдида чопарлар жўнатиб ва хабарлар юбориб «хонликнинг қутлуғ мавкаби Амуя дарёсидан ўтадиган бўлса, камина Андхуд қалъасини осмон дашаматли даргоҳ эгасига топшириб, ўзим хоннинг бошқа мулозимлари каторидан ўрин олажакман» деган сўзларни айттирди. Жаҳон олувчи хон шу ваъдага умид боғлаб, Самарқанддан Амуя дарёси қирғоғи сари йўлга тушди.

Шунга кўра ҳалиги гуруҳ саййид Жаъфархожа кўрсатмасига биноан «Бадиуззамон Мирзо мазкур

Муҳаммад Боқир тархон фитнасини бостириш учун Андхуд ҳудудига кетгани заҳоти қаршилиқ шиорини намойиш этиб, ул ҳазратнинг қўлга тушиши борасида лозим бир режани амалга ошириш»ни кўнгилларига тугдилар.

Аммо, буни қаранги, айна ўша чоғларда амир Муҳаммад Боқир арғун Бадиуззамон Мирзодан аразлаб, бир неча кундан бери уйида ўтирган кўйи салтанат саройи мулозиматини тарк қилиб ўтирган бўлиб, Офтоб тархон ва фитначилардан яна айримлари шунга кўра ул жанобни ҳам ўзларига шерик қилиб олиш фикрига тушдилар ва у билан овлоқ бир жойда учрашиб, юракларида бор гапни тўкиб солдилар. Амир Муҳаммад Боқир сиртдан уларнинг сўзларини қабул қилган бўлди ва «яхшиси эртага Хожа Абу Наср Порсо мазори бошида ҳаммамиз йиғилиб, кейинчалик гапимиздан қайтмаслик учун бир аҳду паймон қилишиб олайлик, юким бу иш ҳеч пайсалсиз амалга ошгай» деди. Шунга келишиб олингач, ҳар ким ўз уйига кетди. Бироқ амир Султон Бадиуззамоннинг Муҳаммад Боқирга кўрсатган чексиз яхшиликлари ҳаққига риоят масаласи амирнинг этагидан маҳкам ушлаб, ўша кечаси Мирзо Иброҳим Султон чаҳорбоғида ўтирган шохзоданинг ҳузурига қараб чопди ва ул ёмон ниятчиларнинг ўй-фикрлари аҳолини арзга еткарди. Султон Бадиуззамон Мирзо ул жамоатга нисбатан турлитуман меҳрибонлик ва хаддан зиёд иноятлар кўрсатган булгани учун бу сузларни ғараз юзасидан айтилган гапга йўйди ва керагича диққат бермай, қабул қулоғи билан эшигмади. Амир Муҳаммад Боқир эса «яхшиси эртага тўнг пайти ишончли бир кишингизни менга

кўшиб Хожа Порсо мазори бошига юборинг, токим бу сўзларим ҳақиқати нурга тўла қутлуғ кўнгилга аниқ ва равшан бўлгай» дея арзга еткарди. Ул ҳазрат бу илтимосни ижобат иззатига яқин тутди ва Паҳлавон Ҳасан Алининг амир Муҳаммад Бокирга кўшилиб, ул мазорга бориши тайинланди. Ул амир жаноб эрта саҳарлаб Паҳлавон Ҳасан Алини мазор иморатларидан саналган жамоатхона хужраларидан бирида ўтказиб, хона эшигини ташқарисидан кулфлаб қўйди ва ўзи мазор эшиги олдида исён ахлини кутиб ўтирди. Ўша чоғда мазкур жамоат ҳам келиб қолиб, халиги жамоатхона эшигини очганча ичкари кирдилар ва кечаги масала юзасидан суҳбат бошладилар. Саййид Жаъфархожа музокара охирида ўтирганларга Шайбонийхонга тарафдор бўлиш борасида онт ичиргач, шу билан аҳду паймон учрашуви яқунланиб, йиғин аҳли таркаб кетишди. Шундан сўнг Паҳлавон Ҳасан Али бекиниб ўтирган еридан чиқиб, Султон Бадиуззамон Мирзо ҳузурига борди ва бўлиб ўтган воқеани батафсил арзга етказди. Эртаси куни «барча амир ва давлат устунлари Андхуд ҳокими исёнчи Муҳаммад Бокир тархон иши бўйича маслаҳат учун девонхона ўтовида йиғилсинлар» деган олий фармон чиқди. Чакирилганлар йиғилгандан Султон Бадиуззамон Мирзо улуғ амирлардан Умарбек ва Шайх Али тағой, Ошик Муҳаммад арғун, Ёдгор Абу Исҳак Окбуқо, Муҳаммад Бокир арғун, Шохмансурни ёғийлик йўлига кирган мазкур гуруҳни ушлаш учун тайинлади. Буйруқ олган амирлар ўша заҳотиёқ туз тутгир кўрнамаклар тўдасини ушлаб, кишанбанд қилган кўйи ҳар бирини бир ишончли кишига топширдилар ва бор бойликларини мусодара қилдилар.

Тутилганлар жумласидан бўлмиш Шохмуҳаммад барлос ва Офтоб тархон, Тийнак Келди қабилар шу ондаёқ қатл қилиндилар. Иброҳим Султон, Жаҳонгир барлос, Қаро Пирмуҳаммад, саййид Жаъфархожа ўша куниси шоҳона кечиримга эришиб, уларни озод қилиш бора-сида олий ҳукм содир бўлди. Аммо саййид Жаъфархожанинг мол-мулкани мусодара қилишга мутасадди этиб тайинланган амир Шохмансур «бу фитнанинг ҳамиртуруши ушбу саййид саналади, уни қўйиб юбориш давлатчиликка лойик иш бўлмас» дея, Султон Бадиуззамон Мирзонинг саййидлик паноҳини ўлдиришга розилиги йўқ эканига қарамай, саййид Жаъфархожани бўйнидан бўғиб ўлдирди.<sup>97</sup>

Ана шу воқеалар бўлиб турган бир вақтда жаҳон олувчи Шайбонийхон Карки кечувидан ўтди, буни эшитган Бадиуззамон Мирзо эса Иброҳим Султоннинг чаҳорбоғиданоқ оти жиловини Газравон тоғи тарафга бурди.

---

<sup>97</sup> Жаъфархожа саййид Отоний ўлими борасида маълумот берган шоир Муҳаммад Солиҳ «Шайбонийнома»да хон тилидан шундай ёзади.  
Дели:

«Саййид бизнинг учун ўлди,  
Эмди сизларга зарурат бўлди.  
Ки, тилаб қонини разм этгайбиз,  
Разм этар азминни жазм этгайбиз».

## ШАЙБОНИЙХОННИНГ ҒАЛАБА АЛОМАТЛИ ТУҒИ МОҲЧАСИНИНГ БАЛҲ МАМЛАКАТИ УҒКИДАН БАЛҚИБ ЧИҚИШИ ҲАМДА УЛ ШАҲАР АҲОЛИСИНИНГ АЧЧИҚ ТУРМУШ ВА ТАЛҲ МЕҲНАТГА ЙЎЛИҚҚАНИ

909 йилнинг куз фасли бошлари<sup>98</sup>да Муҳаммадхон Шайбоний юрт олишлик байроғини кўтарди ва амир Муҳаммад Боқир тархон чакирувига биноан Капки кечуvidан ўтиб, Анджуд атрофини салтанат чодирлари устунига айлантирди. Муҳаммад Боқир тархон хоннинг олий мавкабига кўшилиб, совғалар тортиқ қилди. Аммо хоннинг илтифот назарига илина олмай, Шайбонийхон уни дарёнинг нариги томонига кўчириб юборди.

Жаҳон олувчи хоннинг Амударёдан кечиб ўтгани хабари Мирзо Иброҳим Султон чаҳорбоғида Мирзо Бадиуззамон Мирзо арзига етишди. Бироқ кўшиннинг тарқоқ ҳолда экани ва уруш талаб ботирлар йиғини мухайё эмаслиги сабабли шоҳзода Балхда қолишни маъқул кўрмади ва салтанату жаҳонбонлик кўзи қарочуғининг нури Мирзо Муҳаммад Замонни Балхда кўйиб, амир Султон Қулихонни шоҳзода хизматида қолдирди. Қилич ва қалам соҳиби хожа Жалолиддин Миракий ҳамда амир Шайх Абусаид Ирокий, Қаро Ҳасан улғут ҳам шу шаҳарда қоладиган бўлишди. Амир Умарбек ўғли амир Алихон эса Шибирғон доругаси бўлмиш Кабобекка ёрдам учун кетиб, ул шаҳарни сақлаш борасида анча саъй-ҳаракатлар кўрсатди. Шундан сўнг султонликнинг олий байроғи

<sup>98</sup> 1503 йил октябрь ойи.

Гарнайсон ва Чахоряк дараси йўлидан юриб, у ердан Карояғоч сари ошиқди ва Карояғочдан йўналиш жилловини Жиболи Жазравон томонга бурди.

Муҳаммадхон Шайбоний Андхуд ишларини ҳал қилгач, йўналиш юзини Балх сари қаратди ва қиёмат аломатли ўзбек қўшинидан бир тўдасини Шибирғонни боскин-чопкин қилиш учун тайинлади. Ул тўда шаҳар худудига етишгач, амир Умарбек ўғли амир Алихон ботир жангчилардан юз нафари ҳамроҳлигида уруш-саваш мақсадида қалъадан ташқари чиқди ва ул жаноб билан ўзбеклар ўртасида жанг рўй бериб, уруш-саваш асносида амир Алихоннинг отига бир ўқ келиб тегди ва фурсатдан фойдаланган ўзбек аскарлари уни ушлаб, оёғига оғир занжирли кишан солган кўйи хон ўрдусига элтдилар. Шундан сўнг хонликнинг зафар аломатли байроғи ойчаси ўта хашамат ва мақсади ҳосиллик билан Балх уфқидан балқиб чиқиб, амир Султон Кулихон ва ул макондаги бошқа амиру аъёнларнинг кўнгиллари қалъани мудофаа қилишга мойил бўлиб, Ироқ дарвозаси ҳимояси Пахлавон Ҳасан Али Султон ва унинг хос навкарларидан бир гуруҳи зиммасига юкланди. Уккоша дарвозаси эса амир Жонқул ва Жон Аҳмад Кулихон, амир Дарвиш Муҳаммад китобдорнинг жасурлик ва пахлавонлик шарафи билан мустаҳкамланди. Қилич ва қалам соҳиби Жалолиддин Миракий Шутурхўр дарвозасини беркитди. Муҳаммад Замон Мирзо Шайх Абу-саид Ироқий, Қаро Ҳасан алғут билан бирга Арқда ўтирди. Амир Султон Кулихон шаҳарнинг жомеъ масжидида истиқомат палосини ёйди ва шу ердан туриб барча қалъа буржлари-ю дарвозалари кўрикчиларига ёрдам берадиган бўлди.

У томонда бўлса Муҳаммадхон Шайбоний паҳлавонлик маслаки соликларидан ўн минг киши билан бирга Шутурхўр дарвозаси рўпарасида манзил тутди. Укаси Махмуд Султоннинг ўрнини эса Ирок дарвозаси қаршиси қилиб белгилади. Жўжи насли бошқа султонлардан бошқа бир гуруҳини Уккоша дарвозасига қарата жойлаштирди. Балх қалъасининг барча буржлари тўғрисига ўз амиру нўёнларни юборди. Шундан сўнг дастлаб шаҳарга элчи юбориб, амир Султон ва Бадидуззамон Мирзонинг бошқа амирларини итоат ва бўйсунишга чақирди. Бу сўзи балхликларнинг қабул қулоғидан жой олмагач, қалъа олувчилик асбоб ва қуроқларини тартибга келтириш учун ишора қилди. Ўзбеклар бир ҳафта давомида чексиз миқдордаги чапар ва тўраларни ҳозирлагач ҳамда қалъа тагидаги чуқур сувини бошқа тарафга қочириб, йўналиш йўлини тупроқ уюб тўкиш билан тайёр ҳолга келтиргандан сўнг султонлик уруши борасидаги ҳукм содир бўлиб, ўзбек қўшини шаҳар қалъасининг барча томонидан сурнай-қарнай овози-ю бурғу ва ноқора садосини осмон қалъаси томи шифтига етказдилар ва чумоли-ю чигирткадек юзни Балх хандаки сари қаратиб, қиёмат кун иломинини намўён қилдилар. Ўша кун тонгида Муҳаммадхон Шайбоний қора тусли совут кийган ҳолатда тоғ сағрили отга минди. Ўн мингга яқин жиба кийган ўзбек пиёдалари хоннинг олдида тушган қўйи юриб кетишаркан, барчаси бошлари узра чапар ва тўр тутганча Шутурхўр дарвозаси ўнгидаги чуқурга кирдилар. Хожа Жалолиддин Миракийнинг кишилари гайратлари жўш уриб, дарҳол қўлларини ўк ва тош сари қўздилар. Бирок хожа Жалолиддин уларни ўзбеклар

тупрок уюмларидан юкори кўтарилиб, Шайх Ҳожи хандакига якинлашмагунга қадар ўк ва тош отишдан тийиниб туришни буюрди. Шундан сўнг дастлаб ўзи душман тарафга бир тош отди ва ул тош бир чапарга тегиб, унинг панасидаги эгасини чуқурга қулатди. Кейин шу буржда турган бошка ботирлар кўзни тикувчи камон ўқлари ва ўлим юришли тошларни ота бошладилар. Натяжада хоконнинг қўшини ягона чорани кочишда кўриб, ўзбек аскардан жуда кўпчилиги мазкур чуқурда жароҳатланиб ва ўлим топиб, бир-бири устига қуладилар. Шунингдек, шаҳар қалъасининг барча буржу минорасидаги Баҳром қаҳрли баҳодирлар ўлим асарли ўк бургутини камон уясидан учирма қилар ва тош отувчи манжаник камонларини гулдиратиб, муҳориба ва уруш эшикларини очар эдилар.

Гарчи ўша куни ўзбеклар ҳам ниҳоятда жасурлик ва мардоналик намунасини кўрсатиб, шаҳарликлардан анча кишини одам йикувчи ўқлар захми билан ярадор қилган эсалар-да, аммо бу шаҳар қалъасини бир зарба билан олиш амри маҳол бўлгани сабабли ниҳоят орқага чекиннишга мажбур бўлдилар. Мазкур жангда хон кўшинидан беш юз нафари кон ичувчи ўқлар захми ва манжаник тошлари зарбидан фоний оламдан мангулик жаҳонига юз тутишди. Шунга ўхшаб, ўзбек черики яна икки навбат Балх учун султонлик урушини солди ва худди биринчи кундаги каби бирон иш чиқара олмай орқага қайтди. Шундан сўнг хон ўз кўшини аскарларининг беҳуда нобуд бўлишини ўйлаб, амирлар ва баҳодирларни уруш оловини ёкишга ундамади. Аммо имкон борича қалъадагиларни қамал сиқувига олишга ҳаракат қилди.





Ўша аснода бир кечаси амир Алихон кулай фурсат топиб оёғидаги кишан билан қочишга эришди ва Шутурхўр дарвозаси хандакига келиб, қичқирганча ўз номини айтиб, кимлигини билдирди. Шунда Хожа Миракийнинг навкарларидан бир нечтаси пастга тушиб, амирни тепага олиб чиқдилар ва унинг қутулгани баробарида илоҳга шукрлар айтиш шартларини бажо келтирдилар.

Муҳаммадхон Шайбоний уч ой мобайнида Балх қалъаси атрофида ўтиргач, бу қалъани уруш билан олиб бўлмаслигини англади ва сулҳу яраш эшикларини очиб, шу йўл воситасида ўлкани тасарруф доирасига киритмоқни истади. Шунга кўра, ақаси амир Алишер Навоий вафотидан сўнг хизматдан истеъфо бериб, Файзобод кишлоғида яшаётган ва хоннинг туғи ойчаси етишмиш нурларини Балх ҳудудига сочган кезларда эса ўз ихтиёри биланми ёки мажбурият юзасиданми, ҳар қалай мулозимат йўлини тутган амир Дарвиш Алини шаҳарга юборди ва у орқали «темурий султонларининг иқбол қуёши ботиш сарҳадига етиб, салтанат ул хонадондан яна қайта чингизийлар сулоласи қўлига ўтган. Ушбу кунларда камал ичида ўтирар экансиз, егулик бирор захирангиз қолмагани бизга аёндыр. Шу сабабли хонлик лутфи ва хоконлик иноятига суяниб, ўжарлик ва бўйсунмаслик эшикларини ёпишингиз ва тобелик қўли билан шаҳар дарвозаларини очишингиз энг мақбул иш саналди» дея айттириб юборди. Амир Дарвиш Али амир Султон ва Балхнинг бошқа амиру аъёнлари билан учрашди ва элчилик шартларини адо этди. Хожа Жалолиддин Миракий бу сўзлар жавоби кафолатини бўйнига олиб «мана бир юз эллик йилгача

довур бизлар отадан-ота, бободан-бобо барчамиз амир Темур Кўрагоннинг етук авлодлари меҳрибонлиги ва инояти сояси остида роҳату фароғатда ҳаёт кечириб келмоқдамиз. Ушбу дамларда эса Мирзо Бадиуззамоннинг андак шикаст топиб, ҳозирча хон ҳазрат билан уруш-саваш мақомига кириша олмаган экан, бу дегани ул буюк шаънли подшоҳларнинг неча бир йиллик тарбиятлари ҳаққини дарҳол унутишимиз ўринли бўлиши ва омонат йўли билан бизга топшириб кетган шаҳарни хиёнат аҳли каби душман тасарруфи остига ташлашимиз лозимлигини билдирмайди. Ваҳолонки, тез орада хокони мансурнинг қутлуғ соябони барча шоҳзодалар ва Хуросон кўшинлари билан бирга икбол соясини бу теграларга солажакдир ҳамда илоҳий иноят мадади ва шоҳаншоҳлик ёрдами билан душманлар ишини дўстлар истаганидек йўсинда бир ёқлик килажакдир. Аммо хон ўйлаганларидек, бизнинг захирамиз ниҳоясига етгани ҳақиқатга тўғри келмайди. Чунки, гарчи шу тобда эшак миясидан бўлак егулик нарса топмаётган бўлсак-да, ҳали яна бир йиллик захирамиз бор. Бу сўзнинг манбаси ва далили шуки, ушбу айёмда Балх кўча ва бозорларида жуда кўп эшак зоти йиқилиб-йимрилган кўйи йўқлик ўтлоқзорига юзлангандир.

Алқисса, амир Дарвиш Али мазкур кинояли сўзларни эшиттач, ўзининг бу воситачилиги билан ҳеч ким шаҳар дарвозаларини Муҳаммадхон Шайбоний юзи сари очмаслигини билди. Қайтиб бориб, кўрган ва эшитганларининг барини хон арзига етказди. Хон уша киши ўрталарида қайтиш ноқорасини чалиб, Амуя дарёсидан кечиб ўтиб, Самарканд сари ошиқди.

Шундай қилиб, қайтадан роҳат ва фароғат нурлари



куббатилислом Балх аҳолиси манглайи узра таралди. Аммо қамал давомида ўзбек кўшини босқин-чопқини натижасида шаҳар ташқарисидаги жойлар шу қадар вайронага айланган эдики, ундан ортиғини тасаввур қилиб бўлмасди. Шунга кўра, бу ҳодиса таърихи юзасидан сўзларни рақам этгувчи қалам бир китъани таҳрир тизимига киритганди.

#### **Китъа:**

Муҳаммадхон чу аз Омуя бигзашт,  
Шароби айши аҳли Балх шуд талх.  
Тамоми шаҳр вайрон гашт аз жанг,  
Аз он таърих шуд «вайронии Балх<sup>99</sup>».

#### *Мазмуни:*

Муҳаммадхон Шайбоний Омуядан ўтгач,  
Балх аҳолисининг турмуш шароби аччиқ бўлди.  
Урушдан шаҳар бутун вайрон бўлди,  
Шундан сана, яъни таърихи бўлди  
«Балх вайронлиги» [299-б.].

---

<sup>99</sup> Абжадда бу сўзлардан 909 сони ҳосил бўлиб, бу сана мелодда 1503 йилга тўғри келади.

**СУЛТОН МАҲМУДХОН ВА ОЛАЧАХОННИНГ  
ЮКСАК МАКОНЛИ ПОДШОҲ БОБУР МИРЗОГА  
ЁРДАМ УЧУН АНДИЖОН ТОМОНГА ЛАШКАР  
ТОРТГАНИ ЗИКРИ ВА УЛ ОЛИЙ ШОНЛИ ХОНЛАР  
БИЛАН МОВАРОУННАҲР ФАРМОНФАРМОСИ  
БЎЛМИШ АБУЛФАТҲ МУҲАММАД  
ШАЙБОНИЙХОН ЎРТАСИДА РЎЙ БЕРГАН УРУШ  
БАЁНИ**

[305-б.] Мақсади ҳосил подшоҳ Заҳририддин Муҳаммад Бобур бин Мирзо Умаршайх Кўрагон доруссалтани Самарқанд сари йўналган вақтларда яна бир марта Султон Аҳмад танбал туғён оловини ёндириб, тесқаричилик ва исён эшиқларини очди. Сўнграқ Жаҳонгир Мирзо давлат ва иқбол сингари ундан юз ўтирган эсада, тағин олдингидек муҳолифат йўлида юраверди. Шунга кўра, исломпаноҳ Бобур подшоҳ Самарқандни Шайбонийхонга ташлаб чиққандан сўнг ўзининг маврусий мамлақатини қайта қўлга кирита олмади ва Тошкентга кетишга мажбур бўлди. Бир неча вақт Султон Маҳмудхон меҳрибонлиги оғушида бўлиб, қамал кийинчилиги-ю уруш заҳмати чарқоқларини танасидан аритган кўйи дам олди. Султон Маҳмудхон эл орасида Олачахон номи билан танилган ўз укаси Султон Аҳмадхон билан биргалиқда Андижон томонга қўшин тортиб, ул мамлақатни Султон Аҳмад танбалдан тортиб олиб, жаҳон бўйсунувчи подшоҳ қўлига топшириш ва Бу юришни қувваг доирасидан амал сари келтиришга қарор қилиб, 906 йил<sup>100</sup>и катта қўшин билан ўша то-

---

<sup>100</sup> 906 йил – 1500 йил 28 июль – 1501 йил 16 июль.

монга равона бўлди. Аммо Андижонга етмасдан бурун ва қўлини мақсад келинчагининг бўйнига ташламасдан олдин Шайбонийхон ёмғир томчилари сонича қўшин билан ўша манзилга келиб қолди ва шу ерда аскарлар тўкнашуви юз бериб, жуда қаттиқ уруш-саваш бўлди. Тақдир тақозоси билан Хоника ва Олачахон ўзбеклар қўлига асир тушдилар, жаҳон аҳли подшоҳи эса оти жиловини Мўғулистон томонлардаги шаҳарлар сари бурди. Муҳаммад Шайбонийхоннинг умид кўзи фатҳу зафар гавдасини кўрганидан яна ҳам ёришиб, яшин ва шамолга жиловдош бир қосидни Тошкандга юборди ва у ердаги мўғулларга «Хоника ва Олачахон қўлимизга тушди, Заҳриддин Муҳаммад Бобур подшоҳ эса юзини қочиш йўли сари қаратди, агар истагингиз қиёмат ёлқинли газабимиз олови қўлга тушганларнинг ҳаёти хирмонини ёкиш бўлмаса, Бобур Мирзонинг қочишига қаршилиқ қилинг ҳамда қандай бўлмасин хожа Абулмакоримни қўлга тушириб, қамаб қўйинг» дея хабар берди. Шунга биноан Тошкент халқи хожа Абулмакоримни ушлаб, қамаб қўйдилар. Шайбонийхон ул икки олий маконли хонни икки-уч кун ушлаб туриб, сўнг қайси тарафни хоҳласалар, ўша ёққа кетишлари учун рўхсат берди.

Хожа Абулмакорим қамокда турганидан икки-уч кун ўтиб, қочишга муваффақ бўлди. Пиёда юрганча Тошкент шаҳридан ташқари чиқиб, шариф соқолини қирдириб ташлади. Лекин кекса ёшдалиги ва юришга қуввати йўқлиги сабабли душман таъкибидан бутунлай хавф-хатарсиз бўладиган жойгача етиб бора олмай, ўша шаҳарга яқин ердаги қишлоқ аҳлидан биттасининг уйига яширинди. Ул муруватсиз шахс эса хожани бир-

икки кун уйида саклаб, шундан сўнг Шайбонийхонга тарафдорлардан баъзи бир кишиларни мазкур воқеадан хабардор қилди. Ул кишилар эса Хожа Абулмакоримни ушлаб, ўз хонлари ёнига олиб бордилар. Хоннинг кўзи Хожага тушгач «соқолни нима қилдинг?» деб сўради. Хожа жавобида ушбу байтни айтди.

**Байт:**

Чирогеро ки Ийзад бар фурузад,  
Ҳар он кас пуф кунад решаш бисузад.

*Мазмуни:*

Худо ёққан чирокни ким пуфлаб,  
Ўчирай деса, ўша одамнинг соқоли қуяр.

Аммо бу латифадан бирон фойда чикмади ва ўша лаҳзада сиёсат қаҳрамони ул олий насабли хожани охираг оламига жўнатди.

Бу воқеалардан кейин Шайбонийхоннинг шавкат байроғи олдингидан ҳам кўпроқ юксалиб, Самарқандни ўз давлатининг пойтахти қилди. Укаси Маҳмуд Султон илгариги дастур бўйича Бухоро шаҳрида ҳукумат туғини ҳилпиратди. Тошканд шаҳри ва Султон Маҳмудхон ва Олачахон вилоятлари Шайбонийхоннинг амакилари, яъни оналари Мирзо Улуғбек Кўрагоннинг кизи бўлмиш Кўчкунчихон ва Севинчик султон бин Абулхайрхонларга тааллуқ топди. Шоҳрухиянинг доругалиги мансаби хоннинг улуғ амирлари қаторидан жой олган амир Яъқубга берилди.

**АМИР МУҲАММАД БОҚИРНИНГ ОЛИЙ  
МАРТАБАЛИ ПОДШОҲ ЗАҲИРИДДИН  
МУҲАММАД БОБУР ҲАЗРАТЛАРИ ҲУЗУРИГА  
КЕЛГАНИ ЗИКРИ ВА АМИР ХУСРАВШОҲНИНГ  
СУЛТОН БАДИУЗЗАМОН БАҲОДИР ДАРГОҲИГА  
ЕТИШГАНИ БАЁНИ**

Исломлаоҳ Бобур подшоҳ Шайбонийхоннинг Султон Маҳмудхон ва Олачахон билан бўлган уруши майдонидан кутулиб чиқиб, оти жilовини Мўғулистон томон бурғач ва бир-икки кунни йўл юриш билан ўтказгач «душмандан бир гуруҳи подшоҳ йўлида жойлашган доvon оғзини беркитгани ва келаётганлар устига ташланиш ниятида жасурлик оёғини қаттиқ тираб, тиришқоклик қиличини яланғочлаганлари» маълум бўлди. Шунга биноан ҳазрати подшоҳ ул йўлдан юришдан воз кечишни маъқул билиб, бошқаларга унчалик таниш бўлмаган йўл орқали Ҳисори Шодмон томонга шошилди. У ердан эса йўналиш жilовини мадинат уррижол Термиз тарафга қаратди. Ул шаҳарнинг ўзбек қўшини савлатидан бирон оқшом истироҳат тўшагида тинч ухлай олмай ўтирган ҳокими амир Муҳаммад Боқир Бобур подшоҳнинг қутлуғ мавқаби келганини улуғ бир нажот билиб, соврин ва тортиқлар билан хизмат сари ошиқди. Ул ҳазрат ҳам ҳоким билан қай тарафга борилса давлатга маъқул қафолат бўла олиши борасида маслаҳатлашди. Соҳиби тадбир амир ул тожу тахт безовчиси арзига «Муҳаммад Шайбонийхон Мовароуннаҳр юртларини истило қилиб, тафриқа ва паришонлик учқунини ҳазрат подшоҳга қарашли халқ ва қўшин аҳволи саҳифасига сочган экан, яхшиси шу-

ким, бир неча кун бу янглиғ шафкатсиз турмуш зуғуми билан чиқишайлик-да, Кобул томонга кетиб, ўзимизни ўзбеклар мамлакати худудидан узоқлатайлик» деди.

### Назм:

Надори агар бо адув зури жанг,  
Тарихи мадуро гўзин бедаранг.  
Зимулкаш ба жое намо интикол,  
Ки як чанд ийман шави аз китол.

### Мазмуни:

Душман билан жангга етмаса кучинг,  
Дархол ярашиш йулини тут.  
Юртидан бирор жойга чикиб кетакол,  
Шунда бўлурсан бир неча вақт урушдан омон.

Олийжоҳ<sup>101</sup> Бобур подшоҳ бу ақлни тўғри деб билди ва 910 йил<sup>102</sup>и йўналиш юзини Кобул тарафга бурди. Тасодифдан олий мавқабнинг ўтиши амир Хусравшоҳ турган хуудга якин бир манзилдан тушиб қолди. Шунда жаноб амир чор-ночор қимматбаҳо тухфалар билан ҳазрат Бобур подшоҳнинг ҳузурига ошиқиб, ихлос ва хизматкорлик ихорини қилди ва салтанат тахти поясини ўпши саодатини топди. Олий ўрдуда бир неча кун сокин тургандан сўнг, унинг кўпчилиқ мулозимлари давлат ва иқбол сингари истиқлол эгаси бўлмиш ҳазрат подшоҳнинг халифа ошиёнлик даргоҳи мулозимати-га келдилар ва қуллик исирғасини қулоқларига осиб, ўз бўйяшларига хизмат занжирини боғладилар. Жаноб

<sup>101</sup> Олийжоҳ – олий мартаба.

<sup>102</sup> 910 йил (мухаррам) – 1504 йил 14 июнь.



амир ахволни бу тарзда кўргач, жуда қаттиқ ваҳимага тушиб, бир кечаси ўзининг барча яроқ ва асбобларини турган жойида қолдирган кўйи икки-уч нафар навқари билан бирга қочмоқ қарорини ихтиёр этганча йўналиш тугини Султон Бадиуззамон Мирзо қароргоҳи томон кўтарди. Чунки унинг ҳеч бир тарафда бирор паноҳи ва ҳеч бир томонда бирор оромгоҳи қолмаган эди.

### **Байт:**

Ойи барам он дам ки шави аз ҳама фориғ,  
Он лаҳза агар низ наои че кунад кас.

### *Мазмуни:*

Ёнимга келсанг ҳамма нарсадан қутуласан,  
Ўз пайтида келмасанг, не қила олсин бошқалар!

Маймана қасабасида амир Хусравшоҳнинг келгани хабари ул олий мартабали хусрав Бадиуззамон Мирзо арзига етишди, шоҳзода эса, ўзида зотан мавжуд хуш ахлоқ етуқлиги орқасида амирнинг илғари содир этган гуножларини эсидан чиқаргандек бўлиб, салтанат ва давлатнинг кўз қорачиғи бўлмиш ўғли Муҳаммад Замон Мирзо билан бирга амир Зуннун ҳамда бошқа амир ва давлат устунларини Хусравшоҳни кутиб олиш учун истиқболига юборди. Ўзи ҳам олий қароргоҳдан гашқари чиққан кўйи бир тепалик бошига бориб кўш гашлади. Бадиуззамоннинг суюкли ўғли шоҳзода Муҳаммад Замон Мирзо ва амир Зуннун эса амир Хусравшоҳни ўша мавзеда қўл ўпишлик саодатига етказдилар ва амирнинг ҳазрат Захириддин Муҳаммад Бобур подшоҳ хузурида рўй берган воқеасини айтиб

бердилар. Ўша куниси Султон Бадруззамон Мирзо амир Хусравшоҳ учун керак асбобларни тайёрлашга киришиб, чодир ва ўтов ҳамда елдек учар отлару юк ташувчи туялар, миниладиган ва юк кўтарадиган хачирлар, палосу хизматкорлар ва ҳаддан зиёд олтин, кумуш тангалар инъом этди. Амир Зуннун ҳам амир Хусравшоҳ олдига лойик тортиқ ва арзирли совғалар юборди. Султон Бадруззамон Мирзо амир Хусравшоҳ билан маслаҳатлашиб, уни мактов сифатли хокони мансур мулоқотига боришга кўндирди ва Майманадан кўзғалиб, Чечакту сайхонлигида чодир ва ўтов куббасини куёш ва ой турган осмон чўккисига етказди.

**ХАЗРАТ БОБУР ПОДШОҲ МАВКАБИНИНГ КОБУЛ  
ШАҲРИ ЧЕТИГА ЕТГАНИ ҲАМДА УЛ ЎЛКАНИНГ  
ИЛОҲИЙ ВА МОДДИЙ НАРСАЛАР ЯРАТГУВЧИСИ  
ХАЗРАТ ХУДОВАНДИ ТАОЛО ИНОЯТИ БИЛАН  
БОБУР ПОДШОҲ ТАСАРРУФИГА КИРГАНИ ЗИКРИ**

Олий подшоҳ тақдири ва ягона шаҳаншоҳ<sup>103</sup> истаги бўйича шу насиба бўлган эканки, довғорак хусрав Захириддин Муҳаммад Бобурнинг адолат ва эҳсони файзидак лаби ташналарнинг умид боғчаси зулм ва зуғум водийсида ям-яшиллик ва гуллаб-яшнаш сифатини толажаги ҳамда буюклик ва улуғлик дуржи гавхарининг иқбол давлати мангу эгам инояти уфқидан порлаб, каноти қайрилган саргашталар аҳволи бошига нур сочажаги учун ул хазратни Мўғулистон хонлари ва шайбоний хони урушининг жон олувчи майдонида

<sup>103</sup> Олий подшоҳ, ягона шаҳаншоҳ – Аллоҳи таоло кўзда тутилмоқда.

Ўзининг лутф ва саховат қаноти паноҳида ёвуз душман ёмонлигидан саклаб, соғ-саломат Бадахшон тоғлигига етказди ва яна Бир бор ул бахтиёр подшоҳнинг умид билагини салтанат ва жаҳонга ҳукмронлик асбоби-ю юрт олувчилик ашёсини амир Хусравшоҳ колдириб кетган курол-аслаҳа ва ҳарбий жиҳозлар ҳисобидан қувватлантирди. Шундан сўнг олий мартабали подшоҳ даргоҳнинг амир ва нўёнлари маслаҳати-ю маъқуллови бўйича, Кобулни олишга қарор қилиб, ул шаҳар сари равона бўлди. Тез суръатлар билан неча бир масофаларни босиб ўтгач, ул шаҳар ташқариси подшоҳнинг қутлуғ қадами шарофатидан Эрам гулистонидек гуллаб-яшнади. Амир Муҳаммад Муқим арғун жанг майдонга тушиб урушишга кучи етмаган учун шаҳар қалъаси ичига Беркиниб олди. Зафарли черик у ерни қамал қилганидан бир неча кун ўтгач, шаҳар аҳолиси юрт олувчи ҳазрат хизматига боришга истак билдириб, Муҳаммад Муқимнинг иши сабру чидам даражасидан ўтди ва подшоҳнинг осмон ўпар даргоҳига чопарлар юбориб, кечирим ва омонлик тилаш учун подшоҳ ҳузурига боражаги ва шаҳар қалъаси қалитларини топшириб, оти жиловини Гармсир ва Қандаҳор томонларга буражаги борасида аҳду паймон тузажагини билдирди. Ҳазрат подшоҳ Муҳаммад Муқимнинг илтимосини ижобий тарзда қабул қилиб «Муҳаммад Муқим исён эшикларини беқитиб, шаҳар дарвозаларини очса, унга керагича меҳрибонлик кўрсатурмиз» деган сўзларини қасамлар билан мустаҳкам қилди. Муҳаммад Муқим подшоҳлик иноятига умид боғлаб, Кобул шаҳридан ташқари чиқди ва палос ўпишлик шарафини топиб, муносиб совғалар тортиқ қилди. Муҳаммад Бобур

Мирзо ҳам ваъдага биноан уни хусравона гамхӯрлик ва подшоҳона меҳрибонлик билан сарафроз қилиб, барча навкар ва мулозимлари, кўплаб ярок ва қимматбаҳо ашёлари билан ўз ватанига кетишга руҳсат берди. Ҳазрат подшоҳ илоҳий муваффақият ёрлиғи ва Аллоҳ тавфиқи ёрдами билан Кобул шаҳри ҳамда унинг туман ва музофотлари, қўшимча ҳудудларини ўз тасарруфи остига киритиб, ободон ўлкага айлантирди. Жабру зулмдан эзилган ҳамда зўравонлик ва исён эрмағига айланиб қолган шаҳар халқи ҳамда кишлок аҳлини осойишталик ва омонлик маҳодига етказди.

### Назм:

Алами адлу дод сохт баланд,  
Партави лутф бар жаҳон афканд.  
Бас ки дар мулк тухми эҳсон кешт,  
Гашт хуррам чу марғзори беҳишт.  
Боғи умиди аҳли фазлу хунар,  
Шуд зи файзи ағои у бобар.

### Мазмуни:

Адолат ва дод сўраш туғини тикди,  
Лутф нуруни жаҳон аро таратди.  
Юрт эҳсон уруғини кўп экканидан,  
Яшнади жаннат ўтлоқзори мисол.  
Илму хунар аҳлининг умид боғи,  
Бўлди сахоси файзидан қудратманд [308-б.].

## БАДИУЗЗАМОН МИРЗОНИНГ ҲИРОТДА ТУРГАН ПАЙТИДА РЎЙ БЕРГАН АЙРИМ ВОҚЕАЛАР ЗИКРИ

[310-б.] Бадиуззамон Мирзо хокони мансур мамлакатининг пойтахти Ҳиротда турган пайти отаси Султон Хусайн бир неча бор бу тўнгич ўғли шарафига тўйлар бериб, ҳар бир ўтиришда олийшон шоҳзода ҳаққида турли-туман инъом ва эҳсонлар тортиғини адо этди. Ўғлининг амир ва садру вазирлари ҳамда хос ичкиларига ҳам киммагбаҳо либослар кийдириб, бошларини сийлади. Шунингдек, Абулмансур Музаффар Хусайн Кўрагон қапта акаси шарафи ва унинг мактов сийратли амирлари учун хусравона тўй уюштирди ва тортиқлар бериш шартларини риоя қилиб, бирдамлик асосини мустаҳкам этиш қоидаларини бажарди. Амир Муборизиддин Муҳаммад рузафзун ҳам ғоятда шукуҳли бир зиёфат ясаб, Мирзо Бадиуззамонни ўз уйига олиб борди ва елдек учар арабий отлар ҳамда мўл-кўл тухфа-ю совғалар тортиқ қилиб, хизматкорлик қондасини бажо келтирди. Худди шундай тарзда бошқа амирлар ва давлат арконлари ҳам ихлос ва садоқат расмларини адо этдилар ҳамда давлатхоҳлик ва тарафдорлик жавҳарларини арз баркашига солиб, ниёзмандлик шартларини намойиш қилдилар.

Амир Шужоиддин Зуннун Ҳиротга келиб турганидан ўн-ўн беш кундан сўнг «ҳазрат подшоҳ Муҳаммад Бобур Мирзо ўғлим Муҳаммад Муқимни бирор баҳона билан ушлаб қолмасин тағин ҳамда Кобулистонни эгаллагач, юзини Қандаҳор ва Заминдовар тарафларга ҳам қаратмасин яна» деган ҳадикда руҳсат сўраб, инъ-

ом ва эҳсонларга эришган кўйи ўз вилояти сари жўнаб кетди.

Султон Бадиуззамон Мирзо ўша Хиротда турган кунларда Мирзо Улугбек бин Мирзо Султон Абу Саиднинг ўз аммаси Поянда Султонбегимнинг тарбияси остида яшаётган қизини ўз никоҳига киритди. Ақд куни саййидлар ва қозилар ҳозир бўлиб, Қози Ихтиёриддин Ҳасан никоҳ сўзларини ўқиди. Шу баҳона билан бир неча кун тўй ва ўйин-кулги йиғини тартиб топди ва гулфом бода жоми ёғдуси хурматли шохзодалар ва олиймақом амирларнинг ҳол юзи сари балқиди.

Яна ўша вақтларда, илгари ёзганимиздек, ҳазрат ҳоконий мамлақати пойтахтида эътибор ва ихтиёри жуда етук даражада бўлган мақтов сифатли хожа Афзалиддин Муҳаммад Кермоний бир неча кун хасталаниб, сўнг оламдан ўтди ва Султон Бадиуззамон Мирзо, Музаффар Ҳусайн Мирзо амирлар, вазирлар, саййидлар, шайху уламо билан бирга ул олий насабли хожа жанозасида қатнашдилар ва майитини Козургоҳга элиб, шу Хожа вафоти муносабати билан қурилган мазорда тупрокка топширдилар. Таъзия айёми ниҳоясига етгач, ҳокони мансур амир Муборизиддин Муҳаммад Валибекнинг қутқу ва иғвоси билан марҳум хожанинг мол-мулкини хатлашга буйруқ берди ва ул жанобнинг барча фарзандлари, қариндош-уруғлари, мулозимлари-ю бирор нисбати бор кишиларининг мол-мулки тортиб олиниб, шунинг ҳисобидан давлат хазинасига кўп мол ва ҳаддан зиёд нафис матолар келиб тушди. Хожа Афзал билан қудалик жихатдан қариндошлиги бор ва унинг ҳаракати шарофатидан садрлик мансабига эришган Шаҳобиддин Исҳак ҳамда худди шундай

тарзда ул Хожа жаноблари тарбияси сабабли вазирлик гилами устига ўтириб, амир Низомиддин Алишер девони ишларини бажариб юрган Хожа Жалолиддин Муҳаммад Семноний бало бандига тушдилар. Аммонималари бўлса, чиқариб давлатга топширгач, ўлпон йиғувчи муҳассиллар буйруққа биноан уларни кишандан бўшатдилар.

### **БАДИУЗЗАМОН МИРЗОНИНГ ЖАМШИД МАРТАБАЛИ ШАЙБОНИЙХОНГА ҚАРШИ УРУШИШ УЧУН ЙЎНАЛГАНИ ЗИКРИ ВА АМИР ШУЖОИДДИН ХУСРАВШОҲ ВОҚЕАСИ БАЁНИ**

Султон Бадиуззамон Мирзо кишининг кўп вақтини олийшонли ҳокон ҳузурида ўтказгач ҳамда турғун ва сайёр хусрав саодат ўтиришли Буржиси манзилини тарк этиб, ёзини қаттиқ қасосли Баҳром уйи сари қаратгач, ҳокони мансурнинг оламини безовчи ақли ул олийжаноб шохзоданинг Музаффар Ҳусайн Мирзо ҳамда нўёнлар ва амирлардан айримлари билан бирга Мурғоб дарёсининг кирғоғини зафарга ёр лашқаргоҳга айлаштириб, агар Муҳаммад Шайбонийхон юрт олишлик нияти орқасида Амуя дарёсидан ўтса, у билан тўқнаш ва уруш-саваш қилишини тақозо этди. Шунга кўра Султон Бадиуззамон Мирзо 910 йилнинг муборак рамазон ойи<sup>104</sup>да ҳазрат Султон Ҳусайннинг яқин кишиси, яъни мархум амир кабир Низомиддин Алишер Навоийнинг уйдан чиқиб, Жунайд кўкалтошнинг Мухтор тоғи этагида жойлашган макбара – ҳазирасида қўш ташлади. Ўша вақтда аъло тахт поясига Заҳир

<sup>104</sup>910 йил рамазон ойи – 1505 йил 5 февраль – 6 март.

ус-салтана вал-халофа Муҳаммад Бобур Мирзо олди-дан элчилар келиб, ул ҳазратнинг келишув ва иттифок бўлиш борасидаги ёзишмаларини арзга етказиб, инъом ва эҳсонга эришган кўйи қайтишга ижозат олиб, подшоҳ хузурига қайтиб кетдилар. Султон Бадиуззамон Мирзо бир неча кундан сўнг Жунайд хазирасидан кўчиб, Чихил дўхтарон сари ошиқди. У ердан ўтиб, Мурғоб дарёси томонга равона бўлди. Йўл устидаги Мури манзили ул кутлуғ қадам бахтидан жаннат боғлари кўркамлигини топгач, Мирзо Музаффар Ҳусайн Кўрагон ва амир Муҳаммад Бурундук орқадан етиб келиб, олий мавкабга қўшилдилар. Сўнг мақсади ҳосил ака-укалар бир-бирига жиловдош бўлган кўйи Панждеҳ йўлидан Мурғоб сари кетдилар. Бирок мазкур бекатдан Мирзо Музаффар Ҳусайн аъло тахт поясидан юборилган олий фармонга биноан доруссалтана Ҳиротга қайтиб кетди. Амир Хусравшоҳ эса оти жиловини Кундуз ва Бақлон сари бурди ва у неча бир манзил ва бекатларни босиб ўтиб, ул мамлакат худудига етгач, ҳар ерлик кишилардан бир тўдаси бу амир атрофига тўплайдилар. Шайбонийхоннинг Кундуздаги ўзбек доруғаси мудофаа мақсадида бир тўп аскар билан амир Хусравшоҳнинг олдини тўсиб чиқди ва икки томон ўртасида уруш-савап оташи аланга олиб, Хусравшоҳга тобелардан кўпи ўзбекларнинг қилич ва ўки захмидан ўлим топиб, омон қолганлари қочиб кетдилар. Амир жаноблари эса тақдир сарпанжасига асир бўлди. Ўзбек кўшини сардори уни эшакка ўтказиб, Кундуз қалъасига элтди ва шу зайл шаҳар буйлаб айлантқиришларини буюрди. Худди шундай қилгач, амир Хусравшоҳни илгари ўзи мақсади ҳосиллик байроғини қиллиратган мазкур шаҳарда қалга еткардилар.



## Назм:

Мабин дур сипехру меҳри гармаш,  
Ки ҳеч аз кин гузоре нест шармаш.  
Ба меҳраш дили касе чун субҳ кам баст,  
Ки дар хун чун шафак ҳар шом нанишаст.

## Мазмуни:

Осмон ва иссиқ куёшини узоқ деб ўйлама,  
Адоват қилишдан уялар дема ҳеч уларни.  
Меҳридан ҳеч кимнинг дили тонгдек оқармаган,  
Ки, қон-ла шафакдек ҳар шомда ўтирмаган.

Хусравшоҳ халққарвар одил амир эди ва ўн-ўн беш йил Султон Маҳмуд Мирзо салтанати даврида нойиблик мансаби билан Қундузда ҳукумат юргизганди. Ул ҳазрат вафотидан кейин бир неча йил Ҳисори Шодмон, Хатлон, Термиз, Бадахшон, Баклон вилоятларини ўз қўли остида сақлади ва катта мартаба-ю шукуҳ, давлату иқбол билан эркин бошқарув байроғини хилпиратди. Ул жаноб шароб ва бошқа ҳаром нарсалардан тийиниб, парҳезкорлик билан ўзини бу каби нарсалардан узоқ тугарди. Ҳамиша тоат вазифаларини адо этар ва ибодат шартларини бажарар ҳамда раббимнинг мажид қаломи кирояти ва субҳоний оятлар тиловатига машғул бўларди. Аммо шундай мактовли хислатларга бокмай, тошбағирлик ва раҳмсизлик билан тавсифланган ва мулку давлатга эришишда кўнгли лавҳига фақат вафосизлик ва неъматга қуфр нақшини чизган эди. Юқорида зикр қилингани каби ўз хўжайини ўғилларидан бирини исён наштари билан нобуд қилди ва яна бировининг ҳаёти пойдеворини жавру тугён қўли билан тагидан

кўпорди. Натигада кўп ўтмай, ана шу феълининг кас-ри ўзига уриб, Аллоҳи таолонинг касос сарпанжаси унинг мартаба-ю шукуҳи палосини ана шу юқорида кўрганингиз каби аянчли аҳволда йиғиштира қолди.

**Назм:**

Чу аз лавҳи дил шуст накши вафо,  
Ба сад меҳнагу дард шуд мубтало.  
Вафо кун ба ҳар кас валинеъмат аст,  
Кил дар бевафойи базе захмат аст.

*Мазмуни:*

Дил лавҳидан вафо нақшини ўчиргач,  
Минг бир захмату дардга бўлди мубтало.  
Вафо кил ким бўлса сенга валинеъмат,  
Вафосизликда бордир кўпгина захмат.

Ўша 910 йил<sup>105</sup> да музаффар туғли шоҳзода Иброҳим Хусайн Мирзо доимий шароб ичиши ва муттасил май истеъмол этганидан тузалмас саъб касалига мубтало бўлиб, табиблар муолажа ва даволаши фойда бермади ва шаввол ойи охирида ҳаёти ниҳоясига етди. Хоқони мансур бу ходиса рўй берганидан ғоятда ғамга ботиб, кўзлари фавворасидан ёш томчиларини окизди. Ниҳоят кўли билан сабру тоқатнинг мустаҳкам ипини ушлаб, «ким қийинчиликка сабр қилса, унинг мукофоти ҳисобсиз бўлажак» карима калимаси билан чидам кўрсатди ва марҳум шоҳзоданинг суюрғоли бўлган Қойин вилоятини унинг ота бир, она бошқа иниси Ибн Хусайн Мирзога иноят қилди. Ул шоҳзода ўша ёкка ошиқиб, юзини адолат палосини ёймоқ учун қаратди.

<sup>105</sup> 910 йил – 1504 йил 14 июнь – 1505 йил 3 июнь.

## БАДИУЗЗАМОН МИРЗОНИНГ МУРҒОБ ДАРЁСИ БЎЙИДАН БАЛХОБ ТОМОНГА ЙЎНАЛГАНИ ЗИКРИ

Балхоб бир тоғлик ер бўлиб, Даражаз ва Мурғоб, Хиротруд дарёлари шу ерда бир-биридан ажраб кетади. Кийинчилик билан бориладиган тоғлик даралари ва қалин туташган тўқайлари борлиги сабабли у ернинг халки доимо бўйин товлашлик билан яшаб, кўлдан келгунча ҳокимларга итоат этмасликка тиришадилар. Бадиуззамон Мирзо куббатилислом Балхда салтанат ва жаҳонбонлик палосини ёйиб ўтирган 908 йили амир Боқир тархонни жасур қўшиндан бир бўлаги билан бирга Балхоб аҳолисининг эсини киритиб қўйиш ва улар кўлига тушган мол-мулкни қайтариб олиш учун юборди. Амир Муҳаммад Боқир ва балхобликлар ўртасида уруш олови аланга олиб, ул амир жаноблари енгилиб қайтди. Ўша вақтда Бадиуззамон Мирзо Амуя дарёси қирғоғига кетаётгани сабабли бул тойифадан қасос ола олмади. Ниҳоят Мурғоб дарёси бўйи ғалабага ёр лашкаргоҳга айланган ушбу вақтда, балхобликлар устига босқин-чолқин уюштириш ўйи ойдин кўнгли сари йўл топди ва зафар аломатли байроқни ҳилпиратиб, у ерга илғор буюрди. Кутилмаганда ул куҳистон ён-теварагини қўшин аскарлари босиб кетди ва шохзода исёнчиларнинг итоату тан олиш қадамини ташлаган бир жамоасига адолат-эҳсон сояси остидан жой бериб, исён ва бўйсунмаслик мақомида қаттиқ қадам билан турган тойифани эса талон-торож этишга буюрди.

Ҳали Балхоб ҳудуди зафарга кон лашкаргоҳ мақоми бўлиб турган пайтда амир Зуннун ёнидан кетма-кет

ва пайдар-пай равишда элчилар келиб, ул жаноб тилидан «Ҳазрат подшоҳ Заҳир уд-давла вал-икбол Бобур Мирзо чексиз сонли кўшин билан жаҳон олишлик байроғини Қандаҳор ва Заминдовар томонга қарата кўтарган ва бу шаҳарларни эгаллаш нақшини шижоат ва талбир қалами билан кўнгли лавҳига чизган. Истак ва умидимиз шундаки, Сиз ҳазратлари ғамхўрлик жиловини бу томон тўғрилаб, давлат душманини йўқотиш сари ҳиммат қилсангиз, тоқим қутлуғ фолли соябон соясида мамлакатимиз боғи ҳодисалар тўфони ва фалокат офтоби жазирамасида қовжирамай, омон сакланиб қолса» деган сўзларни етказдилар. Султон Бадиуззамон Мирзо давлат фойдасини ул илтимосни қабул қилишда кўрди ва амир Зуннун юборган кишиларнинг кўнглини тўлдириб қайтаргач, сўнг юлдузларча мартабали мавкаб улар кетича Қандаҳор томон ҳаракатга келди.

## **СУЛТОН БАДИУЗЗАМОН МИРЗОНИНГ ҚАНДАҲОР МАМЛАКАТИГА БОРГАНИ БАЁНИ ВА ЎША КЕЧА-КУНДУЗДА РЎЙ БЕРГАН ВОҚЕАЛАРДАН АЙРИМЛАРИ ЗАКРИДАГИ ГАПЛАР**

Мақсади ҳосил шохзода Бадиуззамон Мирзонинг нусрат шиорли байроғи ойчаси Қандаҳор вилоятига яқин етгач, амир Шужондин Зуннун ва ўғиллари Шужобек ва Муҳаммад муқим подшоҳона пешкаш ва хушравона тортиқлар билан истикболга ошиқдилар ва шариф узангини ўпишга мушарраф бўлиб, кўп сийловларга эришдилар. Ўша айёмда ҳазрат подшоҳ Муҳаммад Бобур Мирзонинг йўлга тушгани хабари кетма-кет ва узлуксиз келиб тургани сабабли Бадиуззамон Мирзо

«Сейистон, Ғури Сохар, Тулак, Одок, Қалъагоҳ, Фароҳ, Хушкруд, Заминдоварнинг барча лашкар ва хашари зафар аломатли лашкаргоҳда йиғилсин» деган фармон берди. Улуғ амирлар бу буйруқни етказиш учун мазкур вилоятларнинг ён-атрофига тавочилар жўнатдилар. Амир Султон Али арғун Сейистон кўшини ва ул вилоятларнинг бошқа сардорлари чексиз сонли лашкар билан Қандаҳор тарафга юрдилар.

Мухаммад Бобур Мирзо Султон Бадиуззамон Мирзонинг Қандаҳорга келгани ва нусрат шиорли катта кўшин тўпланганидан воқиф бўлгач, гапнинг яхшисини ярашиш ишида кўриб, нусрат нишон ўрдуга элчилар юборди ва дўстлик ва бирдамлик изҳор этди. Бадиуззамон Мирзо бу чин кўнгилдан айтилган дўстона сўзлар баробарида ўз гайғомини юборди ва сулх қондалари амалга ошиб, олий мавқаб Қандаҳордан Заминдоварга қараб юрди.

Бу воқеалар рўй бериб турганда амир Зуннуннинг Султон Бадиуззамон Мирзо никоҳида бўлган кизи ва шундан сал ўтмай, шу келиннинг ўта одила аёл саналган онаси кетма-кет вафот этишди. Султон Бадиуззамон Мирзо ва амир Зуннун йигирма кун орасида рўй берган бу икки мусибатдан қайғу ва ғамларга ботдилар ва уларнинг руҳига бағишлаб, фуқаро ва мискинларга кўп миқдорда обу ош тортиб, илоҳий калом хатмларини бажо келтирдилар. Сўнг кишлоқ юрти борасида машварат солиб, кишни Фароҳ қасабасида ўтказиш, офтоб киш буржидан Баҳорнинг тенглик нуқтасига ўтгач эса, қай тарафни маъқул топсалар, ҳиммат отини ўша томон сари ҳайдашга қарор қилдилар. Шу қарор бўйича Султон Бадиуззамон Мирзо ва амир Зуннун Фароҳга

бориб, йўл азоблари чарчоғини ёзгач, Мирзонинг олий кўнлига амир Зуннуннинг укаси амир Султон Али арғунни салтанат кўзининг карочиғи Муҳаммад Замон Мирзонинг отабеклик мансабига тайинлаб, унинг эса, шоҳзодани Сейистонга элтган кўйи барча ҳимматини Муҳаммад Замон Мирзо бин Султон Бадиуззамон Мирзонинг тарбиясига бағишлаши лозимлиги фикри келди. Амир Султон Алининг юраги бу илтифотдан фахр ва қувончга тўлиб, подшоҳона тўйлар берди ва шоҳзодани унга топширишган қуни сочқилар сочиб, ниёз ва нисор<sup>106</sup> шартини бажо келтирди [314-б.].

### ХУРОСОН СУЛТОНЛАРИНИНГ ШАЙБОНИЙХОН БИЛАН ТЎҚНАШИШ ВА УРУШ-САВАШ СОЛИШ УЧУН ҚЎЗГАЛГАНИ ЗИКРИ

[368-б.] Муҳаммадхон Шайбоний Султон Ҳусайн Мирзонинг мангу олам сари кетганидан<sup>107</sup> хабар топгач, Хуросонни эгалламоқ фикрига тушиб, ул вилоятлардаги аҳвол ва вазиятдан хабардор бўлиш мақсадида мавлоно Хитой номли бир кишисини элчилик расми билан салтанат уйи Ҳиротга юборди. Мавлоно Хитой Боғи Жаҳоноро сайхонлигида Султон Бадиуззамон Мирзо ва Музаффар Ҳусайн Кўрагоннинг шуқуҳ далолат палосини ўпиш шарафини топиб, олиб келган мактуби мазмунини қуйидагича арзга етказди: – Элчилик мақсади шуқим, Шайбонийхон «Сизларнинг отабобонгиз ҳамиша бирор воқеа рўй бериб, ҳодисалар

<sup>106</sup> *Нисор* – бошдан олтин, қумуш танга сочинш; Пул-маблағ тортиғи.

<sup>107</sup> Бу воқеа 911 йил 11-зулҳижжаси (1506 йил 6 май)да рўй берган эди.

машакқати тирдобида қолишса, бизнинг олийшонли хоконларимизга мурожаат қилиб, итоат шартларини бажо келтирганлар. Энг яхшиси шуким, сиз ҳам ота-боболарингизнинг ойдин анъаналарини давом эттириб, карама-қаршилиқ эшикларини бекитиб ташланг-да, келишувнинг тўғри йўлидан оғишманг ва сира ундан ташқари кадам босманг, токим, мамлакат майдони маъмур ва ободлигича қолиб, барчани яратган холиқнинг омонати бўлмиш халқ нусрат асарли аскарларга «ёқости бўлмасин» демоқда. Бадиуззамон Мирзо ва Музаффар Ҳусайн Кўрагон Шайбонийхоннинг бу элчи юборишдан нияти нималигини англаганлари учун бул сўзларга жавоб бериш ва элчини изига қайтаришни орқага суриб, Хуросоннинг ён-атрофига чопарлар юбориб, шохзодалар ва зафар юришли кушннинг йиғилиши борасида фармон бердилар. Шу гаплар бўлиб турган пайтда куббатилислом Балх хокими амир Султон Куланжок олдидан элчилар келиб, унинг «Муҳаммадхон Шайбонийнинг найсоний<sup>108</sup> булут ёмғири томчилари сонича лашкар билан Балх шаҳри атрофини ғалаба яқунли байроқ ва туғлар марказига айлантирган кўйи камалга машғул экани, аксига олиб, шаҳар аҳолиси кўлида ғамлаб кўйилган ғалла қолмагани ва озик-овқат йўқлиги кабилар кўшин ахлини йўқлик сарҳадига етаклади, умид шулким, хазратлар биргаликда бу худудга йўналсалар, то ўзбек лашқари йўқотилиб, осойишталик нурлари бу шаҳар халқи аҳвол юзи узра ёғду сочса» деган илтимосини етказдилар. Султон Бадиуззамон Мирзо ва Абулмансур

<sup>108</sup> *Найсон* – сунний тақвим бўйича мелоддаги апрель ойига тўғри келувчи ой номи.

Музаффар Хусайн Мирзо бу хабарни эшитгандан кейин амирлар ва арконий давлат билан кенгашиб, Шайбонийхон билан урушишга қарор қилдилар. Яна янгида шохзодаларни йиғиш учун Хуросон диёри ён-теварагига чопарлар жунатдилар. Ниҳоят мазкур йилнинг куз фасли боши<sup>109</sup>да доруссалтана Хиротдан нусрат атоматли байроқларни куббагилислом Балх томон кўтардилар ва мавкаблар отлари чангидан ой ва қуёш чехрасини қорайтириб, осмонда милт-милт этаётган юлдузлар кўзини эса хира торттирдилар.

### Назм:

Равон гаштанд шохони неку кийш,  
Сипоҳе бениҳоят аз пасу пеш.  
Ба таиди илоҳий гашта хуррам,  
Зафар дар хидмату икбол ҳамдам.

### Мазмуни:

Йўлга тушишди яхши қоидали шохлар,  
Олду ортларида чексиз соғли кўшинлари.  
Илоҳий тақдирдан бўлиб шод-хуррам,  
Хизматида ғалаба-ю икбол ҳамдам.

Чиҳилдўхтарон атрофи шохзодаларнинг кавкаб мартабали мавкаблари чангидан мишк сочувчи бўлгач, Абулимуҳсин Мирзо нусрат асарли лашкарни бошлаб, мисра: Сипоҳе ба касрат чу аъдоди ахтар – кўпликда юлдузлар сонича бир кўшин билан Марв шаҳридан ташриф буюрди ва кўзларни мақсади ҳосил оға-инилар

<sup>109</sup> Аслида 912 йил ёз фасли кўзда тутилмоқда. Бу мелодда 1506 йил ёзига тўғри келади.



учрашувидан ойдин қилиб, ҳар жиҳатдан улуғ бўлган Султон Бадиуззамонга чингизий тўра бўйича тиз чўккалади ва назаридан тортиқлар ўткарди. Музаффар Хусайн Мирзо мулк салтанатида Султон Бадиуззамон Мирзо билан нечоғлик шерик бўлмасин, аммо ёш жиҳатдан Абулмуҳсин Мирзодан кичик бўлгани учун унга таъзим қилиб, ҳурмат кўрсатди ва икки томондан ниёз ва нисор шартлари юзага чиқди. Сўнг ул бекатдан ҳам кўчирилиб, Мурғоб дарёси қирғоғига тушилгач, Ибн Хусайн Мирзо Қойиндан, амир Султон Али аргун Сейистондан келди ҳамда Хуросон мамлакатларининг бошқа амиру аскарлари ҳам кетма-кет ва пайдар-пай равишда лашкаргоҳга оқиб келавердилар.

#### **Назм:**

Расиданд аз ҳар тараф сарваре,  
Ба ҳар як мулозим шуда лашкаре.  
Ба хуни адув танг баста миён,  
Қушода ба мадҳи салотин забон.

#### *Мазмуни:*

Келишди ҳар тарафдан бир сарвар,  
Ҳар бири ёнида келар бир лашкар.  
Душман қонига қаттиқ боғлаб бел,  
Чоғлаб султонларининг мадҳига тил.

Шунингдек, Марвруд дарёси бўйи зафарли қўшиннинг чодиргоҳига айланган ўша айёмда малики маннон кудрати билан кундан-кун Хуросон султонлари йигини чин дўстлар кўнглидагидек ортаган сайин ортиб бораркан, кутилмаганда, Султон Бадиуззамон Мирзонинг

икболга лим тўла даргоҳига ширин тилли элчи келди  
ва Худои таолонияг инояти уфкидан улутворлик ва юк-  
сак мартаба юлдузи чиқаётгани башоратини етказди.  
Яъни халифат паҳоли ҳазрат Заҳириддин Муҳаммад  
Бобур подшоҳнинг бахт залворли қадами ташрифи ха-  
бари тарқалди ва қувонч ва хурсандлик нурлари парта-  
ви жаҳонбинлик маслаки солиқлари ва амирлару дав-  
лат устунлари аҳволи юзи сари ёғилди.

### **Нази:**

Мужда, эй дил ки Масиҳо нафасе меояд,  
Ки эи анфоси хушаш буи касе меояд.  
Аз ғами ҳажр макун нолаву фарёд ки душ,  
Задам фоле ва фарёдрасе меояд.

### *Мазмуни:*

Суюнчи бер эй дил, бир Масиҳодам келадур,  
Хуш нафасидан аёнким, дилга ҳамдам келадур.  
Ҳажр ғамидан қилма нола-ю фарёд, чун окшом,  
Фол ташласам, додга етгувчи бир одам келадур.

## **ОЛИЙЖАНОБ ПОДШОҲ БОБУРНИНГ МУРҒОБ ДАРЁСИ БЎЙИДА ХУРОСОН СУЛТОНЛАРИГА ҚЎШИЛГАНИ БАЁНИДАГИ СЎЗЛАР**

Ғозийлик далолатли подшоҳ Заҳириддин Муҳаммад  
Бобурнинг шавқат ва сарафрозлик ноқораси садоси,  
давлат ва ҳашаматли йиғноқи нури ёғдуси ҳамда  
бошқа гўзал сифату мактовли хислатлари оламаро  
шухрат топган ва ул омадга ёр подшоҳнинг Шайбо-  
нийхон билан қилган уруш ва тўқнашувлари воқеаси



хоқони мансур Султон Хусайн Мирзо Бойқаро арзига етишган вақтларда ул шоҳ фаросат нури ва ўта донолиги орқасида тез орада бу салтанат ва иқбол боғи сарварининг мартаба ва шавкат юлдузи юрт олишлик ва ҳукм суришининг энг юксак даражасидан балкиб чиқажаги ва Аллоҳи таолонинг иноят қўллари осойишталик ва орзулар эшигини унинг фархунда ҳаёти юзига қарата очажagini билган эди. Шунга кўра Султон Али хоббининг ўгли Саййид Афзални Кобулга юбориб, дўстлик ва яхши эътиқод тили билан «ер юзи мамлакатларини эгаллаш ва омонлик ўрнатиш ҳамкорлик ва дўстлик билаги қуввати билан муяссар бўлади, икки жаҳон матлабу мақсадларига эришиш эса ёрдам ва келишувни амалга ошириш билан қўлга киради. Ҳазрат подшоҳ Бобур Мирзо менга дилбанд фарзанд ва ука ўрнида азиз жонга баробардир. Шу жиҳатдан ул подшоҳ исёнчи муҳолифларни йўқотишда ва кўзғолончи душманларни нобуд қилиш ишида биз билан иттифок йўлини тугтиб, бирдамлик ва ҳамжиҳатлик қондаларига риоя қилишлари лозим. Тоқим бегоналар меросий мамлакатга дахл қилиш мажolini топа олмагайлар ва бундан кейин Мовароуннаҳр шаҳар ва юртларида буюклик ва жаҳонбонлик тахтига чиқа олмагайлар» деган сўзларни айттирди. Саййид Афзал баланд мақомли подшоҳнинг тахти пойига етишди ва бу жўяли сўзларни арзга етказди. Ул ҳазрат мўъжиза низоми «қачон сизларга бирон ибора билан салом берилса, сизлар ундан ҳам чиройлироқ қилиб алик олинлар»<sup>110</sup> катоми мазмунига амал қилиб, Саййид

<sup>110</sup> Қуръони карим, Нисо (4) сураси, 86-оятдан.

Афзални ўз меҳрибонлик ва саховат фазилатлари орқасида подшоҳона инъомларидан баҳраманд ва хурсанд қилиб. Султон Хусайн Мирзонинг мулоқоти сари йўналди. Ўша аснода Жаҳонгир Мирзо музаффар туғли подшоҳ розилигини олмасдан, Кобулдан ташқари чиқиб, аймоқлар юрган ҳудудга юзланди. Шунда жаҳон олувчи подшоҳ кўнглига «аймоқларнинг калонтарлари бошларини Жаҳонгир Мирзонинг итоат халқасига тикишлари, у эса аймоқлар ёрдамида яна бир бор давлат учун кураш бошлаш кўйига тушиб, муҳолифат ва қарши чиқиш эшикларини очиши эҳтимолдан холи эмас» деган фикр келди. Натижада олий шарофатли ақл «фалакка етувчи туғ Жаҳонгир Мирзо томон йўналса-да ул шоҳзода олий мавқабга кўшилса-ю сўнг Хуросон сафарига бирга чиқилса» деган фикрни тақозо қилди. Шундан сўнг олижоҳ подшоҳ дорулмулк Кобул шаҳрини ишончли кишилар жумласидан бўлган бири гуруҳ шижоат вужудли амирларга топшириб, уларга адолат ва халқпарвар бўлишлари борасида васиятлар қилгач, 911 йил<sup>11</sup>да баракат-қутли оёғини гардун шитобли асл зотли оти узангисига тикиб, ўрнидан кўзгалди.

### Назм:

Ба икбол шоҳи Фаридун сифот,  
Зи Кобул равон шуд ба суйи Ҳирот.  
Зафар бар ямин, нусрат андар ясор,  
Рафиқи сафар лутфи парвардигор.

<sup>11</sup> 911 йил – бу ерда 1506 йил 23 май хуни кўзда тутилмоқда.

### *Мазмуни:*

Иқбол-ла шоҳи Фаридун сифот,  
Кетди Қобулдан шаҳри Ҳирот.  
Зафар сўлда, нусрат ўнгда яқбор,  
Йўлдоши эрди лутфи парвардигор.

Қабила ва аймоқ-уруғ бошлиқлари осмон ҳашамли мавқабнинг йўлга тушганидан хабар топишгач, Мирзо Жаҳонгирга парво ҳам қилмай, барчалари сочқи ва тортиқлар билан Искандар мисол подшоҳ хузурига ошиқдилар. Мирзо Жаҳонгир ҳам қайтадан давлатхоҳлик занжирини елкасига ташлаб, подшоҳлик мавқабига қўшилди ва олдинги дастур бўйича турли-туман ғамхўрлик ва ҳар хил лутфлар билан сарафроз бўлди. Хуросон мамлақати ҳудуди осмони эҳсони кўп Бобур подшоҳнинг саманди чанг-ғуборидан мушк таратувчи бўлгач, хоқони мансур Султон Ҳусайн Мирзо Бойқаронинг вафоти хабари тилларда миш-миш бўлди. Илқомли кўнгилдан «ул мағфират аломатли Хусравнинг ўғиллари ўртасида ихтилоф юзи рўй кўрсатиши эҳтимоли йўқ эмас ва шунинг орқасида уларга тааллуқли мамлакатлардан айримлари салтанат ошиён даргоҳ мулозимлари кўлига ўтиши ҳам мумкин» қабилидаги ўйлар ўтди. Шунга биноан зафар гавдали байроқ олдинги дастурга кўра ўша томон сари манзил ва бекатларни босиб ўтишга тушди ва Хобирон шаҳрига етишгач, шоҳзодалар ва олийшон амирларнинг Мурғоб дарёси қирғоғида тўпланганлари маълум бўлди. Ул яхши ўй-фикрли подшоҳнинг ойдин кўнглига Бадиуззамон Мирзо ва унинг иниларига ёрдам ва мадад бериш ва улар билан биргаликда Шай-

бонийхон ҳамда бошқа душманларга қарши курашиш нияти келди. Ниҳоят шу қарор бўйича оти жиловини Марвруд тарафга бурди ва бу қувонч асарли хабарни етказиш учун Мурғобга қамар шитобли элчи юборди. Бадиуззамон Мирзо ва укалари бу хушхабарни эшитгач, зафар ва иқбол юлдузининг орзу ва умид уфқидан балқиб чиқишига умид боғлаб, сочқи ва тортиқ шартларини бажаришга шошилдилар.

### Нази:

Биё ки рояти мансури подшоҳ расид,  
Навиди фазлу каромат ба меҳру моҳ расид.  
Жамоли бахт зи руйи зафар ниқоб андохт,  
Камоли адл ба фарёди додхоҳ расид.

### Мазмуни:

Келким, подшоҳнинг зафарли туғи етди,  
Фазлу каромат суюнчиси ой, куёшга етди.  
Бахт жамоли зафар юзидан ниқоб итқитди,  
Адолат камоли дод истаганлар фарёдига етди.

Бадиуззамон Мирзонинг барча бажариши шарт фармонига биноан амир Муҳаммад Бурундук барлос ва амир Зуннун мактов хислатли Бобур подшоҳнинг зафарга ёр мавкаби истикболига ошиқдилар ва Дармом маъзилида осмон хашаматли даргоҳ мулозаматига етишиб, турлича марҳамат ва шафқат лутфига эришдилар. Аҳду паймон қондалари адо этилгач, ул олий мақомли подшоҳ масофаларни босиб ўтиш тезлигини оширди ва Султон Бадиуззамон Мирзо ул ҳазрат келиши яқинлашганидан огоҳлик топиб, укалари билан бирга кўтиб олиш расминин адо этиш учун Марвчокдан

кўзғалиб, Гулбоғбон манзилида Хуросон султонларининг жон димоғи ул халифалик боғининг гул шохали шамшодининг мулоқоти тароватидан муаттар бўлди. Ҳар икки томондан таъзим ва улуғлаш маросими амалга ошди. Султон Бадиуззамон Мирзо ва Абулмуҳсин Мирзо ҳамда жаннатмакон хоконнинг бошқа мажид ўғиллари Бобур Мирзонинг бахтга кон қадами ташрифини азим бир Баракат билдилар ва меҳмондорлик ва хизматкорлик қоидаларида тўла саъй-ҳаракат кўрсатдилар. Иттифоқ ва бирдамлик қоидалари садоқат ёрдами билан қай миқдорда амалга ошиши лозим бўлса, кучлари борича шунча равишда адо этдилар ва дину давлат ишлари ҳамда мулку миллат душманлари хавфини аритиш борасидаги машваратга тиришдилар. Мактов хислатли Бобур Мирзонинг қадами шарофатидан Хуросон султонлари ўрдусида кўшинларнинг шундай азим бир йиғини бўлдими, уни ёзиш бармоқлар кимирлаши билан амалга ошмайди ва баёнини икки тилли қалам ҳаракати билан битиб бўлмайди. Агар ул соҳиби тамкин султонлар ўша йиғилган шижоат қоидали кўшин билан кўзланган юришни амалга оширсалар эди, Хуросон вилояти ҳеч бир гапсиз ўзбеклар ҳамласидан дахлсиз ва омон коларди. Аммо қудратли мулклар молики тақдири бошқача тарзда эканки, шунчалик олий мартабали сардорлар йиғилишидан ва бу қадар кўп амирлар ва кўшин тўпланишидан ҳеч бир фойда чиқмади.

### Назм:

Чу давлат атоеист аз кирдигор,  
Наояд зи бисёрии хайл кор.



Ба тадбир давлат наояд ба даст,  
Зи тақдир дон дар жаҳон ҳар чи ҳаст.  
Худо дар азал ҳар чи тақдир кард,  
Ба тадбир натавонаш тағйир кард.

*Мазмуни:*

Давлат парвардигорнинг атоси эрур,  
Кўшин кўплигидан иш чиқавермас.  
Тадбир билан келмас қўлга давлат,  
Тақдирдан бил не бўлса жаҳонда.  
Худо азалда ҳар нени тақдир этса,  
Тадбир-ла ўзгартиб булмас уни ҳеч.

## **БАЛҲНИНГ МУҲАММАД ШАЙБОНИЙҲОН ТАСАРУФИГА КИРГАНИ ЗИКРИ ВА ХУРОСОН СУЛТОНЛАРИ-Ю ҲОКИМЛАРИНИНГ ОРҚАГА ҚАЙТИБ КЕТГАНИ БАЁНИ**

Айтилган достон ва ёзилган хикоялар мазмунидан маълум бўлишича, Муҳаммад Муҳсин Мирзо Шайбонийхон исёнини бостиришда, Аллоҳ тақдирининг тавфиқ учун қўллови йўқлигидан, ака-укалари билан келишув йўлини тутмади ва ўз давлати қароргоҳи, яъни муқаддас Разавия *алайҳиссалом* Машҳадида сокин тураркан, амирлар ва давлат устунларидан ҳеч бир кишини ёрдам учун жўнатмади. Шу жихатдан Султон Бадиуззамон Мирзо ва Музаффар Ҳусайн Кўрагон юришига катта путур етди ва яна бир бор маслаҳатга киришиб, уруш ўрмонининг шери ва жанг денгизининг аждари бўлмиш амир Шужоиддин Зуннун «ҳозирги кунда амир Темур Кўрагон улуси бир ерга тўплангандек





йиғин кайта яна муяссар бўлиши қийин, бундай фурсатни ганимат билиб, бақувват дил ва яхши умид билан ҳарбу саваш майдони, тўкнаш ва зарб маъракасига кириш лозим ва мулклар бахш этувчи малик иноятидан фатху зафар тиламоқ керак, токим, истак чехраси ғайб пардаси орғидан кўриниш берса» дея ўтирганлар арзига етказди. Шунда амир Муҳаммад Бурундук барлос «Балх томонга отланганимиз заҳоти шу вақтгача Хуросон мамлакатларини кўлга киритиш пайида юрган Кепак Мирзо ака-укалари иттифоқига қўшилмай, Ҳирот шаҳри устига кўшин тортиши аниқ ва табиийки шаҳар халқи амир Муҳаммад Валибек ҳукумати тарафдорлари амир Шайх Али Тағой ва амир Юсуф Али кўкалтошдан бу шаҳарни химоя қилишда ожиз келиб, шунга кўра Муҳаммад Мухсин Мирзо Хуросон пойтахти Ҳиротни ўз тасарруфига киритади. Бундай ҳол рўй берса, ёнимиздаги амирлар ва лашкар аҳлининг болачакаси ва мол-мулки Ҳиротда қолган кўпчилик қисми биздан юз ўтириб, Ҳиротга кетадилар. Энг яхшиси ва маъқули шуки, бу кишида ичимиздаги душманни йўқ қилайлик-да, дала-даштда от ва мол-ҳол ўтлари кўп бўлган баҳор фаслининг бошида хотиржам кўнгил билан ўзбек кўшинига қарши урушиш учун душман олдида отланайлик» деди.

Шу гап-сўзлар айтилиб ва баҳсу мунозаралар бўлиб турган аснода «Амир Султон Қулунжоқ ва лашкар аҳли шаҳарни мустаҳкамлаш ва сақлашга кучлари йўқлигидан тушқунликка тушиб, Муҳаммад Шайбонийхондан омонлик тиладилар, хон эса уларни дилга ёқар ваъдалар билан алдагач, Амир Султон куббатил ислом Балх дарвозаларини очиб берди ва хоннинг

осмон мартабали мавкабига кўшилди. Азамат ўзбек кўшини эса ғорат ва талон-торој супургиси билан бирпасда фоҳира Балқ шаҳрини шип-шийдон қилиб тозалашди. Муҳаммадхон Шайбонийнинг қулоғига Хуросоннинг кўпчилик ҳоким ва кўшин бошлиқлари Мурғоб дарёси бўйида йиғилиб, урушмоқчи бўлиб ўтиришибди, деган хабар етгач, тезлик қаноти билан қайтиш байроғини кўтарди» мазмунидаги гаплар етиб келди. Бу хабар Хуросон султонлари ўрдусида тарқалгач ва ҳақиқатдан ҳам бу киш айёмида Амударёдан кечиб ўтиб, Муҳаммад Шайбонийхон билан урушиш инсон чидам-бардошидан ташқари иш бўлгани учун амир Муҳаммад Бурундукнинг фикри маъқул кўрилиб, мазкур йилнинг ражаб ойи<sup>112</sup>да тарқалиб кетиш тоши хуросонликлар шишахонаси сари отилди. Заҳир ус-салтана вал-хилофа Муҳаммад Бобур подшоҳ йўналиш байроғини Кобул томон ҳилпиратди, Ибн Ҳусайн Мирзо Қойин тарафга кетди, Абулмуҳсин Мирзо Марв сари йўлга тушди. Амир Зуннун ва амир Султон Али арғуннинг ўғиллари Гармсир шаҳарлари томон юзландилар. Султон Бадиуззамон Мирзо ва Музаффар Ҳусайн Мирзо салтанат ва давлат пойтахти Ҳиротга кетдилар ва ўша бир неча кун Муҳаммад Муҳсин Мирзо ишини ҳал этиш маслаҳати бўйича Абулмансур Музаффар Ҳусайн Кўрагон Кавсавия қишлоғига ташриф буюриб, ул маконда қишлоқ учун тўхтади. Амир Муҳаммад Бурундук барлос ва зафар иқтибосли амирлардан яна бир нечаси бу Мирзо хизматига бел боғладилар. Султон Бадиуззамон Мирзо эса

<sup>112</sup> 912 йил ражабн кўзда тутилмоқда. Бу сана мелодда 1506 йил ноябрь – декабрига тўғри келади.



амир Зуннун ва бошқа амиру нўёнлар билан бирга бу киш доруссалтана Хиротда сокин туриб, муборак рамазон ойи<sup>113</sup> да рўза тутиш ва фарзу нафл намозларини адо этишга машғул бўлди. Рўза ҳайитига яқин ҳазрат ҳокони мансурнинг пок руҳини ёд этиш учун катта ош тортишга фармон берди. Шаввол<sup>114</sup>нинг қувонч фолли ҳилол ойи ўз юзидаги пардани олиб ташлагач, ул буюқлик авжининг юлдузи Ийдгоҳга ташриф буюриб, ниёз юзасидан ҳайит намозини адо этди ва кайтиш чоғи султонликнинг шарқий мадрасасини қутлуғ тушиш бахтидан осмон фазосининг ғайирлиги келадиган жойга айлангирди. Доруссалтана Хиротнинг саййид, уламо, қозисидан тортиб барча каттакон ва шариф кишилари аъло ҳазрат уюштирган йиғинда қатнашиб, дастурхон ёйгувчи хонсолор, яъни дастурхон бошлиқлари ҳаддан ташқари лазиз таомлар ва анвои ҳалволардан инсон тасаввурига сиққанидан ҳам кўпроқ тарзда муҳайё қилдилар ҳамда халқнинг турли табақаларини фойдага қон ул дастурхондан баҳраманд қилиб, кўп ҳазз-ҳузур бағишладилар. Гардун ҳашаматли Султон Бадиуззамон таом ва зуллил жалол Аллоҳнинг каломи хатмидан сўнг тез хиромли абраш отга миниб, Жаҳоноро боғига ташриф буюрди ва айшу нишот палосини ёйиш, қувонч ва шоду хуррамлик асбобини тузишга машғул бўлди.

### Байт:

Ҳар вақт ҳуш ки даст дехад, муғтанам шумор,  
Касро вукуф нест ки поёни қор чист.

<sup>113</sup> 912 йил рамазон ойи кўзда тутилмоқда (1507 йил 26 январь – 24 февраль).

<sup>114</sup> 912 йил шавволи боши (1507 йил 25 февраль) кўзда тутилган.

*Мазмуни:*

Шодлик чоғи келса, ганимат бил,  
Иш охирини ҳеч ким билмас, бил.

**СУЛТОН БАДИУЗЗАМОН МИРЗОНИНГ ЯЙЛОҚИ  
МАРАЛГА КЕТГАНИ ЗИКРИ ҲАМДА ҚУДРАТЛИ  
АЛЛОҲ ТАҚДИРИГА БИНОАН МУҲАММАД  
ШАЙБОНИЙХОННИНГ ДАВЛАГИ БАЙРОҒИ  
ЮҚОРИ КЎТАРИЛГАНИ БАЁНИДАГИ ҒАҒЛАР**

Қиш фаслининг истило даври поёну ниҳоясига ет-  
гач ва замоннинг турфакор султони райхонлару гул-  
чечакларнинг баҳор осорли кўшинини дала-дашт  
бўстонлари устига тортгач, қаҳратон совуқ ва аёз  
сипоҳи Фарвардин<sup>115</sup> лашкари ҳужумидан енгилиб ва  
шарқ насабли ҳокон Баҳром офтобхонасини эгаллаб,  
гердаиш байроғини еттинчи осмондан ўтказгач,

**Назм:**

Султони жаҳоннаварди айём,  
Зад хийма ба тахтгоҳи Баҳром.  
Афрохт алам зи лола дар дашт,  
Олам зи сипоҳи сабза пур гашт.

*Мазмуни:*

Айёмнинг жаҳон кезувчи султони,  
Чодир тикди Баҳром тахтгоҳига.

---

<sup>115</sup> Фарвардин – қадимги эронликлар тақвимида олам яратилиши (парвард) жараёнининг баҳор фаслида амалга ошганига ишора қилувчи биринчи ой номи. Ҳозирги хижрий шамсий тақвимида акс этган бу ойи боши мелодда 21 мартга тўғри келади.

Лоладан байроқ кўтарди дашт аро,  
Олам яшиллик сипоҳидан тўлди.

Султон Бадиуззамон Мирзо амир Шужоиддин Зуннун аргун ва амир Низомиддин Шайхали тағойни Ҳиротда қолдириб, олий туғларни Бодғис яйлоқи томон кўтарди ва бир неча кун жаннат аломатли ўтлоқзор бўлмиш Марал манзилида истикомат кўчини ёйди. Ўша вақтда Музаффар Ҳусайн Мирзо улуғвор акаси билан учрашиш иштиёқини туйиб, кишлов юртидан ҳаракатланди ва 912 йилнинг зулҳижжа ойи охирлари<sup>116</sup>да мазкур манзилда икки бахтли юлдузнинг яқинлашиб, бир ерга келиши рўй берди. Ака-укалар кўзларини бир-бирова дийдори билан равшан қилдилар ва душманни йўқотиш борасида машварат йўлини тугтиб, ўтган-кетган ва келажак ҳақидаги сўзларни ўртага солдилар. Ўша баҳорда Муҳаммадхон Шайбоний мулк олиш касбидеда Амуя дарёсидан кечиб ўтади, деган тасаввур бўйича сўзга чечан элчиларни шохзодалар ва олийшонли амирлар олдига юбориб, уларнинг бир ерга йиғилишига фармон бердилар. Шу жумладан Шужобекни чакириб келиш учун заррадан ҳам камтар каминани Қандаҳор сафарига тайин қилдилар ва ушбу ҳарфлар биттувчиси пайшанба куни мазкур ойнинг охирги санаси<sup>117</sup>да кетишга рухсат олиб, йўл анжомини тайёрлаб, мақсад сари юриш учун аввал Марал манзилдан Ҳиротга ошиқди. Шу аснода ифбат ва ҳашамат кутисининг гавҳари Султон Бадиуззамон Мирзонинг кизи Чучукбегим доруссалтана Ҳиротда офатларга тўла

<sup>116</sup> 912 йил зулҳижжа ойи охирлари – 1507 йил 1 – 10 май.

<sup>117</sup> 912 йил 30 зулҳижжа – 1507 йил 2 май.

жахондан охират сафари кўчини йиғиштирди. Амир Зуннун ва амир Шайх Али улуғ султонлар қондаси бўйича ул Махд улёни ювиб ва қафанлаш ишига бош бўлиб, пок жасадини шарифа Бадиа мадрасасида дафн қилдилар ва баракали руҳини ёд этиш учун факиру мискинларга таом бериш, Худои субҳона ва таоло каломини хагм қилишга машғул бўлдилар. 913 йилнинг муҳаррам ойи<sup>118</sup> ҳилоли давлат ва ҳашамат машриқидан порлаб, осмоннинг зангори денгизи сари кечиб ўтгач, Муҳаммадхон Шайбонийнинг Карки кечувидан ўтгани ва Хуросон тарафга йўналгани хабари тарқалди. Султон Бадиуззамон Мирзо амир Шужоиддин Зуннун ва амир Низомиддин Шайх Али тағойни кутлуғ ўрдуга чорлади ва улар мазкур ойнанинг тўртинчиси<sup>119</sup> да душанба куни Ҳирот шаҳридан халойик паноҳ даргоҳга ошиқдилар. Эртаси куни мулозамат шарафига мушарраф бўлиб, бошқа улуғ амирлар билан бирга машварат палосини ёйдилар ва тақдир ўқини тадбир қалқони ва воқеалар сабабчиси буюк эгамнинг қазову қадари селобини ҳас ва ҳашак уюми билан қайтара олишни кўнглига тутдилар. Ҳайҳот, ҳайҳот. **Мисра:** Воқеи тири қазо набувад сепар – Қазо ўқига тўсиқ бўлгучи қалқон йўқ; Мулкларнинг мутлақ молики иродаси Хуросон вилояти Муҳаммад Шайбонийхон тасарруфи доирасига кириши ва ҳокони мансур ўғиллари давлати охирига етишини тақозо қилган экан, туганмас кўшин йиғилиши ва соҳиби ақл амирларнинг тадбири билан бирор иш ўнганмади. Айни ўша пайтда Мовароуннаҳрнинг Баҳром кадрли сипоҳи тепадан пастга юзлангучи сел

<sup>118</sup> 913 йил муҳаррам – 1507 йил 13 май.

<sup>119</sup> 913 йил 4 муҳаррам – 1507 йил 17 май.

каби Амуя дарёсидан кечиб ўтиб, Хуросонни бало тўфони босди.

**Назм:**

Чу тақдири илаҳий буд зи инсон,  
Ки гардад ва мунтақил мулки Хуросон.  
Наёмад кор аз мардони сафдар,  
На аз тадбири доноёни кишвар.  
Шанидам ин сухан аз кудаку пир,  
Ки тақдири илаҳийро че тадбир.

*Мазмуни:*

Илоҳий тақдир экан бу янглиғ,  
Кўлдан-кўлга ўтди Хуросон мулки.  
Саф ёрувчи мардлар кўлидан иш келмади,  
Юрт донолари тадбиридан ҳам фойда чикмади.  
Эшитдим бу сўзни бола-ю қари чолдан, дер:  
Илоҳий тақдирга ахир борми чора-ю тадбир.

Бу воқеа тавсифи шундай эди: Муҳаммадхон Шайбоний 912 йилнинг зулҳижжа ойи ўрталари<sup>120</sup>ида до-рулмулк Самарқанддан мулк олишлик эгарига ўтирди ва Карки кечувидан ўтиб, Андхуд худудига ошиқди. Ўша пайтлари Султон Бадиуззамон Мирзо томонидан Андхудга ҳоким этиб қўйилган амир Шохмансур ўзбек хонининг шавкати кўплиги ва давлати қуввати зўрлигидан хабардор бўлгач, иқбол каби хонликнинг салтанат ва истиқлол даргоҳига борди ва бўйсунтириш занжирини елкасига отиб, Шайбонийхоннинг илти-

<sup>120</sup> 912 йил зулҳижжа ойи ўрталари – 1507 йил апрели.

фот назарига манзур бўлди. Сўнг жаҳон олувчи хон шюшилнч қаноги билан Андхуддан Мурғоб дарёси бўйига илғор солди. Марвчокқа етишгач, ул қасаба кўрғонининг кутволи итоат ва фармонга бўйсунишда Шохмансурга эргашди. Ўшангача Бадиуззамон Мирзо ва Абулмансур Музаффар Хусайн Кўрагонга хоннинг мансур мавкаби Амуя дарёсидан ўтгани хабари ҳали маълум бўлмади. Муҳаммадхон Шайбоний Бодғис атрофига етишгачгина изтироб сели тошқини Хуросон султонлари ва амирларининг сабот биноларини бузиб, ҳайрат ва ўй-фикр денгизига ғарқ қилди. Яна бир марта маслаҳат йўлини тутиб, амир Зуннун ўзининг туғма шижоатига кўра душман билан даладашда урушиш лозимлиги фикрини илгари сурди, амир Муҳаммад Бурундук эса Ҳирот шаҳридан туриб мудофаа урушига ўтишни маслаҳат берди. Аммо кўнгиллар ҳали бу икки маслаҳатдан бирини қабул қилишга улгурмай туриб, эртасига, яъни 913 йил муҳаррам ойининг еттинчиси<sup>121</sup>да пайшанба кунини тонг маҳали Муҳаммадхон Шайбонийнинг осмоний ходисалардан ҳам кўп кўшин билан бирга Ҳирот қалъасига яқин келгани аломати кўринди. Ул музаффар туғли кўшинининг саркардаси Муҳаммад Шайбонийхоннинг ўғли Темур султон ва Убайдуллох бин Махмуд Султон бош бўлмиш манқилой қисми бурунғор ва жувонғор билан саф тортган кўйи жанг майдонига келиб кирди. Султон Бадиуззамон Мирзо ва Музаффар Хусайн Мирзо ҳам қушинни тайёр ҳолатга келтириб, одам зоти Муҳит денгизини намнок

<sup>121</sup> 913 йил 7 муҳаррам — 1507 йил 19 май.





тупрок қўли билан кўммоқчи бўлгандек ва бало се-  
лини хас-хашак мушти билан юришдан тўхтатмоқчи  
экани каби уруш ва жанг мақомини эгалладилар.

### **Байт:**

Дар гарди сипоҳ шўълаи тег,  
Бинмауд ба сони барқ дар меғ.

### *Мазмуни:*

Кўшин чангидан қиличлар шўъласи,  
Кўринарди қора булут аро чакнаган яшиндек

Ўқ бургути ёшу кексанинг ҳаётини ямламок учун  
огзини очди, найза аждаҳолари кичик ва катта гуруҳига  
зарба бериш илынжида тилини чўзди.

### **Назм:**

Дар он майдон синони оташангез,  
Зи баҳри таъни гурдон шуд забонтез.  
Укоби тир омад сурх минқор,  
Аз хуни пурдилон рўзи пайқор.

### *Мазмуни:*

Ул майдонда ўт пурқар найзалар,  
Ботирларга урай деб тил қайрар.  
Ўқ бургути қизил тумшукли бўлди,  
Мардлар конидан жанг куни.

Хуросон амирлари ва лашкарбошилари жумла-  
сидан амир Шужоиддин Зуннун арғунва амир Низо-  
миддин Шайхали тағой уруш ва чопиш ўрмонининг  
шерларидан бир гуруҳи билан ўша куни жанг майдо-

нида қиёмат кунини кўптириб, наҳанг юришди шамшир зарби ва ўлим аломатли ўқ захмидан пахлавоонлик йўлининг йўловчиларидан бир тўдаси ҳаёти қайиғини фано ғарқобига чўктирдилар. Аммо ўзбекларнинг ғалаба изловчи аскарлари сон жиҳатидан хуросонликлардан кўп бўлгани, шунингдек, мавжли денгиз каби орқадан фавж-фавж, тўп-тўп ёрдамга келиб тургани сабабли шоҳзодалар қўшини етарлича қаршилик кўрсатишдан ожиз бўлиб, йўналиш жиловини қочиш водийси сари бурдилар ва ҳар тойифа тарқоқ ҳолда не қиларин билмай Хуросон шаҳар ва туманлари ён-теварагидан бири тарафга ошиқдилар.

Аммо ҳолу қол тили ҳамиша ушбу байт мазмунига: Набинад зи ман душмани бадгумон, Ба жўз руйи шамширу пушти камон – Ёмон ниятли душман мендан кўрмас, Қилич юзи-ю, камон орқасидан ўзгани; мос бўлган амир Зуннун кутурган шер каби гоҳ маймана қисмига, гоҳ эса майсара қисмига ташланар, қилич ва ханжар захмидан майдон тупроғини довюраклар қони билан кип-қизил қилиб, ўта жасурлик намунасини кўрсатарди. Ниҳоят ўзбеклар ён-атрофдан кириб, жанг майдони шахсуворини отдан қулатдилар ва хон олди-га олиб бормоқчи бўлиб, кўл ва бўйинини боғламоқчи бўлдилар. Бироқ амир Зуннун ожизлик сари бўйин эгмади ва шахид бўлгунига қадар қўлдан келгунча қаттиқ олишди.

Амир Шайх Али тағой эса уруша-уруша ёнидаги хуросонлик бир нечта тобе кишилари билан бирга тақдир сарпанжасига асир тушди.

Ўзбекларнинг казову қадардек қудратли қўшини қочган хуросонликларни то Тўққуз работ ҳудудигача

қувлаб бориб, баён бармоғи санок доирасига қиритишдан ожизлик қиладиган, икки тилли қалам эса сон-саногидан озгинасини ҳам ёзишга қодир бўлмаган даражадаги ўлжани қўлга қиритдилар. **Мисра:** Ожиз аст аз шархи он иншон қалам – Ожиздир шархидан қаламнинг иншоси; «Ишлар ҳақиқатини билгувчи ёлғиз Аллоҳдир.»

### **ХУРОСОН ҲОКИМЛАРИ ВА АСКАРЛАРИНИНГ ТАРҚАЛИБ КЕТГАНИ ҲАМДА МУҲАММАД ШАЙБОНИЙХОННИНГ ГАЛАБА НИШОНЛИ БАЙРОҚЛАРИ КАҲДИСТОН САЙҲОНЛИГИГА ЕТИШГАНИ БАЁНИ БОРАСИДАГИ ГАПЛАР**

Буюк ва қудратли Ҳақ улуглиги инояти билан Амир Алишер работи ва Марал манзили орасидан фатху зафар шабадаси Муҳаммад Шайбонийхон байроғи сари эсгач, Султон Бадиуззамон Мирзо ва Музаффар Ҳусайн Кўрагон ўзларининг қўплаб амир ва лашқар аҳли билан бирга «бу қочиш сизларга фойда бермас<sup>122</sup>» қаримаси талабига амал қилиб, ҳар ким бир тарафга қочиб кетишди. Саййид Абдуллоҳ Мирзо амирлардан бир тўдаси билан бирга муқаддас Машҳадга бориб, Кепак Мирзога қўшилди. Абдулбоқий Мирзо ва амир Муҳаммад Бурундук барлос Сабзавор худудида Ибн Ҳусайн Мирзога қўшилдилар. Султон Бадиуззамон Мирзо эса до-руссалтана Ҳирот четига ошиқиб, ўша окшом Боғи Навда манзил тутди ва бир лаҳзагина мудраб, **мисра:** Сахар чун хусрави ховар алам бар қухсорон зад – Сахарда шарк хусрави тоғлик устига байроқ тиккач;

<sup>122</sup> Қуръони қарим, Азҳоб (33) сураси, 16-оятдан.

Қандаҳор ва Заминдовар худудига йўналди. Музаффар Хусайн Мирзо тун қаърида Ҳиротга кириб, шаҳар боги сари юрди ва шайхулислом мавлоно Сайфиддин Аҳмад ат-Тафтазоний ва амир Ғиёсиддин Муҳаммад ибн амир Жалолиддин Юсуф ар-Розий ва кози Ихтиёриддин Ҳасанни чакириб, Ҳиротни мудосфаа қилиш борасида улардан ёрдам сўради. Улар эса «шаҳарни саклашга лашкар билан эришилади, ёлғиз бизнинг уринишимиздан фойда чикмайди» дея жавоб бердилар. Музаффар Хусайн Мирзо «бу шаҳарга менинг ёнимдаги уч нафар навкардан бошқа бирон-бир аскар келиб кирмади» деди. Улуғлар «ундай бўлса, қандай қилиб ўзбек кўшинига қарши урушиб бўлади?» дейишди. Шунга кўра олий шонли шохзода юз минг дарду алам ичида мулку молу онаси билан видолашган кўйи тонг отгач, хос кишилари ва мулозимларидан бир нечтаси билан бирга Ферузобод дарвозасидан ташқарига отилиб чикди ва Туршиз йўлидан йўналиш юзини Астробод томонга қаратди.

Эртасига 913 йил муҳаррам ойининг саккизинчиси<sup>123</sup>да жума куни тонг маҳали саййидлар, козилар ва Ҳиротнинг улуғ ва аъёнлари Шайхулислом мадрасасида йиғилиб, юз берган воқеа борасида машварат қуръасини ўртага ташладилар. Катта-ю кичикнинг кўнгли Муҳаммад Шайбонийхонга итоат этиш ва бўйсунуш тариқаси сулуқига қарор топиб, ушбу сатрлар муаллифига бу қарорни ёритувчи бир хатни каламга олишни буюрдилар, сўнг ул мактубни шаҳар мухтасибни мавлоно Усмоннинг уқасининг ўгли орқали ўзбеклар олдига юбордилар. Мавлонозода йўлга ту-

<sup>123</sup> 913 йил 8 муҳаррам – 1507 йил 20 май.



шиб, Хиёбон кўчаси бошида талончиларга йўликди ва туғувчилар барча нарсасидан айиргач, пиёда ва кип-яланғоч ҳолда Тўккуз работ яқинида Муҳаммад Темур Султон олдига етиб, бўлиб ўтган воқеаларни айтиб берди. Муҳаммад Темур Султон уни отаси Шайбонийхон олдига жўнатди. Муҳаммад Шайбонийхон эса ҳиротликлар хати мазмунидан огоҳ бўлгач, ўша кун сўнгида Каҳдистон текислигини иқбол давлатининг чодирни устунлари тикланган жойга айлангирди ва кўнглини Хуросон мамлақати салтанатини олиш ишларидан тинчитиб, улуғлик ва мақсади ҳосиллик байроғини кўтарди.

## **ҲИРОТ УЛУҒЛАРИ ВА ШАРИФ КИШИЛАРИНИНГ ҲАЙРАТ ВА ПАРИШОНЛИҚДА ҚОЛГАНДАН СЎНГ МУҲАММАДХОН ШАЙБОНИЙ ҲУЗУРИГА ЕТИШҒАНИ ЗИКРИ**

Ҳиротнинг барча аҳолиси Муҳаммадхон Шайбоний қаҳру ғазабидан кўркиб, шаҳар дарвозаларини қувонч ва шодлик сингари ўз юзлари сари беркитиб, чексиз ғам ва андуҳ гирдобида ўтирган ҳамда ўзбекининг қиёмат аломатли лашкари эса ул фоҳира шаҳар ташқарисидаги маҳаллаларда қудрат туғини қилпиратган ва ғорату торожга берилиб кетганлари ўша жума кунинда ғоятда қизиқ бир воқеа-ҳодиса рўй бериб, Мовароуннаҳр кўшинидан бир бўлагининг қатлга етиши юзага чиқди. Бу ҳодисанинг тафсили шуким, хожа Муизиддин Ҳусайн Шабонқора ва хожа Шамсиддин Муҳаммад мунший ҳамда жаннатмақон ҳокон хонадони мулозимларидан Маралдаги уруш

майдонидан қочиб кутулган кўйи келиб, кечаси Ҳирот шаҳри ташқарисидаги боғларда ухлаб ётган бир гуруҳ кишилар ўша куннинг чошттоҳида қочиб кетишни хаёл қилиб, ўзларининг халос бўлиши борасида бир ҳийла ўйлаб топадилар. Шу режа асосида курол-аслаҳа таққан ва темир совут кийган ҳолда елдек учар отларга минган кўйи «ҳо-ҳой, давлат Кепак Мирзо давлати» дея бақириб-чақирришар ва кимга дуч келишса «ҳозиргина Муҳаммад Муҳсин Мирзо катта қўшин билан етиб келди ва урушиш ниятида ўзбеклар подшоҳи томон кетди» дейишарди. Ҳиротнинг бу хабарни эшитган рияд ва чапани кишилари шу заҳоти камондан отилиб чикувчи ўқ сингари шаҳар дарвозаларидан ташқари сари ёпирилдилар ва шаҳар қалъаси четидаги маҳаллаларда ўлжа излаш билан машғул ўзбек аскарларидан уч юзгача кишини чопиб ўлдирдилар. Бирок, кўп ўтмай, Кепак Мирзо келгани ҳақидаги хабарнинг ғирт ёлғонлиги маълум бўлиб, ўзбек аскарларининг ўлдирилгани жиҳатидан катта-ю кичик хиротликлар юрагига ҳадик ва кўрқув тушган кўйи халойиқ ҳайрат денгизига чўмиб, ғам ва андуҳ қарвони ёш ва қари қалби майдонига ўз оғир юқларини туширди. Сай-йид, қози, уламо, хуллас, шаҳарнинг барча фуқаро ва бутун аҳолиси ўша кечани каттиқ алам ва мунг ичида ўтказиб, ҳайрат ва фикр қаърида саргардон кезган кўйи ҳар дам ўзлари нажоти борасида ўйлаб чиқдилар. Эртасига шанба куни тонгида ул жаҳонгирлик йўли солиқининг ўрдусидан мавлоно Биноийнинг укаси Ҳиротга келиб, хоннинг салтанат ошиён даргоҳи муншийлари шайхулислом ва қози Ихтиёриддин Ҳасан номига ёзилган нишонини келтирди. Бу хатнинг мазму-

ни куйидагича эди: – Нусрат аломатли байрок Бодғис худудига етишгач, Бадиуззамон Мирзо юрт олувчи сипох савлатидан хайиккан кўйи кочиб кетди, амир Зуннун *арғун* ўлдирилиб, Шайх Али *тағой* тақдир кўлига асир тушди. Биз эсақ Кахдистон сайхонлигида давлатнинг олий чодирини тикиб, химмати баландлик туйғусини Хуросон ўлкасининг барча аҳолиси осойишталигини тиклашга қаратганмиз. Шунинг учун ушбу нишон етгач, дадилланиб ва кўнгилларни тинчитиб, олампаҳо дарғоҳга келишингиз лозим. Аслзода ва улуғлардан қай бирини маъқул кўрсалар, ўзлари билан бирга олиб келсинлар.

Ҳирот улуғлари фармон мазмунидан воқиф бўлгач, нишонни келтирган қосидни инъом ва эҳсонлар билан хурсанд ва шод этиб, ўша заҳоти шайхулислом ва кишилар аълосининг мажид авлоди бошлиғи амир Камолиддин Атоуллоҳ ал-Хусайний ва амир Абдулқодир, амир Гиёсиддин Муҳаммад бин амир Юсуф, саййид Садриддин Юнус, қози Ихтиёриддин Ҳасан, қози Садриддин Абдулҳай сохиби айёр Кахдистон ўлангига йўналдилар. Ғалаба аломатли лашкаргоҳга яқинлашгач, Муҳаммадхон Шайбонийнинг даргоҳида садрлик мансабида турган, балки чексиз ихтиёрга эга бўлган мавлоно Низомиддин Абдурахим Туркистоний ва девоннинг ашроф ишига мушарраф бўлган хожа Камолиддин Махмуд Соғаржий таъзими вожиб ул зотларни кутиб олдилар ва чодирлардан бирига тушуриб, подшоҳни бундан огоҳ этдилар. Муҳаммадхон Шайбоний «олдин ҳиротликлардан ундирилажак моли омоний – омонлик моли ва соврину тортиқлар миқдорини келишиб олиб, сўнг улуғлар ва шариф кишиларни

аъло ашраф йиғинга киритинлар» дея буйрук берди. Мавлоно Абдурахим Туркистоний ва Хожа Камолиддин Махмуд Соғаржий бу борада келганлар билан анча баҳсу мунозара қилгач, тарафлар куйидаги қарорга келишди: шаҳарнинг барча оддий фуқароси ва майда хунармандлари ўша вақтларда ҳар тангачаси олти кепаккий ўрнида юриб турган бир мисқоллик тангачадан юз минг тангача миқдоридagi маблағни ўлпон ўрнида тўлашади, улуғ мансабдор ва қатта ер эгалари ҳаммаси бўлиб йигирма минг тангачани хонга хос тортик ўрнида тақдим этиб, ун беш минг тангача вазир мавлоно Абдурахим Туркистоний учун ундирилади.

Шундан сўнг Муҳаммадхон Шайбоний салтанат ва жаҳонбонлик боргоҳини Муҳаммад Темур Султон, Убайдуллоҳ султон, Ҳамза султон, Маҳди Султон сингари иззатли султонлар ва Жон Вафо мирзо каби ҳурматли амирлар иштироки билан безаб, келган улуғлар ва шариф кишиларни шу кўрунишхонага чорлади. Бу жамоадан кўпи ҳадик ва кўркув ичида осмон ўпар чодирга киргач, султонлар ва амирлар улар таъзими учун ўридан кўзгалдилар. Хон ҳамманинг ўтиришига руҳсат берди-ю ўша лаҳзадаёқ яна шаҳарга қайтишларига ишора қилди. Жон Вафо мирзо Ҳирот шаҳрининг ҳукумат ва доруғалиги мансаби билан сийланиб, ифтихор ва сарафрозлик топган кўйи келган улуғлар билан бирга шаҳарга қараб кетди. Бошқа ишларни битказиш учун мавлоно Абдурахим Туркистоний ҳам ўша томонга отланди. Шаҳарга кирилгач, Жон Вафо мирзо амир Ғиёс фарзандлари уйига тушди, мавлоно Абдурахим эса қалъанинг Хуш дарвозаси тепасидаги уйларга қўш ташлади.





## УЛУҒ ВАЗИРЛАРНИНГ ФОХИРА ҲИРОТ ШАҲРИГА КИРГАНИ БАЁНИ ВА РҶЙ БЕРГАН ПУЛ УНДИРИШ ВОҚЕАСИ ВА АҲВОЛ ҚИЙИНЧИЛИГИДАН БИР БЎЛАГИНИНГ ЗИКРИ

Сабаблар сабабчисининг раво кўрган тақдирига биноан давлат ва иқбол Муҳаммад Шайбонийхоннинг орзу ва умиди уфқидан порлаб чиққач ва Хуросон шаҳарларининг доимо олий султонлар ўтирадиган пойтахти бўлган ва ҳозир ҳам шундай мақомда турувчи Ҳиротни эгаллагач, ҳикмат яқули «мулк кишиларсиз, кишилар эса мол-мулксиз бўлмас» каломини ўз назарининг мақсади қилиб, барча ҳимматини кўздан яширин мол ва ашёларни топиш ва улуғлар қабул қилган ўлпон мажбуриятининг бажарилиши сари қаратди. Хожа Камолиддин Маҳмуд Соғаржий ва «Хожа хўрд» лақаби билан танилган хожа Абулвафо ундирувчилар ва лашкар ахлининг бир гуруҳи билан 913 йил муҳаррам ойининг ўн биринчиси<sup>124</sup>да доруссалтана Ҳиротга кирдилар ва барча солиқ молини хатта тушириб, айтилган маблағни ҳам аёвсиз бир йўсинда улуғлар ва аҳолидан талаб қилган кўйи бир ҳафта ичида барчасини ундириб олдилар. Раҳматлик ҳокони мансурнинг покиза хотинлари ва мукаррам қизлари ҳамда Бадлуззамон Мирзо ва Музаффар Ҳусайн Кўрагоннинг ахлу аёлига қарашли сиртдаги ашё ва буюм ҳамда бойликларини бутунлай тортиб олиб, ул жамоани қутлуғ ўрдуга жўнатдилар. Улар хон мулокоти иззати шарафини топгач, жаннатмакон ҳокони мансурнинг сингисининг кизи ва Музаффар Ҳусайн Кўрагоннинг никоҳида бўлган маҳд улё Хонзода хоним бинта Аҳмадхон Шай-

<sup>124</sup> 913 йил 11 муҳаррам – 1507 йил 23 май.



бонийхоннинг назарига ёкиб қолиб, хон бу гўзал аёлнинг шаръий равишда висолига етмоқ чорасини ахтара бошлади. Шунда хоним «Музаффар Хусайн Мирзо бундан икки йил олдин мени талок қилган эди» деган иддаони аён қилди. Диёнат ахлидан бир тўдаси хонимнинг муддаси асосида гувоҳлик беришди ва шу тарика у ойдн шарият қондаси бўйича хон аёллари каторидан жой олди. Музаффар Хусайн Мирзонинг кизи бўлмиш ва мазкур улё хонимдан туғилган Меҳрангиз бегимни Убайдуллоҳ Султон ўз никоҳига киритди. Муҳаммадхон Шайбоний хаё пардасининг қолган бошқа хижланишинларини қайтариб яна шаҳарга юборди ва уларнинг яшириб қўйган пуллари ва қимматбаҳо буюмларини тортиб олиш учун ундирувчилар тайинлади. Натижада обдор лаълу жавохир ва шохвор дурлару румоний ёкут ва бадахшоний лаъллар ҳамда бошқа ялтироқ гавҳару тиллову олтин буюмлар ундириб олиндики, уларнинг ўндан бири ҳам ҳеч бир подшоҳ хаёл хазинасига сиғмайди. Шунингдек ул олий шаънли хонадон давлати устунлари ва амирлар молидан ҳам нақд пул ва кўп нафис газмоллар қўлга кирди. Ўзбекнинг қиёмат аломатли қўшини Хуросон бойлари ва мутаваллий-бошлиқларидан ҳар бирини бир баҳона билан ушлаб, азоб ва қийноққа солдилар ва қўлларидан келганча улардан нарса ундирдилар. «Аниқки, подшоҳлар қачон бирон кишлокка (бостириб) кирсалар, уни вайрон этурлар, аҳолисининг обрў-этиборлиларини эса хор-зор қилурлар. Уларнинг қилмиш-одатлари шудир»<sup>125</sup> ояти мазмуни жуда етук

---

<sup>125</sup> Қуръони карим, Намл (27) сураси, 34-оят.

кўринишда юзага чиқди ва мансаб ва мартаба ахлдан кўпчилиги ҳақорат ва хору зорлик оёғи остида эзилиб, катта-ю кичикнинг нола ва додлари сайёр фалак авжидан ҳам ошди. Ор-номус ҳарамининг нозанинлари раҳм-шафқатсиз ўзбеклар кўлига тутқун тушиб, азоб ва уқубат аро қолдилар ва ифбат ҳижласининг Зуҳра манглайларини Баҳром савлат мўғуллар отлари орқасидан ҳар тарафга судраган кўйи ул гўзаллар кўчаву бозорларда саргардон бўлиб, бир нафас тинмасдилар.

### Нам:

Алам зад оташи зулм андар он бум,  
Жаҳон торик шуд аз охи мазлум.  
Бар омад нолаву шиван зи мардум,  
Набуд он қавмо аслан тараххум.

### Мазмуни:

Байроқ тикди зулм оташи ул диёрда,  
Жаҳон коронгу бўлди мазлум оҳидан.  
Халқдан чиқди нолаву оху фарёд саси,  
Йўк эрди ул қавмга сира раҳму шафқат.

Ниҳоят хожа Қамолиддин Маҳмуд [Соғаржий]нинг ҳаракати билан бу шиддат олови таскин топиб, тинчлик ва омонлик нурлари инсон тойифасининг турмуши юзи сари таралди. Ва 913 йил муҳаррам ойининг ўн беши<sup>126</sup>да жума кунини доруссалтана Ҳиротнинг жоме масжидида хутбани Абулхайрхон ва Муҳаммадхон Шайбоний номига ўқидилар ва Шайбонийхон буюрга-

<sup>126</sup> 913 йил 15 муҳаррам – 1507 йил 27 май.

ни бўйича хоннинг лақабини «имоми замон ва халифат Ур-рахман» шаклида тилга олдилар. Ул жаҳон олувчи хон олий ҳиммати тақозосича «собиқ тангаларга ярим донак<sup>127</sup> кўшсинлар ва тангалар кутлуғ ном билан безаниши шарофатидан ҳар бирини олти динор кепакий<sup>128</sup> ўрнида билсинлар, эски бир мисколлик тангачаларни эса беш динор ўрнида қабул қилсинлар» деган фармон бўлди.

Шу воқеалар бўлиб турган вақтда Хуросон султонлари ва ҳокимлари хизматида турган ва ўзбекларнинг боскин-чопқинидан хавфсираб, Ҳирот яқинидаги тоғларда бекинган кўйи қаттиқ қўрққанларидан бир лаҳза ҳам хавотирсиз ва тинч ўтира олмаётган вазирлар ва тоғлик тожик халқидан баъзилари олий даргоҳга хатлар юбориб, омонлик тиладилар. Ул жамоатни чақириб олиш борасида фармон чиқиб, барчалари хон палосини ўпиш шарафига етдилар ва улардан куни тарбият ва ғамхўрлик назарига манзур бўлиб, муносиб мансабларга эришдилар. Шулар жумласидан хожа Муизиддин Ҳусайн Шабонқора ва мавлоно Ҳожи Муҳаммад Қаҳстоний вазирлик мансабига ўтгирдилар, Ҳожа Шамсиддин Муҳаммад мунший ва мавлоно Жалолиддин Қосим Хондамир ер ва кўчмас мулк ишлари девони бўлди. Саййид Ғиёсиддин Муҳаммад боғбоннинг иззатли ўғилларидан амир Жалолиддин Маҳмуд салтанат бўсағаси хизматини ихтиёр этди, амир Султон Маҳмуд эса юзини шаҳар доруғаси бўлган Жон Вафо мирзонинг юмушларини бажариш сари қаратди.

<sup>127</sup> Донак (данаг, данг) – 3, 15 граммлик кумуш (дирҳам) танга.

<sup>128</sup> Кепакий – мўгул хони Кебақхон давридаги тангалар ўлчовининг бирлик мезони.

## ИХТИЁРИДДИН ҚАЛЪАСИ ВА ТИРАТУ КЎРҒОНИНИНГ ЭҒАЛЛАНИШИ ЗИКРИ

Ўтган хикоялар замирида аниқ бўлганидек, Султон Бадиуззамон Мирзо Ихтиёриддин қалъаси кутволлигини амир Сорбон Жунайднинг ўғли амир Ошиқ Муҳаммад Кўкалтошга топширган эди. Маралга йўналган пайти ўз мухтарам ҳарами бўлмиш Мирзо Улуғбек бин Мирзо Султон Абусаид кизи Кобилӣ бегимни Андалиб номи билан танилган Рукия Оғо билан бирга ўша қалъада қўйиб кетди. Марал урушидан кутулиб қочиш имконини топган амир Ошиқ Муҳаммад *арғун*, Шайх Абдуллоҳ баковул ва қўшиндан яна айрим кишилар ҳам Ихтиёриддин қалъаси мустаҳкамлиги учун келиб ўша кўрғонга бекиндилар. Шунингдек, қилич ва қалам соҳиби хожа Жалолиддин Миракий ҳам мазкур қалъага борган эди. Маҳди улё Хадижа беги Оғо ҳам золим ўлпончилар шафқатсизлигидан қочиб Ихтиёриддин қалъасига беркинди. Бу бари жамоат Баҳром савлат ўзбеклар хайбатида жуда ҳам кўркканлари сабабли, шаҳар ишлари юкорида шарҳ қилганимиз даҳшатли даражага етишганига қарамай, бу кўрғонни сақлаш борасида ўзларидан бирор камчилик ўтишига йўл қўймасликка тиришдилар. Шу жиҳатдан Муҳаммадхон Шайбоний барча ҳиммат ва диққат-эътиборини ул кўрғонни фатх этиш учун йўналтириб, амир Ошиқ Муҳаммад Кўкалтош олдига уни қаршилиқ кўрсатиш оқибати даҳшатида кўрқитиш ва салтанат даргоҳи эгасининг марҳаматидан умидвор қилиб пастга тушириш мақсадида сўзга чечан элчилар юборди. Бирок эл-

чиларнинг борди-келдисидан ҳам натижа чикмагач, ҳамма бажариши шарт бўлган фармон чиқарилиб, унга кўра темир чангалли ер қазувчилар ертўла қазишга тушдилар. Уч-тўрт кун ана шундай ер қовлаш иши билан машғул бўлингач, шаҳар боғи томонидаги бурж-миноранинг таги коваклашиб, бир томонга оғанча қулаб тушиш сари майл билдирди. Бу оғиш мушоҳадасидан калъа ичидагиларнинг чидам ва сабру қарор устунлари ларзага келиб, хон ҳузурига бир қосид жўнатган кўйи ўз жонлари учун омонлик тиладилар. Хон буйруғига биноан мавлоно Абдурахим Туркистоний кўрғон дарвозаси олдига борди. Ҳар иккала Ошиқ Муҳаммад ва Шайх Абдуллоҳ, Хожа Жалолиддин Миракий пастга тушдилар. Мавлоно Абдурахим аҳду паймон қондаларини иймонни ўргага кўйиш билан мустаҳкамлаб, Шайбонийхон номидан «кўрғонни урушсиз топширсангизлар, ҳеч бир кимса жону молларингизга бирор нуксон етказмайди» дея оғилар ичди. Ноилож Ихтиёрдин калъаси сокинларидан баъзиси ўз ихтиёри, айримлари эса дилда ўкинч билан кўрғон ичидан чикдилар. Ҳар иккала Ошиқ Муҳаммад ва Шайх Абдуллоҳ ўлпон тўлайдиган бўлиб, ўз мол ва буюмларини пастга туширган кўйи омонлик тиладилар. Шундан сўнг Ошиқ Муҳаммад Кўкалтош Хуросонда қолди, Ошиқ Муҳаммад арғун ва Шайх Абдуллоҳ баковул эса Бадиуззамон Мирзо ҳузурига юзландилар. Хожа Жалолиддин Миракий бўлса ўзига қариндош хожа Камолиддин Маҳмуд Соғаржий воситасида бирор зиён-заҳмат етмай қутулди. Ифбат чодирининг юзи ёпикларидан Кобилий бегимни Қанбар Мирзо

Кўкалтош ўз никоҳига киритди. Андалибни Темур Султон ўз харамхонасига жўнатди. Ихтиёриддин кўргони кутволлиги Пахлавон Дарвиш Муҳаммадга тааллуқ топди. Жон Вафобий Мирзо *дўрмон* ҳам Хуш дарвозаси ташқарисидан шу қалъага кўчиб ўтиб жойлашди. Муҳаммадхон Шайбонийнинг ойдин кўнгли Ихтиёриддин қалъаси ишларидан тинчигач, хон энди бор химматини амир Зайниддин Али тасарруфида турган Тирату қалъаси фатҳ томон қаратди ва бу борада улуғ амирлар ва давлат устунлари билан маслаҳат қурыасини ўртага ташлади. Ул қалъа яратувчи эгамнинг ажойиботларидан бири бўлиб, уни жанг билан олиш ҳар нечук иқтидорли подшоҳлар кудрати доирасидан ҳам ташқари эди. Шу сабабли барча йиғилганлар бир овоздан «элчи ва мактублар билан амир Зайниддин Алини хизматга киритишга эришиш лозим» деган қарорни билдирдилар. Амир Зайниддин Али билан дўстлик ва мустаҳкам бирдамлик алоқаларига эга хожа Шамсиддин Муҳаммад мунший ул вазифани зиммасига олиб, йўналиш жоловини Тирату қалъаси томон тўғрилади ва манзилга етгач амир Зайниддин Али кўнглини кўп оғтилар ичиб ва аҳду паймон қондаларини тузиш билан инонтририб, олампаҳоқ даргоҳга келтирди ва жаноб амирлик паноҳи қалъа дарвозалари-ю захира омборлари қалтиларини салтанат тахти эгасига топшириб, ўзига тааллуқли шахсий молларини ҳам тортиқ йўсини билан келтириб берди ва шу тариқа бошқа ўлпон ёки бож олиш балоларидан омон қолди [381-6].

## ХУРОСОНДА РЎЙ БЕРГАН ВА МУАРРИХЛАР НАЗДИДА ТИЛГА ОЛИНИШИ ЛОЗИМ БЎЛГАН АЙРИМ ХОДИСАЛАР ЗИКРИ

[388 б.] Мулкларнинг мутлак моликининг – *шаъ-ни улугдир* – қудрат қўли «Аллоҳ мулкни хоҳлаган кишига беради<sup>129</sup>» бахтли либосини Муҳаммадхон Шайбонийнинг қобилият қоматига мослаб тиккач ва эҳтиёжсизлик шамоли билан ҳоқони мансурнинг олий зотли ўғиллари йўғини хирмонини тўзғитиб, улардан ҳар бирини битта мамлакатга элтиб ташлагач, Муҳаммадхон Шайбоний мулклар бағишловчи молики маннон шукри ва олқиши шартларини адо этмокка киришиб, амирлар ва қўшин бошлиқларидан ҳар бирини бирер муносиб мансаб билан сийлади. Олий маконли темурий шохзодаларга қарши уруш майдонида шижат ва жасурликнинг энг юксак намунасини кўрсатган ўғли Муҳаммад Темур Султон ва жияни Убайдуллоҳ Султонлар ҳақида эса турли-туман инъом ва эҳсонлар атосини амалга оширди.

Юқорида ёзганимиздек, Ҳирот ҳукумати ва доруғалиги мансаби Жон Вафо мирзога тааллуқ топди ва бул ўлканинг вазирлик ишлари Хўжа хўрд лақаби билан ҳам танилган Хожа Абулвафога берилди. Иқим чухра юзини Фушанж шаҳри доруғалиги сари қаратди. Хоннинг аммасининг ўғли бўлмиш саййид Ҳодихожа муқалдас Машҳадда бошчилик туғини юқори кўтарди. Сабзавор вилояти Замиш<sup>130</sup> Баҳодирга берилди ва

<sup>129</sup> Куръони карим, Бақара (3) сураси, 26-оятдан.

<sup>130</sup> Бу исм Муҳаммадёр ибн Араб Қатағаннинг «Мусаххар ал-билод» асарига «Барбиш» шаклида берилган.



Канбарбийнинг раислик туғи Марви Шохжаҳонда кайвон айвонидан ўтди. Мир Муҳаммад Солих Жомда, Ройбий Бохарзда фармонфармо бўлдилар. Эломон Туршизда ҳокимлик эшикларини ўз юзи сари очди. Балх ҳукумати ишлари ихтиёри Шайбонийхоннинг Захириддин Муҳаммад Бобур Мирзонинг эгачисидан туғилган ўғли Хуррамшоҳ Султоннинг қудрат қўлига кириб, қарорга кўра, Қанбарбий кўкалтош ўша шаҳарда бу шохзода хизматида турган кўйи мол-мулкишларини бутлайдиган бўлди. Самарқанд салтанатига Муҳаммад Темур султон тайинланди, Убайдуллоҳ Султон эса мактов хислатли марҳум отаси каби Бухорога ҳоким бўлди.

Хоннинг ойдин кўнгли бу сингари ишлардан тинчигач, Қандаҳорни эгалламоқни хаёл қилиб, оти тизгинини ўша тарафга тўғрилади. Ул шаҳар ҳудудига етишгач, амир Зуннун ўғиллари Шужобек ва Муҳаммад Муқим сўзамол элчиларни мўл-кўл тортиқлар билан салтанат ошиён даргоҳга юбориб, итбат ва бўйсунуш изҳорини қилдилар ҳамда хутба-ю тангани мақсади ҳосил хусрав номи билан беаъза ва хоннинг мулозимати шарафини топиш ваъдасини бердилар. Муҳаммадхон Шайбоний улардан рози бўлиб, Хуросон томонга қайтди.

Шу воқеалар асносида амир Муборизиддин Муҳаммад Валибек ўзини олий мартабали хон даргоҳига қаратди. Бу сўзнинг шарҳи шуким, Табас қалъаси ҳокони мансур замонида амир Муҳаммад Валибек тасарруфи остида бўлиб, ул мустаҳкам кўрғонда бу амирлик нишонли жаноб томонидан қўйилган нойибларидан бири амир Турди Бобо ҳокимлик қилиб ўтирарди. Муқаддас Машҳад атрофида Абулмуҳсин

Мирзо ва Кепак Мирзо шахидлик жомини ичиш-гач ва Мовароуннахр лашкари ҳамласидан Хуросон кўшини тор-мор этилгач, амир Муҳаммад Валибек қочиш жилловини Табас қалъаси томонга бурди. Аммо кўрғонга етишгач, кутилмаганда амир Турди Бобо унга бўйсуннишдан бош товлаб, хизматкорлик эшикларини очмади. Ноилож амир Муҳаммад Валибек умидсиз ва ҳайрон ҳолатда Хуросон томон юзланди ва Муҳаммадхон Шайбоний хизматига бориб, хон буйруғига биноан Мовароуннахр тарафга кўчиб кетди.

Айни ўша вақтларда амир Носириддин Умарбек ва амир Зайниддин Али ҳамда Хуросон амирларидан қолган-қутган бир нечтаси Мовароуннахр сафарига буйруқ олдилар ва уларнинг барчаси сихат-саломат ул вилоятга етиб, бир неча кун осойишта яшадилар.

Шунингдек ўша пайтда, урушда асир тушган амир Муҳаммад Бурундук барлос табиий ажал исканжасида оламдан ўтди. Амир Султон Али арғун эса Сейистондан қимматбаҳо совғаларни халойиқ паноҳли даргоҳга юбориб, итоат ва қуллик изҳорини қилди.

Оламни кезувчи офтоб тўхташ манзилларида туравериш чўзилганидан сиқилиб, йўналиш байроғини Мезон томон кўтарди ва куз рақиби боғу бўстонлар юзидан барг ва япроқларни сидириб, қип-яланғоч қилган кўйи Дай<sup>131</sup> сипоҳининг мукаддима қисми совуқлик аён этгач, Муҳаммадхон Шайбоний йўналиш юзини Мовароуннахр сари қаратиб, Хуросоннинг шариф ва улуг кишиларидан амир Гиёсиддин Муҳаммад ибн амир Юсуф, қози Садриддин Муҳаммад ал-имомий,

<sup>131</sup> Дай – эронликларнинг хижрий-шамсий тақвими бўйича унингч ой номи, йилнинг 22 декабрь – 20 мартга тўғри келади.

сайид Садриддин Юнус, кози Ихтиёриддин Ҳасанни ўзи билан бирга олиб кетди. Бу сафар чоғи ул жамоатга нисбатан инъом ва эҳсон йўлини тутиб, барчасининг кўнглини олишга ҳаракат қилди.

Ҳокони мансурнинг энг кичик ўғли ва Ибн Ҳусайн Мирзонинг она бир укаси Муҳаммад Қосим Мирзо мазкур уруш майдонидан қутулиб чиккач, Дурун ва Нисо шаҳарлари томонга қочиб Борган эди. Ўша кишда бу жасур шохзода кўшин тўплаб, муқаддас Машҳад устига юрди. Машҳад шаҳри ҳокими Сайид Ходихожа қаршилиқ қилишга кучи етмаслигидан давлат марказини бўш қолдириб, йўналиш туғини Марв томонга қараб кўтарди ва воқеани олий тахт пойига битиб юборди. Муҳаммадхон Шайбоний теурий шохзоданинг бундай журъатидан вокиф бўлгач, Убайдуллоҳ Султонни ул ҳодисанинг олдани олишга тайинлади. Убайдуллоҳ Султон хазратлари Бухоро кўшини билан Чаҳоржўй кечувидан ўтиб, Марв сари ошиқди ва Марвга етгач, у ердаги ҳоким Қанбарбий ва қочиб Марвга келган Сайид Ходихожани ўзига кўшиб, шошилинч қаноти билан юзини муқаддас Машҳадга қаратди. Ул табаррук манзилга етилгач, Қосим Мирзо шаҳар ичида кўчабанд ғов ва тўсиқларини ясаб, жанг ва уруш-савашни бошлади, аммо кўп ўтмай енгилди. Бир нечта ўзбек аскарлари шохзодага етиб олиб, кўлга туширишди ва нариги оламга равона қилишди. Келганлар муқаддас Разавия машҳади, яъни макбара сахнида зулм кўлини енгидан чиқариб, олий мақомли имом равзасидаги мужовир ва зиёратчилар йиғини хирмонини горат ва талон-торож елига совурдилар.

Ўша йили Захир ус-салтана Муҳаммад Бобур Мир-



зо Кобул ва Ғазниндан зафарга ёр кўшин билан ғалаба қолдириш байроқни Қандаҳор ва Заминдоварни эгаллаш учун кўтарди. Шужобек эса Муҳаммад Муқим билан бирга ҳазрат подшоҳга қарши олдинга чиқиб, ҳар икки томоннинг шижоаглилари ҳамла ели воситасида жанг майдони ўтини аланга олдирдилар. Анча олишув ва уруш-савашдан сўнг нусрат ва зафар шабадаси Бобурни байроқ парчами<sup>132</sup> томон эса қиришди. Шужобек енгилб, Муҳаммад Муқим билан бирга қочиб сари юзланди. Қандаҳор ва Заминдовар мамлақати тўлалигича ҳазрат Бобур подшоҳ тасарруфи остига кирди. Бобур Мирзо амир Зуннун аргуннинг кўп йиллар давомида йиккан хазина ва ганжиналарини қўлиб кўшиннинг амиру лашкарбошилари ўртасида тақсимлаб берди. Қандаҳор ҳукумати ихтиёр тизгинини эса ўзининг олий зотли укаси Султон Носир Мирзонинг қудрат қўлига тутқазиб, қайтиш жиловини орқага тўғрилади. Аммо бир неча ойдан кейин Шужобек ва Муҳаммад Муқим жасорат аломатли лашкар билан Қандаҳорга қайтиб келиб, мамлақатни Султон Носир Мирзодан тортиб олдилар. Нағижада шоҳзода Носир Мирзо Кобул сари чиқиб кетиб, амир Зуннуннинг ўғилларидан ҳар бири ўз вилоятлари ишларини саранжомлаш учун йўналдилар. Шундан сал ўтмай, Муҳаммад Муқим устига табиий ажалнинг талабкор хизматчиси етиб келиб, амирзода қаттиқ касалга дучор бўлди ва шунинг орқасида фаний оламдан мангулик жаҳонига кўчиб ўтди. **Мисра:** Онки поянда ва боқийст, Худо хоҳад буд – Устундек турғувчи ва мангу колғувчи фақат Худо булажак.

<sup>132</sup> *Байроқ парчами* – байроқ матоси.



**СУЛТОН БАДИУЗЗАМОН МИРЗО ВА МУЗАФФАР  
ХУСАЙН КЎРАГОННИНГ ЖУРЖОН ВИЛОЯТИГА  
КЕЛГАНИ ВА ЖАНОБ МУЗАФФАР ХУСАЙН  
КЎРАГОННИНГ САРВАРЛИК ТАХТИДАН МОЛИКИ  
МАННОНИНГ МАҒФИРАТИ ЁНИГА КЎЧИБ  
ЎТГАНИ ЗИКРИ**

Султон Бадиуззамон Мирзо ва Музаффар Хусайн Кўрагон Муҳаммадхон Шайбоний савлатидан кўрқиб доруссалтана Ҳиротни тарк этган ўша 913 йил муҳаррам ойининг саккизинчи<sup>133</sup>си жума куни тонгида улардан биттаси Боғи Нав, иккинчиси шаҳардан елдек учар отларга ўтириб, юзларини қочиш водийси томон қаратгач, Султон Бадиуззамон Мирзо Гармсир ва Қандаҳор вилоятида ҳоким бўлиб ўтирган Шужобекнинг ёрдамига суяниб ўша томонга йўналди. Қандаҳор худудига етишгач, Шужобекдан бевафоликнинг нохуш йўлини мушоҳада қилиб, йўналиш байроғини Нимруз мамлакати сари кўтарди ва амир Султон Али арғун олдига одам юбориб, мақсади ҳосиллик буржининг юлдузи Мирзо Муҳаммад Замонни тилатди. Амир Султон Али арғун ҳамма бажариши шарт фармон талабини бажо келтириб, шохзодани муносиб керак-яроқ билан олий ўрдуга кузатиб қолди. Сўнг Бадиуззамон Мирзо кўчма-кўч юриб Журжонга юзланди.

Муҳаммад Хусайн Мирзо ҳам Туршиз йўли орқали ўша томонга юрган эди. Шу сабабли Астробод дорулфатҳида яна бир бор икки бахт юлдузининг яқинлашуви рўй берди ва ул икки яхши юлдузли оғо-

<sup>133</sup> 913 йил 8 муҳаррам – 1507 йил 20 май.

инилар бир-бири билан кучоклашиб, бир-бирини бағрига босиб кўришдилар. Бир онадан туғишган акаси Муҳаммад Ҳусайн Мирзо вафот этгач, унинг ўрнига Астрободда ҳукумат байроғини кўтарган Фаридун Ҳусайн Мирзони эса Домғон вилоятини бошқариш учун юбордилар.

Ул мактов хислатли икки оға-инининг Астрободда кўним топгани ҳақидаги хабар доруссалтана Ҳиротга етгач, салтанат пардасининг хижланишинлари По-янда Султон бегим, Хадижа беги Оғо ва ҳокони мансур харам саройининг яна бир нечта хотин-халажлари шахар доруғаси Жон Вафо мирзодан рухсат олиб, юзларини Журжон<sup>134</sup>га каратдилар.

Темурий улусининг кўшин ахлидан қай бири Хуросон шахарларидан қайси бирида қолган бўлса, улар ҳам ўша тарафга кета бошладилар. Шу сабабли яна бир марта Султон Бадиуззамон Мирзо ва Музаффар Ҳусайн Кўрагон байроғи остида жасурлик аломатли кўшин йигилди.

Бир неча ой ўтгач эса Музаффар Ҳусайн Мирзо оғир касалга мубтало бўлди. Ҳозик табиблар ва аниқ билгувчи ҳакимлар ул касални Мирзо танидан аритиш ва ёпишган балони хайдаш учун қанчалик уринишмасин, шоҳзоданинг яхши сифатли зоти гавҳарида сихат-саломатлик сурати кўрирмай, заифлик кучайди. Сўнг баракатли руҳининг булбули жон қафасидан қудсий боғ гулшани сари парвозга киришди. Иқбол гулзорининг самара бағишловчи ниҳоли кулфатли оламнинг золимлик шамоли тўғони кучидан ер тубан кулади ва

---

<sup>134</sup> Журжон – Гургон, ҳозирги Гунбади Кобус шаҳри.

истиклол осмонининг куёшдек ялтирок юлдузи ша-  
раф ва камол буржи авжидан юзини гурбатхона тубига  
каратди.

**Назм:**

Зи бедоди сипеҳр ва жаври айём,  
Бимурд он хусрави неку саранжом.  
Ҳануз аз ғуссан он жавру бедод,  
Сияхлушанд аҳли Астробод.

*Мазмуни:*

Осмон зулмидан ва айём жавридан,  
Ўлди ул яхши ишли хусрав.  
Ҳалигача ул жавру зулм ғуссасидан,  
Қора кийимда мотам тутар Астробод аҳли.

Султон Бадиуззамон Мирзо ул олий зотли укаси  
фирокида эс-хушини кўлдан берган кўйи эғнига аза-  
дорлик либосини кийди. Маҳд улё Хадижа беги Оғо  
ул мактов сийратли ўғилни йўқотиш азоб-укубатидан  
сабр-токат ёқасини йиртиб, зор-зор йиғиси товушини  
зангори осмонга етказди.

**Назм:**

Ба нохун руй жесту муй бар канд,  
Зи афгон гулғула дар чарх афканд.  
Зи селоби саҳоби чашми хунбор,  
Заминро сохт чун дарёйи зуххор.

*Мазмуни:*

Тирнок-ла юз тимдади-ю соч юлди,  
Фигондан чархга гулғула солди.



Қонли кўз булути селобидан,  
Ерни қилди худди тошкин денгиз.

Ниҳоят барчалари қўлни чидам ва тоқатнинг мустаҳкам арқони сари чўзиб, шоҳзодани ювиш ва қасфлаш билан бўлдилар ҳамда ойдин оятлар хатми ва таомлар тортиш ва садакалар бериш билан шариф ружини шод қилдилар.

Бу маросимлар адо этилгач, Султон Бадиуззамон Мирзо таъзия либосидан худди куёш тутилиш доирасидан чиққан каби юз кўрсатиб, Журжон салтанати ишларига киришди. Аммо ғафлаг зўридан, олдинги дастурдагидек, яна айшу ишратга берилиб, най наво-си ва арғанун садосини ўзгарувчан фалакка ўрлатиб ўтирар экан, хали Астрободга келганига тўлик бир йил бўлмайд туриб, Муҳаммадхон Шайбонийнинг таъкиб ва қувиш йўсини билан Журжон вилоятига ҳам келаётгани хабарини эшитди.

## **МУҲАММАДХОН ШАЙБОНИЙНИНГ ТУРОН ВИЛОЯТИДАН ЭРОН МАМЛАКАТИ УСТИГА ИҚСКИНЧИ МАРТА ЮРИШ УЮШТИРГАНИ БАЁНИ**

Султони рабиъ чун дигар бор,  
Зад хийма ба тарафи дашту кухсор.  
Аз сабзаву гул сепах аён кард,  
Оҳанги ҳарими бустон кард.  
Аз сарви саҳи алам бар афрохт,  
Аз ғурриши раъд суран андохт.  
Аз ханжари обдори савсан,  
Бигирифт тамоми сахни гулшан.





### *Мазмуни:*

Баҳор султони яна бир бор,  
Тиккач чодир дашту тоғ тарафга.  
Майса-ю гулдан кўшин ясади,  
Боғ-бўстон сари кадам ташлади.  
Адл комат сарвдан байрок кўтарди,  
Момоқалдирок гулдиракидан сурон солди.  
Савсаннинг сувли ханжаридан,  
Гулшан сахнини тутди бутунлай.

Юрт олишлик тариқининг солики Абулфатҳ Муҳаммадхон Шайбоний денгиз тошқинли ва момоқалдирок гулдиракли кўшин билан наштар санчувчи қуёш сингари ва темир совут кийган аждаҳо каби Амуя дарёсидан сузиб ўтиб, ўта ҳашамат ва мақсади ҳосиллик билан Хуросон шаҳарлари устига юрган кўйи Журжон вилоятини эгаллаш учун йўналди. Султон Бадиуззамон Мирзо душман яқинлашиб келаётганидан хабар топгач ва Журжон кўшини кучи билан ул юрт олувчи хонга қарши тўкнаш ва уруш майдонига кириб бўлмаслигини англагач, шоҳликнинг қаъба мартаба даргоҳи эҳромини боғлаб, оти жиловини Озарбайжон томонга бурди ва Мирзо Муҳаммад Замонни эса Домгон қалъасида амакиси Фаридун Хусайн Мирзо ёнида қолдирди-да, йўлларни босиб ўтишда тезликни яна ҳам оширди. Бу хабар сафавийлар шоҳининг салтанати тахти пойининг мулозимлари арзига етишиб, шоҳнинг ҳамма бажариши шарт фармонига биноан Байрамбек Қарамоний Мирзо Бадиуззамонни кутиб олди. Олий мартабали ҳазрат шоҳ салтанат ва давлат тахтида ўтириб, жаҳонпаноҳ боргоҳ ён-атрофини муаззам амирлар ва

хурматга сазовор нўёнлар вужуди билан безаган куниси Байрамбек Султон Бадиуззамон Мирзони ашрафи аъло мажлисга олиб кирди ва Мирзо кутлуғ қўлни ўтиш шарафига мушарраф бўлиб, муносиб бир ўринда ўтирди ва сўнг турли-туман сийлов ва илғифотга эришиб, инъом ва икромга кўмилган ҳолда оламpanох даргоҳдан ташқари чиқиб, истикомат қилиши учун тайинланган манзилга бориб кўш ташлади.

Муҳаммадхон Шайбоний эса Мирзо Бадиуззамоннинг Озарбайжон томонга кетгани ва Журжон майдонининг бўш қолганидан хабар топгач, ул вилоят бошқарувини неча йиллаб ҳокони мансур ва Музаффар Хусайн Кўрагон хизматида умр ўтказган, аммо Марал воқеаси куни Шайбонийхонга кўшилган амир Хожа Аҳмад қўнқиротга берди ва ҳиммат арқонини Домғон шаҳрини эгаллаш кунгураси устига отиш учун бел боғлаб, Домғон шаҳри кўрғони атрофига етгандан кейин эса, Мовароуннаҳрнинг Баҳром қаҳрли черики камал ва уруш ишини бошлаб юборди. Фаридун Хусайн Мирзо ва Муҳаммад Замон Мирзо мулозимлари ҳам юзларини душманга қарши мудофаа ва хамла жанги майдонига қаратдилар. Бир неча кундан сўнг шохзодалар ўз аҳволлари саҳифасида ожизлик ва тушкунлик аломатини кўриб, сўз билгич ва доно элчиларни Муҳаммадхон Шайбонийнинг ҳузурига юбордилар ва эҳтиёж изҳорини қилиб, омонлик тиладилар. Жаҳон олувчи хон уларнинг элчи ва қосидларини турли-туман инъом ва эҳсонлар билан сийлаб, аҳду паймонни ўртага солганча «Домғон қалъасидан ташқари чиқсалар ҳамда уруш ва исённи тарк этсалар, жон ва танларига ҳеч бир нуқсон етказмайман, аксинча, ул

икки соҳибии саодат шоҳзодани чексиз лутфларимга сазовор қиламан» деган ваъдаларни берди. Шундан сўнг Фаридун Ҳусайн Мирзо ва Муҳаммад Замон Мирзо шаҳар дарвозаларини ланг очиб, Муҳаммадхон Шайбонийнинг даргоҳига ошиқдилар ва шафқат назари билан эъозлашиб, иноят ва риоятга эришдилар. Бир неча кундан кейин Муҳаммад Замон Мирзо Озарбайжонга кетиш учун руҳсат олди, Фаридун Ҳусайн Мирзо эса ижозатсиз хон ўрдусидан ажралиб чиқиб, Атрек дарёси бўйи тарафга ва Яқ туркманлари ичига йўналди.

Журжон мамлакати ва унга қарашли музофотлар Муҳаммадхон Шайбонийга насиб этгач, унинг кишвар очувчи байроғи кўтарилиб, Бастом ва Домгон вилоятидан то Туркистоннинг чекка шаҳар ва туманларигача шу хоннинг тасарруфи остига кирди.

Хон ёзда Родгон сайхонлигида чодир ва ўтовни қуббасини қуёш ва ойгача етказиб, яйлоқ гаштини сураб, қишда эса Мовароуннаҳрга кетиб, гоҳи козок лашкарини тор-мор келтириш, айрим вақтларда Дашти қипчоқдаги уруғ-қабилалар устига боскин-чопкин уюштирар эди.

915 йилнинг охири<sup>135</sup>да хон ўша пайтлари Дашти қипчоқнинг барча ҳокимларидан шижоат ва мардоналикда тенгсизлиги, уруғ-аймоқлари ва мол-мулки кўплиги билан устунлик ва истисноликка эга Қосим Султондан енгилди ва қочиш пайти Қанбар Мирзо хон кўшинининг кўпгина бошлиқлари билан бирга ўлдирилди.

Муҳаммадхон Шайбоний баҳор фаслида паришон-хол суратда Хуросонга қайтиб, Гармсир ва Заминдовар

<sup>135</sup> 915 йил охири – 1510 йил 27 март.

тоғликларида юрган ҳазора ва накудор қавмлари устига лашкар тортди. Икболи қуёши завол чегарасига етган экан, бу юришда ҳам бахти чопмай, ҳеч бир иш қила олмагач. 916 йилнинг шабон ойи ўрталари<sup>136</sup>да ўзбек аскарларидан кўпи от ва қурол-яроқларини фано елига совуриб, пиёда юрган кўйи доруссалтана Хиротга келдилар. Хон шу келишда бир неча кун Жаҳоноро боғида йўл азоби чарқокларини чиқаргач, ер юзи шоҳи Исмоил сафавийнинг қутлуғ туғлари Ироқ ва Озарбайжондан Хуросон томонга келаётгани хабарини эшитди. Ноилож ҳайрон ва кўнгли паришон ҳолда шошилишч қаноти билан Марви Шохжаҳонга қараб қочди ва ул вилоят худудида шохлик давлатининг қувват сарпанжаси ҳаёти ипини узди. Келажак воқеалар баёни асносида бу ҳикоят ҳолагининг тўла шарҳи ёзув сифатини топажак ва анбар тароватли қалам ҳаракатининг нури бу баён тафсили устига ёғилажак.

### **Рубоий:**

Тавфики илахий агарам бор шавад,  
Алгофи шаҳаншаҳий мададкор шавад.

Шарҳи суҳане ки гашт мужмал мазкур,  
Азрашҳаи килки ман намудор шавад.

### *Мазмуни:*

Илохий тавфик агар менга юз кўрсатса,  
Шаҳаншоҳлик лутфи мададкорим бўлса.  
Қисқача зикр этилган сўзнинг шарҳи,  
Қатамим томчисидан намоён бўлажак.

---

<sup>136</sup> 916 йил шабон ойи ўрталари – 1510 йил 18 ноябрь.

Энди эзгу ракамли қаламнинг ҳокони мансур Мирзо Султон Ҳусайннинг ўғиллари аҳволини баён доирасига киритиш вақти етди, шундан сўнг барча химмат ва ҳамма ҳаракатини бу жилднинг тўртинчи жузвини ёзишга сарфлайди.

## **МАҒФИРАТЛИ ҲОҚОНИ МАНСУР САЛТАНАТ ШАРАФИ АБУЛҒОЗИ СУЛТОН ҲУСАЙН МИРЗОНИНГ МАЖИД ЎГИЛЛАРИ АҲВОЛИ ЗИКРИ**

Қалам булути томчилари ва мақтов ракамли бармоқлар ҳаракати туфайли илгарироқ маълум бўлдики, ҳокони мансур йўналиш байроғини охираат олами сари кўтаргач, ўзидан етти нафар яхши юлдузли ўғил ёдгор қолдирганди. Шулардан Абулмуҳсин Мирзо, Муҳаммад Муҳсин Мирзо ва Муҳаммад Қосим Мирзо муқаддас Машҳадда шахидлик шарбатини татидилар.

Абулмуҳсин Мирзодан уч яшарлик Султон Муҳаммад Бойқаро отлиғ бир ўғил қолди ва ул шоҳзодани отаси воқеаси кунни мулозимлардан бир нечтаси Бовард ва Нисо томонга кочириб юбордилар. Афтидан бир неча йилдан сўнг яшаб турган ўша юртда табиий ажали билан жаҳондан ўтган.

Юқорида айтганимиздек, Абулмансур Музаффар Ҳусайн Кўрагон Астрободда ўлди ва унинг Меҳрангиз бекам исмли битта кизи бор эди. Муҳаммадхон Шайбоний Ҳиротни фатҳ қилган айёмда Меҳрангиз бекам Убайдуллоҳ Султоннинг никоҳига киритилди ва бирикки йил у билан яшаб, эр-хотин ўртасида ажралиш рўй бергач, бекам Хуросонга келди. Ҳозирги хижрий

929 йил<sup>137</sup>да ул мастура бирор эрнинг амру нахий<sup>138</sup>си остида бўлмаган ҳолда Ирок<sup>139</sup> шаҳарларидан бирида умр кечирмоқда.

Фаридун Хусайн Мирзо Домғон қалъасидан ташкари чиккач, Яка туркманлари орасига кетди. Муҳаммадхон Шайбоний Дашти кипчок қабилалари устига лашкар тортиб кетган ўша 915 йилнинг боши<sup>140</sup>да эса, у оз сонли кўшин тўшлаб, Хуросон шаҳар ва туманларини иликлаб, Калот қалъасини кўлга киритди. Марви Шоҳижаҳон ҳокими Қанбарбий бу хабарни эшитгач, ўзбек кўшинидан бир тўдаси билан Фаридун Хусайн Мирзо ўтирган Калот устига юрди. Шохзода ўз ёнидаги ёрдамчи ва тарафдор шаҳарликлар сони озлигидан қалъани мудофаа қилишга кучи етмай, Қанбарбий ғалабага эришди. Фаридун Хусайн Мирзо эса ўзбеклар кўлига тушди ва бақо кўч-кўлонини фано елига совурди.

Ибн Хусайн Мирзо бир неча йил шохликнинг мақсади ҳосил наввоби Исмоил сафавий давлати байроғи остида ғоят фароғатда яшади ва 919 йил<sup>141</sup>и Кошон шаҳрида туйқус ўлим сабабли юзини охират оламига қаратди.

Султон Бадиуззамон Мирзо уч-тўрт ой ер юзи шоҳи Исмоил сафавийнинг ўрдусида вақтини хуш ўтказгач, буйрукка биноан Рай мамлакатига бориб

<sup>137</sup> 929 йил – 1522 йил 20 ноябрь – 1523 йил 9 ноябрь.

<sup>138</sup> *Амру нахий* – руҳсат ёки таъқиқ; бу ерда бировнинг қўл ости (никоҳи)да бўлмаслик кўзда тутилмоқда.

<sup>139</sup> *Ирок (Ироқи ажсам)* – бу ерда Эроннинг Озарбайжон минтақаси кўзда тутилмоқда.

<sup>140</sup> 915 йил боши – 1509 йил 21 апрель.

<sup>141</sup> 919 йил – 1513 йил 9 март – 1514 йил 25 февраль.



яшай бошлади. Ўшанда Султон Боязид барлос ва Шайх Абуллоҳ баковулнинг зулмлари роса жонидан ўтгани сабабли Мирзо ул шаҳар доруғаси бўлмиш Пир Аҳмад варсокни ул икки азизни ўлдиришга ундади. Сўнг байроғи остида йиғилган озгина қўшин билан Астро-бод томонга йўналди. Журжон ҳокими Хожа Аҳмад қўнқирот уларга қарши уруш учун олдларига чиқиб, икки ўртада жуда қаттиқ бир жанг рўй берди. Бадиуззамон Мирзо олдидаги одамлар ичида энг суюқлиси ҳамда сурат ва сийрат яхшилити, таъб соғломлиги-ю зеҳн ўткирлиги билан ўзига ўхшаш хизматчи ва яқин кишилардан тўла устунликка эга бўлмиш Муҳаммад Қули ўша жангда шаҳидлик шарбатини ичди. Ниҳоят Бадиуззамон Мирзо лашкари енгилиб, ул олампаҳо султон эса хос кишиларидан бир тўпи билан жанг майдонидан қутулиб чиқди ва Ҳиндистон вилоятлари сари йўналиб. Ача ва Тахтага ошиқди. Ул мамлакат ҳокими онҳазратни кутиб олди ва иззат-икром расмларини адо этиб, ўз ҳолига яраша пешкаш ва совринлар юборди. Султон Бадиуззамон Мирзо бир йилдан зиёдрок Синд халқи орасида яшаб, кейин яна бир бор шоҳликнинг олампаҳо даргоҳи эгаси Шоҳ Исмоил хизматининг эҳромини боғлади ва 919 йил<sup>142</sup>да Хуросонда малойик ошиёнли даргоҳга етишиб, шоҳнинг илтифот кўзи назарига илинди ва олам кезар ўрду билан бирга Озарбайжонга кетди. У ерга етиб боргач, мулозимат ишидан истеъфо сўради ва шоҳ ул ҳазратнинг илтимосини ижобат иззати билан рўёбга чиқариб, Бадиуззамон Мирзонинг Шунбғозон мавзесида истиқомат қилиши

---

<sup>142</sup> 919 йил – 1513 йил 9 март – 1514 йил 25 февраль.

ва Табриз мулки девонидан ҳар куни султоннинг тирикчилиги учун ёрдам пули ўрнида минг динор етказиб турилиши тайинланди. Рум подшоси Султон Салим молик ул-мулук ва вожиб ут-таъзим тақдири талабига биноан Табриз устига бостириб келиб, ул шаҳарни вақтинча эгаллаган 920 йилнинг ражаб ойи<sup>143</sup>да Мирзо Бадиуззамонга иззаг-икром кўрсатиб, ўзи билан бирга Истанбулга олиб кетди. Султон Бадиуззамон Мирзо ул мамлакатда уч-тўрт ой яшагач, вабо касалига чалинди ва «бирон жон каерда ўлишини ҳам била олмас»<sup>144</sup> ояти каримаси мазмуни ул икбол осмони куёши васфи холига мос келди. Тақдир этилган умри вақти тугаб битгач «эй тинчиган жон, қайт»<sup>145</sup> қақиригини лаббайка сўзи билан эшитиб, минг бир хасрат билан оламдан ўтди.

### **Рубоий:**

Абдал набувад давлати дунё жовид,  
Зинҳор вафо мадор аз даҳри умид.  
Анвори камолат расад охир ба завол,  
Ҳар чанд бар авжи мулк боши хуршид.

### *Мазмуни:*

Мангу бўлмас дунё давлати абад,  
Умид оламидан ҳеч вафо кутма.  
Камолинг нури аҳийри етар заволга,  
Мулк авжида куёш бўлсанг-да.

---

<sup>143</sup> 920 йил ражаб ойи – 1514 йил 22 август – 20 сентябрь.

<sup>144</sup> Куръони карим, Лукмон (31) сураси, 34-оятдан.

<sup>145</sup> Куръони карим, Фажр (89) сураси, 27-28-оятдан.



**Яна:**

Хуршиди ҳаёт кай бувад поянда,  
Доим набувад нури бақо тобанда.  
Чи шах, чи гадо, чи хожаву чи банда,  
Бошад ҳамаро пейки ажал оянда.

*Мазмуни:*

Ҳаёт қуёши қачон барқарор турибди,  
Бақо нури ҳамиша ҳам ялтираб турмас.  
Шоҳми, гадоми, хўжайинми ё қулми,  
Барчасига ажал жарчиси келар келажакда.

«Аллоҳдан бошқа барча нарса ҳалок бўлғуси ва Аллоҳга қайтувчидир»<sup>146</sup>.

Султон Бадигуззамон Мирзо бу ўткинчи оламдан этак силкитиб кетгач, ундан бир ўғил ёдгор қолди ва бу ўғил қатта шонли султон Мирзо Муҳаммад Замон бўлиб, у ўша Домғон қалъасидан ташқари чиқиб, Шайбонийхоннинг муруввати орақасида шоҳ Исмоилнинг олампадох даргоҳига ошиққан замондан буён 920 йилга қадар ўша жаннатнинг Сидра дарахти мартабали шоҳлик бўсағаси хизматида яшадди ва кундан-кун яна ҳам кўпроқ илтифот ва иноятга эришиб, аммо мазкур санада шоҳнинг қуллук келажакли истиқлол байроқлари Табриздан чиқиб, Султон Салим бостириб келаятган томон кўзгалган вақтда, Муҳаммад Замон Мирзо бир тўда бузғунчи одамлар иғвосига учиб, бу юришдан бўйин товлади ва юзини Астробод сари қаратди. Ҳазоржариб худудига етгач эса, ул вилоят ҳокими амир Камолиддин Хусайн олдига чо-

<sup>146</sup> Қуръони карим, Қасас (28) сураси, 88-оятдан.

пар юборди ва уни итоату бўйсунушга чақирди. Амир Хусайн ота-боболари ҳаққида теуурийлар хонадони султонлари кўрсатиб келган яхшиликлар ҳурмати юзасидан махдумзода<sup>147</sup>нинг бу фармонини бажариб, минг нафар отлик билан хизмат сари ошиқди ва тортиклар ўтқариб, олий мавқаб мулозиматида оти жиловини Журжон томонга бурди. Бу хабар ўз акаси Халафбек томонидан Астробод ҳокими этиб қўйилган Пирғайб Бектош қулоғига етишгач, кўржиб қочиб кетди. Ноилож Журжоннинг ашроф ва аъён шохзодани кутиб олиб, ниёз ва нисор шартларини бажо келтирдилар. Мирзо Муҳаммад Замон мақсади ҳосил ва бахтиёр ҳолда Астрободга кириб, ул шаҳарнинг калонтарларини турли лутф ва эҳсонлар билан сийлади. Жумладан жаноб султоний сайф ул-аномий хожа Музаффар битикчи<sup>148</sup>нинг энг катта акаси хожа Гиёсиддин Али битикчига девон ишлари мансабини иноят қилди ва ул жанобнинг яхтли юлдузли ўғли Ибн Яминбекни парвоначи қилди. Ул шаҳар доруғалиги ишларининг ихтиёр жиловини Оқо Мир Кафшгарнинг қўлига тутқазди. Сўнг итоат ва

---

<sup>147</sup> Махдумзода (аслида: махзумзода) – Ҳондамир ўз хўжайини Бад-гузмон Мирзонинг ўгли бўлгани учун Муҳаммад Замон Мирзони шундай атаган. Махзум – хўжайин.

<sup>148</sup> Хожа Музаффар битикчи – илгарироқ Шайбонийхон хизматида вазир бўлган бу саййид шох Исмонд Хуросонга бостириб келган 1510 йил қузида хали ўзбеклар хони халок бўлмасдан бурун шох хизматига киради ва кўп йиллар Хуросон ва Мозандарон ўлкасининг божу хирожини ундирувчи молия вазир сифатида фаолият кўрсатади. Афтидан, Хуросондаги бош вазир Ҳабибуллоҳ Соважий қулида ишлаган Музаффар битикчи ҳам Ҳондамирга моддий ёрдамлар берган. Муаллиф шу сабабли бу саййидни “султонлик кишиси ва “жаннат қилич остидадир” ҳикматига ишора тарзда “кишилар қиличи” сифати билан тилга олган.

бўйсунуш даъватини етказиш учун *Сойинхон улуси*<sup>149</sup> ва *Каро[йит]* эли катталари олдига элчилар жўнатди. Ул халк ҳам игоат ва фармонбардорлик тариқини ихтиёр этиб, бу улус ва элнинг бир гуруҳ амирлари мулозиматга ошиқдилар ва лойик пешкашлар тортик килиб, июнат ва илтифот топдилар. Шу каби Журжоннинг дярлик барча таниқли ва оддий кишилари ул шахриёрлик буржининг дуру гавҳарига хизмат этиш занжирини ўз бўйинларига ташладилар. Бирок жаноб султоний сайф ил-аномий хожа Музаффар битикчининг яна бир акаси хожа Низомиддин Махмуд ва унинг азиз ўғли амир Муҳаммад Музаффар мустаҳкам кўрғонларни беркитиб ўтириб, итсат йўлини танламадилар.

Хуллас, Муҳаммад Замон Мирзо бор-йўғи шу фатх билан ўзини мустақил подшоҳ тасаввур қилиб, юзини айшу ишрат ва ўйин-кулгу палосини ёйиш сари қаратди ва икки-уч ой давомида ҳар тонг унинг ишрат дастгоҳли саройида аччик шароб жоми худди офтоб соғари фалқ базмида айлангани каби давра бўйлаб кезар эди. Ул хўжаста фаржом шохзода ҳар окшом гуландом соғийлардан узлуксиз қадаҳ талаб қилиб, коса тагида бир томчи қолдирмай сипкорарди.

Бу воқеалар бўлиб ўтаётган маҳалда жаноб султоний сайф ил-аномий Музаффар битикчи Хуросондан шоҳ олдида Озарбайжонга кетиб бораркан Калидар манзилида Муҳаммад Замон Мирзонинг Астрободни босиб олганини эшитди ва ўша ердан Исфаройин томонга ошиқиб, ул шаҳар ҳокими бўлмиш Барун сул-

---

<sup>149</sup> Сойинхон («бахтли хон», Ботухоннинг лақаби) улуси – ҳозирги Туркменистоннинг Туркманбоши мавзесидан то Эроннинг Астробод шаҳригача бўлган Каспий бўйи худудида яшовчи халқлар ўша вақтда шундай аталган.

тонни ўзига кўшиб олди. Юкадинбек ҳам оркадан етиб келди. Булар ўз йўлида давом этиб, аммо Султон Салимнинг Табриз устига бостириб келгани сабабига кўра халқ орасида ҳар хил миш-мишлар кўпайганидан, жаноб султоний сайф ул-аномий Музаффар битикчи ва бошқа амирлар секин-аста юриб кетмоқда эдилар. Хўршор кишлогига етишгач. Қаро Увайс кўрчи шохнинг олампазоҳ даргоҳидан келиб, ашрафи аъло зотининг соғ-саломат экани, Султон Салимнинг эса оркага қайтиб келгани хабарини келтирди ва шохнинг жаноб сайф ул-аномий Музаффар битикчининг атокли номига ёзилган «Журжон мулкани Мирзо Муҳаммад Замон кўлидан қайтириб олиш» борасидаги ҳуҷум фармонини кўрсатди. Шунга кўра амирлар хурсанду шод бўлишиб, камбағалларга садака ва назрлар беришга тушдилар. Сўнг Астробод сари юришга отланиб, йўналиш тўғларини Бастом томонга кўтардилар. Йўл асносида Бастом доруғасининг чопари келиб, хожа Мир Кафшгарнинг кесилган бошини келтирди. Бу воқеанинг тафсиلى шуким, хожа Мир Кафшгар Мирзо Муҳаммад Замон фармонига кўра Журжон кўшинидан бир тўдаси билан Бастом устига боскин-чопкин учун келган бўлиб, ул вилоят кишлокларидан бир нечасига доруғалик қилиб ўтирган Муҳаммад Оқо бир нечта жасур адамлар билан биргаликда улар йўлини тўсиб чиқади ва ҳамла ели билан уруш оловини аланга олдириб, шохлик давлати қуввати шарофатидан хожа Мир Кафшгар шу жангда улдирилади. Муҳаммад Оқо Мир эса унинг бошини жаноб султоний Музаффар битикчи ва амирлар олдига юборади ва бу ишни яхшиликка йўйиб, Астробод довони оғзига қирадилар.

Хожа Мирнинг ўлдирилгани хабари унинг укаси Оқо Мир кулоғига етишгач, ўта изтироб ва аламли ҳолда Муҳаммад Замон Мирзо олдига бориб, бўлиб ўтган воқеани арзга етказди ва шоҳзоданинг сайф ил-аномий Хожа Музаффар битикчининг акаси Хожа Гиёсиддин Али ва унинг ўғли Ибни Яминбекни талатиб, ўзларини ҳибсга олишга қайради. Амир Хусайн Ҳазоржарибий ҳам сабабга мадад бўлиб, ул икки олий шаънли хожани мусодара ва маҳбус қилдилар, сўнг уруш куни шаҳидлик шарбатини ичирдилар.

Алқисса, Муҳаммад Замон Мирзо Хуросон амирлари яқинлашиб келгач, амир Хусайн Ҳазоржарибий ҳамда *Соғинхон улуси* ва *Каро[йит]* эли сардорлари билан бирга Астрободдан ташқари чикди. Шу аснода хожа Низомиддин Маҳмуд, амир Муҳаммад Музаффар ён-атрофдаги тобе аҳоли ҳамда Мирзо Али Фандараский икки юз киши ва саййид Фаҳриддин Каюсарий ва Султон Қабул ўғли *Соғинхон улусидан* бир гуруҳ кишилар билан Султон жанобларига кўшилдилар ва жума куни намозгар чоғи 920 йил рамазон ойининг ўн бешинчиси<sup>150</sup>да Астрободгача тахминан саккиз фарсах масофа ердаги Оқ Машҳад ҳудудида тарафларнинг тўкнаши рўй берди. Ҳар икки кўшиннинг манқилой қисми бир-бири устига ташланиб, ҳар икки тарафдан икки-уч киши ўлдирилди. Жаҳонни кезувчи қуёш ботиши сабабля зулмат ниқоби инсоний кўриш кучи олдини тўсгани учун ҳар иккала томон ҳам ўз лашкаргоҳига қайтиб келиб, ул тунни ўткардилар. Шанба куни тонгида тагин жанг сафларини тузатиб, ҳимматни бир-

<sup>150</sup> 920 йил 15 рамазон – 1514 йил 5 ноябрь.

бирини фоний қилиб, йўқлик оламига жўнатиш сари қаратдилар. Ямоний қиличлар<sup>141</sup> паҳлавонлик маслағи солиқлар кўлида бош кесишни бошлади ва Хаттий найзалар<sup>152</sup> фано хатини кекса-ю ёшнинг умри саҳифасига битиб, гили бурролик шартини бажо келтирди. Ўлим аломатли ўқ товуши ажал паёмини катта-ю кичикнинг хуш кўлига етказди. Қон оқизувчи шамшир жанг майдони кенглигини лоззорнинг рашк ва ғайирлиги келадиган жойга айлантирди. Ниҳоят, шохлик давлатининг қудратидан, балки илохий лутф ва иноят туфайли фатху зафар келини жаноб сайф ул-аномий кўзи ўнгида намоён булди, Муҳаммад Замон Мирзонинг иши эса қайғули яқун топиб, қудратли маликнинг тақдир кўли унинг йиғини палосини йиғиштирди. Амир Хусайн Хазоржарибий ўз ватанига қочиб кетиб, Муҳаммад Замон Мирзо Сойинхон халқи орасига кетди. Жаноб сайф ул-аномий ўзининг Музаффар исмига мос равишда музаффар ва мансур Астробод сари ошиқиб, ўша ерда бир неча кун йўл азоби чарчокларини ёзди. Олий зотли динпаноҳ шох фармонида биноан Астробод шаҳрига ҳоким этиб тайинланган Ғавс Султон Нишобурдан Журжонга келди ва жаноб сайф ул-аномий билан бирга Муҳаммад Замон Мирзони йўқотиш қасдига бел боғлади. Тонг пайти шохзода амирлар яқинлашиб келганидан хабар топиб, у ердан Карозли манзиллари сари ошиқди. Бир-икки ой мазкур халқ орасида юраркан, ўша аснода илғари Султон Бадруззамон Мирзо-

<sup>141</sup> *Ямоний қиличлар* – Яман ўлкаси пулатидан ишланган қиличлар сифатига қийёслов.

<sup>152</sup> *Хаттий* – Арабистондаги Хатт ўлкасида ишланган найзалар сифатига қийёслов.

нинг амирлари каторида турган амир Ўрдушоҳ бин амир Султон Муҳаммад бин Ўрдушоҳнинг Хуросонда бош кўтариб чиққани ва Фаржистоннинг тоғлик ерларини эгаллаганини эшитди. Шунингдек, «Хуросон ва Журжон амирлари бажарилиши шарт фармонга биноан ўша томонга кетишибди» деган хабар ҳам тарқалди. Шу бўйича, Мирзо Муҳаммад Замон Обиварднинг чўл-сахро йўлидан Фаржистон томонга йўналди ва ул чексиз масофани озгина вақтда босиб ўтиб, мазкур вилоят таркибига кирувчи Ўлум тепалигига етишгач, ўша вақтда Кухизоғда сокин турган Ўрдушоҳ махдумзоданинг мавқабини ихлос ва ниёз қадами билан кутиб олди ва салтанат асбобидан нимага саховат қўли етса, ўшани тортиқ қилди.

Ўша вақтлари, агар сабабини ёзсак, анча чўзилиб кетадиган сабаблардан бири рўй бериб, ушбу саҳифалар қораловчиси Фаржистон вилояти кишлоқларидан бири бўлмиш ва Кухизоғга уланувчи Пашт кишлоғида ватан тугган бўлиб, Мирзо Муҳаммад Замон келганидан хабар топгач, хокони мансур ва Султон Бадиуззамон Мирзодан кўрган яхшилик ва иноятлари ҳаққи хурмати такозосича ўзини бир зарра мисол ул офтоб аломатли назарга етказишга қарор қилди. Файзли палос юзини ўпиш шарафига мушарраф бўлгач, унинг давлат ва умри дуосини адо этдим. Ул ҳазрат ҳам бу маврусий бандасига кўп лутф ва марҳаматлар кўргузиб, шундай деди: – Ота-бобомизга содик хизмат қилиб келганингиз каби бундан буёғига бизга ҳам шундай хизмат қилмоғингиз керак ва ҳар қандай ҳолатда ҳам биздан ажраш ва ташлаб кетиш фикрини раво кўрмаслигингиз лозим.



Ушбу сатрлар муаллифи канчалик ўринли узрларга ёпишмасин ва хизмат машаққатини бўйнига олишдан истеъфо изламасин, фойдаси бўлмади. Махдумзода от ва олтин инъом қилиб, амир Ўрдушоҳ эса бошка сафар анжомини саранжомлаб берди.

Амир Ўрдушоҳ Муҳаммад Замон Мирзо келиши билан катта ёрдамни қўлга киритгач, ўша пайтлари Хурсон волийси бўлиб ўтирган жаноб ҳукумат паноҳли Зайналхонга қарши чиқиш шиорини изҳор қилиб, Хиротруд ва Шоклонга қарашли бир нечта қасаба ва қишлоқларни боскин-чоғқин қилиб талади. Сўнг Хирот қавмлари ва *нақудар* қабилалари устига қўшин тортиб, қуп йилки ва қуй улжа олди. У ердан Ғурга бориб, ул тоғликнинг ҳокимлари амир Дарвиш ва амир Фахриддиндан, дўқ-пўписа-ю яхши-ёмон гапларни ўртага солиб, тез юрар отлар ва юк ташувчи туялар ҳамда нафис буюмлар олди ва ул сафардан Фарилун тоғли махдумзода узангисига ўта қувваг ва шавкат билан қайтди. Мирзо бир неча кун Чақчаронда истикомат қўчини тўшади.

Ўша аснода Балхда Шоҳ Исмоил номидан ҳукумат ёргизиб ўтирган ҳазрат мамлакатпаноҳ Дев Султоннинг ул шаҳарни Муҳаммад Баҳорлуга топшириб, ўзи эса олампаноҳ шоҳ даргоҳига кетгани хабари тарқалди. Шунга кўра, Муҳаммад Замон Мирзо ва амир Ўрдушоҳ бошига Балхни қўлга киритиш хаёли тушиб, 921 йил рамазон ойи<sup>153</sup>да Чақчарондан чексиз сонли қўшин билан Сон ва Чахоряк сари йўлга тушдилар. Мазкур ойнинг охирларида Бод қишлоғига етишиб, шу мавзуда Фитр ҳайитининг қоида ва расмларини адо этишга

<sup>153</sup> 921 йил рамазон ойи – 1515 йил 9 октябрь – 7 ноябрь.





киришдилар. У ердан эса мазкур вилоят худудига кириб, кишлов учун жойлашдилар. Ўша кишда Дарасуф мулки ҳокими Абдулали ва Балхоб ҳокимининг укаси Нажмиддин маҳдумзоданинг салтанатмаоб даргоҳига келиб, лойик тортиқлар ўткардилар. Балх ҳокимлигига карашли ён-атроф аймақлари батамом итоат арконини бўйнига солиб, султоннинг олий ўрдусига кўшилдилар. Киш фасли ниҳоясига етиб, кўкариш қуввати майса ва райҳонлар кўшинини дала-дашт ва боғ-бўстонлар устига тортгач ва тонгги шабада ғунча қалъасини очиш учун болта ўкталган ва гул султони зумрад тахт устида манзил тутиб, ҳаво мўътадиллиги учун буйрук берган чоғда Муҳаммад Замон Мирзо ва амир Ўрдушоҳ Балх шахрини эгаллаш юришига қарор қилиб, Даражазни фатҳ аломатли байроқ маркази қилдилар ва ул вилоятнинг айрим қалонтарлари Муҳаммад Баҳорлудан юз ўтириб ва олий ўрдуга келиб, дуо айтиб ва ҳамду сано ўқиган кўйи хизмат ишига киришдилар.

Шу аснода Балх ҳукумати девони вазири ва қалъанинг Шоҳ Хусайн буржи ишлари зиммасида бўлган Хожа Жалолиддин Миракий Муҳаммад Баҳорлудан ҳадиксираб, маҳдумзода олдига чопар юборди ва у орқали «агар фалон кечаси олий мавқаб қалъа хандаки четига келса, камина шаҳарни осон эгаллашингиз учун Шоҳ Хусайн буржини олий мақом султонга топшираман» дея айттирди. Шунга биноан Муҳаммад Замон Мирзо ва амир Ўрдушоҳ келишилган ўша 922 йил рабиулаввал ойининг олтинчиси<sup>154</sup>да чоршанба кечаси Балх қалъаси ёнига бордилар. Ваҳолонки,

<sup>154</sup> 922 йил 6 рабиулаввал – 1516 йил 11 апрель.

ўтган куннинг намозгар пайти амир Муҳаммад Баҳорлу мазкур махфий келишувдан хабар топиб, Хожа Миракий ва унинг якин одамларини тутмоқчи бўлганида, Хожа Миракий ўз ўғиллари ва мулозимлари билан бирга мазкур бурждан ўзларини ташлаб кочишга улгурган кўйи ўрду тарафга юргандилар. Кискаси, ул жамоат Балх ташқарисида олий мавкабга кўшилиб, бўлиб ўтган воқеани гапириб бердилар, Муҳаммад Замон Мирзо эса ноилож камал ва ҳужум ишларини бошлади.

Камал давом этиб, даладаги ҳосил пишиб, уни ўриб ва йиғиб олиш вақти етган даврда, шаҳар ичида қолган катта ер эгалари ва шаҳарга якин кишлоклар калонтарлари «энди лашкар ахли ғалла далаларимизда отларини ўтлатишади» деган гумонда амир Муҳаммад Баҳорлуга қарши равишда яна бир вазирлик мансабидаги хожа Носириддин Ҳайдар Али қарчақ билан тил бириктирдилар ва Муҳаммад Замон Мирзо ва амир Ўрдушоҳ кальанинг Уккоша дарвозаси яқинидаги Милкат Оғо иморатига ҳамла уюштириб, кўшинни олдинга юборган рабиулохир ойининг учинчиси<sup>155</sup> да шанба кун мазкур дарвозани очдилар ва махдумзода Ўрдушоҳга жилвдош ҳолда Балхга кириб, амир Муҳаммад Баҳорлу эса арқда беркинди ва мазкур ойнинг бешинчиси<sup>156</sup> да чаҳоршанба кун аҳду паймон билан ташқари чиқди ва пешкаш ўтқариб, мулозим бўлди.

Шу фатҳ воқеаси вақти Шибирғон ҳокими амир Жон Муҳаммад кулунжок ул вилоятнинг арбоб ва калонтарлари билан бирга махдумзоданинг икбол ошиёنли даргоҳига ошиқиб, Шибирғон қалъаси қалитла-

<sup>155</sup> 922 йил 3 рабиулохир – 1516 йил 6 май.

<sup>156</sup> 922 йил 5 рабиулохир – 1516 йил 8 май.

рини олий мақомли мавкаб эгаси кўлига топширдилар ва муносиб пешкашлар тортиқ қилиб, олий даргоҳнинг бошқа бандалари қаторидан жой олдилар.

Муҳаммад Замон Мирзо ва амир Ўрдушоҳ икки ярим ой мобайнида Балхда туриб, деҳқонларнинг бор маҳсулот ва ғаллалари шаҳар ичига киргунча халқ билан чиройли ҳамкорликни амалга оширдилар. Сўнг амир Ўрдушоҳ қуббатилислом Балх ҳукумати тизгинини ўз уқаси Қавомбекнинг кифоятли кафтига тутқазди, Шибирғон вилоятини эса дарубаст йўсини билан ўз жияни Аминбекка иноят қилиб, Сон ва Чаҳоряк доруғалигини ҳам унга берди. Бироқ бу иш маҳдумзоданинг мунаввар кўнглига оғир ботди. Чунки ул ҳазратнинг муддаосига кўра Балх олий девонга тааллуқ топиши лозим эди, Шибирғон эса хос амирлардан бирига берилиши керак эди.

Алқисса, амир Ўрдушоҳ Балх ва Шибирғон истехкомидан хотиржам бўлгач, Мирзо Муҳаммад Замонни ўзига нисбатан кўнглини совутган ҳолда Балхдан эргаштириб чиқди ва Макруми худудида юрган *тулкичи* халқи ичига ошиқди ва ул жамоатдан кўп миқдорда от ва кўй олиб, уларнинг калонтарларини ёнига солиб, Яккаўланг халқи устига босқин-чопқин уюштирди ва у ердаги айрим аҳолини ғорат қилиб, оти жilовини Сон ва Чаҳоряк тарафга бурди ва ул вилоят молини хатлаб, Фаржистон томонга юзланди. Бу ҳолатлар асносида ул амир жанобларидан яна бошқа бир нечта ишлар юз бериб, маҳдумзоданинг кўнгли оғриши ортишига сабаб бўлди. Ахийри ўзича «имкони топилганда ўзимга иттифоқдош жасур кишилардан бир нечтаси билан бирга бундан ажраб чиқаман» деган қарорга

келди. Чахоржак кишлоғида амир Ўрдушоҳ мавлоно Мақбулнинг Астроб мавзеси калонтари ва жуда бой киши бўлиш отаси вафот этганини эшитиб, конидаги тамагирлик кучи жўшди ва ўзининг ўттиз-қирк хослар билан ҳол-аҳвол сўрагани кетди. Муҳаммад Замон Мирзо фурсатни ғанимат билиб, Жадий<sup>157</sup>нинг биринчи кунига тўғри келувчи мазкур йил зулкаъда ойининг ўн тўртинчиси<sup>158</sup>да чоштгоҳ маҳали хосларидан ўттиз киши билан шикор баҳонасида ўрдудан отланиб, Қазам ва Сорбоғ томонга кетди. Хуфтон намози чоғи амир Ўрдушоҳ Астробдан қайтиб келиб, Мирзо Муҳаммад Замоннинг айрилиб чиқиб кетганидан хабар топгач, бағоят ғамгин ва хафа бўлди. Кетини узмай, махдумзода олдига элчи ва хатлар юбориб, бундан кейин иноят йўлидан кадам босажаги, ҳеч бир камчеликсиз Мирзога хизмат қилажагини айтиб, келиб қўшилишини ўтиниб илтимос қилди. Аммо унинг бу илтимослари мақбул бўлмади, балки кимни элчиликка юборса, улар ҳам амир хузурига қайтиб келишмади. Сардорлар ва лашкар аҳли ҳам ҳар кечаси тўп-тўп ҳолда Ўрдушоҳнинг умид ўрдусидан кочиб, Муҳаммад Замон Мирзо даргоҳига борар эдилар. Шу зайл галаба аломагли байроқ остида катта бир жамоат йиғилди, Мирзо эса амир Ўрдушоҳни йўқотувчи бўлиб, Қазам ва Сорбоғдан йўналиш жиловини Сон ва Чахоржак тарафга бурди. Даражаз мавзесига етгач, Кароёғочда турган амир Ўрдушоҳ ул ҳазратнинг юриш билан келаётганидан хабар топди ва изтироб-

<sup>157</sup> Жадий — хижрий шамсийнинг ўнинчи ойи номи, декабрь – январь оралиғига туғри келади.

<sup>158</sup> 922 йил 14 зулкаъда – 1516 йил 10 декабрь.

га тушган кўйи Курбон хайити куни уғруқ, яъни оила ва бола-чакасини Фаржистон томонга жўнатди. Сўнг ўзи ҳам эртаси тонгда ўша ёкка кетишга қарор қилди. Аммо ўша окшомиси ёнидаги Гончи мўғули амирларининг ҳаммаси ва *Али донишмандий* эли кочиб, Муҳаммад Замон Мирзонинг истикболи сари кетдилар. Амир Ўрдушоҳ офтоб Жаддий буржининг охирида бўлган Курбон хайитининг иккинчи тонги ва булут кўзи ғамзадалар каби сон-саноксиз ёш томчиларини тўкаётган маҳал Қароёғочдан кўчиб, йўлга тушди. Амир Али *жалойир* ва Дўст Калкад ҳам ундан ажралиб, юзни маҳдумзода давлати сари қаратдилар. Амир Ўрдушоҳ Окмасжиддан ўтиб, шу манзил билан Жазравон ўртасида восита бўлмиш тоғ сўкмоғига кирди. Тўсатдан Муҳаммад Замон Мирзо юборган илғор амирлари амир Муҳаммад Жаъфар барлос, амир Жаъфар Али карокўз, Ҳаронкули, Шох Ҳусайн Ёракий мирохур, Шох Мазид кўкалтош, Махмуд эшикоғоси орқадан етиб келдилар ва амир Ўрдушоҳ давлатининг устунларидан Шох Муҳаммад Бирка ҳам улар билан иттифокдош бўлиб, қилич сармаган кўйи Ўрдушоҳ томон отилдилар. У эса Ҳайдар тархон ва Юсуф тархон каби ўз яқинларидан етти киши билан бирга Шибирғон тарафга кочиб қолди. Ёнидаги бошқа лашкар ва уруғ-аймоқ аҳли мол ва буюмлари билан бирга Муҳаммад Замон Мирзонинг амирлари кўлига тушдилар.

Муҳаммад Замон Мирзо ўша куннинг намозгарида мазкур тоғ дарасига етиб бориб, кечаси шу ерда тўхтади. Эртасига эса Окмасжидга қайтиб, мавкаб одамлари ва кўшин хизматчиларини ўз лутфу иноятидан умидвор қилган кўйи амир Ўрдушоҳ ва унга тобе-

лар молидан канчаси кўлга тушган бўлса, ҳаммасини амирлар ва лашкар аҳлига тақсимлаб бериб, ғалабага ёр байроқни Сон ва Чаҳоряк сари хилпиратди.

Қароғоч манзилида амир Ўрдушоҳнинг Шибирғондан туғри Балхга қараб кетгани хабари келди. Махдумзода амирлар билан кенгашиб, Ўрдушоҳ билан ярашишга қарор қилди ва шу иш бўйича ушбу варақлар қораловчиси, яъни каминага шошилинич тарзда куббатилислом Балхга бориш ва икки томон ўртасида кўтарилган келишмовчилик чангу ғубори ярашиш ва сулҳ суви билан бостирилиши учун бир бало қилиб амир Ўрдушоҳни ул ҳазратнинг ота-боболарига тааллуқли бўлиб келган Балх мамлакатини олий мақомли даргоҳ эгаси<sup>159</sup> гасарруфига топшириб, асл юрти бўлмиш Ғаржистонга кетишга кўндиришимни буюрди ва бу борада амир Ўрдушоҳ ва укаси Кавомбек ҳамда Балхнинг улуг ва шариф кишилари номига нишонлар каламга олиниб, бу камина буйруққа биноан ул шаҳарга ошиқди. Аммо борилгач, канчалик насихат қоришикли сўзлар ва чин дўстликни англаувчи гапларни амир Ўрдушоҳ қулоғига етказиб, жанжал мақомидан воз кечиш ва Балхни ташлаб Ғаржистонга кетишга ундаб, қаттиқ ҳаракатлар қилмайин, бирон натижа чикмади. Каминага қайтиш учун рухсат берган вақтда «агар махдумзода озгина киписи билан Балх қалъаси ташқарисига ташриф буюрса ва мен, укаларим, яқинларим жонига қасд қилмаслик ва қонларимизни тўкмасликка қасам ичиб, аҳду паймон қилсагина томонлар ўртасида сулҳ қондаси амалга ошиши мумкин, бўлмаса асло йўқ!»

<sup>159</sup> Муҳаммад Замон Мирзо бин Бадруззамон Мирзо кўзда тутилмоқда.

деди. Камина Балждан маънос ва тушкун бир ҳолатда қайтиб, Сон кишлоғида маҳдумзоданинг иқбол ошиёни даргоҳга етишдим ва нимани эшитган бўлсам, битта қолдирмай арзга етказдим. Муҳаммад Замон Мирзо эса «Балх атрофини ғалаба аломатли лашкар чодирлари тикиладиган жойга айлантирсам, ул шаҳар халқи ҳокони мансур хонадони кўрсатган адолат ва эҳсони юз хотири ва ҳаққи хурматини қилиб, шаҳар дарвозаларини очиб берадилар» деган ўйда Балх томон юрди ва бир ойча қамал қилиб ўтирди. Аммо ҳадеганда фатҳ эшиклари очилавермагач, амир Ўрдушоҳ олдига канчалик элчи ва хатлар юбориб, ваъда ва сўз бермак билан овора бўлмасин, булардан ҳам бирор фойда чикмади. Ўша аснода амир Ўрдушоҳ ўзининг хос хизматчилари қаторидан жой олган амир Муҳаммад Халилни Кобулга ҳазрат подшоҳ Захириддин Муҳаммад Бобур Мирзо ҳузурига юбориб, ул ҳазратнинг Балхга ташриф буюришини тилагани ва агар подшоҳ келса, қалъа ва шаҳар қалитларини унга топширажаги борасидаги гаплари аниқланди. Шу сабабли тез орада ул ҳазратнинг нусрат оятли байроғи моҳчаси етишиш нуруни бул ҳудуд узра сочажаги ҳам аён бўлиб, Муҳаммад Замон Мирзо Балх атрофидан кўзгалган кўйи Даражазга кетди. Ўша манзилда Мирзо Алибек, амир Муҳаммад Боқир бин амир Муҳаммад Бурундук барлос Бадахшон тарафдан Мирзо Муҳаммад Замон Мирзо ҳузурига келиб, давлатхоҳлик заъжирини елкасига ташладилар. Мирзо Алибек яраш палосини ёзишни ўз зиммасига олди ва Муҳаммад Замон Мирзодан ружсат ҳосил қилиб, битта ўзи Балхга кетди ва амир Ўрдушоҳ билан учрашиб, унга жўяли далиллар билан «икки томон учун энг тўғри иш келишув

қондаларини мустаҳкамлаб, карама-қаршилиқ иллатларини йўқотишда»лиги борасида таъкидлар қилди. Шундан сўнг «Мухаммад Замон Мирзо ва амир Ўрдушоҳ ўзларининг озгина кишиси билан Балхнинг икки фарсахлик ерида жойлашган Тахта қишлоғида учрашадилар ва аҳду паймон шартларини ўртага ташлаб, биргаликда жиловдош бўлган кўйи Балхга борадилар-да, агар маҳдумзода кўнгли амир Ўрдушоҳни Балхда қолдиришга мойил бўлса, Балхда қолдиради. йўқса рухсат бериб, Фаржистон тарафларга жўнатади» деган тўхтамакга келинди. Мирзо Алибек қайтиб келиб, яраш хабарини етказди. Шоҳзода Даражаздан Арбўз даҳанасига ошиқди. Амир Ўрдушоҳ томонидан эса Саййид Абдуллоҳ ва Ҳайдар тархонлар маҳдумзода ҳузурига келиб, ул ҳазрат ва амирлари-ю давлати устунларига «амир Ўрдушоҳ ҳаққида ёмон ниятлар қилмаслик»ка қасам ичирдилар. Бу тарафдан Мухаммад Замон Мирзо даргоҳининг хос кишилари каторидан жой олган Мухаммадқули девона Балхга борди ва амир Ўрдушоҳнинг кўнглига ишонч бағишлади. Ўрдушоҳ 923 йил рабиулаввал ойи<sup>160</sup>нинг бир чоршанба куниси тонгида барчаси эҳтиёткорликка риоя қилиш учун кийимлари остидан темир совутлар кийиб олган ўз хосларидан қирқ киши билан бирга Тахта қишлоғига келиб, Рустам баковулни келишилгани бўйича ул ҳазратнинг ҳам ўттиз-қирқ киши билан шу ерга келишини айттириш учун шоҳзода олдига жўнатди. Мухаммад Замон Мирзо ўзининг минг нафарга яқин бўлган барча амирлари ва кўшини билан бирга Арбўз даҳанасидан шу манзил ва Тахта қишлоғи орасини боғловчи сахрога отланиб, у ерда лашкарни

<sup>160</sup> 923 йил рабиулаввал ойи – 1517 йил 23 февраль – 23 март.



тўхташга буюрди ва олтмиш-етмиш нафар жасур кишии ҳамроҳлигида Ўрдушоҳ билан учрашиш учун кетди. Амирлар билан эса то Ўрдушоҳ хузуримга келгунга қадар шу мавзеда ўрнингиздан кимирламай турасизлар, учрашувга етиб келгач эса, тезликда у томон ҳаракатланасизлар, дея яширинча тарзда келишиб олди.

Махдумзода қишлоққа етиб боргач, амир Ўрдушоҳ ўжар гавсанидан ерга тушиб, уч бор тиз чўкди ва саховатли қабул шарафини топди. Сўнг «мен фармонни бажону дил ижро этувчи навкарлар жумласидан бўламан, шу сабабли даргоҳингиздан қувлаган вақтингизда бир бурчакка бориб ўтирдим, мана энди чақирган экансиз, тағин мулозиматга келдим» деган сўзларни тилидан жорий қилди. Махдумзода ҳам шунга яраша жавоб сўзларини айтиб, бир-бирига жиловдош бўлиб, отларига миндилар ва юзни шаҳар сари қаратдилар. Ўша пайтда Муҳаммад Замон Мирзонинг қолган қўшини ҳам келиб, олий мавқабга қўшилишди. Буни кўрган амир Ўрдушоҳ бундай кўпчиликдан қаттиқ кўркиб қолди ва тезда қочиб, махдумзодадан бурунрок шаҳарга кириб, қайтадан қаршилиқ йўлини тутиш ўйига тушди. Кўп ўтмай бу ўйлаган режаси ул ҳазратнинг амирлари назарида ойдинлашиб, тор ўтарлик жойга келган пайтлари амир Ўрдушоҳни тутиб, қатлга етказдилар. Ёнида келган қирқ кишидан айримлари ушланиб, бир қисми эса Балхга қочдилар ва бўлиб ўтган воқеани Қавомбекка сўзлаб бердилар. Қавомбек қалъанинг буржу борасини мустаҳкамлаб, кетма-кет равишда Кобулга элчилар юборди ва Муҳаммад Замон Мирзо даладаги ҳосилни отларига едириш имконини топмасдан

бурун олий зотли Бобур подшоҳнинг зафар кўринишли байроқлари жуда тезлик билан Балх томонга юришини сўраб, илтижо килди.

Махдумзода Балх худудида жойлашиб, шаҳарни бир ойча камалда тутганидан сўнг ҳазрат подшоҳ Бобур Мирзонинг Балхга келаётгани хабари тарқалди. Муҳаммад Замон Мирзо ночор Даражазга кетиб, оила-сига бориб кўшилди.

Ўша пайгда олий мартабали подшоҳ Бобур Мирзо даргоҳидан ҳукумат нишони бўйича шаҳар ва қалъа қалитлари Фақир Алибекка топширилиб, унинг олий ўрдуга кетгани ва яқинда олий зотли ҳазрат подшоҳнинг зафар қуринишли соябони ҳам етишиш соясини ул шаҳар устига ёяжаги хабари етиб келди. Шунга кўра Муҳаммад Замон Мирзо амир Муҳаммад Боқир барлосни итоат ва бўйсунуш ҳамда маврусий мулкни сўраш учун ҳазрат Заҳир ус-салтана вад-дин Бобур Мирзонинг салтанат ошиён даргоҳига юборди. Ўзи эса Сон ва Чаҳорьяк йўли билан Кароёғочга йўналди. Мирзо ул манзилга етгач, хонадонининг шон ва қадами улуғлиги билан Мовароуннаҳрнинг бошқа шарифларидан кўп устунликка эга Шоҳ Мир Ҳусайн ҳазрат подшоҳ Бобур Мирзо олдидан амир Муҳаммад Боқир барлосга кўшилиб, осмон асосли даргоҳга етишди ва турли-туман лутфлар билан сийланиб, подшоҳ ҳазратларининг номасини арзга етказди. Хат мазмуни куйидагича эди: – Биз бу юришни ул азиз биродар<sup>161</sup>нинг давлати ўнгланиши учун амалга оширганмиз. Чунки агар юрт олувчи байроғимиз бу томонга йўналмаганда

---

<sup>161</sup> Муҳаммад Замон Мирзо кўзда тутилмоқда.

эди, Қавомбек Мовароуннаҳр ҳокимларига итоат этиш заنجирини бўйнига солиб, куббатилислом Балхни уларга топширган бўларди. Энди энг яхшиси шуким, ул биродаримиз олий кўнгил илтифоти билан дадилланган ҳолда жаҳонганоҳ даргоҳимиз сари ошиқсалар, то Балх мамлакатининг бошқарув жиловини қудрат қўлингизга топшириб, биз Кобул тарафга қайтиб кетсак.

Муҳаммад Замон Мирзо бу мактубни мутолаа қилгач ва Шоҳ Мир Ҳусайндан дилга ёқар сўзларни эшитгач, ҳазрат подшоҳ ҳузурига бориш ўйини кўнглидан ўтказди. Аммо боришга қарор қабул қилишдан олдин ота томонидан саййид Муртазохоннинг набира<sup>162</sup>си бўлмиш, она томондан келиб чиқиши Абулқайрхонга уланувчи ҳамда ҳазрат подшоҳ Бобур Мирзонинг эгачиси унинг никоҳида умр кечираётган жаноб сиёдатмаоб, салтанат интисоб саййид Маҳдихожа<sup>163</sup> Даражаз манзилида турган Бобур подшоҳ ҳазратларидан юз ўтириб, Муҳаммад Замон Мирзо олдига келди ва маҳдумзодани Бобур Мирзонинг олий ўрдусига боришдан қайтариб, бу қарорга қаршилиқ кўрсатди. Шунга биноан Муҳаммад Замон Мирзо Шоҳ Искандар бин Шоҳ Рустам бин Саййид Ҳамза садрни Шоҳ Мир Ҳусайнга кўшиб салтанат ошиёнли даргоҳга жўнатди ва у орқали: – Мулозиматга боришимиз учун муносиб керак-яроқлар бут

<sup>162</sup> *Набира* – қупинча фарзанд, уғил маъносига.

<sup>163</sup> Ҳондамир Ҳабиб ус-сийар” да Шайбонийхоннинг амамаваччаси ва хон талок қилгач Ҳонзодабегимга у йланган Ҳодихожа бин Муртазохожа исминни юқоридангача “Маҳдихожа” шаклида ҳам ҳавола қилган бўлиб, ушбу сатрлар маълифи бу икки жилликка аниқлик киритди. Қаранг: И. Бекжонов. Ҳоводабегим ва Хуррамшоҳ қисматлари//Холис, 10 март. 2011.

эмастиги ва турмуш асбоби йўқлигидан тортик тайёрлаш ҳозирча муяссар бўлмади. Худо хоҳласа, Балхни каминага иноят қилганингиздан кейин ва олий мавқаб Кобул томонга қайтиб кетгандан сўнг керак-яроқтарни бутлаб, олампаҳо даргоҳ эгаси мулокоти шарофини топажамиз, – дея айттирди.

Мухаммад Замон Мирзо Шох Мир Хусайн ва Шох Искандарни жўнатгандан сўнг Шибирғонни эгаллаш учун кетди ва ул шаҳар ҳокими Аминбек олди-га элчи юбориб, уни итоат ва бўйин эгишга чақирди. Аминбек эса ул ҳазратни жуда мустаҳкам тоғ дараси бўлган Қароёғочдан ташқари чиқариб олиб, агар ҳазрат подшоҳ Бобур Мирзо ул тарафга илғор солса, ҳеч бир қийинчиликсиз фатҳу зафар келинини кўришга муяссар бўламан, деган ниятда эҳтиёжга қоришиқ сўзлар айттирди ва «агар олий байроқ ойчаси етишув нури-ни Шибирғон атрофига таратса, камина бошдан кадам ясаб, хизматга ошиқажакман ва ул даргоҳ эгасининг инъои ва эҳсон дастурхонидан тўла ҳазз-ҳузур топажакман» дея мактуб йўллади. Мухаммад Замон Мирзо бу сўзни рост воқелик дея тасаввур қилиб, уғрукни Қароёғочда қўйди ва йўналиш байроғини Шибирғон томонга қараб кўтарди. Амир Нейматуллоҳ кўприги бошига етгандан сўнг ярим кечаси «Шох Искандар билан учрашгач, Фаридун тожли ҳазрат подшоҳ Бобур Мирзонинг ғазаб ўти аланга олиб, шошилинч қаноти билан оти жиловини Қароёғоч томон тўғрилади» деган хабар етиб келди. Шунга кўра Мирзо Мухаммад Замон балки ҳазрат Заҳир ус-салтана Бобурдан олдинроқ уғруққа етиб оларман, деган умидда яқинроқ бўлган тоғ йўли билан Қароёғоч сари йўналди ва ул тоғ



йўлини оркадан мустаҳкам қилдилар. Аммо йўл асно-  
сида Ҳусайн Ака девона Қароёғочдан келиб, ҳазрат Бо-  
бур подшоҳ Қароёғочга кириб, уғрукни тасарруф қилди  
ва эндиликда уч-тўрт минг жасур суворий билан уруш  
ва жангга тайёр турибди, дея арзга етказди. Муҳаммад  
Замон Мирзо бу хабарни эшитгач, йўналиш жиловни  
Ғаржистон томонга бурди. Йўл давомида эса амир  
Ҳусайн Али жалойир ва амир Юнус Али бин амир  
Бобо Али ва хожа Ҳайдар Али қарчақ ҳамда сардор-  
лар ва кўшиндан бир тўдаси ул ҳазрат ёнидан қочиб,  
Қароёғочга кетдилар. Махдумзода шошилинич қаноти  
билан Ғаржистон сари илгарилаб кетди. Пилчироғга  
етганда саййид Махдихожа ҳам Муҳаммад Замон Мир-  
зодан руҳсаг сўраб, йўлини Мовароуннахр томон сол-  
ди. Муҳаммад Замон Мирзо Ғаржистонга етгач, амир  
Шоҳ Муҳаммад Сайфулмулк ва Хожа Гиёсиддин Али  
Холдор ва Хожа Камолиддин Ҳусайн ва ул вилоятнинг  
бошқа арбобу калонтарлари кутиб олиш шартлари-  
ни бажо келтирдилар ва қудрат қўллари нимага етса,  
ўшанча тортиқ қилдилар. Махдумзода Усту қишлоғида  
истиқомат кўрпа-тўшагини ёйди.

Ўша икки-уч кун ичида галаба аломатли бобурий  
байроқлар ҳам Ғаржистон вилояти билан Чакчаронни  
боғлаб турувчи Окгунбад мавзесига ўз соясини таш-  
лади. Бироқ ғаржистонликларнинг бариси Муҳаммад  
Замон Мирзо давлатига тарафдорликда тўғри дамли ва  
собит қадамли бўлгани учун ҳазрат Бобур подшоҳ ул  
тоғлик юртга кира олмади ва Ғурнинг Ферузакуҳ та-  
рафига кетиб, у ердан Яккаўланг йўли орқали Кобулга  
йўналди.

Муҳаммад Замон Мирзо яна бир навбат озгина

керак-ярок ва лозим нарсаларни ғамлаб, Ғаржистондан Чакчаронга кўчиб борди ва Чароғдон манзилида истиқомат чироғини ёкиб. у ердан Қандаҳор томонга йўналаман ёки яна бир марта Балх ҳудудига бораман, деб иккиланиб ўтирган маҳал, кутилмаганда сардорлари Иброҳим Султон Мавсулий ва Аҳмад Султон афшор бўлмиш ва Ҳирот волийси Амирхон лала буйруғи бўйича бу томонга келаётган Хуросон амирлари кўшинининг муқаддима қисми кўринди. Махдумзода амир Шоҳ Муҳаммад Сайфулмулук ва амир Ўрдушоҳнинг амакиваччаси Мирзобек ва амир Ҳаронқули ва Ислом Али бин Ёр Али бахши ва амир Шоҳ Ҳусайн Ёракий мирохурни Ғончи мўғулининг кўп кишиси ва лашкар аҳли билан Хуросон амирлар рўнарасида қўйиб, ўзи эса йўналиш байроғини Севинж йўли орқали Ғаржистон садаларидан бири бўлмиш Бандар томон кўтарди. Иброҳим Султон ва Аҳмад Султон Муҳаммад Замоннинг сипоҳини қилич ва найза зарби билан енгиб, Мирзобекни Ғончи мўғуллари калонтарларидан ўн-ўн икки киши билан бирга қўшиб ва кўшиндан ҳам кўпларини ҳалокат тулроғига улоқтирдилар. Қочиб қутулган бошқалари Муҳаммад Замонга бориб қўшилдилар. Ул ҳазрат Бандардан Қандаҳор сарй йўналди. Ушбу сатрлар ёзғувчиси эса яроқи талофатга учрагани сабабли руҳсат олиб, Ғаржистонда қолдим. Махдумзода Рубазга етганда Чароғдон урушидан ўша томонга қочган Шоҳ Муҳаммад Пир Ака ён-атроф кишиларидан олтмиш-етмиш киши билан келиб, олий мавқабга қўшилди ва ул ҳазратни ҳадеб ундайвергач, махдумзода унинг сўзи билан Қандаҳорга юришдан воз кечиб, жиловни Сон



ва Чаҳоряк вилоятига бурди ва лашкар аҳли Жазравон атрофида МирзоБекнинг Шибирғонга кетаётган уғрукини талаб, озгина миқдордаги керак-ярокни қўлга киритган кўйи Чаҳорякка бориб, ўз ўлганларини ювиб-кафанлаш учун Бандарда қолган Ислом Али, Ёр Али бахши ва Ғончи мўғулли кишиларининг етиб келишини кутиш ва сўнг Шибирғонга кетиш учун кўш ташладилар.

Аминбек бу хабарни эшитгач, ўша пайтда ҳазрат подшоҳ Бобур Мирзо буйруғига биноан Балх ҳокими бўлиб ўтирган амир Иброҳим чопук олдига одам юбориб «муносиби шуқим, Муҳаммад Замон Мирзонинг лашкари йиғилишдан олдин ул ҳазрат ишини бирёқлик қилишга киришайлик» дея хабар қилди. Амир Иброҳим Балхдан чиқиб, Аминбек унга қўшилди ва ул икки амир бир-бири билан иттифок бўлиб, шоҳзода устига юрдилар. Икки уртада қаттиқ жанг бўлди. Ана шу олишув пайти Муҳаммад Замон Мирзонинг оти сунчиқиб, ўша орада амир Иброҳим чопук бу ҳол устига етиб келди ва ул ҳазратни қўлга туширди. Аммо таъзим ва эҳтиром бажо келтириб, маҳдумзодани ўзи билан Балхга олиб кетди ва у ердан йўналиш юзини Кобул сари қаратди. Ҳазрат подшоҳ Муҳаммад Бобур Мирзо ўзининг яхши хулқ ва гўзал атвори, туғма қарам ва зотий меҳрибонлиги орқасида ўта шафқат ва марҳамат билан Муҳаммад Замон Мирзони қарши олди ва гуноҳларини худди бўлмагандек ҳаёлидан чиқариб ташларкан, инъом ва эҳсон эшиklarини маҳдумзода ҳаёти юзи сари очиб, салтанат асбобларини иноят қилди.

## Назм:

Подшоҳи карими бақданавоз,  
Хусрави журмбаҳш афвтароз.  
Аз сари журми хешу бегона,  
Бигзарад, зи онки ҳаст фарзона.  
Сад хато бинад а-р аз хайлу ҳашам,  
Кунадаш афв аз камоли карам.

## Мазмуни:

Бандаларни сийловчи меҳрибон подшоҳ,  
Айбларни кечирувчи. гуноҳдан ўтувчи шох.  
Қариндошу бегонанинг айбидан,  
Кечар, тунки у бир окилу доно.  
Оддӣ ва бой кишидан юз хато кўрса агар,  
Карамӣ камоли туфайли афв қилади.

Олий шаъли подшоҳ онту қасамлар ўртага соли-  
ниб килинган аҳду паймондан сўнг Балх вилояти ва  
унга тобе ерлар бошқаруви жilовини махдумзоданинг  
кудрат кўлига тутқазди. Бобур Мирзо ул ҳазратни уч-  
тўрт ой Қобулда ушлаб тургач, подшоҳлик саройининг  
мухтарама хонимларидан бир каримани махдумзода-  
га унашиб. рози ва шоқир ҳолда кўнглини ифтихор ва  
сарафрозликка тўлдирган кўйи Балхга юборди. Ҳеч  
бир сўзамолликка берилмасдан ва маддохлик йўлини  
тутмасдан айтадиган бўлсак, ул исломпаноҳ подшоҳ  
қай даражада юксак карам ва яхшилик, не қадар чек-  
сиз шафқат ва саховат намунаси бўлса, барисини ул  
олий мартабали шохзодага нисбатан юзага чиқарди.  
Бу лутф ва эҳсон доврӯғи, бу афв ва ёрдам овозаси  
оламнинг гўрт томони бўйлаб ёйилиб, барча тойифа



кишилар меҳрибон подшоҳга таҳсину офарин айтдилар. Ҳозирги кунимизгача, яъни кириб келган ҳижрий 929 йил зулкаъда ойи<sup>164</sup>га қадар, Муҳаммад Замон Мирзо ўша мамлакатда ҳукумат ишига машғул бўлиб ўтирибди. Гоҳида Хуросон ҳокимлари олдига элчилар юбориб, аъло ҳазрат динпаноҳ Бобур подшоҳнинг халифалик тахти поясида бел боғлаб турганларга нисбатан ихлос ва бандалик шартларини бажо келтиради. Ишончли умид ва содиқ ишонч шуқим, ул саодатли маҳдумзода подшоҳлик – *Аллоҳи таоло субҳонаҳу мулки ва султонилигини абадий қилсин* – осмони офтобининг давлат ва адолати сояси остида иқболнинг юкори даражаларига етишади ҳамда шавкат ва мартаба нурининг ёғдуси шоҳаншоҳликнинг мақсади ҳосил наввоби Бобур Мирзо июноти уфқидан унинг аҳволи узра таралади.

### **Рубоий:**

Он ахтари нур густари авжи умид,  
Шойистаи афсару сарири Жамшид.  
Хоҳам ки ба зилли давлати шоҳи жаҳон,  
Бар маснади иқбол бимонад жовид.

### *Мазмуни:*

Умид осмонининг нур сочувчи ул юлдузи,  
Жамшиднинг тожу тахтига муносиб.  
Истайманки, жаҳон шоҳи давлати паноҳида,  
Иқбол тахтида қолса мангуга.

---

<sup>164</sup> 929 йил зулкаъда ойи – 1522 йил 11 сентябрь – 10 октябрь.

Таққик эгаси қаламнинг дўстона ёрдами билан мақсади ҳосил соҳибкирон Амир Темур Кўрагон авлодининг гаройиб аломатли ахбори гавҳарларини шу ергача иборалар тизимига терган ва довотнинг ҳаётбахш булоги томчиларидан сўзамоллик топиб, баён тизгинини абадга уланган шоҳлик давлати айёмининг ажойиб воқеаларини ёзиш сари бурган экан, умид шулким, Жамшид кудратли вазир<sup>165</sup>нинг уйғок бахти кўмаги ва инояти ёрдами билан бу битик хато ва айблардан холи топилиб, ушбу Искандар сифот Шоҳ Исмоилнинг юрт огувчилик ҳолатларини энг яхши иборалар, гўзал истиоралар билан яқину йироқдагилар, турку тожик халқлар қулоғига етказгай [405-б.].

## ШОҲ ИСМОИЛ ТОМОНИДАН ХУРОСОН ФАТҲИНИНГ БОШЛАНИШИ

[503-бет.] Сўз маъносини билгувчилик байроғини кўтарувчилар ва сўзга чечанлик тахтига безак берувчилар ушбу аниқликни англаб, шу воқеадан вокиф бўлажақларким, мақтов хислатли шоҳнинг абадга уланган давлатида шундай бир ҳосият бор бўлиб, сидқиқилдан ва соф кўнгилдан ихлос ва ниёз юзини иқбол қондали даргоҳ саҳнига қаратган ҳар бир муваффақият соҳибининг умид ниҳоли тенгсиз малиқнинг инояти офтоби партавидан соя ёйгувчилик даражасигача ўсиб, истаги ғунчаси мурод чаманида сарафрозлик насими билан очилажақдир. Ҳашамати кўплигидан мағрур бўлган қай бир тўла шавкатли

<sup>165</sup> Сафавийлар вазири Ҳабибуллоҳ Соважий кўзда тутилмоқда.



киши эса куллик бўйнини осмон манзиллик даргоҳ эгасининг итоат ҳалқасига тикмаса, озгина вақт ичида ўшанинг улуғлик дараҳти қийинчилик шамолидан таг-туғи билан кўпорилиб, буюклиги боғи қовжираган сахро сифатини топажақдир. Бу таъриф ёзувининг сўнги фикрасига ўхшаш Мухаммадхон Шайбонийнинг ахволи бўлиб, у Хуросон шаҳарлари фатҳидан кейин мамлакати катталиги ва вилоятлари кенглиги, хайлу ҳашами кўплиги, кўшин ва навкарлари зиёдалиги, уруш-саваш асбоблари ҳаддан ортиклиги, салтанат ва истиклол яроқларининг мўл-кўллигига мағрур бўлиб, Сидра манзилли бўсага эгасига нисбатан фармонга бўйсунушлик ва итоат йўлидан қадам босмай, юрт олувчи шоҳнинг зулмат кетказувчи қиличи унинг такаббурлик ва манманлик зангини замона ойнасидан илоҳий тақдир сайқали билан тозалади. Бу маънонинг қисқача баёни шуким, Мухаммадхон Шайбоний Туркистоннинг чекка шаҳарларидан то Семнон худудигача ўз тасарруфи ва эгалланиш доирасига киритгач ва ҳокони мансур Мирзо Султон Хусайннинг мажид ўғилларини Хуросон ўлкаларидан ҳар тарафга путратиб юбориб, эркинлик байроғини кўтаргач, гурур ва кеккайиш сувратини ҳамда истибдод ва зулм нақшини кўнгли тахтаси ва калби саҳифасига чизиб, мақсади ҳосил шоҳ ҳазратлари билан ихлос ва давлатхоҳлик йўлини гутмади. Аксинча, қаршилик ва исён изҳорини қилиб, шер вужудли подшоҳ билан курашмоқва урушмоқни енгил ва осон иш деб ўйлади. Аммо у шунни билмас эдики, лочин қанчалик юксак учмасин, жаннат Сидрат ул-мунтаҳоси шоҳидаги қутлуг Хумо билан тенглашиш қанотини ёза олмайди, шункор

канчалик учкур шикорчи бўлмасин, Семурғдек Қоф водийси майдонини босиб ўта олмайди. Искандар мартабали шоҳ Муҳаммадхон Шайбонийнинг адоват аломатли атворида хабар топгач, икки-уч топқир халқ орасида Шайх Лоҳижоний номи билан танилган фазилатлар эгаларининг каттаси Шайх Муҳиддин Аҳмад ва шариагмаоб, фазилатпаноҳ кози Зиёиддин Нуроллоҳ каби сўзамол элчиларни ул олий мартабали хокон олдига юбориб, хонни тўғрилиқ тариқи сулукига ҳамда итоат ва бўйсунушлиқ тариқаси шартларини бажармоққа чақирди ва халқ осойишталиги пойдеворини бузишга сабаб бўлувчи нолайик ишлардан қўл тортиш сари ундади. Бирок шоҳнинг бу сўзлари хонга сира-сира қор ва таъсир қилмади. Муҳаммадхон Шайбоний ўзбек кўшинлари кўплигига орқа қилиб, фармонни бажарувчилик водийси томон қадам қўймади. Балки Шайх Муҳиддин Аҳмад Лоҳижоний улуғлик ва жаҳонбонлик тахти поясида турганлар ёнидан элчилик расми билан борган вақтда жавоб тариқасида амир Камолиддин Хусайн Обивардийни олампаноҳ даргоҳга юбориб, у орқали жўнатган мактубида шундай сўзларни каламга олган эди: «Ислом ҳажини адо этмок учун кўнгилга келдиким, яқин орада Ирок (Эрон) ва Озарбайжон томонга йўналгаймиз. Шу сабабли учрашувимиз маъзили қаерда бўлажагини маълум қилсангиз.» Малолийк ошиёнли даргоҳ муншийлари шоҳ тилидан хонга жавоб тарзида ушбу сўзларни ёзиб юбордилар: «Биз ҳам ислом обрўси Али Разавия равзаси тавофи учун муқаллас Машҳад томонга бормоққа азми жазм қилганмиз. Муносиби шуким, давлат ва иқбол мавқабларини кутиб олмоққа шошилиш йўлини тутгайлар



то дўстни сийлаш шартлари ва душманни куйдириш расму русумларини ул кишига кўрсатиб қўйгаймиз.» Муҳаммадхон Шайбоний бу жавобдан изтироб денгизига чўмиб, осмон кудратли подшоҳ Ширвон ўлкасида турган ўша киш фаслида биёбон йўли орқали Кермон худудига кўшин тортиб кетди. Бориб ул вилоятнинг айрим ерларини ғорт қилди ва деҳқонлару бечораларга нисбатан зулм ва зуғум ўтказди. Бу каби иш юзага чиққани сабабли 916 йил ражаб ойининг ўрталари<sup>166</sup>да мамлакат олувчи байроқ Харракон сайхонлиги узра етишиш соясини ташлади ва ҳамма бажариши шарт фармонга биноан амирлар ва ироклик, форслик, кермонлик, курдистонлик, луристонлик, арронлик, озарбайжонлик ҳокимлар кўп сонли кўшин билан галаба аломатли ўрдуга йиғилдилар. Шоҳ Хуросон сари юриш ва Муҳаммадхон Шайбонийнинг зулмкор вужудини йўқ қилишга катъий қарор қилиб, қолган амирлар ва нўёнларни ҳам чакириш учун Султон Яйлоқи манзилида катта тўй-йиғин ясашга фармон берди... [504-бет.].

## **ГАЛАБА АЛОМАТЛИ АСКАРЛАРНИНГ УРУШ НИЯТИДА ЎЗБЕК ХОНИ УСТИГА ЙЎНАЛГАНИ**

[506-бет.] Зафарга ёр подшоҳ эртаси кун тонгда Султония йўлидан масофаларни босиб ўтган кўйи Рай шаҳри теграси сари ошиқди ва у ерда ҳам тўхтамай, оти жиловини Домғон вилояти томонга бурди. Ул шаҳар доругаси Муҳаммадхон Шайбонийнинг Аҳмад Султон исмли куёви бўлиб, у нусрат киришимли кўшиннинг

<sup>166</sup> 916 йил ражаб ўртаси - 1510 йил 19 октябрь.

яқин келганидан хабар топди ва юзини қочиш водийси сари қаратиб, мулк ва мол баҳридан кеча қолди. Шунга ўхшаб, Астрободда ҳокимлик қилаётган хожа Аҳмад *қўнқирот* ҳам қочиш тариқини ихтиёр этиб, Зардахок довони оғзи орқали ўтиб, Ёзир ва Дурун томонга кетди. У ердан эса Хоразм тарафга юзланди.

Журжоннинг Саййид Рафеъ ва Бобо Навзар каби арбоб ва калонтарлари ҳамда бошқа оқсоқоллар мўлкўл совға-ю тортиқлар билан зафар аломатли байроқни кутиб олишга ошикиб. Бастомда осмон ҳашаматли хусравнинг палосини ўпиш иззати билан сарафроз бўлдилар ва шохнинг ҳам инояту эҳсонига эришиб, ўз уйларига қайтдилар.

Ўша вақтда жаноб султоний хожа Сайфиддин Музаффар битикчи Кабуджома мавзесида бўлиб, олтин тусли чатр<sup>167</sup> келгани хабарини эшитгач, фатҳу зафар янглиғ осмон кезар ўрду томонга юзланиб, Жожарм ўлкасида Сидра ҳашамагли даргоҳ эгаси мулозимати шарафини топди... Шох Исфароин шаҳри четида унинг қобилиятли қоматини вазирликнинг олий мансаби либоси билан бегади.

У томонда ўша вақтда Ҳазора юришидан юз бўлак бўлган садпора дил билан қайтиб келиб, Ҳиротнинг Боғи Жаҳоноросида ўтирган Муҳаммадхон Шайбоний куёви Аҳмад Султон юборган чопар орқали нусрат нишонли мавқаб келгани хабарини эшитгач, ҳамиша тилини мактанчокликка чоғлаб «яқин орада Ироқ ва Озарбайжон устига лашкар тортаман ва ул юртларни олгач, йўналиш жиловини Ҳижоз то-

---

<sup>167</sup> *Чатр* – соябон (давлат белгиси).

монга гўғирлайман» дея лоф-коф уриб юрганига қарамай, калбига шу даража хавф ва кўркув туйғуси йўл тоғдики, Хуросоннинг душманни ёқувчи кўшини муқаддаси кириб келмасданок 916 йил ражаб ойн охирлари<sup>168</sup>да Ҳиротдан Марвга қочиб кетди ва ўша шаҳар калъасини бекитиб, Мовароуннаҳр султонларига ўзбек кўшинларини ёнига чақириш фармонларини жўнатди.

Мухаммадхон Шайбоний қочиб кетгач, шу хон фармонига кўра Хуросон мамлакатлари доруссалтанаси бўлмиш Ҳиротда ҳокимлик қилиб ўтирган Жонвафо Мирзо ҳам ўз подшоҳига эргашиб «Марви Шоҳижаҳон кайдасан» дея йўлга тушди. Ҳиротда Хожа Хўрд девондан бўлак ўзбек уруғидан ва Мовароуннаҳр халқидан биронта тайинли киши қолмади. Жонвафо Мирзо олдида ғоятда эътиборли бўлган мазкур Хожа амир Султон Махмуд бин саййид Гиёсиддин Муҳаммад боғбон билан дўстлиги туфайли Ихтиёриддин калъасига беркинди.

Ҳиротда рўй берган бу каби воқеалар Тус шаҳри атрофида шохнинг арзига етиб, ул хазратни мулклар бағишловчи молик инояти қўллаб, улугворлиги шарафига ҳам ортди ва Хуросон вилоятлари ишларини қўлга олиш учун доругалар тайинлаб, ўзи муқаддас Машҳад сари юзланди. Ул мақомга етишгач, ихлос ва тўла ниёз юзасидан инсу жин имомининг аршга тегар равзаси тавофи эҳромини боғлаб, Имом Ризо *алайхурраҳма* макбараси зиёрати шароитларини бажо келтирди... ҳамда йўксил ва дуоғўйларга садақалар улашгач, нус-

---

<sup>168</sup> 916 йил ражаб охири – 1510 йил 3 ноябрь.

рат оятли байроқни Сарахс сари ҳилпиратди. У ернинг ўзбек доруғаси аллақачон қочиб кетган бўлиб, халқ шохга нисбатан хизматкорлик ва бўйсунлиқ йўлини тутган кўйи зафар паноҳли кўшин зуғумидан омонлик топиб, имомия мазҳаби шиорини изҳор қилдилар.

Музаффар туғли шохнинг ўзи Сарахсда турган кўйи Дона Муҳаммадбекни мамлакат олувчи кўшиндан бир бўлаги билан бирга манғилой йўсинида Марв томонга юборди...

Муҳаммадхон Шайбоний зафар аломатли кўшиннинг муқаддима қисми келаётганидан хабар топгач, Жонвафо Мирзо ва Қанбарбийни ўзбекнинг қиёмат аломатли кўшинидан катта бир бўлаги билан олдинга жўнатди ва Тоҳиробод кишлоғи ёнида тарафлар тўқнашуви юз бериб, жудда қаттиқ жанг бўлди. Бу жангда Дона Муҳаммадбек ўзбек жангчилардан бирининг камондан отилган ўққа учиб, шаҳидлик шарбатини татиди. Шунга карамай, улуғ ғозийлар шох давлати қувватидан юксак мақомли туғларни батанд кўтариб, ўзбекларни то Марв қалъаси ичигача чекинтириб бордилар. Шу ҳол асносида муртазавий ҳислатли шохнинг қутлуғ туғи ойчаси етишиш нурларини Марв қалъаси атрофига сочиб, ғалаба асарли аскарлар ул шаҳар ён-теварагида чодир қуббаси ва баланд ўтовини тикладилар ҳамда қамал ва ҳамла ҳужумларини бошлаб юбориб, қалъа олишлиқ асбобларини тартибга келтириш сари киришдилар. Муҳаммадхон Шайбоний қалъа дарвозаларини беркитиб, ҳар бир буржни улуғ амирларидан биттасига топширди ва кўнглига қалъа муҳофафасини туғиб, бу мустаҳкам кўрғонни муҳофаза қилиш бобида ҳаддан ташқари кўп ишларни амалга ошир-



ди. Гарчи ул ўлкани босиб олиш юрт олувчи қўшинга султонлик жанги воситасида муяссар бўлса-да, аммо сафёраш шижоат аҳлидан кўпининг талафотга учраши мумкинлигини назарда тутиб, бу иш рухсати борасида қутлут фармон берилмади. Ўша кунлар давомида улуғ ғозийлардан бир қисми жангга кириб, Марв дарвозаси ёнигача боришар ва шаҳардан ҳам бир бўлак жангчилар чиқиб, жиловни уруш-саваш майдонига бурар эдилар. Кўпинча ғалаба шохнинг зафарли қўшини сари бўлар ва ҳар тўқнашда ўзбеклардан бир тўдаси ўлдирилиб, казо кўли уларнинг ҳаёти палосини йиғиштирар эди. Замона одати ўзи шу янглиғ бўлгани сабабли гоҳида ғозийлардан айримлари ҳам ажал соқийси кўлидан шахидлик жомини сипқорар ва гоҳида бир қанчалари тақдир сарпанжасига асир тушиб, Муҳаммадхон Шайбоний буйруғи бўйича қатлга етар эдилар. Бир неча кун шу зайл ўтгач, ажойиботлар йиғингоҳи хонадонининг соҳибни тадбир бошлиғи шарофатидан фатҳ чеҳраси жамол кўрсатди [509-б.].

### **СУЛТОНЛИК ЖАНГИНИНГ РЎЙ БЕРГАНИ ВА ЗАФАР ҚУЁШИНИНГ ОМОНЛИК УФҚИДАН ПОРЛАБ ЧИҚҚАНИ БАЁНИДАГИ ГАПЛАР**

[509-бет.] ... Бир неча кун Марв чети нусрат асарли аскарларнинг истиқомат маҳали бўлгач ва фақат муҳосира-ю мухориба билан фатҳу зафар юлдузи мақсад уфқидан чикмагач, шохнинг илохий иноятлар нурлари иждокори бўлмиш офтоб аломатли қалби ойнасида ушбу тадбир суврати намоён бўлди: «Бир кўч масофа орқага чекинамиз, токим бу чекиниши-



мизни Муҳаммадхон Шайбоний нусрат оягли мавкаб-нинг қочганига йўйсин ва кетимиздан қувлашга жазм қилиб, журъат қадами билан Марвдан чиқсин. Ўшанда фатҳ ва зафар жиловини ҳасадчи ғаним ва ёғий душман томонга бурамиз ва қиличу найза зарби билан қилмишига яраша жазосини топдирамиз.» Сўнг шу ғайбий илҳом ва илохий талқин саналган тўғри тадбирга амал қилиб, бироқ қутлуғ қалбда яширин бу режани нойиблар ва амирларга билдирмасдан, 916 йил 28-шабон<sup>169</sup> чаҳоршанба куни охирида нусрат нишонли байроқлар Марви Шоҳижаҳон четидан ҳаракатга келди ва шоҳ шаҳардан уч фарсах масофа наридаги Маҳмудий кишлоғи дарёчасидан ўтиб тушган кўйи шу ерда бир куну икки оқшом тўхтаб турди. Бу каби орқага қайтишнинг асл ҳақиқатидан беҳабар давлатнинг бир нечта амир ва нўёнлари ниҳоятда ҳайрон бўлдилар ва ўй-фикр денгизига ботиб, ор-номус юзасидан қаттиқ изтироб чека бошладилар. Аммо ҳидоят қоидали шоҳнинг қатъий қарорли ақли режасини англовчи айрим хос ва яқин кишилардан бир бўлаги бу қайтишнинг ҳеч шуҳбасиз фатҳу зафар мукаддимаси учун қулай имконият учун амалга ошаётганини яхши билиб турардилар.

Ҳазрат султоний сайф ул-аномий Музаффар битикчидан эшитганим борки, мазкур манзилда мансур шоҳ халифа ошиёнлик даргоҳ муншийларидан бирига Муҳаммадхон Шайбонийга бир мактуб битишни буюрди. Бу хат мазмуни шундай эди: – Илгари сен бизга «кўнглимизни ислом ҳажини амалга оширмоқ ния-

---

<sup>169</sup> 916 йил ражаб уртаси – 1510 йил 19 октябрь.



ти тўла камраб олди ва якин кунларда ўша юришни рўёбга чиқариш учун Ироқ (Эрон) ва Озарбайжон томонга юзланажакми?» деб ёзган эдинг. Биз эса шунинг жавобига тиришиб «бизнинг ҳам башар аҳли имоми Али ибн Мусо ар-Ризонинг муаттар қабрини тавоф этиш ниятимиз бор ва тез фурсатларда химматни ул тарафга юзланиш учун қаратгаймиз» деган эдик. Сен ўз ваъданг устида турмагач, мана биз жаҳон олувчи кўшин байроғини муқаддас Машҳад сари ҳилпираддик ва Аллоҳга шукрим, ул иқбол қибласи, омонлик ва орзулар қаъбаси тавофи шарафига мушарраф бўлиб, имомлик ошиёшли даргоҳ губоридан умид кўзимиз учун равшанлик ҳосил қилдик. Бу сўзларни ёзишдан мақсад шуким, тасаввуримизча, балки ул жаноб қулуғ мавқабимиз келганидан хабар топиб, қадамимиз истиқболга чиқсалар ҳамда меҳмондорлик ва зиёфат шартларини бажарсалар, жуда лойиқ ва муносиб иш рўй берган бўларди, деган ўйда эдик. Майли, бу ишнинг удасидан чиқа олмаган эканлар, шу сабабли биз ўзимиз мулоқотларини топиш учун алар турган Марв шаҳри ташқарисигача ташриф буюрдик. Аммо бу ерда ҳам ул жанобдан одамгарчилик лавозимлари юзага чиқмади. Начора, эндиликда қайтиш тизгинини орқага бурамиз ва Хуросон вилоятларининг бирида кишловни ўтказиб, баҳор фасли аввали, яъни лола-ю гул-чечаклар кўшигининг уруш-саваш майдонига юриши бошида яна қайтамиз, токим ғайб пардаси ортида яширин суврат кўриниш доирасига киргай, вассалом.

Бу бахт услубли мактубни аъло ашраф фармонга биноан улуғ кўрчилардан бири олиб, пайшанба кунини намозлар чоғи Марв томонга кетди.



Жума куни<sup>170</sup> тонгида, яъни ялтироқ тус байрокли хусрав – офтоби жаҳонтоб олам майдонини эгаллаш ниятида зарҳал қилчини уфқ қинидан чиқарган ва кураш оёқларини осмон майдонига қўйган қўйи фалаклар кўрғонига бекинганларни мағлуб қилган маҳал соҳиби бахт шоҳ Амирбек Мавсулу муҳрдорни уч юз нафар жасур чавандоз билан бирга Махмудий анхори кўприги устида қўйди ва ўзи қўшин билан йўналиш тугини Талхтон қишлоғи сари кўтарди. Режага кўра, Амирбек Муҳаммадхон Шайбонийнинг қўшини қорасини кўрган заҳоти ҳеч тўхтовсиз қочиш йўлига кириб, осмон мартабали мавкабга келиб қўпчилиши лозимлиги, буни кўрган ўзбекларнинг эса ботирлашиб, ҳеч ўйлаб ўтирмасдан ўша йўлдаги Сияҳоб дарёчасидан бемалол ўтган қўйи осмон кезар ўрду орқасидан шошганча қувлаб, шаҳардан анча узоқлашиб қолишлари кутилганди.

У томонда Муҳаммадхон Шайбоний оқибати олқишли шохнинг кўчиб, мағриб томонга йўналганидан хабар топган, энди нусратнишон ғозийлар отлари жилвини Ироқ (Эрон) ва Озарбайжон теграсига етгунга қадар орқага бурмаяжаклар, деб ўйлаган эса-да, шунга қарамай, биринчи куни эҳтиёткорлик расмига риоя қилиш жиҳатидан шаҳардан ташқари чикмади. Аммо жума куни саҳар чоғи ҳар бири қиёмат юришли найза учи билан қоронғу тунда чумоли ва илон кўзини тикувчи ва сув кўринишли шамшир шуъласи билан урушсаваш куни Рустаму Исфандиёр ҳаёти хирманини ёндирувчи совут кийган ханжар санчар баҳодирлардан

---

<sup>170</sup> 1510 йил 3 декабрь кўзда тутилмоқда.

бир тўдаси билан бирга дарвозадан ташқарига кадам босиб, лашкар қалбида жойлашди. Қўшин канотларини эса Жонвафо Мирзо ва Қанбарбийларнинг вужуди шарафи билан мустаҳкамлади. Шу зайл тўла мағрурлик ва гердайиш билан шоҳ орқасидан йўналди. Йўл асносида хонга ер юзи шоҳининг қутлуғ мактуби етишди. Хон хат мазмунидан хабар топгач, бу ёзишманинг сабабини уруш майдонига чиқишдан ўта даражада ожизлик кўрсатилаётгани белгиси ўрнида тасаввур қилди. Шунга кўра кавкаблар мартабасича мавкаблар кетидан олдингидан ҳам кўпроқ саъй-ҳаракат билан таъкиб этишга тушди. Ёнидаги Хожа Камолиддин Махмуд Соғаржийга хат келтирган чопарни Марвга элтиб, камаб кўйишни ва лашкардан ким шаҳарда қолган бўлса, уларни ҳам бу ёққа юборишларини буюрди. Хон масофаларни босиб ўтишда яна ҳам шошилиш йўлини тутаркан, Махмудий кишлоғига етишгач, Амир Бек муҳрдор тайинлангани бўйича оти жиловини қочиш сари бурди. Муҳаммадхон Шайбоний бу ҳолни мушоҳада қилган заҳоти хурсанд бўлиб, галаба умиди жамолини кўришга умид боғлаган кўйи юриш тезлигини тагин-да ошириб, олдингидан ҳам кўпроқ шошилганча яшин ва шамолдек Сияҳоб дарёчасидан ўтди. Аммо музаффар туғли шоҳ Амир Бек аъло шарафли мавкабга етиб келгач, душманнинг яқинлашганидан хабар толиб, ўша пайтда зафар аломатли узанги мулозиматида турган улуғ амирлар ва Баҳром қасосли кўрчилардан уч-тўрт минг нафар отлик чавандоз билан бирга дунё кезар саманд тизгинини тўғирлади ва оҳулар тўдасига чанг солиш учун юзланган йиртқич шер ёки чумчук овлашни писандига илмас юксак учув-



чи лочиндек юзини душманлар тарафга қаратди... Ва Махмудий кишлоғи чеккасида тарафлар яқинлашуви тўқнашув билан якун топиб, ҳар икки томондан сурнай ва карнай овозлари кўтарилди, бурғу ва сурон садолари баланд осмон чуққисидан ўтди. Жанг майдонининг чанги тез айланувчи фалак авжига етишди ва оламни кезувчи отлар туёғининг гард-ғубори офтоб юзига никоб бўлди. Улуғ ғозийлар ажлаҳо гавдали найзаларни қўлга олиб, душманлар сари юзландилар, Баҳром қасосли ўзбеклар қоничар ўқларни камон ипига қўйиб, жангга киришдилар. Қисқаси, бу томондан кутлуғ мавқабдаги ғозийларнинг шаҳоб юлдузидек найзалари баҳодирлар томиридан қон оловини окизар, ул томондан эса Муҳаммадхон Шайбоний аскарларининг дил аломатли пайконлари шижоатлилар кўкси нишонига келиб тегиб, жон бойлигини кўкка совура эди. Ўша қаттиқ уруш-саваш асносида шоҳ душман лашқарининг қалб қисми сари от қўйиб, ҳар ҳамласи билан муҳолиф аскарининг кўпини ер тишлатар эди. Муҳаммадхон Шайбоний ҳам ихтиёр ва изтироп юзасидан озгина вақт сабот ва қарор оёғини маҳкам тираб, шундай уруш ясадики, мияларни икки ёрувчи қиличи зарбасидан шиддат қасосли Баҳром кўркиб, офтобнинг заррин қалқонини боши узра тортди ва қоничар найзасининг келди-кетдиси кўплигидан Семурғ ваҳимага тушиб, Қуҳи Қоф орқасига яширинди. Ниҳоят, юрт олувчи шоҳнинг жаҳонни безовчи байроғи ойчасига ғалаба-ю фатҳ саодати юлдузи яқинлик ҳосил қилди ва динпаноҳ подшоҳнинг ҳуш қулоғига «Аллоҳ ғалаба билан эъзозлайди» калимасининг қувонч орттирар навоси кирди, ўзбекнинг ёмон хислатли қўшинлари эса уруш

майдонига орка ўгириб, жиловни қочиш водийси сари бурдилар. Шоҳ аскарлари уларни қувлаб, қочганлардан жуда кўпини ҳалокат тупроғига қулатдилар.

Хуросон халқи жумласидан саййид Гиёсиддин Муҳаммад боғбоннинг тўнғич ўғли амир Жалолиддин Маҳмуд ва хожа Муизиддин Хусайн девон ва хожа Абдуллоҳ Марвий қабилар бир гуруҳ марвликлар билан бирга Марв шаҳри ичида турган бўлиб, ўша қиёмат кунги ғозийларнинг қиличи зарби ва найзаси санҷисидан оламдан ўтдилар. Жонвафо Мирзо ва Қанбарбий тақдирдан бўлиб, асир тушдилар ва шохлик қаҳри қахрамони ҳукмича қатлга етдилар. Муҳаммадхон Шайбоний ўта саросима ва изтироб ичидаги қочиш маҳали Сияҳоб ёнида узангиси хизматида турган беш юз нафар билан отини бир чаҳорбоғ ичига қарата ҳайдаган эди, аммо боғ ичидан ташқари чиқишга жой топа олмай қолиб, ўша аснода Бурун Султон ғозийлардан бир гуруҳи билан ул боғни ўраб олиб, қўлларини ўк отишга узатдилар. Ўзбеклар ўқ ёмғиридан бир-бири устига қулаб, жуда кўплари отлар туёғи остида ҳалок бўлдилар. Ҳаётларидан бир неча нафаси қолган айримлари эса ўлган шериклари жасди устига тармашиб, ул боғ девори устига чиқиб олишар, аммо улар ҳам ғозийларнинг ўткир қиличи зарбидан оёқдан қолар эдилар. Ул ёмон қавмнинг барчаси найза ва қиличга ем бўлгач, қутлуғ мавқаб мулозимларидан бир нечтаси ўлганлар орасидан Муҳаммадхон Шайбонийни излаб, уни ўша боғ ичидаги мурдалар тагидан топишди. Хон устига қулаб тушган қочоклар остида қолиб, нафаси қисилганидан жонини руҳларни олувчига топширган экан. Улуғ ғозийлар унинг ман-

манлик орқасида ўздан бошқа ҳеч бир сарварни тожга лойик кўрмаган бошини танидан жудо қилиб, зафарпаноҳ шоҳ олдига олиб бориб, жаҳонни кезувчи саманди туёғи остига ташладилар ва шоҳга олқишу дуо айтиш шартларини адо этдилар. Ул ҳазрат илохий шукр саждалари ва жаноби тасоло ҳамдлари лавозимини бажаришга киришиб, тўғри йўл арбобларига назру садакалар улашди. Амирбек Мавсулу ва шу урушда жасурлик аломатларини намоён этган бирдамлик тўқайининг бошқа бир нечта шерларини турли-туман инъомлар билан сийлаб, юракларини фахру гурурга тўлдирди. Муҳаммадхон Шайбоний ва унинг амиру давлати устунларига тегишли ҳаддан зиёд ҳамда билимдон ҳисобчилар саноғига сиғмас миқдордаги ашё ва яроқларни эса улуғ ғозийларга тақсимлаб берди. Марви Шоҳижаҳон шаҳри аҳолиси ва халққа раҳм қилиб, ўлганлар бошларидан миноралар кўтарди<sup>171</sup>.

Муҳаммадхон Шайбоний саройида девонликнинг шарафли мансабига мушарраф бўлиб юрган, балки, иқтидор ва истеъдоди туфайли хоннинг барча мамлакат ва молиявий ишларини бажаришга дахлдор бўлган Ҳожа Камолиддин Маҳмуд Соғаржий бахт ва толле ёрлиги воситасида ўша кунни Марв шаҳри ичи-

---

<sup>171</sup> Нашрда келган матннинг бу каби жумлалари негадир қовушмаган бўлиб, “Тарихи Рашидий”, “Мусаххар ал-билод” асарларида у аниқ берилган. Яъни Муҳаммад Ҳайдар дуплот ва Муҳаммадёр ибн Араб катаган “шоҳ Марв аҳолисини “қатли ом” қилдириб, ўлиқлар бошидан миноралар ясаган”ни ёзадилар. “Мусаххар ал-билод”ни Эронда нашр эттирган Нодира Жалолоий ҳам бу асар қулъзма матнини ўзгартириб, нашрда бу жумлаларни: “Шоҳ Марв аҳолисига раҳм қилиб, ўлиқлар бошларидан миноралар ясади” шаклида беради. Кўринадики, дастлаб “Ҳабиб ус-сийар”нинг эронлик ношири бу каби ўзгартиришга қўл уриб, сунг чоп қилинган “Мусаххар ал-билод” ношири ҳам унга эргашган.



да турган кўйи ўз хони ўлгани воқеаси хабарини эшитиб, шоҳнинг мамлакат девони ишларини тартибга солиш мутасаддийси амир Нажмиддин Масъуд Сонийга яқин бўлиб олиш йўлини излаб, мақсади ҳосил шоҳга ихлосмандлик нақшини кўнгли лавҳига битди. Амир Нажмиддин Масъуд Соний унинг яхши хулқ ва мақтовли атворга лим тўла хислатидан бир бўлагини шоҳ арзига етказиб, тилини хожа шафелиги учун чоғлагач, Хожа Махмуд Соғаржий жонини ўлимдан омон саклаб қолишга эришди. Бугина эмас, балки ўша айёмда шоҳлик меҳрининг куёши илоҳий марҳамат уфқидан порлаб чиқиб, аҳволи сари нур сочди ва вазирлик мансаби-ю соҳиби девонлик ишларига тайинланиб, кадр ва макоми пояси юксалди [514-бет].

### **ЖАҲОН ПОДШОСИ ШОҲ ИСМОИЛНИНГ ОВГА ЧИҚҚАНИ ВА ҚИШЛОВ МАНЗИЛИ ВОҚЕАЛАРИДАН БИР БЎЛАГИ ЗИКРИ**

[521-бет.] Зафар байрокли шоҳ Исмоил Кум шаҳрида фалак ва юлдузларни яратганнинг неъматларига ғарк бўлиб турган киши фаслида ва олий ҳимматининг лочини Хуросон мамлакатлари шикоридан тинчиган маҳалда оху ва тоғ эҳқиси-ю парранда овини кўнглига тутди...

...Ана шу ов асносида жаноб султоний сайф ул-аномий жаноб Музаффар битикчи Мозандарон вилоятларидан қайтиб, амир Абдулкарим ва Око Муҳаммадни улар зиммасидаги маблағдан ундирилган ўн минг тумон пул билан бирга осмонга тенг даргоҳга олиб келди ва бу ишни адо этиш борасида ул икки амир

Ўртасида бўлиб ўтган бахс-тортишувни шох арзига етказди. Мухлисларни сийловчи шох жаноб султонийни турли-туман лутфу эъзолар билан сарафроз қилиб, Мозандарон ҳокимларининг эса бир неча вақт қутлуг ўрдуда туришлари ҳақида олий фармон берди. Шунга кўра ҳокимлар бу кишни осмон маконли даргоҳ мулозиматида охирига етказдилар. Бу қишлоқ юртида содир бўлган воқеалардан яна бири шуқим, ўтган воқеалар рўй бериб турган пайтда элчилик расми билан Захир ус-салтана вал-хилофа Муҳаммад Бобур подшоҳ олди-га кетган Муҳаммадҷон эшиқоғоси Нажмбек қайтиб келиб, шох арзига «ҳазрат Бобур Мирзо жаноблари Мовароуннахрнинг барча шаҳарларини Аҳмадбек сўфи ўғли ва Шохруҳбек афшорнинг улуғ амирлари ёрдамида қўлга киритганига қарамай, димоғи саройи сари ғурур ва такаббурлик тутунига йўл бериб, қаршилиқ қўйига тушган» қабилдаги гапларни етказди. Шунга кўра «Нажмбек захиралар денгизидан бир гуруҳи, яъни қиёмат аломатли қўшиндан бир бўлағи билан Мовароуннахр сари йўлга тушиб, Журжоннинг Қолпушида қишлоқ қилиб ўтирган Дев Султонни ўзига қўшиб олсин ва Амуя дарёсидан кечиб ўтиб, Муҳаммад Бобур подшоҳни қаршилиқ саҳросидан чиқариб, келишув ва дўстликнинг тўтри йўлига солсин» деган қутлуг фармон чиқарилди.<sup>172</sup>

<sup>172</sup> Бу ерда Бобурнинг 1511 йил Бухоро ва Самарқандни эгаллаган пайтига ишора бўлиб, Муҳаммадҷон эшиқоғоси ўз шахсий гарази мақсадида Бобур устидан қақимчилик қилган. Бирок, шохнинг Самарқандга Бобур ҳузурига мақсус қишларни юборишидан эшиқоғосининг ўз сўзларини қандайдир бир далиллар билан исботлаб бера олгани ҳам англашинади. Эшиқоғоси ва Бобур орасидаги ёмонлашган муносабат ҳақида қуйироқда маълумот берилган.

Шу воқеалар бўлиб турган орада Рум подшоси Йилдирим Боязиднинг вафот этгани борасидаги гап-сўзлар таржалди ва унинг Султон Мурад номли набираси отаси ўрнига ўтирган амакиси Султон Салимдан қочиб, олампахоқ шоҳ даргоҳига илтижо билан келди. Шунга кўра «Дев Султон қутлуғ ўрдуга келиб кўшилсин, Нажмбек эса ҳали номларини тилга олажагимиз бир нечта амирлар билан бирга Мовароуннаҳр томон йўналсин» деган шохлик фармони чиқарилди.

Шунингдек, ўша вақтда осмон гуломли шоҳ яна бир бор Мозандарон ҳокимларини ўз иноятларига сазовор этиб, қайтиб кетишлари учун рухсат бераркан, зиммаларидаги йигирма минг тумон миқдорида қолган маблағни ҳам даргоҳга юборишларини шарт қилиб кўйди ва улар мазкур маблағни ундириш бўйича мутасадди бўлмиш жаноб султоний сайф ул-аномий Музаффар битикчи хизматида дуоғўйлик ва саноҳонлик қилганча ўз ўлкаларига бориб, ул жанобнинг кўнгли розилигини топиш ва қолган пулни саранжомлаш учун йўлга тушдилар.

**ЗАҲИРИДДИН МУҲАММАД БОБУР ПОДШОҲ  
ВА ЎЗБЕК СУЛТОНЛАРИ ЎРТАСИДА РЎЙ  
БЕРГАН ВОҚЕАЛАР ВА УРУШЛАР ЗИКРИ ВА  
АМИР НАЖМИДДИН СОНИЙНИНГ ОЛАМНИ  
ЯРАТГАН ЭГАМНИНГ ҚАЗОВУ ТАҚДИРИ БЎЙИЧА  
МОВАРОУННАҲР ТОМОНГА ЮРИШ ҚИЛГАНИ  
БАЁНИ**

Доруссалтана Ҳирот шоҳликнинг зафар аломатли байроклари тикилган жойга айланган кунларда Захириддин Муҳаммад Бобур подшоҳ сўз билгич элчиларни мул-кўл совға ва тухфалар билан иқбол ошёнли шоҳ даргоҳига юбориб, ихлос ва давлатхоҳлик изхорини қилди. Ул олий зотли хусравнинг эътиқод олтини мамлакат олувчи шоҳнинг куёш нурли кўнгли маҳак<sup>173</sup>и орқали тўла соф даражада аён бўлганига биноан Бобур подшоҳнинг элчисини чексиз инъом ва эҳсонга кўмиб, шундай қутлуғ фармон чиқарди: – Ул ҳазрат Мовароуннаҳр мамлакатидан қанчасини ўз тасарруфи доирасига киритса, шунчасига эгалик қилаверсин.

Нихоят Муҳаммад Бобур подшоҳ 917 йил<sup>174</sup>и Зобулистон лашкари билан маврусий вилоятлар сари йўналди ва Бадахшон ҳудудига етишгач, Мирзо Султон Вайс<sup>175</sup>ни ўзига кўшиб, дастлаб юриш байроғини Ҳисори Шодмон тарафга қараб кўтарди. Ул мамла-

---

<sup>173</sup> Маҳак – тиллонинг софлигини аниқлайдиган тош.

<sup>174</sup> 917 йил (муҳаррам ойи) – 1511 йил 31 март – 29 апрель.

<sup>175</sup> Хон Мирзо лақабли Бадахшон волийси темурий Султон Увайс Мирзо бин Мирзо Султон Маҳмуд бин Мирзо Султон Абусаид кўзда тутилмоқда.

катларнинг ҳокимлари Ҳамза Султон ва Маҳди Султонлар мулк вориси келаётганидан хабар топишгач, ўз кўшинларини йиғиб ва жангга ҳозирлаб, уруш майдони сари отландилар. Вахш мавзеси атрофида Бобур Мирзонинг куёш ёғдули туғи душман турган жойга етиб, икки орада жуда шиддатли тўқнашув рўй берди ва шохий иноят кўмаги ва шохлик давлати мадади билан Заҳир ус-салтана Бобур Мирзо зафар топиб, ўзбек кўшини енгилди. Ҳамза Султон ва Маҳди Султон жангда ўлдирилиб, Ҳисори Шодмон, Хатлон, Қундуз, Баклон вилоятлари Амир Темур Кўрагон хонадонининг ул самарасининг эгаллаш доирасига кирди ва у ўзининг мактовли шеvasи такоzosича адолат ва халқпарварлик байроқларини баланд кўтариб, бу ойдин фатҳ воқеасини ҳашамат қондали шох даргоҳига арзадошт қиларкан ниёз калами билан «агар донгдор амирларингиздан бири олий мақомли ғозийларнинг бир гуруҳи билан бирга келиб, бу мухлиснингизга кўшилсалар, тез фурсат ичида Мовароуннаҳрнинг бошқа мамлакатлари ҳам фатҳ қилиниши ва бу вилоятларда хутба-ю танганинг шоханшоҳ номи ва унвони билан зийнат топиб, ўзбек султонларининг эса жаҳонбонлик пойдевори кўпориб ташланишига умидимиз бор» дея ёзиб юборди. Бобур Мирзонинг элчилари Сидра<sup>176</sup> мартабали бўсағага етишгач ва Жамшид ҳашаматли амирлар воситасида ул аризининг мазмунини шохга арз этгач «Аҳмадбек Сўфи ўғли ва Шохрухбек афшор уруш тўқайи арслонларидан бир тўдаси билан Ҳисори Шодмонга бориб, Муҳаммад Бобур Мирзога ёрдам

<sup>176</sup> Сидра (тул мунтаҳо) – жаннатдаги энг баланд дароҳт номи.



берсинлар ва ул олам султонлари қаймоғи мавкабида ўзбек фирқаларига қарши уруш ва жанг қилсинлар» деган қутлуғ ҳукм чиқарилиш шарафини топди. Шунга кўра, ул пок кўнгилли икки амир Ҳисори Шодмон томонга ошиқиб, Муҳаммад Бобур подшоҳ улар ёрдамига суянгаж ҳолда Самарқанд сари йўналди. Ул диёр ҳокими Муҳаммад Темур Султон ва Бухоро волийси Убайдуллоҳ Султон бу ҳолдан хабар топгач, давлат марказини бўш қолдириб, Туркистон томонларга кетдилар. Бобурнинг нусрат аломатли байроғи ойчаси эса доруссалтана Самарқанд уфқидан кўриниш бериб, ул мамлакат ён-атрофи адолат ва инсоф нурлари билан зиёлик сифатини топди. Зулм ва бидъат аҳлининг расму қоидалари орадан йитиб, хутба ва танга маъсум имомларнинг – *уларнинг барчаларига Аллоҳнинг салоти ва саломи бўлсин* – шарафли ва фахрли зикри ва саййидлик паноҳли, Искандар қоидали шоҳнинг исми ва унвони билан безанди. Шу тариқа Муҳаммад Бобур Мирзо яна бир бор ота-боболари ўлкаси пойтахтида сарварлик ўриндигига қадам қўйиб, қутлуғ нишонга биноан Ҳисори Шодмон, Хатлон, Бадахшонни Хон Мирзога берди. Бухоро шаҳрида ва унинг қўлга киритилган бошқа музофотларида адолатпарвар ҳокимлар қўйди. Аҳмадбек Сўфи ўгли ва Шохрухбекнинг юракларини қимматбаҳо тортиқ ва муносиб совғалар, осмон кудратли отлар ва олтин танга тўла халтачалар ва гавҳар шодалари инъоми билан шод-хуррам қилди ва қайтишларига ижозат бериб, халифалик аломатли даргоҳнинг максоди ҳосил наввоби – шоҳ Исмоил учун турли-туман хусравона пешкаш ва ҳар хил подшоҳона тухфалар юборди. Бирок оламpanох

даргоҳдан элчилик расми билан Бобур Мирзо олди-га келган Муҳаммадҷон эшикоғосини тақдирлаш бора-сида бияроз унутиш ва гафлат йўли тутила қолибди. Шу сабабли Муҳаммадҷон эшикоғоси шохнинг Кум шаҳридаги қишлови пайти аъло тахт пойига ети-шиб, ҳазрат Муҳаммад Бобур Мирзо қаршилик ва бўйсунмаслик ўйига тушган, дея арз қилди. Юқорида айтиб ўтганимиздек, шу билан Нажмбек Зайнулоби-дин Бек, Бодинҷон Бек, Хожа Камолиддин Маҳмуд Соғаржий каби бир гуруҳ амирлар ва давлат устун-лари билан бирга Мовароуннаҳрга юзланди. Аммо ул ҳудудга етиб бормасдан бурун «ўзбек султонлари яна бир марта Мовароуннаҳр устига қўшин тортишиб-ди ва Муҳаммад Бобур подшоҳни енгитибди» деган хабар тарқалди. Бу сўзнинг шарҳи шуким, Муҳаммад Темур Султон ва Убайдулло Султон Аҳмадбек ва Шохрухбекнинг кетгани хабарини эшитгач, тагин Мовароуннаҳр шаҳарларини эгаллаш фикрига тушди-лар ва Жонибек Султон ҳамда бошқа қариндошлари билан иттифок бўлиб, инъом ва эҳсон эшиқлари-ни ўзбек улуси сардорлари юзи сари очдилар ва шу тариха шижоатли қўшин ва жасорат аломатли лашкар йиғиб, 9 18 йил бошлари<sup>177</sup>да йўналиш байроғини Бухоро томон кўтардилар ва ўзбек қўшинининг манғилойи шошилинич қаноти билан масофаларни босиб ўтган кўйи келиб, туйқусдан ул шаҳар ён-атрофини босқин-чопқин қилди. Бу хабар Муҳаммад Бобур подшоҳ қулоғига етгач, журъати кўплигидан мулозиматида турган ёнидаги озгина қўшин билан Самарқанддан

<sup>177</sup> 918 йил бошлари (муҳаррам) – 1512 йил 19 март – 17 апрель.

чикиб, душманни йўқотиш учун юзланди. Муҳаммад Мазидхон ҳамда ақл ва тадбир эгаларидан бир қанчаси «бу янглиғ оз аскар ва етар-етмас жанг яроғи-ю кам курол-аслаҳа билан душман устига бостириб бориш давлатга яраша иш эмас, эҳтиёткорлик йўли тақозосига кўра бу юриш катта кўшин йиғилгандан сўнг ва урушга талабкор довиюраклар тўплангандан кейин амалга ошиши лозим» дея нечоғлик арз қилмасинлар, подшоҳ бу сўзларни розилик қулоғи билан эшитмади. Бухоро атрофига яқин етганда «ўзбек султонлари бир неча кўч орқарокка чекиниб ўтиришибди» деган хабарни эшитгандан сўнг эса яна ҳам ботирроқ бўлиб, оти жиловини душманнинг кетидан қувлаш сари бурди. Икки-уч бекаг босиб ўтилгач, тўсатдан Муҳаммад Темур Султон ва Убайдуллоҳ Султон ва Жонибек Султон чексиз кўшин билан уруш сафини ясаб, кўнгилларини кўрқув ва гумондан тозалаб ул саҳрода ўз қорасини кўрсатиб қолдилар<sup>178</sup>. Захир ус-салтана Муҳаммад Бобур душманнинг бу жасорат ва ботирлигини мушоҳада қилгач, кўшинни тайёрлашга тушди ва адоват қиличини қасос кинидан суғуриб, ўзбек тойифасидан бир гуруҳини ўлдирди ва ярадор қилди. Чигатоё кўшинининг бир нечта довиюраклари биринчи ҳамладаёқ ўзбекнинг Ўрус бий, Хожа Аҳмад қўнқирот, Кўчак бий каби нўёнларини асир олдилар ва ҳазрат Бобур подшоҳнинг нурли назарига олиб бордилар. Шу заҳоти ул уч ўзбек

<sup>178</sup> Рузбехон Исфаҳоний, Муҳаммад Хайдар дуглот, Муҳаммадёр ибн Араб ктаган каби тарихчилар маълумотига қараганда, аксинча, Бобур Мирзо қўшинининг сони гоҳ қирк минг, гоҳ етмиш минг кишидан ташкил топиб, ўзбеклар қўшини эса гоҳ уч минг, гоҳида бор-йўғи уч юз кишидан иборат бўлгани айтилади.



сардори шер овл<sup>о</sup>вчи шахриёрнинг пайкони захмидан охират олами сари кетишди. Аммо ўзбек султонлари ёнидаги бошқа амирлар ва сардорлар қасос олишга қаттиқ ҳаракат қилган кўйи оёқни мардоналик майдонига кўйиб, қўлларини уруш асбобларини ишлатиш учун чўздилар ва жанг чангини тез айланувчи осмон авжигача ўрлатиб, сувдек ялтирар пайкон учи ва ўточар қилич тиғи билан бобурий мавкабдаги жуда кўп мулозимлар номини бако лавҳидан ўчирдилар. Ул ҳазрат имкон борича чидам майдонида оёқ тираркан, бироқ ёнидаги кўшини тарқаб кетгач, адоват талаб ўзбеклар эса анча чаққонлашиб, устун кела бошлаганидан сўнг юзни Бухоро томонга қаратди ва ул шаҳарда ҳам туришни маъқул топмай, у ердан Самарқандга кетди. Самарқандда оила ва бола-чакасини ўзига кўшиб, Ҳисори Шодмон сари отланди.

Муҳаммад Темур Султон, Жонибек Султон ва Убайдуллоҳ Султонга яна бир марта Самарқанду Бухоро мамлакати ва у ерларга қарашли туман, музофоту ён-атроф ерлари насиб қилиб, ҳар бири ўзининг илгариги қароргоҳида қарор топишди ва халққа меҳрибонлик қургузиб, ул ўлканинг ҳеч бир аҳолисига озор етказмадилар. Сўнг мазкур йилнинг жумодилаввал ойи<sup>179</sup>да тағин биргалашиб, йўналиш байроғини Ҳисори Шодмон томон хилпирагдилар.

Муҳаммад Бобур подшоҳ душман келаётганидан хабар топгач, Хон Мирзо билан бирга Ҳисори Шодмон қалъаси Аркини мустаҳкамлади ва унинг буйруғига кўра шаҳар қалъаси атрофида айлана қилиб чуқур

---

<sup>179</sup> 918 йил жумодилаввал ойи – 1512 йил 15 июль – 13 август.

қазидилар, қалъа тапқарисидаги маҳаллаларга эса кўчабанд, яъни ғов ва тўсиқлар ўрнатдилар. Ёрдам учун Балх ҳокими Байрамбек Қаромонлу олдиға одамлар жўнатдилар. Байрамбек Қаромоний ҳам амир Султон Муҳаммад Шерозийни ботир мужоҳидлардан уч юз нафар ғозийға бош қилиб, уларға ёрдам тариқасида жўнатди.

Ўзбек султонлари Чағониёнғача келиб, аммо шу ерда Ҳисори Шодмон қалъаси мустаҳкам қилиб беркитилгани ва шижоат аломатли ғозийларнинг у ерга етиб келгани каби кучли мудофаа тайёргарлигидан хабар топшиғач, уруш оловини ёқишни маъқул кўрмай, орқаға қайтиш жиловини юртлари сари бурдилар.

Хуросон ҳокимлари ахбори ва Муҳаммад Темур Султон, Убайдуллоҳ Султон каби ўзбек султонларининг Мовароуннаҳр диёрини қайтадан ишғол қилгани Нажмбекнинг қулоғига етишғач, ўзбек ҳукмдорларини йўқотишни ният қилиб, ёнидаги ўн икки минг нафар ғозийлар билан Хуросон ҳудудига келиб кирди. Ҳусайнбек Лала Ҳиротдан келиб, шунингдек ён-теварақ вилоятларнинг ҳоким ва доруғалари ҳам Нажмбекка қўшилдилар ва сочки-ю пешкаш ўтқариб, итоат занжирини бўйнига осган кўйи Мовароуннаҳр томонга равона бўлдилар. Шунингдек, Хуросоннинг атроф туман ва шаҳарларидан саййидлар, козилар ва таникли шариф кишилар ҳам амир Нажмбек ҳузурига келиб, дуоғўйлик ва кўнгил сўрашлиқ шартларини бажо келтирдилар. Ул жаноб ҳам келган бу барча жамоатни турли-туман инъом ва иззат-икром билан сийлаб, қандай ишлари бўлса, истакларини етарлича бажо келтирди. Амир Гиёсиддин Муҳаммад бин амир Юсуфни эса ёнида олиб қолиб,

бошқа каттаконларга қайтиб кетишлари учун рухсат берди. Сўнг Жом йўлидан Мурғоб дарёси бўйига бориб, у ердан Балх сари ошиқди. Байрамбек Қаромоний Нажмбек мавкабини кутиб олиш учун чиқиб, зиёфат ва меҳмондорчилик шартларини керагича адо этди. Амир Нажмбек йигирма кунга яқин Балх атрофида қўш ташлаб ўтириб, қўшин сардорларидан бир гуруҳини кема ва қайиқларни Термиз кечувига йиғиб келтириш учун Амуя дарёси бўйига жўнатди. Амир Ғиёсиддин Муҳаммадга «Ҳисори Шодмонга бориб, Муҳаммад Бобур подшоҳни шоҳликнинг битмас-туганмас лутфу иноятдан умидвор қилган қўйи ул худуд қўшинлари билан Нажмбекка қўшилишини айтиш» топшириғини берди. Шундан сўнг Термиз ўтарлигига шошилиб, мазкур йилнинг ражаб ойи<sup>180</sup> да дарёдан кечиб ўтди ва ҳали Термиз атрофида турганида амир Ғиёсиддин Муҳаммад Ҳисор томондан қайтиб келди ва бобурий мавкабнинг яқинлашиб қолгани хабарини етказди. Амир Нажмбек бир неча амирлар ва озгина хос мулозимлари билан ул хазратни бир неча фарсах ерда кутиб олиш учун олдинга юрди ва Банди оҳанин деб ҳам аталувчи Чакчак довоида томонларнинг мулоқоти рўй бериб, ҳар икки тарафдан ҳам нисор ва пешкаш шартлари амалга ошди.

У томонда эса ўзбек султонлари Нажмбекнинг дарёдан ўтганидан хабар топишгач, апил-тапил куз ҳосили, яъни даладаги ғалла ва дуккакли дон-дун қабиларни йиғиштириб, қалъаларга ташиб киритдилар. Мовароуннаҳр шаҳарларидан ҳар бири қалъа ва кўргонини бекитишни битта султон ёки амир зиммасига юклаб, мудофаа мақсадида беркиниб олдилар.

<sup>180</sup> 918 йил ражаб ойи — 1512 йил 12 сентябрь — 11 октябрь.

## АМИР НАЖМИ СОНИЙНИНГ УЛУҒВОРЛИК ВА КОМРОНЛИК ҲОЛИДАН БИР БЎЛАГИ ЗИКРИ ВА УНИНГ ЖАНОБИ ЖАЛОЛИ СУБҲОНИЙ ҒАҚДИРИГА БИНОАН ШАҲИД БЎЛГАНИ БАЁНИ

Сўз яшаш пойдевори курувчиси ва киссагўйлик коидасининг тартибга солувчиси бу хикоятни шу сабабли ракам қиладиким, амир Нажми соний лақабли Ёр Ахмад Исфаҳоний фаросати кўплиги ва ишбилармонлик, билимдонлик сифати туфайли жаҳонбонлик ишларини бажаришга тайинланиб, мамлакат олувчи шохнинг девон ишлари ва ҳисоб-китоб юмушларини амалга оширишда тенгсизлик байроғини кўтарар эди. Юқорида ёзганимиз каби динпаноҳ шох ҳазратлари амир Нажм Заргар вафотидан сўнг ўз ишларининг бошқаруви ваколатини ул жанобнинг қудратли қўлига топшириб, мутлак соҳиб ихтиёр килди ва у уч-тўрт йил шу зайл девон ишларини мустақил ҳолда адолат билан бажариб, шохнинг ишончини қозонди ва катта қудратга эга бўлди...Буларни айтишдан мақсад шуким, Нажми Соний<sup>181</sup> ўзининг ана шу шавкат ва ҳашаматидан мағрурланиб, шохдан руҳсат олиб ҳам ўтирмасдан Мовароуннахр фатҳи қафолати ва ўзбек кўшини билан урушиш вазифасини бўйнига олган кўйи бу хатарли иш ва улуғ хутбани осон ва енгил санади. Ва Амуя дарёсидан ўтгач ва ҳазрат Захир ус-салтана Бобур Мирзо билан учрашгач, йўналиш байроғини Хузор томон кўтарди. Ул мавзенинг ҳокими бўлмиш Ок

<sup>181</sup> Нажми соний (иккинчи Нажм) – бу лақаб унга Нажм Заргар исмли вазир вафот этиб, Нажмбек Исфаҳонийнинг унинг ўрнига ўтиргани учун берилган.

Фўлод Султон улуғ ғозийлар билан урушишга кучи ет-маслигини билиб, шаҳарнинг арбоб ва катталари билан сулҳга келишиб олди ва аҳду паймон талабидан сўнг Хузур қалъаси дарвозаларини очди. Амир Нажми соний аҳду паймонга қарамай, уни ҳибсга олди. Халкуту юзбегини ул макондаги ўзбеклари билан бирга ўлдириб, аммо халққа тегмади. У ердан ўтиб, Қарши томонга йўналди. Ул шаҳар ҳокими Шайхим Мирзо мудофаа уруши ва қаршилик мақомида собитқадам турди. Нажмбек шаҳар атрофини амирларига тақсимлаб, ҳар ким ўз мурчалига тушиб, зафарли кўшин аскарлари ўқ ва тўфанг отишга киришдилар ва манжанақ тоши билан Қарши кўрғонининг буржу борасига раҳна солиб, икки-уч кун ичида қаҳру ғазаб шиддати билан ул шаҳарни истило қилдилар. Шайхим Мирзо тобелари билан бирга тақдир сарпанжасига асир тушди. Ўзини ҳимоя қилган шаҳар халқи ҳақида эса «катли ом» бўйича олий ҳукм чиқиб, аҳоли ёппасига киргин қилинди. Амир Ғиёсиддин Муҳаммад бин амир Юсуф ва аъёнлардан бир гуруҳи уруш чоғи ул шаҳарда бўлган айрим бегуноҳлар конини амир Нажмдан тилаб олмоқчи бўлдилар. Аммо у қабул қулоғи билан тингламади. Амир Нажми Соний ўзбек кўшини ва аҳолидан ўн беш мингга яқин кишини аёвсиз равишда қиличдан ўтказиб, Бухоро атрофига қараб кетди. Чунки Жонибек Султон, Убайдуллоҳ Султон ўзбек кўшинининг катта қисми билан бирга шу шаҳарда турган ва тўкнаш, уруш-саваш нақшини ва қаршилик, жангу жадал сувратини кўнгли лавҳи-ю қалби саҳифасига чизиб ўтирган эдилар. Амир Нажм Бухоронинг икки фарсахлик ерига етгач, Муҳаммад Те-

мур Султон ва Абу Саид Султон бин Кўчкунчихоннинг Самарқанд кўшинидан бир гуруҳи билан бирга қарши хужумга ўтиш учун йўлга тушганини эшитди ва ўзи етиб келинган мазкур манзилда турган кўйи Байрамбек Қаромонийга паҳлавонлик маслакининг соликлари билан бир тўдаси ҳамроҳлигида мазкур ўзбек султонларини маҳв этишни буюрди. Ул икки ўзбек султони Байрамбек ва ғозийлар келаётганидан хабар топишгач, Ғиждувон қалъасига кириб, у ерни мустаҳкам қилиб беркитдилар. Байрамбек бу воқеани Нажмбекка хабар қилди. Нажмбек барча аскарлари билан Ғиждувон қалъаси атрофи сари ошиқди. Муҳаммад Темур Султон ва Абу Саид Султон қалъа атрофини мустаҳкамлаб, ҳар куни қон тўқар ўзбеклардан бир тўпини қалъадан ташқарида уруш-саваш солиш учун юборишарди. Бу томондан ҳам ғозийлар уларга рўпара бориб, гоҳи енгар, баъзида енгилар эдилар. Бир неча кун аҳвол шу тарзда кечиб турди. Бора-бора сипоҳилар орасида озик-овқат ва озуқа ҳам йўқола бошлади. Ўзбек султонлари атворидан яхши хабардор бўлган Хожа Камалиддин Маҳмуд Соғаржий бу қалъани уруш билан эгаллаш мумкин эмаслигини билиб, Нажмбек арзига ушбуларни етказди: – Бу қалъада Ғиждувон қалъасини қамал қилишдан фойда чикмайди, чунки бу қалъа мўлкўл озуқа захираси ва кўп қурол-аслаҳа, уруш асбоб ва жанг яроқлари билан лим тўлган. Шунингдек, унда иккита жасур ўзбек султони жуда шижоатли амир ва жангчилар билан туришибди. Агар яна бир неча кун бу манзил нусрат асарли лашқар қароргоҳи бўлишда давом этса, ғозийлар дон-дун йўқлиги жиҳатидан етишмовчилик азобини чекишажак. Давлатга ярашиғи

шуким, бу ердан жўнаш нокорасини чалиб, Қарши ва Ғузур атрофига бориб, кишлов кўшини ташлайлик. У ерда эса шохликка қарашли Балх вилоятларидан ўрду бозор<sup>182</sup> ахли ва саркорлару савдогарлар ғалла ва керак буюмларни зафар иктибосли ўрдуга келтирадидлар. Қиш охирлагач ва ўзбекларнинг ғамлаганлари юзни камайиш сари қаратиб, от-улоқларимиз учун эса даладашда ўт-ўлан кўрингач, қалъа ва шаҳарлар фатҳи учун йўналсак.

Амир Нажмбек бу таклиф жавобида куйидагича деди: – Агар биз Ғиждувон қалъаси атрофидан кўзғалиб, Амуя дарёси бўйига кетсак, ўзбеклар бизнинг бу ҳаракатимизни кўрқанимизга йўядилар ва бу каби иш уларнинг яна ҳам дадил тортиши-ю жасорати кўпайишига олиб келади.

Ҳали бу баҳсу мунозаралар тугамай туриб, Захири ус-салтана вал-хилофа Муҳаммад Бобур подшоҳ мазкур гаплар устига келиб, у ҳам тезда кўчиб кетиш сўзларини орага солган кўйи қамални тўхтатиб, Ғузур ва Қарши томонга кетиш борасидаги таклиф устида қаттиқ турди. Амир Нажм ул ҳазратнинг сўзини юзаки равишда қабул қилиб, ундай бўлса бутун эмас, ўша томонларга эртага кўча қолайлик, деди.

Эртасига, яъни 918 йил муборак рамазон ойининг учинчиси<sup>183</sup> да сешанба куни эрта тонг билан Мовароуннаҳр султонлари кўшинининг илғор қисми Ғиждувон қалъаси атрофидаги дарахтлар орасидан

---

<sup>182</sup> Ўрду (ўрда) – ҳукмдорлар истиқомат қиладиган қароргоҳ. Дала шароитида ҳам шундай аталаверган; Ўрду бозор – мазкур қароргоҳ ва кўшин турган жойда ташкил этиладиган бозор.

<sup>183</sup> 918 йил 3 рамазон – 1512 йил 12 ноябрь.



кўриниш берди ва амиру вазирнинг ўй-тадбир ишлари чиппакка чиқди. Бу воқеанинг тафсили шуқим, Бухоро шаҳрида Жонибек Султон ва Убайдуллоҳ Султон қулоғига «амир Нажмнинг иши Гиждувон атрофида ҳеч илгари силжимаяпти, ҳар кун лашкар ахли озик-овқат ва ем-хашак топиш илинжида таркалиб кетишмаяпти» деган сўзлар етишгач, уруш азмига жазм қилиб, барчаси совут қийган ва ханжар санчар пиёда ва отликдан иборат кўп йиғин билан илғор йўсинида Гиждувон томон юзландилар. Ул диёр ҳудудига етишгач, Муҳаммад Темур Султон ва Абу Саид Султон қалъадаги ўзбеклар билан бирга уларга қўшилиб, бир-бирига жилвдош ҳолда юзни уруш-саваш майдонига қаратдилар. Амир Нажм Соний бу ҳолни мушоҳада қилгач, уруш ва курашишдан бошқа чорани кўрмади ва лашкарнинг майсара-ю маймана қисмини улуғ амирлар вужуди билан мустаҳкамлади. Ўзи эса қўшиннинг қалб қисмида тураркан, Заҳириддин Муҳаммад Бобур подшоҳнинг эса хос қўшини билан тахт ва шай туриб, қайси тарафда ёрдамга эҳтиёж сезилса, ўша томонга боришини тайинлади.

Сафлар тўғирлангач, ўзбек сипоҳининг буронгоридан икки юзга яқин жасур суворий майдонга от солиб, Нажмбек лашкарининг жувонгорига ҳамла қилдилар. Ўша томонда турган Байрамбек ул жамоат хужумини қайтариш учун юзлангани ҳамон дайди бир ўк зарбидан ер тубан қулади. Бу воқеа ўзбеклар жасоратининг ортишига сабаб булиб, бирданига Озарбайжон ва Ирок (Эрон) қўшини устига қараб югурдилар. Нажмбек билан адоватлашиб юрган амирлар қурол-аслаҳани ишга солиш ўрнига қочиш водийсига



кадам кўйдилар. Натижада Нажмбек кўшини енгилиб, Захир ус-салтана Муҳаммад Бобур Мирзо ўзининг хос кўшини билан тўппа-тўғри Ҳисори Шодмон томонга қараб кетди. Амир Гиёсиддин Муҳаммад бин амир Юсуф ва Ҳожа Камолиддин Маҳмуд Соғаржий ҳам ул подшоҳ ҳазратлари мавкаби кетидан йўлга тушишди. Ҳусайнбек Лала ва Аҳмадбек Сўфи ўғли Карки кечуви сари юзландилар.

Ўзбек султонлари байроғи ойчаси фатҳу зафар уфқидан балқиб чиқиб, бу голиб Мовароуннаҳр кўшини ўлдир-ўлдир ва ғоратни бошлаб юборди. Убайдуллоҳ Султон кўшинидан бир тўдаси жанг майдонида амир Нажми соғийнинг кетидан етиб, ул жанобни тақдир сарпанжасининг асирига айлантирдилар ва ўз подшоҳи олдига олиб бориб, буйрукка биноан ҳаёти пойдеворини кўпориб ташладилар. Зайнулобидин бек ҳам кўпгина ғозийлар ва бир гуруҳ хуросонликлар билан бирга ўша куниси шахидлик шарбатини татидилар. Ҳожа Муҳиддин Яҳё бин Ҳожа Шамсиддин Марворид ва Ҳожа Миржон бин Ҳожа Қавомиддин Муҳаммад бин устод Адл меъмор сингари шу ердаги тоғ ва ғорларга кочган яна бир бўлак ҳам самарқандликлар кўлига тушиб, ҳалоқат жомини сипқордилар.

Мазкур йил рамазон ойининг ўн еттинчиси<sup>184</sup>да бу хабар салтанат уйи Ҳиротга етиб, шоҳнинг жаҳон бўйсунувчи ҳукмига кўра вазир ва Хуросондаги мулкӣй ва молиявий ишлар бўйича ихтиёр эгаси бўлиб ўтирган амир Имоиддин Маҳмуд Исфаҳоний Ҳирот кальасининг девор ва миноралари, дарвоза-ю

---

<sup>184</sup> 918 йил 17 рамазон – 1512 йил 26 ноябрь.

истехкомларини бутлашга киришди. Бу хабар келганидан уч-тўрт кун кейин Хусайнбек Лала ва Аҳмадбек Сўфи ўғли соғ-саломат ташриф буюришди. Олам буйсунувчи фармонга биноан Ҳирот ҳукумати Аҳмадбек кўлига ўтгани учун у келиб Ихтиёрддин қалъасига қўш ташлади ва халқ ва қўшинни бошқариш ишига киришиб, халққа адолат ва инсофу диёнат палосини ёйишга ваъда берди.

Заҳриддин Муҳаммад Бобур Мирзонинг кетидан Ҳисори Шодмонга кетган амир Ғиёсиддин Муҳаммад бин амир Юсуф ва Хожа Камолиддин Маҳмуд Соғаржий қабилар ул ҳазратдан иноят ва риоят топиб, Балх томонга юзландилар. Рамазон ойининг ўн бешинчиси<sup>185</sup> да Балхга бориб, Хожа Маҳмуд Соғаржий ўша ерда қолди. Амир Муҳаммад Ҳирот сари ошиқиб, амир Имоиддин Маҳмуд ва бошқа амиру ҳокимлар билан бирга ул жаннат мақомли шаҳар деворини мустаҳкамлаш ишида етук саъй-ҳаракатлар кўргузди.

Бу хабарларнинг бариси осмон ошиёнли даргоҳ эгаси бўлмиш шоҳ ҳазратларига ўша Исфаҳон кишловида ўтирган пайти етишди. Шоҳ яна бир марта Хуросонга юриш ва ўзбеклар зулмини йўқотишни олий ҳимматли кўнглига тугди [530-б.].

---

<sup>185</sup> 918 йил 15 рамазон – 1512 йил 24 ноябрь.

**МУЗАФФАР ТУҒЛИ ШОҲ ҚЎШИННИНИНГ  
МАНГИЛОЙ ҚИСМИ МАШҲАД ШАҲРИ АТРОФИГА  
ЕТИШГАНИ ВА ЎЗБЕК СУЛТОНЛАРИНИНГ  
ГАЛАБА ДАЛОЛАТЛИ ШОҲ ЯҚИНЛАШГАНИНИ  
ЭШИТИБ ҚОЧИБ КЕТИШГАНИ ЗИКРИ**

[353-б.] Шох Бастом ўлангидан Колпуш яйлоғига юрди ва Шероз ҳокими Халил Султонни бир гуруҳ темир тоқатли довьораклар билан мангилой йўсинида мукаддас Машҳадга жўнатди. Халил Султон шохлик давлати кучига суяниб, масофаларни босиб ўтишда тезлик кўрсатган кўйи яшин ва шамол каби мукаддас Машҳадга юзланди. Ул шаҳарда ўтирган Убайдуллоҳ султон бу воқеадан хабар топгач, сабру қарор оёғи қалтираб, ўз икки чорасини фақат қочиб қолишда билди ва Халил Султонбек шаҳарнинг бир фарсахлик ерига етган чоғда Машҳаднинг бир нечта арбоб ва калонтарларини кўчириб, қайтиш жиловини Марви Шоҳижаҳон сари бурди, у ерда ҳам тўхтаб туриш иложини амри маҳол билиб, Шери шутур йўлидан Чаҳоржўй кечувига қараб кетди ва Амуя дарёсидан кечиб ўтиб, Бухоро томон йўналди.

Шунга ўхшаб зафарли қўшин етиб келганини эшитгач, Хиротда ўтирган Темур Султоннинг ҳам юрагига гулгула ва кўрқув тушиб Самарқанд сари йўлгачикди. У ҳам Хуросон улуғларидан амир Гиёсиддин Муҳаммад бин амир Юсуф, амир Султон Маҳмуд бин амир Гиёсиддин, Хожа Жалолиддин Қосим Фаранхўдий, мавлоно Қосим Хондамир ва Хожа Шох Ҳусайн Хиёбонийни кўчириб, ўзи билан олиб кетди...<sup>186</sup>

<sup>186</sup> Бу воқеалар 919 (1513) йилнинг баҳори ва ёзида рўй берган.

Темур Султон Самарқандга етиб боргач, амир Гиёсиддин Муҳаммад бин амир Юсуфнинг ҳаёт ниҳолини қуритмоқни ният қилди. Аммо ул олий мартабали нақиблик паноҳи унлнғ кўнглидагини пайқаб, садрлик мансабида ўтирган мавлоно Низомнинг ёрдамида Самарқанддан қочиб, пиёда юрган кўйи Ҳисори Шодмон томон ошиқди. Захир ус-салтана Муҳаммад Бобур подшоҳ яна бир бор хайр ул-башар – пайғамбар авлодининг ул қаймоғини лутфи назари билан манзур тутиб, сафар асбобини иноят қилди. Сўнғ эса саййид ҳазратлари Зайналхоннинг бошқаруви пайғи до-руссалтана Ҳиротга бориб, олдинги дастур билан давлатхоҳлик эшикларини шоҳлик даргоҳининг эгаси Исмоил сафавий сари очди [536-б.].

**ҚУТЛУҒ МАВКАБНИНГ НАХЖАВОН ҚИШЛОВИГА  
КЕТГАНИ ВА ДЕВ СУЛТОННИНГ ГУРЖИСТОНГА  
ҚЎШИН ТОРТГАНИ ЗИКРИ ҲАМДА МОЗАНДАРОН  
ВА РУСТАМДОР ВИЛОЯТИ ИШЛАРИ ТАРТИБИ  
ВА ХУРОСОН ХАБАРЛАРИНИНГ ОЛАМПАНОҲ  
ШОҲНИНГ АРЗИГА ЕТГАНИ БАЁНИ**

[571-б.]...Олий мартабали шоҳ Нахжавон қишловидан Саҳанд сайхонлиги ва Озарбайжоннинг бошқа яйлоқлари сари кетди ва жаннатга менгзир бир ўтлоқзорда чодир ва ўтов куббасини қуёш ва ой қадар кўтариб, ўйин-кулги ва хурсандчилик палосини ёйди. Ўшга аснода Хуросон томондан элчи келиб, шоҳ арзига Убайдуллоҳхоннинг куп сонли қушин билан Хуросонни эгаллаш учун Амуя дарёсидан кечиб ўтгани ва ул ўлкада бало тўфони кўтарилиб, буюк Худонинг тақдир

кўли тафрика эшиklarини халк ҳаёти юзи сари очганини етказди. Шунга кўра, «шоҳ аъло ҳазратларининг якин кишиси бўлмиш Дурмушхон ўз ёнига Зайналхонни солиб, Хуросон ҳокимлари ёрдамига борсин» деган барча бажариши шарт фармон чикди ва ул олий шаънли Дурмушхон мамлакатпанох вазир Ҳабибуллоҳ Соважийни Қум шаҳрида кўйиб, йўналиш байроғини Хуросон томонга қараб кўтарди ва кўчма-кўч юрган кўйи Султониянинг Харракониға ошиқиб, отларга тин бериш учун бир неча кун ўша ерда истикомат палосини ёйди.

927 йил шабон ойи бошлари<sup>187</sup>да Ҳирот волийси Амир Султон кўрчи<sup>188</sup> олдидан Шоҳқули исмли киши осмон ҳашаматли даргоҳга келиб, шоҳ арзига фаройиб хабарларни етказди. Биринчиси шуқим, Убайдуллоххон чексиз сонли қўшин билан Ҳирот ташқарисига келиб, бир неча кун қамалга киришди ва бирор натижа чиқара олмаслигини билиб, қайтиш жиловини Мовароуннаҳр сари бурди. Иккинчиси шуқим, амир Ғиёсиддин Муҳаммад бин амир Юсуф Заҳир ус-салтана Муҳаммад Бобур подшоҳ давлатига нисбатан тарафдорликда айбланди ва Ҳирот ҳокими амир Султон кўрчи буйруғига биноан ражаб ойининг олтинчиси<sup>189</sup>да сешанба куни Ихтиёриддин қалъаси зиндонига ташланди. Эртасига эса бу саййид насабли амирнинг иши ўлим билан туғанди.

Адолат вужудли шоҳ амир Ғиёсиддин Муҳаммад

<sup>187</sup> 927 йил шабон ойи бошлари – 1521 йил 7 – 10 июль.

<sup>188</sup> Амир Султон кўрчи – кейинчалик Амир Хон лақабини олган Ҳирот ҳокими ва шоҳзода Таҳмосбининг акаси.

<sup>189</sup> 927 йил ражаб – 1521 йил 7 июнь – 6 июль.

бин амир Юсуф ишени текшириш ва тафтиш қилиш борасида жиддий ҳаракатлар кўрсатди ва аниқланишича, Убайдуллоҳхон Ҳирот ташқарисида ўтирган ва қамал ишларига киришган вақтда шаҳар ҳокими Амир Султон кўрчи томонидан ҳеч бир жасорат юзага чиқмаган ва шунга кўра ўзбеклар Ҳирот атрофидаги булукот ва туманларда кўп вайронагарчилик қилганлар. Аслида амир Ғиёсиддин Муҳаммад бин амир Юсуф ўзига нисбат берилган айбдан худди Юсуфнинг бўрисидек холи ва ҳеч бир гуноҳсиз бўлиб, Амир Султон кўрчи эса шахсий адовати орқасида зулм қиличи билан ул яхши эътиқодли фозил саййидга шаҳидлик шарбатини ичирган экан. Натижада шоҳликнинг ғазаб ўти алангаланди ва «музаффар байроқли шоҳзода Абулфатҳ Таҳмосб Мирзо ва Амир Султон дарҳол Ҳиротдан чиқиб, аъло тахт поясига келишсин ва Хуросон бошқаруви эндиликда олий мақомли донддор шоҳзода Сом Мирзога берилсин» деган фармон чиқарилди. Қуйида бу ҳикоят тафсили рақам қилинажак, иншооллоҳи таоло [573-6.]

### **ХУРОСОН МАМЛАКАТЛАРИНИ БОШҚАРУВЧИ АМИР СУЛТОННИНГ АҲВОЛИДАН БИР БЎЛАГИ БАЁНИ ВА УНИНГ БОШҚАРУВ ВАҚТИДА РЎЙ БЕРГАН АЙРИМ ВОҚЕАЛАР ЗАКРИ**

[575-6.]... Шоҳ томонидан ўз хизматлари эвазига «Амир Хон» унвони даражасига кўтарилиб, пойтахт Ҳиротда ўтирган кўйи Хуросон юртларига ҳокимлик қилаётган Амир Султон босар-тусарини билмай қолиб, молия ишлари вазири ва шоҳзода Таҳмосбнинг



ўқитувчиси амир Ғиёсиддин Муҳаммад бин амир Юсуфни ўзбошимчалик билан ишдан бўшатиб, унинг ўқитувчилик ўрнига ҳам мавлоно Аҳмад Табасийни тайинлади. Унинг бу иши шоҳга ёкмай, ҳар кимни қайтадан ўз жойига тайинлашни буюрди ва ўз фармони етказиш учун мавлоно шайх Абусаид Исфаҳонийни Ҳиротга жўнатди. Мавлоно шайх Абусаид Исфаҳоний 926 йил зулкаъда ойининг йигирма биринчиси<sup>190</sup>да якшанба куни доруссалтана Ҳиротга келди ва Амирхон ва амир Ғиёсиддин бин амир Юсуфнинг қоматини шоҳликнинг ёнида олиб келган қимматбаҳо тўни билан безаб, шоҳ фармони хам етказди. Амирхонга бу фармон оғир ботса-да, шайх Ҳиротда турган пайти Аҳмад Табасийдан шоҳзоданинг ўқитувчилиги вазифасини олиб, яна амир Ғиёсиддинга берди. Шайх Абусаид кетган захоти эса дарров девонлик ва ўқитувчилик ишларини яна амир Ғиёсиддин Муҳаммаддан тортиб олди.

Ана шу воқеалар рўй бериб тургани асносида ҳазрат Захир ус-салтана вад-дин Муҳаммад Бобур подшоҳ Қандаҳор ҳокими Шужобекнинг икбол ниҳолини кўпориб ташлашни ният қилди ва Кобулдан Қандаҳорга кўшин тортиб, уруш-саваш эшикларини ланг очди. Ул ҳазратга қаршилиқ кўрсатишга кучи етмаган Шужобек шаҳарда беркиниб, қалъа деворларини мустаҳкамлади. Муҳаммад Бобур подшоҳ Қандаҳор ташқарисини иктидор байроқлари марказига айлантириб, кучи етганча қалъадагиларни қамал азоби аро қолдиришга киришди ва кўпинча осмон хиром-

<sup>190</sup> 926 йил 21 зулкаъда – 1520 йил 3 ноябрь

ли абраш отга миниб, қалъа хандақи яқинига борар ва жасур сипоҳни уруш оловини ёқишга ундарди. У томондан ҳам Қандаҳор ботирлари мудофаа ва муҳориба қадами билан олдинга келиб, қилич ва ўқларни ишга солардилар, яшинсимон пайкон ва ўлим юришли тошлар билан кобулликларнинг ҳаёт қасридан тешиқ очардилар. Аммо кўпинча бобурий мавкаб баҳодирлари фатҳу зафар топиб, муҳолифларни енгар ва орқага чекинтирган кўйи то дарвозагача кетидан қувлаб борардилар. Шу аҳвол асносида Бадахшон ҳокими Хон Мирзо ўз юртида ўткинчи оламни тарк этди ва Бадахшон лаъли каби қон тубига дафн этилиб, унинг мусибатида қон томчилари кўзлар фавворасидан отилиб чикди. Бу хабар Муҳаммад Бобур подшоҳга етгач, амакиваччаси ўлимидан кўп ғам ва ғуссада қолди ва ниҳоят кўлини сабр-тоқат этагига уриб, ул мамлакат бошқарувини ўзининг тўнғич ўгли музаффар туғли шоҳзода Муҳаммад Ҳумоюн Мирзога берди ва хотиржам равишда Қандаҳор ташқарисида ўтиришни давом эттириб, бутун Гармсир вилоятларини ўз тасарруфи остига киритиб, шавкати ва улугворлиги овозаси кайвон айвонидан опди. Амирхон Ҳирот шаҳрида ўтирган кўйи бу воқеа рўй берганидан қаттиқ кўркув ва ҳадикка тушди. Чунки у Муҳаммад Бобур подшоҳ Қандаҳор фатҳидан бўшагач, албатта подшоҳлик байрогини кўтарганча Хуросон томонга отланади, дея кайғуда қолганди.

Камал пайти Шужобек бир неча бор Ҳиротга қосидлар юборди ва Амирхон ва амир Ғиёсиддиндан «бир бало қилиб Муҳаммад Бобур подшоҳни Қандаҳордан Кобулга қайтарсангизлар, мен эсам шоҳзода Таҳмосб хузурига боришлик ва бир умр





кадамимни хизматкорлик йўлидан ташқари босмаслик қасамини ичиш имконига эга бўлай» дея илтимослар қилди. Шунга кўра, Амирхон ва амир Гиёсиддин Муҳаммад кетма-кет ва узлуксиз равишда Амир Темури авлодининг қаймоғи Бобур подшоҳ хузурига элчилар юбордилар ва «Шужобек илгари пайтларда қанчалик гуноҳлар қилган ва қаҳру ғазабга сазовор бўлган эса-да, ҳозир дўстлик оёғини олға босиб, бундан сўнг шохликнинг султонлар паноҳи бўлмиш даргоҳи давлатхоҳлиги тариқати солиқлиги ва ҳар йили шохлик хазинасига боғу хироҷ тўлаш мажбуриятини қабул қилган. Ярашиқлиси шуким, онҳазрат Қандаҳор қамалини тарк этиб, қайтиш жиловини Кобул томонга бурсалар ва бундан ортиқ Қандаҳор халқи-ю ул диёр аҳолисига озор бермасалар» деган хатлар йўлладилар. Муҳаммад Бобур подшоҳ эса «Шужобекнинг ҳозирги итоат ва бўсунишлик изҳори худди кофирнинг ноиложликдан иймонга кириш масаласи мисолидир ва бунга сира ишонмаслик керак. Худои таоло хоҳласа, Қандаҳор фатҳи муяссар бўлгандан сўнг Шужобекни кишанга солиб, малойик ошиёнли даргоҳга юбора-жакмиз ва қайси кишига шохликнинг қутлуғ фармони чиқса, Гармсир ва Қандаҳор мамалакати калитини ўша кишига топширажакмиз» дея жавоб берди. Бу янглиғ жавобни эшитса-да Амирхон таскин топмади ва ишонч ҳосил қилмади. Лекин шу орада, аниқроғи 927 йил баҳори<sup>191</sup>да Убайдуллоҳхоннинг доруссалтана Хиротга юриши рўй бериб, Амирхон бир неча кун мазкур ишга оид гап-сўзларни тўхтатди [579-6.].

<sup>191</sup> 927 йил баҳори – 1521 йил март – апрель.



## ШУ КУНЛАРДА РЎЙ БЕРГАН БОШҚА ВОҚЕАЛАРНИНГ ҚИСҚАЧА ЗИКРИ

[585 б.] Амир Гиёсиддин бин амир Юсуфнинг – *Аллоҳи таоло жойини жаннатда қилсин* – шаҳидлигидан сўнг Амирхон Шохкули кўрчини олампадох шох даргоҳига жўнатди ва у оркали «амир Муҳаммад бин амир Юсуф Сидра мартаба бўсаға эгасининг ҳуқуқ дафтарини унутилиш тоқчасига қўйиб, Заҳириддин Муҳаммад Бобур Мирзони Ҳиротга чакириш қўйига тушди ва шу азим айби сабабли мусодара ва жазога дучор қилиниб, сиёсат қиличи билан умри муддати қирқилди» деган сўзларни айттирди.

Амирхон Шохкулини шох олдига жўнатгандан кейин халқни ҳазрат Заҳириддин Муҳаммад Бобур подшоҳнинг шохга қарши чиққани, амир Гиёсиддин Муҳаммаднинг эса Бобур подшоҳ билан бу борада тил бириктирганига ишонтириш мақсадида Қандаҳорга юриш овозасини таркатиб, 927 йил муборак рамазон ойининг саккизинчиси<sup>192</sup>да якшанба куниси Ҳиротдан ташқари чиққан қўйи Кахдистон сайхонлигида жойлашди. Мазкур ойнинг ўн олтинчисида душанба куни эса Шохкули аъло тахт поясидан қайтиб келиб, Амирхоннинг кулоғига «амир Гиёсиддин Муҳаммаднинг ўлими ҳақидаги хабар шохнинг ғазаб олови аланга олишига сабаб бўлди ва тез орада унинг аломати пайдо бўлиш доирасига кириши эҳтимолдан холи эмас» деди. Натижада Амирхоннинг изтироби олдингидан яна ҳам баттарок бўлди...

<sup>192</sup> 927 йил 8 рамазон – 1521 йил 13 август.

Шоҳ Исмоил ўгли шоҳзода Таҳмосбни ҳузурига чақириб, ўрнига шоҳзода Сом Мирзони Хуросондаги барча ерларга соҳиби ихтиёр қилган кўйи до-руссалтана Хиротга жўнатди. Амирхонни эса Хуросон ҳукуматидан четлаштириб, ўрнига Дурмушхонни тайинлашга буйруқ берди...Аммо Амирхон турли хил ҳийла-найранг билан шоҳзода Таҳмосбни ўзига ҳамфикр қилди ва исён йўлига кириб, 927 йил зулкаъда ойининг ўн тўққизинчиси<sup>193</sup>да душанба куни Сабзавор томонга олиб кетди. Зулҳижжа ойининг еттинчиси<sup>194</sup>да жума куни Дурмушхон Хиротдаги жаҳонни безовчи Боғи Жаҳоноро боғига келиб тушди ва Амирхон воқеасини эшитиб, зулҳижжанинг саккизинчисида шанба куни тонгида шахсан ўзи Сабзаворга илзор солиб, шоҳзодани олиб келиш учун отланди. Ҳайит куниси Сабзавор атрофига етиб келди ва Амирхон шоҳзода Таҳмосб Мирзонинг мулозиматида отга миниб, кутиб олиш расмини аъло даражада адо этди. Дурмушхон Амирхоннинг айбини кечиришни айтиб, уни Хиротга жўнатадиган бўлди. Шундан сўнг ўша манзилдан дин ва давлат амирларининг каймоғи Сайфиддин Музаффарбекни Заҳир ус-салтана ваддин Муҳаммад Бобур подшоҳ олдига юборди ва у орқали «биз аъло ашраф фармони туфайли Хуросон диёрига келган ушбу айёмда олам аҳли шоҳзодаси Таҳмосб Мирзо ёнидаги Амирхон ва чексиз сонли кўшия билан бирга Қандахорга кетаётган эканлар. Онҳазрат<sup>195</sup>нинг меҳру мухаббат султони бизнинг

<sup>193</sup> 927 йил 19 зулкаъда – 1521 йил 21 октябрь.

<sup>194</sup> 927 йил 7 зулҳижжа – 1521 йил 9 ноябрь.

<sup>195</sup> Заҳриддин Муҳаммад Бобур подшоҳ кўзда тутилмоқда.

дилимиз шахристонини эгаллагани сабабли, ўта илтимос билан шоҳзодани Ҳирот тарафига кайтариб юбордик. Умид шуқим, олий мақом эгаси ҳам бирдамлик йўлини тутиб, Қандаҳор ташқарисидан Қобул томонга кўчиб кетсалар, тоқим Шужобек шохнинг олий даргоҳига ошиқиш имқонини топса ҳамда томонлар ўртасида вафо ва дўстлик тариқаси ҳилоф ва ниқоқ шева­сига айланмагай» деган хабарни айттирди. Музаффарбек кетганидан сўнг Дурмушхон Ами­рхон билан бирга олам аҳлининг шоҳзодаси Таҳмосб Мирзо мулозиматида доруссалтана Ҳиротга юзланди ва зулҳижжа ойининг ўн тўққизинчисида чоршанба куни Ҳиротга етиб олди...

928 йил рабиулаввал ойининг йигирма тўққизинчиси<sup>196</sup>да пайшанба куни ҳазрат султоний сайф ул-аномий Хожа Музаффар битикчи Мозандарондан Ҳирот шаҳрига келди. Наврўз куни барча хуросонлик ҳоқим ва улуғ кишилар Дурмушхон ҳузурига келиб, хоннинг илтифотига етишдилар. Ўша орада Музаффарбек Қандаҳордан келиб, Заҳир ус-салтана Муҳаммад Бобур подшоҳнинг музаффар байроқли Дурмушхоннинг гапи бўйича Қандаҳор ёнидан кўчиб, Қобул тарафга кетганини маълум қилди. Шундан сўнг садоратмаоб, арабдан чиққан пайғамбар миллатига қувват берувчи, Тоғ ул-миллата вад-дин Ҳасан Чалабий жаноби олийларининг муҳаббат ва иттиҳод қоидаларини кучайтириш, дўстлик ва ишонч пойдеворини мустаҳкамлаш учун Қобулга боришига қарор қилинди. Ул жаноб 928 йил жумо­дилаввал ойининг иккинчиси<sup>197</sup>да

<sup>196</sup> 928 йил 29 рабиулаввал – 1522 йил 26 март.

<sup>197</sup> 928 йил 2 жумо­дилаввал – 1522 йил 30 март.

душанба куни Ҳиротдан юзни мақсад-манзил сари қаратди. Аммо у ердан қайтишидан олдин жумодилохир ойининг йигирма еттинчиси<sup>198</sup>да якшанба куни Заҳир ус-салтана Муҳаммад Бобур подшоҳнинг элчилари олий даргоҳга етишиб, ул ҳазратнинг Қандаҳорни истило қилгани хабарини келтирдилар ва пешкашлар ўтқариб, келишув ва Бирдамлик асосини мустаҳкам қилдилар. Қандаҳорни эгаллаш воқеаси қуйидагича бўлган экан: Бобур подшоҳ адолатпаноҳ Дурмушхон илтимосига биноан Қандаҳор атрофидан кўзғалиб, Кобулга кетди. Қамал захмати ва қаҳату очлик балосидан яхшигина танг аҳволга келган Шужобек ўз навкарларидан мавлоно Абдулбоки исмли бир кишини Қандаҳорга ҳоким қилди ва Хуросон ҳокимларига берган ваъдасига вафо қилмай, йўналиш байроғини Синд дарёси бўйига қараб хилпиратди. Мавлоно Абдулбоки Шужобекнинг яхшиликлари устига йўққа чиқариш чизигини тортиб, яшин ва шамолга жилвдош бир қосидни Заҳир ус-салтана Бобур Мирзо Олдига жўнатди. Ул ҳазрат эса Ҳасан Чалабий келгандан кейин икки кун ичида Кобулдан Қандаҳорга қайтиб келиб, ул ўлкани эгаллаш ва тасарруф доирасига киритди ва ул жанобни турли хил инъом ва иззат-икромлар билан сийлаб, ўзининг хос кишиларидан Мирзоқулини Ҳасан Чалабийга қўшиб юборди. Сўнг Қандаҳор шаҳри бошқарувини ўзининг донгдор ўғли Муҳаммад Комрон Мирзога топшириб, Кобулга қайтди. Ҳасан Чалабий ва Мирзоқули эса шабон ойининг йигирма учинчиси<sup>199</sup>да пайшанба куни доруссалтана Ҳиротга келиб, Зобулистон воқеаларини

<sup>198</sup> 928 йил 27 жумодилохир – 1522 йил 24 апрель.

<sup>199</sup> 928 йил 23 шабон – 1522 йил 19 июль.

арзга етказдилар ва пешкашлар ўтқариб, лутфу эҳсон назарига тушдилар. Мирзокули бир неча кун хонлиқнинг олий бўсағаси мулозиматида тургач, қимматбаҳо тўн инъоми-ю, кўп олтин, кумуш тангалар сийлови билан сарафроз бўлган кўйи қайтиб кетди.

Ўша аснода ҳазрат шохнинг яқин кишиси Дурмушхон олий ҳимматини вилоят ишларига тартиб-интизом бериш ва ҳукумат юмушларини саранжомлаш сари қаратиб, Зайналхонни Журжон мамлақати ҳукуматини бериш билан фахрлантирди, Зайниддин Султоннинг бошқарув туғини эса Исфароин ва Нишобур вилоятига тикди. Сабзавор фармонфармолиги мансабини яна Чагур Ака Султонда қолдирди. Тус ва муқаддас Машҳаднинг бошқариш жилловини Бурун Султоннинг кифоятли қафтига тутқазди. Амирхон замонида бу юртлар сарқорлиги Аҳмад Султон афшорга тааллуқ бўлгани сабабидан унинг кўнглига оғриниш чағи ўтириб, олампаҳо даргоҳига кетиш учун руҳсат сўради ва ижозат олиб, оти жилловини Рай шаҳригача кўйиб юбормади. Бу иш шох қулоғига етишгач, олий фармон чиқарилиб, унга кўра Райдан қайтиб бориб, Хуросон вилоятларида ватан тутган кўйи Дурмушхоннинг буйруғига бўйсуниб, вафодорлик билан иш тутиши таъкидланди. Шунга кўра орқага қайтиш ноқорасини чалди ва доруссалтана Ҳиротга келгач, яхши сифатли Дурмушхон Аҳмад Султонни лутф ва марҳамат назари билан манзур тутиб, Ҳиротруд шаҳри ва муқаддас Ғиёсия лангари, Сохир, Тулак, Фароҳ, Сабзавор, Ўк, Қалъагоҳ бошқаруви сарқорлигини унинг туғрилиқни кўрсатувчи ақли ихтиёрига топширди.

БОБУР ЖАМОАТ ФОНДИ

ГИЁСИДДИН БИН ҲУМОМИДДИН ХОНДАМИР

## БУЮКЛИК ХИСЛАТИ

*«Ҳабиб ус-сийар фи ахбори афроди башар» –  
«Башар аҳли сийратидан хабар берувчи дўст»  
китобининг Заҳириддин Муҳаммад Бобур  
ҳаёти ҳақидаги боблари*

**«Sharq» нашриёт-матбаа  
акциядорлик компанияси  
Бош таҳририяти  
Тошкент – 2011**

Муҳаррир *Аҳрор Аҳмедов*  
Бадий муҳаррир *Умид Сулаймонов*  
Техник муҳаррир *Лина Хиждова*  
Саҳифаловчи *Лидия Цой*  
Мусаҳҳилар: *Маъмура Зиямухамедова,  
Шарафат Ҳуррамова*

**Нашр лицензияси А1 № 078, 18.09.2066 йил**

Теришга берилди 17.08.2011. Босишга рухсат эгилди 25.08.2011.  
Бичими 70x100  $\frac{1}{32}$ , Times гарнитураси. Офсет босма.  
Шартли босма табоғи 12,25. Нашриёт-ҳисоб табоғи 11,97.  
Адади 1000 нусха. Буюртма № 1810.

**«Sharq» нашриёт-матбаа акциядорлик  
компанияси босмаҳонаси  
100000, Тошкент шаҳри, Буюк Турон, 41.**

**X – 75    Хондамир, Гиёсиддин Бин Ҳумомиддин.**  
Буюклик хислати: Заҳириддин Муҳаммад Бобур ҳаёти ҳақидаги боблар / Гиёсиддин Бин Ҳумомиддин Хондамир; масъул муҳаррир Д. Юсупова; форс тилидан тарж., кириш сўзи ва изоҳлар муаллифи И.Бекжонов; Бобур жамоат фонди. – Т.: «Sharq», 2011. – 304 б.

**УДК: 821.512.133(092)  
ББК 63.3(5Ў)4**

**ISBN 978-9943-00-752-9**